

沈雲龍主編

近代中國史料叢刊

第七輯

文海出版社印行

近代中國史料叢刊第七輯

沈雲龍 主編

駱文忠公奏議

駱秉章著

文海出版社印行

近代中國史料叢刊

第七輯

目錄

駱文忠公奏議

駱秉章著

合肥李氏三世遺集（李文安·鴻章·經述）

李國杰編

嘯亭續錄

汲修主人著

蒿菴隨筆

馮煦著

韜菴老人自訂年譜

勞乃宣著

驢背集

胡思敬著

使俄草

王之春著

黃克強先生傳記

劉揆一著

蔡（鏞）黃（興）追悼錄

雲南國是報輯

丁巳滇川軍閥紀錄

佚名編

國史列傳

駱秉章廣東花縣人道光十二年進士改翰林院庶吉士十三年散館授編修十八年十月

記名以御史用十一月補江南道監察御史十九年五月

稽查北新倉六月掌江南道監察御史二十年三月充會試同考官八月充順天鄉試同考官十月稽查銀庫二十一年補工科給事中二十二年二月遷鴻臚寺少卿五月擢奉天府府丞兼學政二十三年因查庫時失察庫吏虧短部議革職仍罰賠庫款旋以限內全數完繳

特旨以庶子

日講起

胥公

命偕賡福馳

母憂

命偕福濟馳

禹州

縣監

顯位

魯河

旨由河南馳赴江蘇查明知府周沐潤知縣秋家丞等七員被參各款請分別治罪

諭曰封疆大吏於屬員賢否原應隨時察着若必待欽差始劣員懲辦安用此大吏爲耶該督等均著交部議處駱秉章不將該上司隨案附參亦屬疏忽著傳旨申飭時東南洋面不靖苦累商民疏言洋面遼濶宜飭海疆督撫提鎮督飭水師嚴密偵探更添配兵船互相堵截不得稍分畛域

詔如所請十月擢翰林院侍講學士途次接奉諭旨折回山東查辦告病運司韋德成控案十二月擢湖

北按察使二十九年閏四月遷貴州布政使七月  
調雲南布政使三十年三月擢湖南巡撫十月以  
常德岳州水軍及辰州等八營協駐守地方收成  
歉薄兵丁買食維艱請借給一月餉銀

允之咸豐元年二月奏言上年武陵等處水患隄垸冲潰

該處係積欠之區業民力難以全修請於司庫項  
下借銀發交各縣按照被淹田畝覈實修辦分年  
徵還又奏湖南所運荊州五幫漕糧上年被災緩  
徵幫丁無力辦運又無他款可籌請撥案借銀三  
萬九千餘兩以紓丁力均如所請行時粵逆滋事

命湖廣總督程喬采往湖南偕秉章及提督余萬清督辦  
湖南防務尋會同奏言粵匪北竄象州若與賀縣  
賊匪糾合必由修仁荔浦等處經過凡湖南邊界  
相通之處均酌派官兵嚴密防堵如可相機進援  
即由提督余萬清馳往勦辦不分畛域疏入報

聞十一月訪獲衡陽清泉會匪左家發等六十餘犯伏法  
十二月查明沅江縣金盆洲等處官荒草地十二  
萬七千餘畝涸復難期奏請免租二年正月粵逆  
圍攻桂林湖南大小要隘五十餘處均關緊要秉  
章會商程喬采將前派赴粵之兵截留分布另調



沅洲豐洲永順營兵速赴永州聽候調遣三月粵  
匪由興安灌陽竄攻全州永州與全州毘連水路  
尤爲迅捷秉章飭總兵孫照帶兵馳赴零陵之黃  
沙河將灣泊各船撤歸楚岸一面將湖北續到官  
兵擇要分布四月全州失守粵匪由小路偷越竄  
抵零陵之水土橋燒毀柳公廟一帶民房復竄奔  
雙排地方五月竄入湖南陷道州

上以秉章未能先事預防並以余萬清係秉章請留楚之  
員萬清防守不力皆秉章保舉不實下部議處尋  
部議降三級留任時長沙城多傾塌秉章以省城

爲通省保障急宜擇要興修率屬倡捐經費請先  
借司庫銀二萬兩支墊

允之尋以賊擾楚境

命秉章勸諭紳民仿照嘉慶年間築堡事宜自相保衛秉  
章疏言築堡之法與團練相爲表裏賊匪無從搜  
括民居亦免流離洵屬法良意美惟工程旣大需  
用浩繁且興築在事前未可臨渴掘井惟有督飭  
地方官認真試辦俟有端倪即據實奏陳旋奉

旨來京另候簡用時調任巡撫張亮基尙未抵任逆匪疊  
陷嘉禾桂陽各州縣秉章以有地方之責下部議

革職

命加恩改爲革職留任八月郴州踞匪陷安仁攸縣由醴陵猝過長沙踞妙高峯上俯瞰城中秉章督兵登陴開放鎗礮相持兩時之久並於城樓上用大砲轟擊賊勢稍却復向大西門小西門鰲山廟等處潛行分駐秉章飭各鎮將分帶兵勇縋城協勦殲斃無數賊仍相持不退九月

諭曰自廣西軍興以來將及兩載朕念民生塗炭宵旰焦勞無時或釋程喬采總制兩湖特命前往湖南督辦防堵如果布置得宜何至任賊竄越竟由道州郴州

一帶直撲省城程喬采著即革職仍留辦糧臺事務  
駱秉章有文武地方之責不能豫爲防範咎亦難辭  
惟念長沙城內守禦正當喫緊之時著俟勦辦賊匪  
完竣後再降諭旨

命暫留湖南辦理長沙防勦事宜事竣再行奏明請

旨時逆眾麇聚西門外之金鷄橋瀏陽門外之教場晝  
夜環攻廣西提督向榮綏靖鎮總兵和春雲南楚  
雄協副將張國樑先後赴援秉章以賊匪負固居  
高勦旣難以成圍焚又不能徧及我出則伏匿我  
歸則又攻城必須步步爲營先規地勢商令和春

紫營於白沙井作以防爲勦之計三旬之中叠次  
獲勝向榮張國樑由排頭口分兩路進攻礮船繼  
進逆賊紛紛敗竄遂將妙高峯西湖橋賊壘及望  
樓哨棚一律平毀十月長沙圍解

上以粵匪竄入楚境叠陷城池秉章本有應得處分此次  
防守功過尙足相抵加恩免議仍

命遵

旨來京十一月賊竄甯鄉由歸義驛攻陷岳州以秉章未  
能豫防降三級十二月賊擾及湖北適秉章卸湖  
南巡撫任北上

上命留於湖北幫同辦理防守事宜未至而武昌失守  
命暫署湖北巡撫即於荊州襄陽二府中酌量何處暫行  
駐紮辦理地方事宜三年正月官軍收復武昌

上命秉章兼程馳赴湖北省城辦理善後各事尋奏言武  
昌自康熙年間裁兵之變迄今百數十年休養生  
息民物滋豐粵逆擾及楚疆所有省垣一切撫恤  
事宜有如修城製礮募兵招商戢匪協撥驛站掩  
埋被害官民收養流亡子女事事均關緊要應次  
第舉辦務期措置悉協輿情而於國計仍無窒礙  
疏入

馬三  
諭曰所籌各事宜均屬周妥著照所擬辦理所需經費當  
覈實動用俾窮黎得均沾實惠地方日就乂安復以  
前任湖北藩司唐樹義熟悉湖北情形請調赴湖  
北以備咨詢

允之三月

命赴江南徐州總辦糧臺事務未行旋奉

旨署湖南巡撫時粵匪陷武昌後湖北雲南江西廣東廣  
西等省土匪蠭起均與湖南接壤在籍侍郎曾國  
藩奉

命籌辦團練號曰湘軍秉章贊成其事又延湘陰舉人左

宗棠襄理戎幕廣羅英俊之士練勇助勦軍威漸振五月江西上猶鷲形山土匪滋擾桂東秉章檄縣丞王鑫等帶兵馳往攻勦平之六月逆船竄至江西南昌城外遵

旨派鎮筓等營兵八百名馳往援勦七月奏請飭廣東督僱拖罟快蟹紅單等船即派南澳鎮遊擊黃開廣等駛赴金陵勦賊可期得力

詔如所請八月實授湖南巡撫時廣西興安恭城土匪擾及衡州飭道員徐嘉瑞督兵會同各處民團並力勦除廣東樂昌土匪同時擾興甯縣飭縣丞王鑫



擊退之十一月常寧土匪吳玉等聚眾滋事派知府張榮組文生曾國葆帶勇圍剿拏獲首犯燬其老巢永興亦有土匪復委直隸州羅澤南分起剿捕首要各犯多被擒斬時粵匪久踞湖北黃州攻破田鎮直逼武昌秉章以北南兩省唇齒相依檄江忠濬援鄂旋因逆船上駛竄陷岳州擾及湘陰並至靖港檄知州王鑫由陸路曾國葆由水路截擊兇燄頓挫賊由洞庭下竄遂復岳州旋派費東道胡林翼統帶黔勇分路追剿直過界口殲悍匪二百餘名四年正月賊匪再陷湖北省城旋以大

股陷華容及岳州水陸并進圍犯長沙官軍前營  
失利王鑫督中營繼進鏖戰數時勢亦不支水師  
礮船亦折回長沙共圖守禦賊遂攻長沙之靖港  
湘陰之樟樹港等處並分股竄及甯鄉湘潭道州  
各州縣秉章奏言賊勢全注湖南知衡永郴桂一  
帶民氣尙強其地毗連兩粵向爲會匪卵育之區  
希圖略取州縣剪枝葉以困腹心一如困鄂之策  
查南省與北省交界之處旣已千里蕭條若省南  
不及早肅清奸民從而響應勢成孤注難以久存  
即界連湖南之江西貴縣各省亦必浸受其禍且

賊據上游與江南三城之賊聲息相通皖鄂之淪胥可慮三城之克復難期所憂不僅東南數省已也湖南西接巫黔東連豫章南跨嶺嶠北控江湖其形勢原有可爲自古東南有事必資上游嘗與曾國藩籌商各省分防糜餉多而兵力薄不如數省合防糜餉小而兵力厚廣東貴州現尙安謐應飭兩省督撫迅派兵勇二三千名貴州由鎮遠而至廣東由郴州而至救援鄰省亦即自固藩籬然統馭非人精卒亦歸無用查廣東知府吳均恩威素著貴州同知韓超善戰知兵均堪膺帶勇之選

從之四日

應

賦

李

師

四

攻

統

路

飾

馬文忠公及傳  
會國藩請將胡林翼帶赴湖北秉章奏言岳州新  
復必有重兵防守方爲計出萬全湖南官兵之曾  
經戰陣者均已調赴湖北若胡林翼復行隨征岳  
郡實無可依恃

諭曰岳州一郡爲湖南門戶川黔藩籬逆匪屢次窺伺防  
範宜嚴且該處駐有重兵則會國藩統師東下可無  
後顧之虞著駱秉章卽飭胡林翼仍駐岳州毋庸隨  
往湖北先是衡陽清泉兩縣會匪甚多保甲催科  
弱者賠累甚苦强者勾結爲奸會國藩奏請更正  
仍責成差役

上命秉章查明具奏尋以保甲催科年清年歛之已有成效責成差役人地生疎查催不易差少則地廣難圖差多則衆益滋擾是杜弊適以滋弊便民反以擾民請仍循其舊

上躋之八月廣東廣西各匪徒同時由灌陽犯道州派王鑫馳援擊退之五年二月廣東連州賊匪復分擾臨武藍山等處派知府江忠濬李輔朝等分路擊敗之克復桂陽州城時粵逆踞湖北通城分踞崇通復陷黃梅分擾武漢總督楊需勦賊失利退守漢口復遁德安三月秉章疏叅之四月武昌再陷

巡撫陶恩培死之秉章以李孟統帶水師不能得力奏請以副將楊載福代之與知府彭玉麟各督水師援鄂時胡林翼署湖北巡撫督陸師在金口堵勦楊需慮難固守奏請令胡林翼設法渡江上扼漢川以固荆襄

上命秉章悉心籌畫因奏言總督楊需始終堅執者防賊北竄四字以北竄之患更重於南可藉以爲詞耳防賊北竄自不能不歸重荆襄者南方可由之以進窺陝豫北方可由之以俯瞰江楚自漢魏六朝以迄宋元皆以荆襄爲重鎮若以現在之形勢言

之江西湖南雖被賊擾形勢猶完湖北安徽皆有重兵勝負尙未可知設使湖北水陸兩軍移駐漢川長江千里盡委之賊其將置東南於不問乎此未解者一也移駐漢川祇能禦賊上竄襄陽其於荊州并無輕重逆賊水陸並進荊州門戶何存此未解者二也胡林翼陸軍即駐漢川水軍無所依附勢非退守監利即移泊岳州爲湖南門戶計尙未爲失然武漢各府豈能度外置之水軍旣去武漢武漢之克復難期此未解者三也若謂賊衆兵單不思廣濟失利之初賊之前隊千餘總督麾下



兵勇萬餘乃退守黃州未一日即退漢川由此而德安而隨州今退至棗陽矣是北竄者賊也引賊北竄者誰乎此未解者四也夫以形勢言之荊州據江水上游襄陽據漢水上游而武漢爲之鎖鑰是襄陽者中原之門戶而武漢又荆襄之門戶也扼賊北竄必固荆襄欲保荆襄必守武漢此一定之局也儻徒知北竄爲重何以合武漢而先顧荆襄胡林翼若不能克復漢陽又焉能繞道進扼漢川况武漢黃梅均未收復胡林翼縱能繞至漢川亦以孤軍而駐於四面皆賊之地又何能爲襄陽

門戶計乎此未解者五也臣因胡林翼一軍甚單現飭守備譚瓊林候補臬司魁聯抽撥兵勇赴鄂助勦楊需所奏各條應毋庸議疏入奉

硃諭所籌尙妥惟議楊需失機各條實屬妄談居多該督固爲虛縮有負朕恩尙不至如汝所言七月派遣員江忠濟督兵擊退巴陵縣方山洞賊匪八月廣西股匪竄踞東安派知府王鑫會同江西知府劉長佑攻克之十月奏請通飭湖南有漕州縣裁汰漕規以紓民困得

旨覽奏均悉汝久任封疆所陳皆歷練有據之談非直以

耳爲目者比六年正月貴州銅仁苗匪由鎮筸竄入  
麻陽派道員翟誥統兵擊退之並收復晃州松桃  
兩廳二月江西逆匪陷萍鄉檄劉長佑及知州蕭  
啓江等擊退之復萍鄉城四月劉長佑等攻克瀘  
溪又敗於鳳凰山旋克復袁州府分宜縣捷

聞論曰賂秉章自前籌辦擡礮接濟曾國藩等大軍復派

兵援勦貴州江西省克復銅仁松桃萍鄉萬載并勦  
辦廣東連州廣西灌陽湖北通城等處賊匪均能不  
分畛域極力圖維又派兵越境克復江西袁州分宜  
兩城攻奪貴州銅仁要隘二處實屬盡心調度蓋績

堪嘉著加恩賞戴花翎十一月派翟誥進勦銅仁賊匪  
破其堡城生擒偽將軍董浩然等銅仁府境肅清  
上嘉其辦理妥速十二月以任滿奏請

陞見

命俟湖南防堵事竣再行請旨七年五月道員王鑫等馳  
援江西吉安陣斬賊首胡壽階臨江之賊潛約新  
淦之賊分路來援道員劉長佑督兵擊敗之知府  
張運蘭又追敗之十二月攻克臨江府城又派道  
員蔣益澧江忠濬等援廣西克復興安直抵平樂  
八年正月

京察屆期

諭曰湖南巡撫賂秉章籌畫軍務能任賢才悉臻安謐著賞加頭品頂戴九月奏保在籍兵部郎中左宗棠連年籌辦礮船選將練勇均能悉心謀畫得

旨左宗棠著賞加四品卿銜十一月貴州鎮遠廣西思恩苗教各匪四出滋擾派按察使翟誥道員韓超等出奇兵破之毀其晃州壘塏山老巢九年七月粵逆石達開攻撲寶慶府城檄湖北荆宜施道李續宜花翎知府劉嶽昭等分路截擊斬馘甚衆賊遂大潰十二月秉章以湖南自江忠源羅澤南塔齊

布等先後募勇訓練百戰粵黔江鄂之間其部曲之效命疆場者請於長沙建祠致祀瞿騰龍丁紹良等或在鄰疆擊賊捐軀或在本省力戰殞命請別建表忠祠并立求忠書院令陣亡各員子弟入院讀書

允之十年六月

命馳赴四川督辦軍務十一年七月授四川總督奏調廣西候補道朱孫詒候補道孫坦知府馮卓懷隨營差委並請留廣東鹽運使裕麟於湖南辦理籌餉事宜均得

旨允行時滇匪藍朝鼎攻綿州衆十餘萬秉章督師由順慶取道潼川派總兵胡中和擊賊於楊老店知州曾傳理攻十賢關連破逆營十餘座解綿州圍復跟蹤追擊連燬賊營七十餘座殲賊四萬餘人九月奏參四川布政使祥奎性情貪鄙副將張定川狡獪刁詐

詔褫其職十月分遣官軍追勦藍逆於羅江之略坪場等處敗之餘匪竄陷丹稜會合眉州李永和一股連營百餘里復派胡中和等分攻之同治元年正月克丹稜城藍逆殲焉捷

聞

諭曰四川總督駱秉章前在湖南巡撫任內勦辦賊匪不分畛域其所薦舉人才尤爲有裨實用自升任川督辦丹稜股匪及整頓地方均能妥速著賞加太子少保銜時遵首周躡躡由滇境竄入岳池合州分陷新甯派道員張由夷曾傳理等擊敗之收復各城李永和猶盤踞青神檄總兵蔣玉龍周達武等追擊之擒斬逆匪周紹湧及僞統領吳禮等一百六十一名解散四千餘名川南北一律肅清捷

聞



諭曰滇匪竄擾川省已經四載駱秉章督辦甫及一年即次第勦除洵屬調度有方著交部從優議叙先是粵逆石達開由貴州廣西竄入川境直撲涪川至是圍攻綦江竄長甯分擾洪高慶縣閏八月復由永甯竄合州疊經官軍擊敗二年正月石逆被勦窮蹙率衆紆道黔滇渡金沙江冀由甯遠突犯川西秉章派兵嚴扼大渡河四月復派副將唐友耕叅將楊應剛等圍之於天全生擒石逆餘黨圍殺淨盡秉章奏入

諭曰偽翼王石達開由廣西倡亂竄擾湖南湖北江西

占踞金陵復犯浙江廣東福建等省紛擾滇黔注意  
川疆志在必逞其破城戕官荼毒生靈久爲覆載所  
不容此次川省將士人人用命將積年巨憝一鼓成  
檢全股殄滅實足伸天討而快人心賂秉章運籌決  
策調度有方深堪嘉尚著賞加太子太保銜五月滇  
匪官兵擊敗後由陝西甯羌回竄川東秉章飭總  
兵周達武追勦平之逆首郭幅潰等伏誅六月以  
川省需才孔亟請調湖南候補道馮崑前廣東按  
察使趙長齡赴川差委

從之時捐納指省之員多指其流寓之省有礙官常秉

馬文忠公奏  
三  
章奏請禁止略言流寓是邦雖爲客民已在部民之列一旦混入寮案與地方官相抗或所捐職分較大動以勢分相凌使之臨民平時同居里巷之人易生藐玩而其親戚故舊夤緣請託情面尤難破除且寓居旣久鎖細皆知藉故搜求挾嫌羅織在所不免請令指捐之員呈明所<sub>屬</sub>省分向未流寓方准分發又奏各省獲盜人員應照向例送部引

見不得由督撫指定官階保奏均下部議行三年正月

京察屆期

諭曰四川總督駱秉章連年督辦軍務叠平巨股全蜀漸次肅清於鄰省軍務及地方整頓各事宜均能實力妥籌精勤罔懈著交部從優議叙六月金陵克復粵逆蕩平

諭曰四川總督駱秉章前在湖南巡撫任內薦賢使能創辦團練克復城池其楚師餉項悉心籌畫不遺餘力及擢任四川總督後督飭官軍殄滅石逆洵屬老成持重懋著公忠加恩賞一等輕車都尉世職并賞戴雙眼花翎

九月檄官軍援甘肅漢南圍攻階州之賊拔其城

馬三  
斬擒首逆餘賊悉平十一月檄官軍助勦貴州號  
匪越境克復仁懷縣城四年三月奏患目疾假期  
已滿因邊境喫緊仍力疾視事奉

諭覽奏具見矢志公忠以國事爲己任仍趕緊調治就  
痊以慰厯系十一月奏川軍赴援漢南死事弁兵請  
於於階州建立專祠以慰忠魂

允之五年以目疾增劇疊請開缺回籍調理

諭曰駱秉章自簡任川督以來於吏治軍務辦理甚爲  
妥協現在鄰境賊氛未靖籌餉籌兵均關緊要未便  
據如所請著毋庸開缺賞假四個月安心調理六年

正月復屆

京察

上以秉章老成碩望宣力彌勤交部優叙三月奏請銷假接篆任事得

旨覽奏欣慰川省鄰氛未靖該督當妥爲籌畫力顧邊防以副委任五月

命以四川總督協辦大學士十二月卒遺疏入

諭曰協辦大學士四川總督賂秉章忠誠亮直清正勤明由翰林薦擢卿階以廉介持躬仰蒙

宣宗成皇帝特達之知先後

命赴山東河南等省查辦事件旋簡授臬司擢任封疆在  
湖南十年練兵訓士甄拔人才東南巨寇賴以殄滅  
復荷

文宗顯皇帝知遇

持加頭品頂戴以示寵眷嗣

命督辦四川軍務朕御極以後即擢授四川總督統軍入  
蜀賞罰嚴明所向克捷滇粵各匪悉數殄除并越境  
攻克甘肅貴州各州縣因石逆就擒川省肅清論功  
行賞晉加太子太保銜旋以江南克復東南掃蕩念  
其昔年在湖南任內識拔將帥克振軍威忠盡咸孚

勛勞夙著復賞戴雙眼花翎賞加一等輕車都尉世職本年夏間簡任綸扉老成碩望方冀克享遐齡長茲倚畀昨因舊恙復發賞假調理遽聞溘逝披覽遺章良深震悼駱秉章著追贈太子太傅卽照大學士例賜卹任內一切處分悉予開復應得卹典該衙門察例具奏并加恩予諡入祀京師賢良祠并於四以湖南兩省建立專祠其生平政蹟事實著卽宣付史館伊子駱天保著賞給郎中服闋後分部行走駱天詒著賞給舉人服闋後准其一體會試伊孫駱楸湘駱楸勤駱楸仁駱楸勳均著交部帶領引見伊姪孫



候選縣丞駱肇銓著以知縣分發省分即補其靈柩  
回籍并著沿途地方官妥爲照料用副篤念盡臣至  
意尋

賜祭一壇

予諡文忠



駱文忠公遺像

皤皤國老秩々大猷忠誠內矢神識  
外周薇垣日直柏府風道封圻建節  
幃幄運籌轂推群彘旗埽蚩尤功高  
玉壘名覆金甌湘江澤被劍閣勛留  
允文允武不競不綈其緩帶輕裘羊  
赫子實綸巾羽扇武鄉侯

受業劉長佑恭題

駱文忠公奏議總目

湘中稿

卷一 甲寅上

賊勢全注湖南請調粵黔兵勇協勦摺

會侍郎  
會雙銜

靖港擊賊互有勝負湘潭大捷克復縣城摺

會侍郎

郎會雙銜

靖港敗賊下竄崇通賊匪南犯官軍三捷摺

南北兩省道路梗塞片

陳鎮由粵領解洋礮到省片

華容龍陽失守常澧喫緊派兵援剿摺

常德府城失守現籌進剿情形摺

中東兩路官軍勦賊獲勝片

鄂城失守撫臣帶兵勇難民來南資送赴荆摺

籌議進剿岳州情形請

旨勅催江西餉銀片

核保湘潭出力員弁兵勇摺

特參文武員弁堵勦不力摺

特參江華文武稟報勦賊不實摺

請留廢員差委摺

通籌防勦大局謹擬製辦船礮摺

請留胡臬司駐守岳州片

參劾文武各員摺

卷二 甲寅下

兩廣匪徒滋擾南界籌防情形摺

東路官軍進克湖北通城片

湖口賊退無庸派兵赴江協勦片

調兵防剿粵匪情形摺

覆陳遵

旨調兵援粵片

籌辦戰船情形摺

覆陳逆首楊秀清實非楊大鵬之子片

平江紳民辦團出力請加學額摺

兩廣賊匪同時犯界各路均獲勝仗摺

詳陳兩粵賊情片

飭委紳士監造礮位片

卷三 乙卯上

永順奸匪撲城擒斬要犯首逆畏罪自盡摺

粵賊竄陷江藍廳城旋即收復片

覆陳兵丁疲乏難以赴黔片

鄂省兵潰賊竄漢口大局頓壞現籌防剿摺

請留發遣革員帶勇効力片

覆陳鄂督敗退武昌失守情形摺

請飭楊副將統領水師片

覆陳水師哨官乘亂搬搶餉銀片

廣東賊陷郴宜廣西賊陷東安衡陽武岡土匪

響應剿辦情形摺

請調羅道一軍回湘防剿摺

援粵辰沅兵丁回郴餉缺遇賊退走片

卷四 乙卯中

南北兩路剿賊獲勝情形摺

覆陳永州防堵情形並查拏安福縣門丁片



魁臬司屢次告病據實直陳摺

委員接帶魁臬司楚寶各勇並留遊擊差委片

北路賊已敗退南路收復東安籌辦情形摺

李副將擅離防所請革職留營効力片

東安竄賊分撲祁新官軍大捷生擒首逆摺

東安賴令深得民心請免查辦片

張守擅離防所請革職示儆片

永興茶陵失守分路剿辦情形摺

卷五 乙卯下

北路官軍大捷克復湖北通城摺

江西劉守留楚剿賊片

追剿粵賊朱逆出境片

採買淮鹽濟食分岸納課濟餉摺

北路官軍先勝後挫籌辦情形摺

南路諸軍迭勝同日克復茶陵桂陽兩州摺

廣西賊匪竄陷永明郴桂逸匪竄擾甯遠摺

黔匪攻撲鎮筸官軍大捷立解城圍摺

卷六 丙辰上

郴州克復陣斬逆首摺

黔匪攻撲鎮筸綏靖沅州官軍擊退克復麻陽

晃州摺

覆陳派員帶兵會剿黔匪片

援軍克復貴州松桃廳銅仁府兩城摺

陣斬偽軍師楊逆片

永明江華克復南路肅清摺

援江官軍兩路獲勝克復萍鄉縣城摺

彙保寶衡永三府肅清出力文武官紳摺

卷七 丙辰中

援江官軍進逼袁州克復萬載縣城現籌進剿

情形摺

王道越境追剿粵匪迭勝因病請假未能速援

江西摺

覆陳夏藩司朱牧能否帶勇片

江西賊匪竄犯瀏攸鄱茶桂各屬邊界官軍團

勇擊退獲勝摺

賊犯湖北通城江道血戰捐軀摺

江巡撫之母捐助軍餉請封片

已革晃州廳楊通判請留任戴罪圖功片

保舉省城團防出力官紳摺

援江各軍會攻袁州鄂省援軍收復新昌上高

進攻瑞州摺

湖北崇通股匪狂竄入境截擊獲勝摺

澧州石門奸民滋事剿捕完竣摺

剿辦潭源洞粵匪片

酌議抽收鹽稅章程摺

卷八

丙辰下

勸捐牙帖酌議變通辦理摺

遵保堪勝道府各員摺

覆陳周委員被參勸捐激變各情摺

出師他省傷亡卹賞請歸用兵各省支領摺

貴州東界民苗俱變添派兵勇越境征剿摺

瀝陳軍務繁難請

旨勅撥協餉摺

援江官軍克復袁州分宜郡縣兩城摺

籌撥兵餉援剿江西吉安片

北路官軍越境剿賊獲勝現辦情形摺

援黔官軍攻克三元屯三角莊逆巢摺

銅仁漸次肅清請

勅黔撫遴員履任治理片

賞戴花翎謝

恩摺

北路官軍肅清湖北通崇蒲通回駐岳州摺  
貴州銅仁府境肅清首逆擒斬楚軍  
覆陳籌畫援剿貴州黎平摺

卷九 丁巳上

王道帶勇剿賊請暫緩

簡放實缺摺

覆陳皖省需米實難籌辦摺

楚邊防軍迭捷收復江西旁縣摺

附陳廣西賊勢披猖片

桂東苗令請郵片

援江官軍克復新喻進逼臨江挫後復勝摺

酌保堵剿湖北江西各股匪出力文武官紳摺

覆陳查辦捐輸廣額並裕道被參各欸摺

援黔官軍攻克金山錦屏馳抵黎平府城摺

彙保剿辦黔匪三次出力員弁摺

接濟各省急需摺

匪徒謀逆先期撲滅在事官紳量請鼓勵摺

卷十 丁巳中

援江官軍馳剿援賊大捷擒斬逆目摺



援粵官軍克復興安縣城摺

援江王道迭獲大捷摺

王道續獲大捷片

援軍克復江西龍泉周副將虛報要功請

勅江撫查明更正參辦摺

遵保北路官軍越境肅清鄂邊出力員弁摺

王道剿賊迭捷疾歿軍中摺

張丞王令戰功最著請先行獎勵片

援江官軍迭獲全勝摺

援江官軍進剿阜田回竄逆匪兩獲大勝片

請催黔省古州鎮道並各縣文武迅赴新任片

卷十一 丁巳下

請撥七年漕折濟餉摺

援粵官軍大捷進圍平樂府城摺

保舉援軍克復廣西興安出力員弁摺

援粵官軍克復平樂府城首逆就擒摺

援軍將領濫收游勇債事請

旨革訊摺

會鄂撫胡雙銜

援江官軍大捷擊退石逆大股摺

援江官軍克復臨江府城摺

馬之良公言錄  
支放楚勇口糧章程片

保舉防軍越境克復江西龍泉崇義上猶各縣  
城出力員弁摺

卷十二 戊午上

賞加頭品頂戴謝

恩摺

查明已革都司實無潛逃懇請開復摺

劉道假歸所部委員接帶片

協濟廣西軍餉軍火摺

朱道遵調前赴廣西起程日期片

舉鹽茶釐金兩局出力官紳摺

瀝陳湖南籌餉情形摺

援江官軍克復崇樂宜南及撫建兩府城摺

彙保援軍克復江西臨江出力員弁摺

劉道長子請獎主簿藍翎片

籌議分軍援浙摺

覆陳曾侍郎起程赴浙日期摺

蕭道假歸所部聽曾侍郎汰選片

覆陳胡藩司未曾經歷戰陣片

保舉援軍克復廣西平樂出力員弁摺

卷十三 戊午下

安鄉縣抽釐助餉請復學額摺

外委卹典重給請

旨勅部註銷片

援江官軍會克吉安府城摺

生擒吉安首逆李雅鳳片

接濟援江軍餉數目大端片

保舉剿捕澧州石門土匪出力員紳摺

遵

旨調兵援皖摺

暫留丁憂知府帶勇剿賊片

安徽李藩司所部濫招游勇據實陳明片

皖軍失利閩賊遠竄敬陳管見摺

加增曾侍郎援閩軍餉片

借動八年漕折濟餉摺

調兵援剿黔匪獲勝進攻鎮遠摺

援黔官軍加增長夫片

接濟貴州韓道軍餉緣由片

保舉援軍克復江西撫建各城出力員弁摺

參劾永州樊鎮違例乘輿私役弁兵摺

參劾栗署鎮規避取巧片

卷十四 已未上

江西大股賊匪竄擾南路籌辦情形摺

查明已革總兵劣蹟有據請提省究辦摺

賊撲永州祁陽官軍大捷籌辦情形摺

辰州木關移設常德裕課籌餉摺

請撥川陝江西三省協餉摺

賊勢趨重寶慶官軍剿辦情形摺

逆賊盡竄湖南無庸撥兵援粵片

請調李道總統寶慶諸軍片

卷十五 己未中

代奏李職員謝

恩摺

保舉援軍克復江西吉安出力員弁摺

凌都司請卹片

寶慶援軍大捷府城解圍摺

逆賊窮蹙南竄官軍追剿楚境漸次肅清摺

另股賊匪竄擾南路各屬防剿情形摺

代奏永州周鎮謝

恩摺



會保援江官軍新城八捷出力員弁摺

剿辦兩粵股匪連獲大捷現籌情形摺

援粵官軍獲勝桂林重圍漸解摺

逆目周學韓等投誠片

卷十六 已未下

覆陳粵西重圍及蔣藩司用兵情形摺

剿辦粵西回竄股匪擒斬逆渠摺

解還湖北借撥火藥片

楚軍越境剿辦粵匪獲勝摺

查參桂陽等縣失守文武摺

彙保援黔官軍出力員弁及邊防文武摺

援黔官軍克復鎮遠府衛兩城摺

楚軍越境剿辦廣東禾洞賊匪擒斬首逆摺

請建表忠祠求忠書院摺

湖南軍餉缺乏黔餉請

勅部議摺

蕭道一軍改道馳赴黔蜀之交摺

楚軍剿辦黔匪獲勝並飭田鎮由黎平進剿片

請留處州劉鎮差委片

庚申

皖賊上犯請調蕭道全軍改道援皖固鄂摺

駱文忠公奏議卷之一目錄 湘中稿

甲寅上

賊勢全注湖南請調粵黔兵勇協剿摺

會侍郎  
會雙銜

靖港擊賊互有勝負湘潭大捷克復縣城摺

會侍郎

郎曾雙銜

靖港敗賊下竄崇通賊匪南犯官軍三捷摺

南北兩省道路梗塞片

陳鎮由粵領解洋礮到省片

華容龍陽失守常澧喫緊派兵援剿摺

常德府城失守現籌進剿情形摺

中東兩路官軍勦賊獲勝片

鄂城失守撫臣帶兵勇難民來南資送赴荆摺

籌議進剿岳州情形請

旨勅催江西餉銀片

核保湘潭出力員弁兵勇摺

特參文武員弁堵勦不力摺

特參江華文武稟報勦賊不實摺

請留廢員差委摺

通籌防勦大局謹擬製辦船礮摺

請留胡臬司駐守岳州片

參劾文武各員摺



賊勢全注湖南請調粵黔兵勇協剿摺

奏爲賊勢全注湖南大局堪虞請

旨速敕廣東貴州邊調兵勇來楚協剿仰祈

聖鑒事竊賊自二月由水路上竄湖南被兵勇擊退

茲復糾聚醜類水陸並進大舉南犯賊船數千

號分泊長沙之靖港銅官渚湘陰之漳樹港青

泥港等處距省城僅數十里陸路之賊由靖港

登陸取道甯鄉直趨湘潭臣等現選派陸路兵

勇三千餘名及水師六營星夜馳赴湘潭相機

攻剿仍留水師四營扼要駐紮下游且堵且剿



力遏其上竄之路此次南犯匪黨探聞兩廣湖南老賊居多水陸兩路約有數萬餘眾臣曾國藩上年所遣偵探新自賊中脫歸略悉賊黨情形據云賊自黃州漢陽溯江而上湖北潁江各州縣皆已殘破到處裹脅丁壯擄掠船隻沿江築堡蜂屯蟻聚勒令被陷各府縣民人開送戶口名冊禁止薙髮奸民乘機倡亂所在蠶起環鄂地方皆被賊踞賊黨奸謀欲舍鄂省不攻待其自困知湖南衡永郴桂寶慶一帶民風尚強其地界連兩粵向爲會匪盜賊卵育之所易於

煽聚希圖略取各郡縣剪其枝葉以潰腹心一  
如困鄂之策屢獲賊中奸細所供大略相同現  
在賊由甯鄉陸路直指湘潭其奸謀益可想見  
臣等雖經選派兵勇相機痛剿不敢爲株守省  
城之計但恐省城北路與北省交界之處旣已  
道途梗塞千里蕭條若南省不及早肅清各郡  
縣奸民從而響應不獨省城勢成孤注難以久  
存卽界連湖南之兩粵江西貴州各省亦必以  
次浸受其害且賊踞江湖上游與江南三城之  
賊聲息相通皖鄂之淪胥可慮三城之克復難

期兇燄益熾蔓延益廣所憂不僅東南數省已也湖南西接巫黔東連豫章南跨嶺嶠北控江湖其形勢原有可爲自古東南有事必資上游兵力圖史所載可考而知當茲兵燹之餘兵餉兩空蠶賊四起茲復值巨匪大舉南犯臣等受恩深重忝膺重寄敢不竭力支持但調兵則無兵可調募勇則無資可募軍威屢挫逆燄愈張若不及早綢繆悔將無及竊惟鄰省如江西廣西警報時聞自顧不暇勢難紛紛征調惟廣東貴州兩省現均安謐如常應請

敕下兩廣督臣廣東撫臣貴州撫臣迅速派撥兵勇

各二三千名馳赴湖南以資援剿之用救援鄰  
省亦卽自固藩籬廣東兵勇由郴州而至衡州  
貴州兵勇由鎮遠而至常德相機協剿湖南之  
賊平而三省邊圉亦固其於大計不無小補但  
千軍易得一將難求統馭苟非其人精卒亦歸  
無用廣東將弁臣等不能週知請

敕廣東督撫臣遴選屢經戰陣膽識最優之員飭其  
自選營兵管帶現任廣東潮州府知府吳均恩  
威素著士民愛戴以之帶勇可期得力並請

敕廣東督

臣

撫

臣

委其迅速帶勇來楚貴州遊擊圖

塔納參將閃雲遊擊馬清傑古州營千總黃掄  
充膽技素優亦應飭其自選營兵管帶貴州現  
署清江廳同知韓超知兵善戰署襄安縣知縣  
徐河清膽略過人堪膺帶勇之選所屬部民又  
皆樸勇可靠並請

敕貴州撫

臣

迅卽札委該文武等迅速挑兵募勇配

齊軍械鍋帳馳赴湖南預備沿途征剿如仰仗  
天威湖南之賊得及早殲除此項兵勇卽可長驅東  
下併力攻剿蓋以逆賊旣瀕江築壘聯艦結寨

水師雖制之水中夾攻仍須陸路不可不厚集  
兵力以收肅清江面之實效也臣等因時局關  
係甚大彼此悉心商議意見相同除一面飛咨  
廣東貴州督撫臣外謹會同提臣鮑起豹合詞  
由驛具

奏伏乞

皇上聖鑒訓示謹

奏

咸豐四年四月初一日拜發奉

硃批另有旨欽此



靖港擊賊互有勝負湘潭大捷克復縣城摺  
奏爲官軍擊賊靖港互有勝負賊由陸路攻陷湘  
潭官軍水陸夾擊大獲勝仗巨股剿滅克復縣  
城恭摺由驛馳

奏仰祈

聖鑒事竊逆賊大股水陸並進逼近省垣陸路之賊  
先散踞岳州湘陰各境賊船分布臨資口樟樹  
港喬口靖港等處連日北風甚勁大雨經旬水  
軍不能進剿北路水陸各賊併聚泊靖港港外  
環泊戰船堅築礮臺爲負嵎觀釁之計三月二



十四五等日狂飈稍息臣曾國藩飭水師各營

駛赴靖港更番迭擊上下往復周而復始其斃

船中岸上之賊約二百餘名擊沉賊船三隻燒

賊火藥船一隻賊訪知省城水陸防剿綦嚴不

敢闖入思由陸路繞越甯鄉徑撲湘潭臣曾國

藩先遣湘勇營官伍宏鑑魏崇德郭鴻壽率湘

勇千八百人扼要立營防賊侵軼並飭該營官

以賊勢方盛宜謹守營壘固無與戰俟副將塔

齊布兵到再籌進剿二十五日賊分三股齊撲

魏崇德等營盤湘勇在營內施放鎗礮斃賊數

十既而大股賊匪驟分十餘路四面圍逼該勇等奮力衝突殺賊百餘賊來益眾勢不可支湘勇陣亡數百遂紛紛潰散二十六日塔齊布帶兵勇一千三百餘名馳往援剿賊已於是日卯刻掩甲疾趨由閒道直赴湘潭塔齊布周鳳山等探知亦卽繞道前進二十八日馳抵湘潭縣城外四五里高嶺地方賊前隊於二十七日已到署湘潭縣知縣劉建德督帶團勇於城外響水瀾沙市嶺一帶地方堵禦賊已由西路暗襲縣城分遣死黨四出擄掠民船一面在城北陞

立木城意圖阻遏援師爲久踞計塔齊布以該  
逆頻年猖獗每用以守爲戰反客爲主之法若  
不及時速剿俟賊營壘既定攻克爲難卽於二  
十八日未刻同周鳳山督帶弁兵壯勇分路進  
攻賊營鎗礮如雨塔齊布令兵勇聞礮卽伏礮  
止卽進數伏數起直逼賊營各兵勇奮不顧身  
闖入賊營施放火箭火彈殺賊五百餘名燒斃  
無算生擒三十餘名奪獲賊馬六匹抬鎗鳥鎗  
二十餘桿火藥五桶鉛彈三百觔旂幟刀矛無  
數木城全燬臣等卽飭國子監學正銜候選訓

導江忠淑帶楚勇一千三百名都司李輔朝帶  
楚勇八百名守備張正揚帶鎮筸綏靖兵丁五  
百名先後繼進復挑選得力水師五營交委員  
候選知府褚汝航等管帶駛往湘潭乘逆賊甫  
擄民船尚未成列迅速追剿二十八夜賊匪仍  
於原處豎立木城二十九日卯刻塔齊布周鳳  
山李輔朝等督飭兵勇分兩路進剿賊分五路  
蜂擁而來塔齊布等亦分五路迎敵賊匪亡命  
猛撲塔齊布手執大旂麾各路兵勇奮勇向前  
周鳳山嚴督後隊繼進手刃臨陣退縮之勇七

人塔齊布與周鳳山縱橫血戰立斬該逆僞統領先鋒六名僞都督元帥三名斃賊五百餘名賊匪紛紛潰散各路兵勇躡蹤緊追斃賊無數仍將木城燒燬奪獲紫金冠一頂紅巾黃巾無數賊馬數十匹僞印一顆抬斃四十八桿旂幟刀矛無數已刻始行收隊兵勇甫回營造飯賊忽分兩路前來撲營塔齊布令兵勇假退誘賊偪近從營後繞出鎗斃齊施轟斃賊匪五百餘名且追且殺至嶺下塘邊四面圍偪賊匪無路逃竄淹死不計其數此三月二十八九兩日塔

齊布周鳳山督率陸路兵勇三獲大勝之實在情形也委員褚汝航候選知縣夏鑾千總楊載福附生彭玉麟鄒世琦等於二十九日管帶水勇戰船甫抵湘潭賊匪已擄上游民船數百號順流而下四月初一日辰刻褚汝航等督率各營水師分隊進剿長龍在前三板左右斜出載礮轟擊夏鑾彭玉麟楊載福各選派勁勇飛駕快蟹直撲賊船賊匪開礮還擊火彈火箭齊發煙燄迷漫兵賊莫辨該營官等飭令各勇挽柁速據上風施放火具各隊分左右翼飛駛繼進

礮斃紅衣賊目十數名火器飛入賊船遇船卽著頃刻延燒逆賊情急跳上小船輒被兵勇擒斬生擒長髮賊共一百二十餘名奪獲大小船六十餘號旂幟號衣黃巾黃馬褂鎗礮刀矛火藥鉛子偽書名冊等件無算戍刻始行收隊是日陸路之賊仍在北城外高壘木城四座塔齊布周鳳山督帶兵勇三路進剿李輔朝帶楚勇在後接應逆渠因連次敗北盡選長髮老賊居先分三路迎敵塔齊布督率兵勇奮迅向前身先士卒誓不與賊俱生兵勇感激思奮併力鏖

戰往來衝突殺斃長髮老賊約數百人黃巾紅  
衣狼籍道路被逼溺斃者無算後隊兵勇乘機  
拋擲火器燒燬賊踞房屋斃賊亦無算生擒長  
髮老賊六十餘人賊遂退至城根兵勇三路合  
隊盡銳衝殺斃賊數百焚燒木城四座望樓一  
座奪獲二百斤大礮三尊抬礮拍鎗旂幟刀矛  
數百餘件此又初一日水陸大獲勝仗之實在  
情形也塔齊布以連日血戰士卒頗勞傳令暫  
歇一日是夜四更水路賊匪從上游燒放火船  
數隻順流而下小船載油燈無數隨之意欲驚



擾我軍兵勇乘坐三板將賊所放火船撐開洄聚一處任其自燒各船無恙初二日辰刻褚汝航等督率快蟹擗鼓督戰廣東外委羅管全哨官張宏邦區聯彪呂勝等施放鎗礮繼以火箭火礮焚燒賊船羅管全生擒紅衣長髮賊目一名哨官薛飛雄外委施成任把總陳武龍何卓然等連環攻擊自辰至午擊沉賊船八十餘隻斃賊二百餘名從九品區本昌候補千總戴兆熊分途燒斃紅衣賊目一名登岸追獲賊馬一匹復擒上賊船奪獲僞前十一營師帥黃夫旂

一桿紅緞風帽黃綾帽及逆匪名冊令旂等件  
褚汝航親開大礮轟斃紅巾賊匪十數名長龍  
三板等船鼓舞爭先自午至申又燒燬賊船二  
百餘隻轟斃水陸逆賊三百餘名奪獲大小旂  
幟十五桿生擒長髮老賊二名逆船三十隻米  
三百石火藥四百斤大小鉛子九桶衣帽器械  
無算營官彭玉麟楊載福親坐三板小艇往來  
督戰礮聲如雷湘波鼎沸楊載福身受鎗傷尚  
復指揮鏖戰自辰至酉燒燬賊船三百餘號燒  
斃紅衣長髮逆賊三百餘名生擒長髮賊匪十

三名短髮賊匪四十餘名著船之火延燒岸上  
街市房屋百里外遙見火光燭天岸上之賊燒  
斃者實亦無數可紀奪獲旂幟器械無算潭城  
賊船僅剩文昌閣上三十餘隻餘悉燒燬淨盡  
此初二日水師大獲勝仗之實在情形也臣曾  
國藩以潭城逆賊屢被官軍水陸痛剿專盼靖  
港之賊救援急應乘機攻剿俾逆賊首尾不能  
相顧明知水師可恃者均已調赴湘潭陸路各  
營除塔齊布周鳳山兩營正在潭城剿賊升用  
同知林源恩一營駐防平江此外岳州甯鄉兩

次失利陣亡湘勇約七八百名又淘汰遣散湘勇已千餘名現存營者僅及千名難期得力而事機所在又不敢不急切圖之是日卯刻親率大小戰船四十隻陸勇八百馳赴靖港上二十里之白沙洲相機進剿午刻西南風陡發水流迅急戰船順風駛至靖港不能停留更番迭擊逆賊在礮臺開礮適中哨船頭桅各水勇急落帆收泊靖港對岸之銅官渚賊眾用小划船二百餘隻順西風駛偏水營水勇開礮轟擊礮高船低不能命中戰船被焚十餘隻隨風漂散數

隻水勇見勢不支紛紛棄船上岸或自將戰船  
焚燬恐以資賊或竟被逆賊掠取臣曾國藩在

白沙洲聞信急飭陸勇分三路速撲靖港賊營

冀分賊勢陸勇見水勇失利心懷疑怯雖小有

斬獲旋即卻退

臣

曾國藩見水陸氣餒萬難得

手傳令撤隊回營此又初二日靖港剿賊失利

之實在情形也初三日塔齊布在潭城審濟地

方高豎望樓知道逆賊散處潭城總市將由水路

逃竄知會水師迅速兜剿一面於辰刻分派兵

勇四路進撲城市生擒賊匪十餘殺斃四十餘

名賊已敗退忽巳刻大雨如注官軍繩藥均濕  
遂撤隊回營該逆復蜂擁追來兵勇折回截殺  
署綏靖營守備張萬邦單騎衝入賊陣手刃數  
賊登時陣亡額外童添雲四川咨記把總岳炳  
榮向前搶護各受重傷塔齊布指揮兵勇分投  
痛剿賊仍敗退回巢是夜四鼓逆賊所擄上游  
大船數百隻駛至審濟城市各賊紛紛上船希  
圖乘風上竄彭玉麟商同楊載福卽於初四日  
卯刻督率兩營戰船跟幫緊追午刻行抵下攝  
司賊船檣帆林立彭玉麟楊載福分坐快蟹一

隻三板一隻先進賊開鎗礮抵拒水勇開放大礮轟斃賊匪百數十人賊船四處散駛彭玉麟揚載福乘勢急進遇船卽燒船上馬匹及所擄財物極多彭玉麟揚載福令眾勇毋許上船擄取專意射火焚船是時北風甚勁順風縱火遇船卽著自卯至未燒賊船大小七百隻長髮短髮逐浪漂流紅衣黃巾隨波上下其中船戶水手難以分別搭救岸藉水溫同歸浩劫事雖慘而功則奇水戰火攻未有痛快如此者當燒船緊急時遊匪棄甲拋衣登岸折回潭城管帶楚

勇委員江忠淑偵知商同署湘潭縣劉建德覓  
熟識本處路徑已選安徽從九王炳元六品軍  
功武生黃德均帶楚勇數十悄伏潭城西北角  
俟賊駕梯出入時卽奪梯直上楚勇嚴陣以待  
寅刻果見逆賊由西北緣梯而下伏勇將賊衆  
砍斃奪梯而上登城大呼官兵上城逆賊不辨  
我兵多少倉卒緣城竄逸該勇卽將城門洞開  
江忠淑帶勇直入縣城塔齊布督帶兵勇繼至  
分門搜剿當斃長髮短髮二百餘名生擒長髮  
六十餘名內一賊腰牌上寫春分副侍衛書士



汪秉義安徽人一僞司馬王玉春一僞司馬洪

大貴皆廣西人一頭戴貼金雙龍大紗帽身穿

黃緞馬褂下穿紅緞繡龍腿褲背負令旂自稱

五軍統領大元帥羅口音似廣東人問其名堅

不吐實桀驁萬狀當卽斬決其日又搜獲身穿

黃馬褂長髮老賊十三人以追賊在卽未及起

解槩予駢誅將該逆衣服剝下呈驗奪獲大小

黃旗一百零一面大礮三尊戰鼓三面拍鎗五

十四桿鳥鎗六十九桿馬騾三十五匹黃龍傘

帽二頂火藥六桶鉛子四桶紅衣黃巾刀矛器

械無數此初四日水師追剿大獲勝仗及初五日卯刻克復城池之實在情形也現在賊匪紛紛竄逸有上竄者有下竄者有遁回靖港者皆零星逃竄不復成軍已飭塔齊布等分投追剿並札飭各道府州縣四處搜拏管帶湘勇已革并用同知直隸州知州王鑫追賊至雲湖橋殺賊四十二名初六日設伏於魯家壩殺賊三百餘名生擒二十餘名又一股由淥口竄至醴陵縣人約數百將竄入江西萍鄉臣等飛咨江西撫臣速飭堵剿此次逆賊大舉南犯多曾經百

戰兇悍之徒意圖竊踞湘潭與靖港之賊互爲首尾倘不及早撲滅不獨省城孤注難以圖存衡永郴桂及兩粵匪黨聞風響應從亂如歸東南大局不堪設想幸仗

皇上威靈八日之閒水陸十獲大勝全股掃蕩賊膽已寒訊自賊中逃出者皆云粵楚滿髮老賊及皖鄂新附賊黨經此番屢次痛剿之後相向痛哭羣起怨尤老賊惡新賊之不爲盡力新賊疑老賊之暗洩軍情彼此猜忿初二初三兩日敗回收隊後在潭城分黨鬪鬪自相屠戮者約數

百之多皆臣等意想所不到此次水陸痛剿斃賊近萬所獲旂幟器械無算兇渠僞目除陣斬外或斃於水或斃於火爲數極多被擄解散之人約以萬計逆賊實已聞風喪膽現在靖港一股亟應回軍剿辦俟水陸兵勇調回卽行相機攻剿補用副將塔齊布忠義奮發勇敢當先士卒樂爲之用通賊剿賊已獲大勝此次復著奇功實屬武員中傑出之才前剿辦江西土匪竄至茶陵案內請

旨賞換花翎以副將補用尚未接准部覆應仍請

賞換花翎加總兵銜並

賞給勇號藍翎守備周鳳山饒有膽略深得士心上  
年冬開在常甯縣洋泉道州四慶橋本年正月  
在道州巖頭村屢次帶勇剿匪迭著戰功擬以  
都司保奏三月十四日隨同塔齊布進剿崇通  
賊匪大獲勝仗此次奮勇當先克獲全勝應請  
旨以遊擊升用先換頂戴並

賞換花翎委員山西升用知府卽補同知褚汝航熟  
悉水戰情形才優膽壯調度有方應請

旨免補同知以知府歸原省儘先補用並

賞加道銜委員卽選知縣夏鑾督勇力戰膽識俱壯  
應請

旨以同知升用先換頂戴藍翎千總楊載福以陸路  
武弁管帶水師被賊鎗傷左肋右腿數處裹創  
血戰奮不顧身陸續燒燬賊船四百餘隻請以  
守備留於本省補用並請

賞換花翎六品軍功附生彭玉麟書生從戎膽氣過  
於宿將激昂慷慨有烈士風 臣曾國藩前在岳  
州派往西湖搜查賊船該生帶水勇三十餘名  
分坐兩小舟周歷重湖沿途搜剿殺斃長髮賊

匪三十餘名奪獲賊船數隻擬以縣丞府經保  
奏此次力疾帶勇猶會同楊載福親坐小船焚  
剿賊船六七百隻免致他竄厥功甚偉應請

旨以知縣歸部遇缺卽選分帶水勇哨官張宏邦奮  
勇當先搶上賊船生擒黃巾賊目並焚燒賊船  
數十隻身受重傷應請

旨以于總歸於廣東拔補國子監學正銜候選訓導  
江忠淑係前安徽撫臣江忠源胞弟督帶楚勇  
首先登城立將城池克復甚合機宜應請

賞加五品銜此外各文武員弁兵勇奮勇出力者尚

多俟卽核明勞績最著者開列名單懇懇

皇上恩施加以鼓勵陣亡員弁兵勇俟該將弁等查

明分別

奏請

賞卹庶才傑進用而廓清可期拔擢有真而羣才競  
奮所有水陸勝負實在情形謹據實由驛馳

奏伏乞

皇上聖鑒訓示施行謹

奏

咸豐四年四月十二日拜發奉



硃批另有旨欽此

靖港敗賊下竄崇通賊匪南犯官軍三捷摺  
奏爲靖港賊船喪膽下竄敗殘餘匪迭經各州縣  
兵勇團眾協力截剿近省地方 律肅清崇通  
賊匪乘間南犯兵勇迎剿三獲勝仗恭摺由驛  
馳

奏仰祈

聖鑒事竊逆賊大股自竄踞湘潭經水陸兵勇痛加  
剿洗零匪膽寒四竄臣等預飭各州縣會督汛  
弁團紳各於所屬要隘嚴密兜截一面飛調水  
陸兵勇回軍合剿靖港賊巢旋據衡州府及衡

山醴陵瀏陽平江安仁常甯道州攸縣湘陰長沙各州縣先後稟報截擒潰敗餘匪各百餘名數十名十數名數名不等訊係廣西湖南滿髮老賊居多希圖薙髮潛歸復行勾結滋事內有唐清成許高發等皆係廣西賊目唐容光一犯賊中僞稱軍師當卽就地正法梟示以昭炯戒維時靖港賊船聞道賊連日大敗兇渠僞目多已授首僅逆目林紹璋一犯以四騎負夜奔回靖港賊黨聞風膽喪卽夜將輜重船隻乘風下駛比塔齊布等水陸兵勇回軍長沙該逆已由

灣河蘆林潭一帶揚帆下竄經過湘陰岳州等處均不敢停泊中途因舵工水手逃散遺棄船隻頗多其由醴陵小路逸出餘匪探由江西萍鄉萬載新昌等縣轉至湖北邊界會同通城賊匪意圖乘閒南犯臣隨調守備徐統緒知縣陳鑑源帶綏靖兵三百名候選訓導江忠淑帶楚勇一千三百餘名馳赴平江會同升用同知直隸州知州林源恩相機進剿旋據林源恩署平江縣知縣汪敦灝稟稱湖北崇通賊匪於四月初七八等日竄入江西義甯州界之桃樹港江

西官兵迎剿失利賊勢披猖十六日僞旅帥夏  
姓金姓胡姓竟敢率賊南犯前隊已至上塔市  
林源恩分派隨營紳士管帶壯勇團丁暗抄上  
塔市之後自率中隊迎剿該逆倉卒整隊抗拒  
各勇直前衝殺壯勇團丁左右抄出斃賊九十  
餘名生擒賊匪沈連升王敦才方榮本陳賓海  
黃沅清等五名奪回江西官營被擄拍鎗十八  
桿烏鎗十二桿火藥六桶鉛子四桶賊匪旂幟  
號衣多件知縣陳鑑源守備徐統緒候選訓導  
江忠淑管帶兵勇繼至二十七日移營進紮通

城九嶺地方五月初一日正擬出隊攻剿是日辰刻該逆忽分三路蜂擁而來各路約千餘人官軍亦分三路拒敵林源恩徐統緒分帶兵勇當賊左右兩路江忠淑督楚勇當賊中路俟賊撲近營盤卽令藍翎千總徐志近軍功六品百長劉長珀江鑑堂徐成旃等協同八品軍功陳鳳舞向前衝殺轟斃紅巾賊匪數十名賊匪紛紛敗潰楚勇乘勝掩殺斃賊多名過河淹斃者無數賊復分踞山頂楚勇亦分路搶上山梁兩路各斃賊數十名生擒六名奪獲大中黃旂十

二面小黃令旂十餘面拍鎗八桿大礮一尊烏鎗九桿長矛二十三枝火藥火彈兩石鉛子一石腰刀十八把黃紅號衣包巾各數十件林源恩徐統緒兩路兵勇踵至合力猛追賊匪亡命奔潰墜巖跌死者無數可紀此五月初一日官兵進剿崇通賊匪獲勝之實在情形也昨據署平江縣知縣汪敦瀨稟稱初四日賊匪復分三股由閒道抄襲官軍後路經江忠淑林源恩陳鑑源徐統緒及平江團紳黃錫予凌煌壽等分投迎擊大獲勝仗斃賊數百生擒數十名賊匪

仍紛紛敗退後路揚雀坳餉報已通其殺斃賊  
匪實數及奪獲器械實數尚未接據該委員稟  
報<sub>臣</sub>以崇通賊匪愈聚愈多並據探報有邀約  
蒲圻長髮老賊助逆情事當復添調藍翎守備  
蔣大勝管帶楚勇六百四十名馳赴平江北界  
協剿以資後勁復面商署提<sub>臣</sub>塔齊布督領兵  
勇即日馳赴岳州相機防剿所有截拿潰匪各  
州縣員弁團眾及平江剿賊疊獲勝仗員弁兵  
勇可否擇其尤爲出力者彙入湘潭剿賊保舉  
案內核實開單保



奏以昭激勸之處出自

天恩謹將賊船下竄剿賊獲勝各緣由會同署提臣

塔齊布革職前禮部右侍郎臣曾國藩據實馳

奏伏乞

皇上聖鑒訓示施行謹

奏

咸豐四年五月初十日拜發奉

硃批另有旨欽此

南北兩省道路梗塞片

再湖北一省被逆賊勾結土匪四處充斥水陸道梗鄂城以外四面皆賊迭奉

諭旨運解銀米以資接濟

臣

前後屢飭偵探路徑果

能設法繞解卽迂阻勞費亦何敢辭乃該省南路之嘉魚蒲圻西路之通山通城崇陽北路之漢陽黃州東路之興國大冶武昌各處地方皆被賊匪佔踞不獨餉需銀米重累之物運解萬難卽公牘私函亦且無從徑達江西運解湖北餉項四萬二千兩正月自南昌委解起程繞道

義甯州淹留許久不能前進仍改由山路折回  
萍鄉於四月底始運至湖南省城擬由湖南解  
鄂現因道梗寄存司庫臣與曾國藩前擬將道  
員蔣徵蒲捐項錢文就近分撥荊州由荊州伺  
便解鄂昨接荊州府江陵縣稟據云荊州曾預  
備米數千石並鹽局存錢一萬餘串急欲解赴  
鄂城正苦無路得達頃初九日接湖北撫臣青  
麇四月十四日自鄂城發來細字密函具言城  
中困乏之狀尤爲悽絕查此械發後復從咸甯  
折回覓人扮作挑鹽販賣之徒展轉遞至江西

義甯州由義甯州轉遞平江然後得達寸函往返尚復艱辛至此道路梗塞情形已可想見湖南湖北兩省勢重輔車誼均休戚非奉

諭旨嚴催亦斷無膜視之理一俟水陸兩路有隙可乘卽當設法接濟謹將現在水陸運解艱阻實情會同革職前禮部侍郎臣曾國藩附片陳

奏伏乞

皇上聖鑒謹

奏

咸豐四年五月初十日拜發奉

硃批知道了欽此

陳鎮由粵領解洋礮到省片

再兩廣督

臣

葉名琛奏委新授山東登州鎮總

兵陳輝龍督同遊擊沙鎮邦管帶提標各營及  
大鵬協弁兵何岳澧等九十六員名順解大小  
洋礮一百尊來楚會商督帶礮船赴湖北江西  
堵剿賊匪業於四月二十一日行抵長沙 臣接  
晤之餘詢及水師情形甚爲諳練惟據稱現有  
戰船亟宜修整而江湖與海洋形勢互異須再  
添造淺水拖罟船數隻方利攻剿之用與曾國  
藩彼此熟商意見亦同現正趕緊購料監造俟

船成演試即可開行廣西委員李孟羣所募水  
勇亦約於旬日外方可趕到所有鎮臣陳輝龍  
順解洋礮到省及籌辦情形謹附片具

奏伏乞

聖鑒謹

奏

咸豐四年五月初十日拜發奉

硃批知道了欽此

華容龍陽失守常澧喫緊派兵援剿摺

奏爲逆賊自湖北竄陷華容縣城復勾結賊船竄踞岳州分陷龍陽現在常德澧州情形喫緊已調撥兵勇馳往援剿恭摺由驛馳

奏仰祈

聖鑒事竊前據署岳州府華容縣知縣宋昌期稟報該縣界連湖北荊州各屬時有土匪勾結長髮賊匪闖入邊境當經降調岳常澧道張琴挑派兵勇委因公在澧之衡州通判福增管帶馳往援剿斃賊百數十名生擒賊目尹其正萬四文



福元等犯華容紳士嚴致崇童生白人虎等亦斃賊多名賊匪潰逸福增旋即回澧旋據澧州知州胡鏞稟報據署華容縣知縣宋昌期家丁方貴稟稱賊匪大股於四月二十八日復分四路蜂擁而至該令宋昌期督同弁兵紳勇嬰城固守至五月初二日城破殉難核與探報無殊臣當飛飭前調之都司烏什哈等帶辰州九谿等處官兵五百名武舉李克生帶辰勇二百名就近改道馳赴澧州一帶進剿該都司等尚未接札已於五月十二日行抵常德府屬之龍陽

縣卽據該縣稟稱初十日探有賊船百數十隻  
在華容縣傅家磯一帶揚帆直抵西港勢將竄  
越該縣請截留烏什哈等兵勇在縣防剿又據  
湘陰縣稟報連日北風大作賊船紛紛上駛陸  
路賊匪陸續回竄岳州賊船泊南津港現又分  
船竄往西湖龍陽一帶與華容竄出賊船會合  
臣以賊竄龍陽則常德澧州一水可通並形喫  
緊非調撥重兵援剿恐難得力當卽札調卽補  
都司李輔朝管帶楚勇一千名署新甯知縣趙  
啓玉募楚勇一千名統歸貴東道胡林翼節制

胡林翼帶自募黔勇六百名前已委赴安化縣  
搜拏會匪卽飭其取道益陽馳赴龍陽常德一  
帶相機援剿正調撥聞忽接益陽縣稟報十二  
日賊匪攻撲龍陽縣城經該署縣文耀會同烏  
什哈洞庭營遊擊王政先等登陴守禦開放鎗  
礮將賊擊退因城垣坍塌甚多賊匪於十三日  
卯刻由缺口蜂擁而入兵勇潰散縣城遂致失  
守文武各員不知下落旋據烏什哈稟報相符  
臣以賊匪旣已攻陷龍陽該處去常德水程僅  
止一日常德雖有兵勇二千未免尚形單薄據

常德府知府景星常德協副將富勒東十四日  
發來稟報距城六十里滄港地方有賊船數十  
號在彼焚掠署提臣塔齊布亦派委准升遊擊  
周鳳山帶勇一千一百名由益陽前進但賊船  
乘風飛駛程途迅速官軍從湖壩取道時當夏  
令野潦縱橫澤行途行難期直捷而曾國藩所  
有師船正在趕緊修艫幫帶破船登州鎮臣陳  
輝龍所造淺水拖罟尚難尅期蒞事廣西委員  
李孟羣所募水勇千名雖經札催亦尚無抵省  
確耗焦急不可名言查常德與岳州對峙重湖

均爲湖南門戶澧州南連常德北接荊州亦爲  
要地現在湖北與湖南接壤各地方多被賊踞  
文報不通統計湖南防剿兵勇東則由平江進  
剿崇通爲一路五品銜候選訓導江忠淑補用  
知縣陳鑑源守備徐統緒統之已轉戰而前直  
抵湖北通城中則由湘陰直趨岳州爲一路署  
提臣塔齊布統之現駐長樂街相機進剿西則  
由龍陽援剿常澧爲一路已札貴東道胡林翼  
統之俟各路勇齊迅速援剿統計三路兵勇長  
天已一萬數千人而省城之防兵曾國藩之水

陸兵勇又將盈萬頃接桂陽州衡州府稟報嘉禾常甯兩縣又有鄰匪攻撲城垣之警南路兵勇復難裁撤當此三空四盡之時庫項無存兵端未艾此臣所爲拮据不遑莫名焦灼者也惟有催飭各路將領邊督兵勇迅速殲除冀稍慰皇上殄寇安民之至意所有華容龍陽失守現籌援剿情形謹會同署提臣塔齊布革職前禮部侍郎臣曾國藩由驛馳

奏伏乞

皇上聖鑒訓示施行謹

奏

咸豐四年五月二十五日拜發奉

硃批另有旨欽此

常德府城失守現籌進剿情形摺

奏爲常德府城失守現籌水陸進剿情形恭摺由

驛馳

奏仰祈

聖鑒事竊逆賊自湖北竄陷華容勾結逆船竄踞岳  
州分陷龍陽縣城常澧一帶情形喫緊臣等派  
撥兵勇馳往援剿業經馳

奏在案旋據探報逆賊自五月十三日竄陷龍陽  
後賊船由滄港白沙市駛進十五日攻撲府城  
十六日午刻城陷知府景星副將富勒敦遇害



維時附近之桃源縣辰州府稟報常德十五日以後情形均不能明確臣等飛催派往援剿之准升遊擊周鳳山卽補都司李輔朝星速帶勇先進二十五二十七等日周鳳山李輔朝等行抵龍陽聞龍陽以廿現有賊船屯駐該處所有船隻被賊擄盡勢難飛渡正計議閒賊船百餘隻飛駛前來上下分泊陸路賊匪從後繞撲營盤周鳳山李輔朝督勇分路鏖戰轟斃賊匪百數十名奪獲賊船二十餘隻旂幟刀矛器械多件賊船敗潰駛回周鳳山等擬卽用所奪賊船

渡勇前進忽二十八二十九等日大雨如注湖水驟長丈餘周鳳山等營盤被水淹浸正議移營高阜間六月初一日辰刻賊船二千餘隻乘漲直迫營盤三面開礮轟擊周鳳山等見勢難支持一面分隊拒戰一面覓路退回毓德舖沿途野潦縱橫各勇鳧水經過閒有溺斃軍裝頗有損失是日貴東道胡林翼帶黔勇由益陽馳抵毓德舖詢知前途無船勢難飛渡新漲之後積水未退遇水結筏更未免濡滯愆期兼之龍陽甫經殘破商民被擄逃匿一空無從買食遂

決計從益陽馬家塘取道黃土店可由桃源武陵邊境直抵常德雖程途迂折山徑崎嶇師行未免勞頓然較之阻水不前遲速迥異筋周鳳山等帶勇徑回益陽縣整理軍裝自帶黔勇斷後以防賊匪追襲初四日胡林翼拔營自益陽帶勇先發周鳳山李輔朝亦先後隨同前進據辰州府劉位坦稟稱貴州參將閃雲統帶黔兵六百行抵辰州已飛札會同胡林翼進剿此西路援剿官軍勝後小挫現在改道速進會剿之實在情形也臣伏思逆賊攻陷常德分踞岳州

是全湖之險已爲該逆所據雖中路進剿岳州  
之賊有署提臣塔齊布一軍西路進剿常德之  
賊有貴東道胡林翼一軍然祇能於陸路相機  
痛剿若賊匪洗足上船官軍卽未免望洋興歎  
是蕩平克復固重在陸路而斷其勾結制其死  
命終非水軍莫濟現在革職前禮部侍郎臣曾  
國藩戰船修造甫畢廣西委員李孟羣所募水  
勇千名甫於昨初六日到省鎮臣陳輝龍所造  
淺水拖罟尚須旬日後始可完工臣與曾國藩  
悉心商議以目今賊勢而論常德賊船多於岳

州情形較岳州更爲吃緊然湖南寬廣數百里賊船乘風泛駛颺忽靡常若舟師全注西湖該逆或分股轉舵東竄岳州或南犯長沙舟師爲其牽制恐難迅速殲除曾國藩現擬將水師分爲兩起一起由益陽龍陽直趨常德遇賊卽剿一起稍後察看賊勢或合或分相機繼發務期與陸路合力夾剿迅將兩城克復乘勢出江東下以求稍紓

皇上殄寇綏疆之至意至澧州一路又在常德之北與湖北荆州連界兼旬以來文報不通實在情

形尚未探確應俟陸續馳

奏湖南迤北一帶驛路梗塞所有摺件暫改由江

西繞道馳遞合併陳明所有常德失守水陸援

剿情形謹會同署提臣塔齊布革職前禮部侍

郎臣曾國藩由驛馳

奏伏乞

皇上聖鑒訓示施行謹

奏

咸豐四年六月初十日拜發奉

硃批另有旨欽此



中東兩路官軍剿賊獲勝片

再署提

臣

塔齊布於五月二十日兵進大荆驛

探報賊匪在新牆築土城三座扼要抗拒塔齊布傳令二十二日分三路進剿都司普承堯由左守備彭三元由右塔齊布親督兵勇由中路而進飭中軍都司滕遇春率前隊兵勇奮力攻撲賊匪負固抵禦官兵鎗斃賊匪數十名鼓勇而前拋擲火彈火罐連奪賊營三座賊匪紛紛潰竄適兩路兵勇繼至塔齊布親督諸勇躡蹤緊追斃賊百餘名生擒長髮賊四十餘名軍前



正法奪獲二百斤礮一尊抬礮烏鎗刀矛旂幟  
號衣二百餘件賊船四十七隻官兵受傷僅止  
三名此中路獲勝之實在情形也東路兵勇由  
平江進剿崇通賊匪三獲勝仗經臣於五月初  
十日由驛馳

奏其五月初四日一戰實斃賊三百餘名生擒賊  
匪三十名陣斬賊目楊檢點毛仕忠自五月初  
九至二十九日大小十一戰據管帶楚勇五品  
銜候選訓導江忠淑管帶綏靖永順官兵守備  
徐統緒等迭次稟報統計實共斃賊九百餘名

生擒百餘名奪獲刀矛四十餘件抬鎗十餘桿  
鳥鎗三十餘桿雜項軍械不計件大小黃旗四  
十餘桿紅黃號衣不計件陣斬賊目陳姓金姓  
僞司馬吳姓等此東路迭獲勝仗之實在情形  
也現在兩路相機進剿兵勇尚爲奮勉堪以仰

慰

宸厯理合附片具

奏伏乞

聖鑒訓示謹

奏

咸豐四年六月初十日拜發奉

硃批知道了欽此

鄂城失守撫臣帶兵勇難民來南資送赴荆摺  
奏爲湖北省城失守撫臣率領兵勇難民來南現  
籌酌給口糧資送赴荆恭摺馳

奏仰祈

聖鑒事竊臣於本月十四日接署提臣塔齊布新牆  
來函據云十一日有把總林從根等自湖北來  
營稱鄂城於本月初二日失守兵勇自潰巡撫  
青麐荊州都統魁玉率領兵勇難民南來將次  
行抵新牆臣接閱之餘不勝駭異現在逆賊竄  
踞岳州常德府城之賊聞官軍將至盡由西湖

乘船赴岳本省北路防剿戒嚴之時鄂城文報  
久梗真偽難知若奸匪冒稱北省兵勇乘機詭  
混賄悞堪虞當委把總朱廷勛馳往偵察旋據  
撫臣青麀來函具言失守緣由並饑疲不堪情  
狀囑臣速撥米二三百石暫資接濟意在取道  
速赴荊州臣一面趕緊籌備一面飛函北撫臣  
將各營兵勇及同行難民實數查明以便料理  
又委補用知府裕麟千總李萼迎往安撫截止  
北來兵勇毋許闖入省城以防奸匪夾雜並裝  
木八百石錢三千串運赴涇溪渡交北撫臣暫

行散給卽紮營距省三十里白馬鋪地方收集  
潰卒按名查點聽其分別隨征散遣再由南省  
酌發口糧遣赴荊州以圖再振所有現籌酌給  
潰卒口糧資送赴荊緣由謹會同革職前禮部  
侍郎臣曾國藩署提臣塔齊布合詞具

奏伏乞

皇上聖鑒訓示施行謹

奏

咸豐四年六月十九日拜發奉

硃批知道了欽此

陽明先生集

甲寅上

三

籌議進剿岳州情形請

旨勅催江西餉銀片

再逆賊攻陷常德後聞援剿西路官軍將至星  
夜將所擄錢糧輜重擄取民船裝運出境西湖  
一帶現無賊蹤昨據署提臣塔齊布函稱賊在  
岳州城外連營八座深溝高壘爲久踞計常德  
賊船駛赴岳州收泊南津港一帶地方風檣林  
立來者尚絡繹不絕署提臣中路一軍兵力稍  
單臣與曾國藩札調委員羅澤南管帶湘勇千  
名岳州府知府魁聯管帶寶勇楚勇千名星夜



馳赴大營隨同進剿西路情形已經准升遊擊周鳳山所帶壯勇一千六百名亦卽調往中路以厚其勢曾國藩已派道銜山西知府褚汝航升用同知夏鑾守備楊載福知縣彭玉麟管帶頭起師船爲水陸夾剿之計誓當竭力掃蕩以靖寇氛惟兵勇雲集所需軍餉浩繁南省庫項已空無從設措加以北省潰兵由南省取道赴荆墊發銀米爲數亦鉅拮据之狀不可名言

臣

昨晤北撫

臣

青麀據云江西現有應解湖北餉

銀十萬兩因道梗未及起解若咨催江西將此

項徑解湖南兩省均可稍資接濟仰懇

皇上天恩敕下江西撫臣迅將該省應解湖北之餉

銀十萬兩委員刻日解赴湖南庶兩省軍餉得以通融濟用其於大局不無小補除一面咨催

江西撫臣外謹附片陳明伏乞

皇上聖鑒施行謹

奏

咸豐四年六月十九日拜發奉

硃批另有旨欽此

皇太子

甲寅上

三

核保湘潭出力員弁兵勇摺

奏爲遵

旨核保出力員弁兵勇懇

恩獎敍以昭激勸事竊前因逆匪竄踞靖港攻陷湘

潭冀上下夾攻爲坐困省垣之計經臣會商前

禮部侍郎臣曾國藩星夜調派水陸兵勇迅往

攻剿八日之間十獲大勝巨股剿滅縣城克復

當經由驛馳

奏補用副將塔齊布等仰蒙

天恩優加獎擢並奉

恩旨出力員弁著該撫查明據實保奏候朕施恩欽

此臣接奉

諭旨卽恭錄行知水陸各將領核實戰績功次開注  
擬保清單臣復與曾國藩逐一細核查此次湘  
潭大捷屢據生擒各賊及逃出裹脅難民均云  
自逆賊由湖南下竄之後除兩次北竄情形伊  
等不知其詳就江南安徽江西湖北湖南而論  
官軍剿賊雖屢獲勝仗而逆賊受創則以江南  
之六合湖南之湘潭兩戰爲最甚固由諸將士  
感激

皇恩奮勉圖報亦原

天心默佑事機順利所致除陸路陣亡之署緩靖守備張萬邦衝入賊陣手刃數賊以致殞命情殊可憫請照守備例給卹水師勇目准升于總張宏邦前次打仗身受重傷保奏之後旋即創裂身死應請照升銜給卹外所有尤爲出力之員弁兵勇謹擇其勞績最著者開單伏乞恩施加以獎勵其出力稍次者卽由臣等咨記拔補庶幾士氣丕振而撻伐益神至崇通剿賊出力及各州縣搜剿餘匪出力各官紳前蒙

恩准彙入湘潭案內保奏容俟查明另摺籲請

恩施謹會同提

臣

塔齊布革職前禮部右侍郎

臣

曾

國藩恭摺由驛具

奏伏乞

皇上聖鑒訓示施行謹

奏

咸豐四年七月初八日拜發奉

硃批另有旨欽此

特參文武員弁堵剿不力摺

奏爲特參堵剿不力之文武員弁請

旨革審事竊查逆匪大股於本年五月間由湖北上

竄連陷華容龍陽常德等府縣經臣飭委貴東

道胡林翼等統帶兵勇馳往剿辦該逆因聞援

兵將至星夜馳赴岳州竄出常德府境西湖一

帶已無賊蹤業經

奏報在案維時臣因澧州南連常德北接荊州宜

昌等府爲南省之門戶地方亦極緊要誠恐該

逆由宜昌竄入州境當卽飛札前調來省之辰



州營都司烏什哈等管帶辰州九溪等營官兵  
五百名武舉呂克生帶長勇二百名就近改道  
馳赴澧州一帶防剿該都司於未接札之先已  
於五月十二日行抵龍陽縣經該署縣文耀留  
其在縣防堵未及赴澧旋據文耀暨洞庭水師  
營遊擊王政先會稟五月十三日賊船數百號  
直逼城下經該縣營等登陴守禦開放鎗礮傷  
斃逆匪多人該逆分股繞赴南城舊垣處所施  
放火箭燃燒城內民房並開礮轟倒城門壕口  
逆賊蜂擁而上經外委丁萬里殺斃長髮賊目

知	用	用	一	分	出	生	18%	正
---	---	---	---	---	---	---	-----	---

招集潰兵又據澧州知州胡鏞署澧州參將張  
昕會稟賊由湖北宜昌下竄逼近該州當於五  
月十五日會稟請兵十六日戌刻賊約三千餘  
人竄至州屬津市河下經署州判姚鈞培會同  
汎弁堵禦十七日賊分三路圍攻州城該州會  
營分門堵禦賊自西北城角低塌處所擁入三  
四百人因該處多係菜園空地當經該州等飭  
令兵勇施放鎗礮並經近城鄉團前來助勢鎗  
斃賊匪十餘人奪獲抬礮刀矛等件賊仍退出  
城外分竄四鄉擄掠復經鄉團先後殺斃二百

餘人該匪於二十二十一等日陸續下竄人民未遭殺戮城池倉庫監獄衙署均各完好又據署常德協中軍都司永州鎮標左營守備程登科提標署右營遊擊恩泰前營都司宋廣東稟報均因殺賊受傷未能抵禦以致郡城失陷等情臣查署龍陽縣補用知縣文耀洞庭營水師遊擊王政先署常德協中軍都司永州鎮標左營守備程登科提標署右營遊擊恩泰前營都司宋廣東於賊匪撲城之時堵禦不力致被攻陷城池已屬罪有應得今據稟均因殺賊受傷

難保非畏葸逃棄事後飾詞狡卸相應請

旨將文耀王政先程登科恩泰宋廣東一併革職拏  
問辰州營都司烏什哈帶兵來省路過龍陽經  
該縣留其防堵雖非守土之官亦未奉委在彼  
堵剿惟身爲武弁旣經該縣商留卽有剿賊之  
任乃不能極力堵禦以致縣城失陷所帶兵丁  
又被衝散實屬庸懦無能烏什哈應請卽行革  
職以示懲儆澧州知州胡鏞等於賊座圍攻之  
時未能悉力固守致城破擁入州城雖據稟旋  
經擊退究屬防禦不力且查該匪旣已入城所

稟倉庫監獄衙署均各完好等情亦難遽信相應請

旨將澧州知州胡鏞署澧州參將張昕均卽革職如查有前項情弊再行從嚴參辦此外各失事文武員弁應參辦者容俟查明另參再常德府知府景星副將富勒敦武陵縣知縣朱元增署武陵縣縣丞秦維松把總鄒萬盛據稟被賊戕害把總談金魁外委王俊業已陣亡告病在籍之山西神池縣知縣高注帶勇殺賊力竭被執罵賊不屈致被賊匪割去口舌遍體鱗傷受害最

甲寅上  
四  
慘又舉人周之楨於城破時投河殉節該官紳  
將弁等大節凜然均堪憐憫應請

旨從優賜卹以慰忠魂謹會同革職前禮部侍郎

臣

曾國藩提督

臣

塔齊布恭摺具

奏伏乞

皇上聖鑒訓示謹

奏

咸豐四年七月初八日拜發奉

硃批另有旨欽此

特參江華文武稟報剿賊不實摺  
奏爲特參稟報剿賊不實之縣營請

旨卽行革職以肅

功令事竊湖南永州一帶界連廣西時有土匪出

沒迭經

臣

札飭各州縣督率士民認真團練巡

防並將出力紳勇隨時獎敘分別鼓勵在案本

年三月間先據江華縣知縣胡開勳稟報是月

十五日探有廣西涼水井等處匪徒千餘人竄

入該縣邊境搶掠焚燬李姓民房殺人祭旗續

據胡開勳會同護遊擊陳進榜稟稱該縣營與



署嶺東營守備伍化蛟等會督紳士兵勇團練分投往捕十七八等日在白芒營兩次斃賊百數十名生擒李月秀等十二名當卽正法餘匪翻山逃逸等情臣查該匪等果已聚黨千餘殺人祭旗焚掠實屬罪大惡極既經擒殺多名因何並不乘勢追擊任其逃逸且已擒殺之匪徒究係何人之力稟內聲敘含糊經臣駁飭確查去後茲據護永州鎮朱瀚署永州府知府黃文琛委員密查涼水井賊匪於三月十七日竄入江華縣白芒營地方人數無多實無千人之衆

亦無殺人祭旗因焚搶生員李開學錢穀房屋  
官兵未到經白芒營團紳及各處團丁連次擊  
散並查得該署守備伍化蛟於十六日帶兵出  
城駐紮十八日督兵前進行至中途知匪已散  
此次剿捕匪犯實係團眾之力地方現已安堵  
該縣營等稟報不實稟據藩臬兩司會揭前來  
臣查廣西涼水井匪徒竄入江華縣境據該護  
鎮等委查人數無多僅止焚掠李開學家房物  
乃胡開勳近在咫尺並不偵探確實輒以匪徒  
千餘殺人祭旗等情混行稟報其與陳進榜稟

報捕賊情形又不將官兵未到之先卽經圍丁擊散緣由詳細聲敘難保非有意張大其詞事後希圖邀功飾詞具稟又署守備伍化蛟旣已帶兵出城因何不卽督兵前進亦畏有畏蕙逗留情弊除護遊擊陳進榜已於另案參辦外相應請

旨將江華縣知縣胡開勳署嶺東營守備升補長安營千總調署左營千總伍化蛟均卽革職以便提省飭審如查有誑報邀功及有意逗留留情事再行從嚴參辦以肅軍政謹會同署提臣塔齊

布恭摺具

奏伏乞

皇上聖鑒訓示謹

奏

咸豐四年七月初八日拜發奉

硃批另有旨欽此



請留廢員差委摺

奏爲廢員人材可惜懇留差委事竊前署道州知州王揆一因咸豐二年四月逆匪攻撲道州帶兵防堵之丁憂提督余萬清潛啓西門將防兵帶去逆賊從西門搶入王揆一急督兵勇截擊受傷未死憤激投河經紳民陳立紀等撈救得生當經前大學士臣賽尚阿審驗屬實並將該員署篆數年頗有循聲民情愛戴聲明請將該革員發往軍台效力贖罪嗣經部臣議奏王揆一因提督余萬清開門走出未向該員告知被

賊匪闖入城內該員率眾禦賊身受多傷雖非該員貽誤究屬失守城池至該大臣所奏該員頗有循聲民情愛戴等語乃守土職官分所當然不得以此減罪臣等公同酌議王揆一應改依被賊攻陷城池守土州縣擬斬監候例上量減一等擬以杖一百流三千里仍從重發往新疆效力贖罪欽奉

硃批王揆一著發往新疆效力贖罪欽此因未奉部覆尚未起解旋據該廢員報捐銀三千兩懇免

發遣經臣附片

奏請欽奉

硃批不准留遣亦不准報捐以杜僥倖該部知道欽此  
臣竊維王揆一失守城池厥咎甚重我

皇上特允部臣所請發往新疆於嚴譴之中已寓未減之意無非以道州失守實由余萬清畏賊棄城開門潛遁該廢員事出倉卒擊賊受傷鄉民力救得生與尋常失守城池官吏究屬有閒姑從量減之議以持情法之平

聖意高深權衡至當臣何敢復行瀆請自取愆尤顧念王揆一失守之故與尋常州縣不同而平日



居官之優亦與尋常州縣迥異亦有不敢不據實直陳者臣自前任湖南巡撫時諭知該廢員在道州署任內甚洽輿情上年蒙

恩復任湖南接見僚屬士民無不爲該廢員極口痛惜者前該廢員報捐銀三千兩卽係道州紳民湊集代爲呈繳其素得民心可知道州孤城斗大當劇寇長驅深入之時危城可保與否本難逆料然非余萬清開門潛逃逆賊何能奪門直入至今該州紳民尚謂余萬清不走道州可望完全其詞雖未可信以爲真然該廢員以失守

被罪則實余萬清有以致之臣曾傳見該廢員  
驗其左胸左脇傷痕鱗比委係當時禦賊被  
傷賽尚阿原奏本屬實情余萬清既蒙  
恩待罪江南該廢員亦蒙

恩遣戍塞外江南與塞外同一效力之場而失守與  
潛逃亦在罪均之列仰懇

逾格鴻慈將王揆一暫留於湖南軍營差遣倘該廢  
員既蒙

聖主再造之恩尚不知奮勉圖報卽謹遵

前旨發往新疆亦未爲晚似此可爲循良之勸而亦

不致開僥倖之門伏乞

聖裁至湖南各州縣城先後失陷該管各上司俱奉嚴旨降革內有永州府知府徐嘉瑞一員因所屬道州江華永明失守該員係不同城知府部議照例革職臣查徐嘉瑞操守謹嚴老成樸實爲知府中不可多得之員自粵賊竄楚以來永州首當其衝該員和輯兵民嬰城固守殺賊多名賊知城堅難犯援兵將到遂繞由陸路狂竄道州永州府城賴以保全無失上年該員署理衡永郴桂道篆正當會匪土匪四起之時該員遇警

或調兵勇掩擊或親往督剿辦理俱合機宜所屬會盜各匪旋起旋滅該員亦著有微勞可否將該員處分寬免留於湖南委用之處出自

天恩 臣於湖南獲咎各員中獨於徐嘉瑞王揆一兩員叩懇

恩施者因湖南一省適當多事之秋靖內訌而禦外寇固賴武員之奮勇驅除尤賴文員之撫綏安輯守令中人材難得每一缺需員委署

臣與藩

臬兩司詳加遴選求其愜心當意者十難一二誠以地方安危全在守令使守令不得其人則

有事之處不能無事無事之處且將有事所係  
實非淺鮮該革員徐嘉瑞廢員王揆一久任湖  
南地方官聲風著是以不揣冒昧妄爲瀆請倘  
存見好屬員之心不特深負

高厚鴻恩且亦何顏立諸僚屬士庶之上愚昧之見  
謹據實直陳伏乞

皇上聖鑒訓示施行謹

奏

咸豐四年閏七月初十日拜發奉

硃批另有旨欽此

通籌防剿大局謹擬製辦船礮摺

奏爲通籌防剿大局謹擬製辦船礮以固本省藩  
籬而資大營接濟現飭紳民設局捐辦仰祈

聖鑒事竊逆賊本年三次上竄疊經官軍竭力攻剿  
仰仗

皇上威靈將士忠勇奮發水陸連獲大捷餘賊喪膽  
下竄湖南地方一律肅清提臣塔齊布革職前

禮部侍郎臣曾國藩卽當遵

旨整軍東下臣前奉

諭旨任楚鄂交界地方妥籌防堵仰見我

皇上洞燭幾先通籌東南大局必上游水陸諸軍隨  
剿隨進而後江面之肅清可期必岳州地界防  
守嚴密而後楚蜀滇黔兩粵無虞而東下之水  
陸兩軍餉道亦可無梗

聖謨廣運欽服難名竊維天下大局西北之形勢在  
陸利用車馬東南之形勢在水利用舟楫自逆  
賊狂竄以來糜爛數省瀕水郡縣生靈受其荼  
毒擄脅日衆兇燄日張所以縱橫恣肆未能  
其衝突者賊掠取江湖舟艦以數萬計長江數  
千里民船爲空沿江險要均爲賊踞一旦順風

揚帆伺便狎至官軍有陸路而無水師來莫拒而去莫追以致坐受其困自奉

明詔籌辦舟師始有湘潭岳州諸大捷逆賊大股剿敗疆圉危而復安此則舟師協剿之明效也

臣

維楚鄂交界險要地方無過岳州城北十五里之城陵磯荆河口兩處而兩處對岸相距不逾十里湖南全境之水入湖由城陵磯而入江四川全境之水入江由荆河口而東下水道守此湖南一省固可無虞卽湖北之荊州宜昌以及入川水路均可控扼所謂地有必爭者此也然



欲於此設防爲重扼上流之計自不得不籌備  
水師欲籌備水師自不得不籌備船礮兼購木  
解以重其險此防守要隘所宜預爲籌及者也  
且賊勢猶盛賊船復多非節節攻剿不能以次  
收廓清之效臣曾國藩所統水師船礮本不爲  
多七月十六日登州鎮臣陳輝龍接仗失利所  
失船礮不少雖經臣曾國藩多方整理漸已復  
振然戰船時須修脩船礮械時須添補備攻剿喫  
緊之際一物不備恐致坐失機宜此又接濟大  
營所宜預爲籌及者也湖南頻年以來兵端疊

起軍餉浩繁庫款久空專盼捐輸接濟雖明知製船鑄礮爲今日萬不可緩之舉而力艱時絀興辦爲難兼之紳民捐輸籌餉之外又有捐輸城工及本地團練經費一戶數捐筋力俱乏未可強以所難正在再四籌畫之時連日接見在籍前翰林院侍講學士丁善慶前工部員外郎陳本欽同知銜卽選知縣唐際盛鹽提舉銜舉人李槩等談及防剿大局亟宜製備船礮意見僉同該紳等均稱水陸官軍旣連獲大捷正宜及時妥籌防剿以期保衛鄉里協濟樓船稍紓

聖主宵旰憂勤之意惟洋礮一項未請作法前蒙奏  
調浙江候補知縣龔振麟及其子之棠如能速  
携鐵模來南固可卽由紳局捐資鑄造倘來此  
需時誠恐緩不及急卽由官咨催廣東採辦夷  
礮以濟急需至製船工料併旂幟軍械一切均  
由紳設局捐辦釐造大小戰船百餘隻如捐項  
較多再行添造現在一面採購船料擇吉興工  
一面分投勸捐以期迅速臣查該紳等當茲餉  
需匱乏之時猶能力肩重在倡義集貲捐辦實  
爲難得湖南民風敦樸風重節槩卽此可見上

年曾奉

諭旨紳民人等情願僱備船礮隨同剿賊著該督撫等隨時保奏獎勵今該紳民捐貲監造更與僱備不同可否仰懇

天恩俟船礮造成估驗合用卽照籌餉例給與各捐生獎敘以昭激勸出自

鴻施此項船礮旣由紳捐辦將來自應免其造冊報銷容臣於專案

奏獎時再爲聲明所有遵

旨防堵勸諭捐辦船礮原由謹會同革職前禮部侍

郎臣曾國藩由驛陳

奏伏乞

皇上聖鑒訓示施行謹

奏

咸豐四年閏七月十六日拜發奉

硃批另有旨欽此

請留胡臬司駐守岳州片

再欽奉

諭旨湖南省雖無賊蹤而岳州一郡屢陷屢復幾爲  
該逆去來自由之地著駱秉章迅飭胡林翼督帶  
練勇嚴密籌防仍竭力搜捕餘匪俾地方一律肅  
清毋致再有疏失仰見我

皇上聖慮周詳無遠不照誠以岳州一郡地踞上游  
爲楚蜀滇黔兩粵六省必爭之要地且水陸兩  
軍指日東下所有餉需軍裝器械及添補戰船  
添調兵勇水陸兩道皆須從岳州經過是岳州

一郡不獨六省藩籬抑係大軍根本臣所以擬增水陸兵勇籌備船礮木簞俾成雄鎮者非徒以嚴西南之防亦所以壯東南之勢也臣未奉

諭旨之先已飛調新任四川臬司胡林翼帶勇馳赴

岳州相機防剿擬將來水陸各兵勇赴岳後一

併歸其統帶前接曾國藩檄稱擬奏調胡林翼

帶勇東下臣比答以岳州緊要胡林翼不可隨

往頃接曾國藩本月十一日螺山舟次來咨并

手檄知臣復檄未到之先已於本月初九日附

片

奏明請

旨飭令該臬司管帶黔勇酌撥他路兵勇自成一隊

隨同東征

臣

維胡林翼以文臣兼嫻武略帶勇

隨征固可期其得力但岳州關係甚大必須重  
兵駐守始爲計出萬全且武漢各府州縣久淪  
於賊土匪四處蠶起又民俗波靡逆賊至則蓄  
髮輸貲官兵來則雍頭求免民情甚不可恃兼  
之江西界連之武甯縣義甯州等處匪黨未就  
殲除本省之巴陵臨湘華容餘匪尚須搜剿此  
次大軍東下利在遄行原不暇久留鎮壓設使



大軍東下之後餘匪復肆鴟張或逆賊乘我軍後路空虛間道抄襲致大營糧台聲息中梗所關殊非細故頻年逆賊縱橫兇燄日熾經湘潭岳州屢次大捷大局甫有轉機豈可稍涉疏虞自貽伊戚湖南官紳兵勇之曾經戰陣者均已調赴東征若胡林翼又復帶勇隨征則岳州一軍更不可恃於大局實兩有所防臣愚昧之見胡林翼隨同東征不過多一起勁旅而以此時事勢言之則駐守岳州遙爲大軍聲援俾大軍無後顧之憂數省有藩籬之固尤於大局有裨

應仍遵前

旨飭令胡林翼駐岳籌防搜捕餘匪以期妥慎是否  
有當伏乞

聖裁謹

奏

咸豐四年閏七月十六日拜發奉

硃批另有旨欽此

屬方用左表前

甲寅上

三

參劾文武各員摺

奏爲參劾文武各員以肅吏治而飭戎行事竊維  
治民以察吏爲先治兵以選將爲要誠以患亂  
之生由於民情之不靖實由於吏治之不修入  
會習敎胥官謀逆者匪也好勇疾貧殺人行劫  
者盜也上失敎故民惑於邪說而會匪以生上  
失養故民迫於饑寒而盜賊以起此吏治之失  
於其始也匪與盜初起之時數健卒縛之而有  
餘乃丁役則有庇縱之弊官幕則畏辦案之煩  
以致族鄰恐其株連憂其報復則有隱匿之事

甚或正犯巧脫而累及平民匪黨誣攀而罪及原告是非顛倒無所適從小民畏匪盜之勢饑且相與暱而比之以倖旦夕之無故此吏治之失於其中也匪盜之勢雖熾然就一州一縣而論少或數百多或千餘止矣合其地良民計之奚止十倍於此夫以十之九之良民治十之一之匪盜宜若有餘而勢常不足者民與民勢不相屬故心不齊官與民情不相孚故事不舉富者吝其財貧者吝其力言保甲言團練言併村結寨僅託虛文官非其人徒法何益此吏治之

失於其後也竊以爲安民莫先於察吏者此也  
兵有強有弱而其實無所謂強無所謂弱視其  
將領而已將領得人則廉以率屬而額可足勤  
以練兵而技可優忠義以倡其勇敢之氣而膽  
可壯否則兵有輕其將領之心而怯者亦驕兵  
有不顧其將領之心而驕者仍怯出隊則憂其  
怯歸營又苦其驕而兵乃不可用矣竊以爲治  
兵莫要於選將者此也 臣 渥蒙

恩命兩任湖南巡撫於所屬文武時常用心體察雖  
文員之實心勤民武職之整飭營務者亦尚有

之而闖葺不職者正復不少查新升岳常禮道  
謝鶴翎材質拘迂辦事竭蹶所轄地方與湖北  
接壤正值籌辦防剿諸務殷繁之際該員斷難  
望其勝任應請

旨以六部郎中改用歸部銓選新化縣知縣趙宗崙  
年力衰頹難期振作請卽勒令休致黔陽縣知  
縣彭寅庸懦無能諸務廢弛以致盜風日熾署  
嘉禾縣知縣永州府經歷紀煥詢麤率險戾與  
論譁然署桃源縣知縣候補通判樊涓樸猥鄙  
糊塗不堪造就均請

旨卽行革職靖州協副將李璋年力就衰請卽勒令  
休致提標都司署鎮筵遊擊景福愎而兼猾嗜  
好又多署永綏協副將撫標右營遊擊劉建綱  
性情卑鄙辦事廢疏該二員皆不能約束兵丁  
應請

旨卽行革職此外各員容臣與提臣及藩臬兩司逐  
一訪察隨時舉劾力挽頽風肅吏治而飭戎行  
以期仰副我

皇上矜寇安民之至意謹會同提臣塔齊布恭摺具  
奏伏祈



聖鑒訓示施行

會銜合併

奏

咸豐四年

硃批另有旨欽此

駱文忠公奏議卷之二目錄 湘中稿

甲寅下

兩廣匪徒滋擾南界籌防情形摺

東路官軍進克湖北通城片

湖口賊退無庸派兵赴江協勦片

調兵防剿粵匪情形摺

覆陳遵

旨調兵援粵片

籌辦戰船情形摺

覆陳逆首楊秀清實非楊大鵬之子片

平江紳民辦團出力請加學額摺

兩廣賊匪同時犯界各路均獲勝仗摺

詳陳兩粵賊情片

飭委紳士監造礮位片

兩廣匪徒滋擾南界籌防情形摺

奏爲兩廣匪徒滋擾現籌南界防堵情形由驛馳  
奏仰祈

聖鑒事竊湖南迤南一帶迫近兩粵永州一郡與粵  
西緊連郴州桂陽兩州與粵東接壤前據永州  
府屬永明江華江藍廳各文武稟報所轄地方  
與粵西交界各處時有鄰匪嘯聚出沒不常准  
廣西撫臣勞崇光移咨防堵臣當飛咨護永州  
鎮總兵朱瀚飭護中營遊擊駱元泰帶兵馳赴  
永明會同署守備向東昇督飭嚴防札調委員

王鑫管帶湘勇五百名馳赴江華一帶地方會同護遊擊周雲耀擇要防堵適郴州宜章桂陽興甯臨武各縣營紛紛稟報廣東韶州府屬仁化樂昌兩縣匪盜蜂起清遠英德乳源各縣均被賊擾匪徒有洪順洪忠義洪勝堂等名目號稱洪兵又據稟報探聞賊匪圍攻韶州府及連州三江營各城甚急廣東省城及佛山鎮地方匪徒聚衆滋擾勢頗猖獗自宜章桂陽以南道路梗阻文報不通月餘以來未接廣東督撫文移所有賊匪蹤跡及防剿事宜一切無從知悉

楚省郴桂各處時有好匪闖入屢經縣汛鄉團盤獲審明正法臣當札調保升遊擊李輔朝管帶楚勇九百名馳往防剿並以樂昌坪石連州星子及莽山等處匪衆嘯聚愈多切近楚界續調卽補知府王葆生統帶委員卽補府經歷周金城所練南勇一千六百名馳赴宜章桂陽臨武一帶督辦防剿李輔朝所帶楚勇並歸該守調遣以一事權臣維湖南郴桂地方與廣東州縣犬牙交錯廣東地方羣盜四起韶連以北與郴桂各屬道路四通官軍分布各隘則防不勝

防且兵分力單一處疎防各處卽爲奪氣不如  
厚集兵力扼要分駐多發哨探偵明各路賊蹤  
捲甲疾趨或迎截或要擊或兜剿臨時分遣方  
操勝算一面督飭各屬激勵鄉團遇有賊至一  
面據險守禦一面飛稟領兵各員星馳夾剿宜  
章一路可以兼顧臨武桂陽一路可以兼顧興  
甯紳團任守官軍任戰如能聯絡一氣剿辦庶  
可得手惟是兩粵自金田逆賊滋事以來民風  
尤多不靖視劫殺爲故常等干戈如兒戲匪黨  
倏合倏分官軍旋撲旋起馴至蜂屯蟻聚良匪

難分現獲奸細各供均稱該匪等議由楚取道  
會合江南巨股各匪首亦有自江南潛歸四出  
勾結者是竄踞江南之賊一日不滅則南服一  
日不能救安而湖南一省適當其衝于大局尤  
有關係現在本省將領官紳兵勇之可用者已  
調隨塔齊布曾國藩水陸兩軍東下北路岳州  
既須籌防南路郴永又刻須準備軍務需人良  
材難得餉源告匱兵事方殷臣惟有殫盡血誠  
與所屬文武悉心籌畫以期稍裨大局仰紓  
宵旰憂勤所有南界籌防情形謹據實馳



奏伏乞

聖鑒訓示謹

奏

咸豐四年八月初十日拜發奉

硃批另有旨欽此

東路官軍進克湖北通城片

再

臣

前委管帶楚勇五品銜候選訓導江忠淑

管帶綏靖永順官兵守備徐統緒由平江進剿

崇通賊匪自五月初九日至二十九日大小十

一戰斃賊九百餘名生擒百餘名經

臣

附片

奏明以後官軍進逼通城立營城外該匪預燬城

外民房環城周掘重塹密釘竹簽爲負隅抗拒

之計官軍屢次攻撲賊匪固匿不出十七日忽

分股前撲營盤江忠淑等亦分隊抵禦勇目鄢

世堂唐遠祚等首先陷陣斃賊數十名賊卽敗

卻回城徐統緒帶兵由右路乘勝追剿擬徑奪門直入詎料賊匪於西門預行伏匿俟官兵逼近壕內伏賊突出徐統緒被賊叢矛戳傷殞命署千總楊文元署把總王金福署外委楊登岸向前救護俱各登時陣亡並陣亡兵丁六十五名分帶楚勇議敘八品陳鳳舞帶勇馳救被賊矛傷左腿楚勇陣亡十數名力戰不退將徐統緒屍身搶回賊仍收隊入城不出此六月十七日先勝後挫之實在情形也委員補用知縣陳鑑源在乎江聞敗星夜馳赴通城大營乎江舉

人何忠駿生員勞崇策亦各帶勇繼至十九日  
賊復分路來撲營盤被官軍團勇擊退殺賊四  
十餘名生擒十一名臣當添派升用知縣趙啓  
玉帶楚勇八百名馳往援剿尚未到營七月初  
四日賊復分數路前來撲營並潛分一路從幕  
橋抄出營後江忠淑等及平江團紳督勇分路  
抵禦先將營後一股擊敗合力痛剿轟斃賊匪  
三百餘名陣斬長髮賊目十餘名初十日官軍  
分路攻撲城垣適賊匪亦分路來撲楚勇及平  
江各勇分路抄截斃賊四百餘名內有執大黃

旂賊目四名自此兩戰之後兇鋒大挫該匪等復招致崇陽通山各賊數千列營城北趙啓玉帶勇適至官軍聲威益壯十八十九二十二一連日鏖戰復斃賊七百餘名內滿髮三名長髮十餘名二十五二十七二十八日三戰亦擒斬二百餘名二十九日賊匪大隊齊出江忠淑趙啓玉及平江團紳等督勇嚴陣以待俟其撲近鎗礮齊施斃賊約一百餘名奇兵從後抄出斃賊百餘賊陣大亂陣斬偽軍師蔡姓逆目廖四廖六等賊自是不敢復出崇陽通山之賊聞

岳州官軍水陸大捷畏官軍由臨湘蒲圻扼其歸路黑夜潛竄奔回舊巢自此通城賊勢益孤閏七月初五初六等日官軍兩次出隊賊於城上施放鎗礮仍不敢出初七日半夜賊開城由北路潛遁江忠淑等偵知派勇四路截擊斃賊三百餘名奪門直入復斃賊百餘名生擒八十餘名奪獲抬鎗鳥鎗木礮旂幟甲仗等件不計其數米二千餘石通計自六月十七至閏七月初八大小二十餘戰斃賊二千餘名兵勇陣亡者一百三十餘名受傷者七十餘名此迭次攻

剿克復通城之實在情形也現在通城股匪倏分倏合者約尚有數起人數約二千有餘亟應次第剿滅免滋後患江忠淑在營感受濕熱患痢甚重臣已飭令歸籍調理聞該員之兄江忠濟患病漸愈札調來營接帶楚勇其江忠濟未到營之前卽札委趙啓玉暫行管帶一面偵探賊蹤相機剿辦一面嚴督該縣紳民速辦團練以別良匪而杜亂萌其竄回崇陽之賊現淮提臣塔齊布三品頂帶曾國藩函開經委員羅澤南迭次進剿獲勝料崇陽克復之期當亦不遠

所有通城剿賊陣亡之守備徐統緒奮勇直前  
遇賊被害實爲可惜應請

旨交部從優議卹以慰忠魂署千總楊文元署把總  
王金福署外委楊登岸三弁救護主將同時被  
害亦堪憫惻請卽照署任

賜卹以昭激勸其在事出力各紳勇可否容  
以示鼓勵之處伏候  
核保

訓示施行謹

奏

咸豐四年八月初十日拜發奉



硃批另有旨欽此

湖口賊退無庸派兵赴江協剿片

再八月初二日承准軍機大臣字寄咸豐四年  
閏七月十九日奉

上諭據陳啓邁奏逆匪竄擾吳城建昌逼近省城兵力不敷調遣請飭湖南仍令上年來江助剿之官紳朱孫詒羅澤南等管帶兵勇前來協剿等語江西賊勢披猖省垣兵力單薄急須鄰省分兵援救著駱秉章迅卽選派三四千名馳赴江西以資接應惟現在朱孫詒羅澤南皆帶兵勇隨同剿賊甚爲得力該二員能否派往著該撫酌量緩急妥籌

辦理如實在不能分撥卽著另揀得力員弁管帶所抽官兵迅速馳往江西協剿毋稍遲緩致誤事機將此由六百里加緊諭令知之欽此查江西撫

臣陳啓邁前此抄奏移咨正值官軍剿賊岳州

水陸大捷羅澤南先經臣札調管帶所募湘勇

赴岳隨同塔齊布進剿正值得手之時未便調

赴江西朱孫詒亦經臣委署寶慶府知府附

奏在案該員自上年帶勇援剿江西事竣回楚所部各勇俱已撤遣歸農自委署寶慶以來所屬武岡新化州縣與辰沅交界各處因常德失陷

土匪蜂起正在搜捕喫緊亦未便遽易生手且該員既無親信練勇臨時招集馳往亦屬無益正躊躇間適接醴陵瀏陽平江各屬探稟逆船旋復退出湖口江西地方安堵如故與本省差探相同是江西毋庸分兵協剿可知查湖南與江西唇齒相依苟本省兵力可分自應通融籌辦在江西謂之協剿在湖南卽謂之分防本無自分畛域之理上年湖南赴援江西兵勇多至數千經臣挑選派往尚爲得力此時則調撥頻煩勢難兼顧且兵勇強弱專視督帶之人又必

督帶兵勇之人與兵勇兩相習熟然後可期得力若雜湊成軍漫然調遣不但虛糜餉項行裝且或致失利損威所關尤非淺鮮臣不敢潦草塞責致重愆尤所有湖南兵勇無可分遣及江西無庸協剿緣由理合附片覆

奏伏乞

聖鑒訓示謹

奏

咸豐四年八月初十日拜發奉

硃批知道了欽此

調兵防剿粵匪情形摺

奏爲廣西股匪攻撲全州調撥兵勇防剿並各縣  
剿辦隣匪小獲勝仗恭摺由驛馳

奏仰祈

聖鑒事竊廣西地方匪盜蜂起前經

奏明在案據護永州鎮總兵朱瀚署永州知府黃  
文琛馳稟八月十八日廣西恭城股匪竄入灌  
陽縣居民慘遭焚劫聲言由全州入楚旋據全  
州文武飛稟該匪現已竄入全州境內據探報  
全灌交界之官塘並全州屬之恩鄉文家村等

處均被搶掠嘯聚愈多又據零陵縣知縣胡廷槐稟稱該匪先踞石塘墟全州文武帶兵勇往剿失利該匪於二十八日分兩股一由宅田尾一由水南渡攻撲全州該州兵勇單薄飛函乞援等情臣維湖南永州一郡三面均接廣西其江華永明江藍廳嶺東營界外均屬粵境均有隣匪窺伺臣前曾札飭護永州游擊周雲耀駱元泰守備向東昇各募壯勇五百名勤加訓練以資防剿復調前保升同知直隸州王鑫管帶湘勇五百名赴江藍廳嶺東營一帶協剿茲復

據報該匪攻撲全州全州雖屬粵境然壤接零陵爲楚粵水陸衝途自全州以北至永地勢平夷難以控扼前年大股賊匪卽由此竄楚是全州地方不獨粵西要隘亦湖南勢所必爭當派省城防兵千餘員名交都司蘇元林統帶赴永並飭王鑫帶勇策應又飛飭道州紳士都司銜陳立紀將前飭募赴岳州府之勇六百名暫赴永郡新甯縣紳士候補知府江忠濟暫將募赴岳州之楚勇亦就近改赴東安聽候調遣隨據永州府稟稱署祁陽縣知縣楊鼎勛擬挑該縣



團勇五百

增派練勇

勇到齊甯

州文武開

城出擊適

力攻剿該

河鷹嘴地

或扼要設

辦理此防

帶界連處

廳同知顏培稟護遊擊周雲耀兩次會稟桂嶺  
禾洞各匪竄伺邊界經該文武督帶兵勇擊退  
生擒匪黨廖乎高張喜保李有義等正法又據  
稟報閏七月十七日禾洞匪徒竄近楚界北石  
關外委唐榮光會同團紳汪際唐等截擊斃賊  
二十餘名奪獲紅旂二面腰刀紅巾等件署守  
備賀炳翊又斃賊七八名生擒匪徒鄔榮奎林  
石生兩名正法二十六日蓮花匪徒竄至邊界  
之杉木關周雲耀賀炳翊顏培稟領兵勇團勇  
分路掩襲斃賊二十餘名生擒匪徒顏亞能歐

陽新劉新右溫亞發等正法奪獲黃字清字旂  
幟各一合洪勝堂旂一面紅布號衣刀矛鳥鎗  
腰牌等件八月二十三日賀炳翊偵知廣東股  
匪分竄至大禾坪地方卽率兵丁團勇出境追  
剿至彭田地方斃賊數十名陣斬執旂賊目一  
名奪獲洪勝堂大旂盈字日字等號小旂十餘  
面生擒匪徒賴亞運鄧萬興二名簾牌鳥鎗刀  
矛等件匪衆敗遁復跟蹤追至荒山賊黨避匿  
民房賀炳翊縱火延燒又斃賊數十始收隊回  
卡其永明縣屬龍虎關地方與廣西富川賀縣

連界自六七月以來時有遊匪或二三千一股或數百一股不時往來窺伺該處地勢險峻團勇尚稱得力賊匪不敢輕入於八月二十六日突有匪衆二千餘分三路潛來團紳義之訓等率團衆立將騎馬匪首殺斃生擒二名賊卽驚遁計永州一府地方界連兩廣各處防不勝防而全州至永州一路尤爲南界門戶現在兵力漸集當可無虞臣惟有隨時督飭文武相機防剿以期力遏兇鋒所有調撥兵勇各緣由謹會同兼署湖廣督臣楊需署提臣多順恭摺由驛

馳

奏伏乞

皇上聖鑒訓示施行謹

奏

咸豐四年九月十一日拜發奉

硃批覽奏起援獲勝各情均悉仍應不分畛域趕緊  
會合剿除欽此

覆陳遵

旨調兵援粵片

再臣於八月十七日承准軍機大臣字寄奉

上諭葉名琛柏貴奏粵匪猖獗請調兵會剿一摺粵東股匪於六七月間先後攻陷惠來高明順德肇慶城池該省兵力不敷攻剿情形萬分吃緊著駱秉章于辰沅兵丁內抽撥一千名迅卽選派得力鎮將管帶配齊軍火器械星夜馳赴廣東省城聽候該督撫調遣毋稍遲悞將此由六百里加緊諭令知之欽此臣維廣東自六月以後匪盜四起省

門之外各州縣市鎮處處有賊屯聚商賈絕迹  
文報不通前據委帶壯勇防堵南界之現補常  
德府知府王葆生稟稱迭據探報廣東城外之  
匪經官軍剿擊漸次解散水師提臣帶領戰船  
駐紮新會縣地方佛山鎮之匪亦漸解散由省  
北至韶州府城道路漸通現在攻撲韶州府城  
之賊約有二萬餘人屯踞北路界連湖南之樂  
昌仁化兩縣及連州等城三江星子平石等市  
鎮仍被賊踞韶州官軍雖近聞數獲勝仗而楚  
粵往來之道仍節節梗阻臣籍隸廣州府花縣

亦已數月不得家書道路傳聞之詞鮮得真確  
臣于欽奉

諭旨後卽檄調辰沅兵千名前往會剿惟湖南兵丁  
頻年征調四出行伍空虛武職實缺乏員多係  
越級遞署綏靖鎮總兵補授南韶連鎮總兵多  
順現署湖南提督鎮筸鎮總兵文安聞患足疾  
尚未就痊永州鎮總兵現係沅州協副將朱瀚  
護理永州現值防剿吃緊之際未便派往各副  
將中求其曾經行陣膽技兼優者實亦難得其  
人貿然調遣不但虛糜可惜亦恐貽誤事機查



由辰沅調赴之兵仍須由省經過臣擬俟彼時  
察看南界情形再爲酌派以期得力粵東匪盜  
既多韶州以北與該省聲息不通楚兵援粵須  
節節攻剿始能逕達韶關韶州廓清始能前抵  
省會

諭調兵丁千名恐尚形單薄容臣相酌機宜隨時具  
奏請

旨所有遵

旨調兵赴粵援剿原由理合先行覆

奏伏候

訓示施行謹

奏

咸豐四年九月十一日拜發奉

硃批所辦尚是若有妥員可兼護提督仍應飭多順  
赴粵方好欽此



籌辦戰船情形摺

奏爲遵

旨速備戰船謹將籌辦情形

奏祈

聖鑒事竊照

臣

于九月初一日承准軍機大臣字寄

咸豐四年八月二十二日奉

上諭自逆匪竄踞金陵分擾揚鎮繼復攻陷安慶廬州等處蹂躪再及武漢長江之險半爲賊佔皆由我軍僅能扼截陸路水師戰船不敷堵剿以致賊匪橫行江面恣其奔突近來紅單艇冒各船漸集

瓜州等處卽獲勝仗向榮所派之兵亦收復太平  
進剿至采石磯以下湖南會國藩統帶兵船現擬  
沿江東下直抵金口距武昌僅六十里是剿賊兼  
賴水軍已有明效惟近日逆賊竄近江西並恐另  
股由池州甯國進犯徽州窺伺浙境武漢以下金  
陵以上如安慶九江等處居中扼要之地尚無戰  
艦阻當亟應廣籌製造上年曾諭四川湖廣等處  
僱匠造船嗣因張亮基賂秉章奏業已估買江船  
鈞鈞等船是以僅令裕瑞籌助經費現在江面更  
爲喫緊四川地方完善多產材木購料興工較爲

便易著裕瑞督飭湖北藩司夏廷樾辦理戰船以資攻勦或在川購造或但購材木籌撥銀兩帶赴湖南製造與駱秉章迅速商辦前據駱秉章奏該員已由辰沅赴川此項戰船如由川之涪江取徑辰沅勢在曾國藩之後若由夔巫上游徑赴荆江直逼漢水當可與曾國藩會合俟江漢道通即可節節攻剿截斷九江安慶兩路賊船著裕瑞與夏廷樾悉心籌議將如何辦理之處迅速具奏至湖南應備船礮前經紳士丁善慶等設局捐辦著卽趕緊添造多多益善駱秉章務飭該紳士等分投

勸捐庶可多修戰艦肅清江面以慰朕念將此由  
六百里加緊諭知裕瑞駱秉章等並傳諭夏廷樾  
知之欽此

臣

跪誦之下仰見我

皇上聖謨廣運實握制勝之機當卽恭錄

寄諭飭在籍紳士前翰林院侍講學士丁善慶等迅  
速督工製造旋據該紳等呈稱已趕造大板艇  
五十隻計日可竣其長龍快蟹等船材木業經  
購齊亦可接續監造現在分途勸捐務期多爲  
籌辦以資接濟

臣

復飭該紳等乘此時天氣晴

暖須監督工匠妥速造辦復札委長沙府知府

倉景恬卽補知府裕麟常川催督以期周妥竊維水師戰艦以堅固便捷爲要而二者不可得兼求其堅固則木料取其厚油艙取其頻釘鉄取其密可矣然船式不合往往笨滯而不靈求其靈便則頭尾取其銳而昂船身取其長而削船底取其狹而尖可矣然船質太輕往往震動而不穩曾國藩自上年冬間奉

旨籌備舟師于造船一事實嘗專心研究臣亦嘗往復參求得其梗槩論造船之精妙雖篙師船戶之說亦人人殊然總其大要則購材宜審船式



宜精監造實在得人工料不可太省數語盡之  
現在紳局所造卽依會國藩所定之式該紳等  
駐工監造每船用費增至兩培木材均採自乾  
州廳一帶似尚堅實合用臣當隨時再行驗視  
查江南水師取勝者以紅單拖罟兩種湖南水  
師取勝者以三板長龍快蟹三種各有所長而  
亦各有所短紅單拖罟體勢壯濶安礮最多屹  
立江中儼若礮臺賊用所擄民船百不當一此  
其所長也然能乘順風而不能逆風能馳騁  
江面而不能窮搜港汊此又其所短三板長龍

利在輕捷能往來縈繞于千艘萬船之中分途抄擊拋擲火器延燒賊艦又能窮搜港汊使賊舟無所藏匿逆風不大遲往速歸尤爲所便惟風急水溜船一下不能復上賊或聚船環攻三板長龍勢散力單每易致挫長沙岳州靖港搗鼓臺兩敗均以風色太利反致失機此又其所短也大約紅單拖罟船質堅固氣勢完壯礮多兵衆每易立功三板長龍則全仗士卒勇猛操駕迅捷乃可制勝現在江南師船已近采石若湖南師船能仗

天威得速抵九江安慶將各處賊船全行掃蕩與江南師船會合彼此各有攸宜賊船實可焚擊淨盡賊船既盡則接濟斷絕必將由陸路衝突而江南澤國非陸賊所宜聚而殲旃似非難事此誠不可再失之機會也惟水戰制勝之具在船而亦在礮臣前與曾國藩

奏催廣東夷礮現在廣東寇盜充斥道路梗塞斷難續解赴楚前此

奏調浙江知縣龔振麟及其子之棠攜帶鐵模來楚鑄礮准浙江撫臣來咨僅遣委員甯瑄帶龔

振麟家人前來此時尚未見到臣又咨催該撫

臣札委龔之棠多帶鐵模來南試鑄庶可以速

補遲伏懇

勅下浙江撫

臣

迅催甯塏及龔之棠星夜趲程前來

以資鑄造配用俾無貽悞至四川多產材木就近購料修造戰船本爲甚便查湖南辰沅一帶無水路可通四川戰船總須沿江而下此時節交霜降水涸灘乾節節阻滯不但澁瀨瞿塘古稱奇險將來戰船造成未知能否安穩徑達木筏笨重亦恐滯碍不前此王濬樓船所爲必須

乘夏水始能從益州直下也伏讀

聖諭飭裕瑞督飭湖北藩司夏廷樾辦理戰船或在  
川購造或但購材木籌撥銀兩帶赴湖南與  
臣  
迅速商辦

聖明實已早慮及此頃夏廷樾於未奉

諭旨留川之先已由西陽折回湖南未便仍赴四川  
督辦致多周折昨與該升司面商據云四川船  
匠恐未能熟諳請戰船程式購料來南製造亦未  
免曠日持久現在湖南木料尚可採辦似不若  
卽在湖南購料興修駕赴大營較爲徑捷但須

四川籌款速解以便趕緊辦理並據該司面稟  
在西陽時曾稟四川督臣裕瑞請寬籌銀一二  
十萬兩解南以資大營接濟如此項先到即可  
暫行挪動數萬兩購料興工臣查該司服官湖  
南最久于地方情形極爲熟悉辦理戰船與紳  
局互相講求自可期其妥善但戰船應備器具  
欸目繁瑣不但軍械旂幟帳棚應爲籌辦卽水  
勇在船一切尋常日用之物一事不全卽不應  
手所有戰船各項應有器具自應概歸該司夏  
廷樾一手經理川省亦應寬爲籌款以便預備

此時賊蹤已遠該省防江之兵想已裁撤經費  
節省籌畫或尚非難惟有仰懇

天恩迅飭四川督臣趕緊籌辦以濟全局愚昧之見  
是否有當伏乞

皇上聖鑒訓示施行謹

奏

咸豐四年九月十一日拜發奉

硃批知道了夏廷樾已令赴湖北藩司任矣欽此

覆陳逆

再臣前

諭旨本日據

名籍隸湖

父楊大鵬

語著駱秉

首楊秀清

拏到省盡

掘焚燒以

齊布並傳



榔桂道張丞實親往未陽縣密查逆首楊秀清  
是否楊大鵬之子並楊大鵬有無子姪親屬在  
外年久未歸之人密速稟覆旋據稟稱奉委後  
遵卽馳抵該縣查楊大鵬本姓歐陽係未陽西  
鄉啞子山人其弟楊大鴻楊大鳩與楊大鵬之  
子石俵二俵均已照例緣坐所撫異姓子鍾紹  
宗當經解省釋回歸宗隨經確切密查該逆楊  
大鵬並無另有子姪親屬在外數年未歸之人  
往勘該縣西鄉啞子山卽瓦子山係歐陽族人  
世居之所檢查譜系該逆楊大鵬自其本身上

五代均係獨子單傳至該逆始有同胞兄弟均經查辦並無餘孽差傳族長里隣查訊該與譜載相符又查三角坪在該縣北門城外僅止楊平龍一戶在彼居住父子四人其子均幼現在家耕種生理調核宗譜並無楊秀清之名是逆首楊秀清實非楊大鵬之子確有可信據該護道稟稱離三角坪不遠蘇家巷地方有民人梁永泰聞查辦嚴緊具稟稱民現年六十九歲元娶楊氏于嘉慶十八年生子宗清乳名禾乃楊氏故後續娶嚴氏宗清不聽教訓于道光十九

年逃去在外至今杳無音信恐其流而爲匪懇求關拘究辦以免後累當詢署耒陽縣知縣張濟遠據云該民素稱良善現據該地方保充團長其子宗清逃去在外爲匪與否實無確據

臣

於接到張丞稟後復密飭衡陽縣教諭吳宏燾就近改裝易服潛往該處詳細查訪惟逆首楊秀清前據逆犯洪大全供係廣東人湖南屢次生擒匪黨有供稱該首逆係廣西鐘人者亦有供稱廣東人者該逆黨堅交秘不但其的實姓名不可得詳卽籍貫亦無指實要之非楊大

鵬之子則斷無可疑至該民人梁永泰之子梁宗清是否流入匪黨尚未可知安可以影響疑似之談遽行提省質問致無辜枉受株連擬俟吳宏燾確切查詢明白後再行分別辦理事關重大臣自當詳慎酌辦斷不敢掉以輕心謹據實覆

奏伏乞

聖鑒訓示謹

奏

咸豐四年九月十一日拜發奉

硃批知道了去歲該逆自添禾乃師僞號如此相似  
著切實根究據實密奏梁永泰呈訴之語顯係畏  
罪自首欽此

平江紳民辦團出力請加學額摺

奏爲平江縣紳民捐辦團防出力請

旨賞加文武學額作爲永遠定額以昭激勸仰祈

聖鑒事竊臣前准兵部侍郎銜臣曾國藩咨開竊照

湖南自辦防剿以來各屬紳民莫不同仇敵愾  
而其始終不懈功在大局者惟平江爲最著查

該縣爲省城門戶毗連湖北通城江西義甯萬  
載及本省之長沙湘陰瀏陽巴陵臨湘八州縣  
自前年八月逆匪圍撲省城距縣界止數十里  
該縣官紳卽設局團練督勇守界緝拿奸細歷

數月無搬徙之民無搶劫之案迨岳州破陷全屬震動巴陵土匪晏仲武等聚衆數千人境搶掠該紳民堵界殺賊晝夜提防兩月之久旋值瀏陽徵義堂匪滋事裹衆萬餘緊逼該縣南界縣民無入匪者該紳民分途守隘殺斃多名上年二月通城何葛墩逆匪滋事與該縣北界緊連各紳民協力堵禦將犯界之賊殺退五月內賊圍江西有由平江醴陵兩路直犯長沙之意該縣東鄉龍門廠與義甯州接壤適當孔道又金雞坊等處路徑分歧南鄉火子坳與萬載毗

連在在告警該紳勇  
後始行解嚴本年五  
遭蹂躪土匪勾結外  
黃棠伍市等處均經  
之戰二十日有新市  
股之賊冀從平江直  
仙人石一帶適當其  
兵迭勝各團紳皆督  
岑川四月初四日崇  
渠登時擊退自後九



箭樓嘴等處大小十餘戰無役不從此該團堵  
界殺賊之戰功也至三月十二日崇陽石子灣  
之捷五六兩月通城接仗共十一次該團勇均  
能出境助陣實爲他屬所難能四月初八日由  
長樂追賊至虹橋圍燒潘姓大宅斃賊尤多此  
該團越境剿賊之戰功也凡此各戰功均據該  
署縣及帶兵委員通稟在案目下尙未撤防且  
正在喫緊之際該縣距省最近鄰境八州縣半  
屬瘡痍惟該縣安堵如故合計四鄉練勇不下  
二萬人旂幟軍械稱是不獨本境無土匪卽外

匪亦不敢肆擾屏蔽省垣有關大局至歷年經費各團公捐公用數逾鉅萬其繳入縣局者據前任知縣林源恩稟報共四萬餘串之多除捐款較多之周鏞等三名外餘俱未邀議敘現在該署縣汪敷灝續行勸捐人情復甚踴躍歷屆錢漕均無蒂欠自非民風淳古士習端方不能得此成效必須破格請獎方足以昭激勸而樹風聲前奉

上諭凡捐輸巨款者准按數增加學額今該縣紳民好義急公歷久罔懈爲湖南各州縣之冠較僅

皇朝文獻通考卷之三百一十五 甲寅下  
三十一  
以捐輸出力者尤爲不同兼以文風素盛原額  
十二名每有遺珠之嘆擬卽會摺

奏請

特旨賞加文武學額永著爲例以爲深明大義者勸  
俾各屬聞風興起於人情風俗時務裨益均非  
淺鮮其學額應加若干名請由臣酌定等因到

臣准此當經咨商學臣旋准咨覆查平江縣應  
考人數頗多文風亦好茲該縣紳民捐輸鉅萬  
越境殺賊急公好義實屬可嘉自應

奏請照大學十五名之例加文武學額各二名等

因到臣准此又經行據藩司徐有壬兼署臬司  
長秀會核議詳前來臣伏查前准禮部咨議奏  
咸豐二年粵匪竄擾湖南圍撲省城紳民竭力  
捍禦轉危爲安均屬可嘉將長沙府學加文武  
童取進學額各三名附郭之長沙善化二縣學  
各加文武童取進學額各二名均作爲永遠定  
額統於咸豐四年科試爲始各按照加額名數  
取進等因於咸豐三年九月二十三日奉  
旨依議欽此欽遵各在案今平江縣切近湖北崇陽  
通城二縣今春崇寇熾窺伺平江該縣餉絀

兵單幾瀕於危幸賴該縣紳民辦理團練歷久  
罔懈均能賈勇抵禦每戰必捷又能越境殺賊  
直薄通城之下使賊望風披靡且捐輸數逾鉅  
萬錢漕亦無蒂欠洵屬踴躍急公深明大義允  
宜破格請獎相應

奏明請

旨賞加平江縣文武學額各三名作為永遠定額以  
昭激勸除咨禮兵二部外謹會同督臣楊霽學  
政臣劉崐兵部侍郎臣曾國藩恭摺具

奏伏乞

皇上聖鑒勅部議覆施行謹

奏

咸豐四年十月

日拜發奉

硃批該部議奏欽此



兩廣賊匪同時犯界各路均獲勝仗摺

奏爲兩廣賊匪同時犯界各路均獲勝仗賊匪竄  
撲道州甯遠臨武藍山各州縣城垣經官軍擊  
退解圍大獲勝仗並現在防剿情形恭摺由驛  
馳

奏仰祈

聖鑒事竊照廣東廣西匪盜蜂起莠民從亂如歸莫  
延日廣湖南迤南一帶跨連兩粵不但宜章零  
陵爲入粵衝途卽永州府郴州桂陽州所屬各  
州縣處處毗連處處有賊每股多者或數千或



萬餘少者亦以千數百計而皆以應援江南大股逆賊爲名紅衣黃巾效賊裝束同時並起勢甚披猖嚴郴桂之防則零道恐其闌入益零道之守則郴桂復慮乘虛當茲水陸兩軍乘勝東下之時兵勇征調已煩餉需轉輸已竭事端迭起羽檄交馳實亦應接不暇臣察度情形調募兵勇分駐永郴兩路並飭各屬文武會督紳勇竭力嚴防小警則各守各境大警則各路領兵文武就近馳援務期調發迅速而緩急適中事機扼要嚴防而遠近得以兼顧所有布置情形

曾經

奏明在案賊之從廣東仁化犯桂陽縣者署知縣  
吳清鵠把總李正鈞於八月十七二十三二十  
七等日會督楚粵團紳於楓門坳界頭隘輪子  
坳太平墟等處擊退陣斬賊目蒙如英廖昌興  
黃心喜僧法祥及賊黨袁懷清等十餘名斃賊  
共二百餘名奪獲旂幟軍械數百件該縣有險  
可據團衆齊心賊亦不敢輕入其由廣東樂昌  
乳源兩縣窺宜章縣者八月初八日宜章團紳  
張選明等於臘園背斃賊百餘斬賊目一名生

擒二十餘名奪獲大紅旗一面小紅旗四十餘  
面子母礮三尊虎蹲礮一尊偽印十顆逆書三  
本軍械百數十件賊由乳源縣梅寮地方竄逸  
管帶楚勇卽選游擊李輔朝知縣王宏謨署守  
備張正陞等繼至生擒賊首鄭光洪並獲賊目  
廖大隆等五名正法九月初七日乳源賊勾結  
梅寮賊竄至樂昌縣王舖洞李輔朝督同張正  
陞外委蕭祖星等分路迎剿南勇爭先陷陣斃  
執大旗賊目三名生擒十餘名斬首三百餘級  
奪獲抬鎗籐牌軍械數百件二十四二十六兩

日李輔朝帶領楚勇會督乳源縣團紳傅培周  
宜章縣團紳張選明等在鳳頭嶺張家冲等處  
擊賊共斃賊四百餘名奪獲大旂八面小旂五  
十餘面偽印四顆鎗礮簾牌無數陣亡楚勇百  
長藍翎把總周興朝其由廣東連州星子入犯  
臨武縣境者八月二十二日九月初二十一等  
日卽補府經歷周金城帶領南勇會同巡檢駱  
鑿署參將趙永年等在臨武縣屬之何家巷龍  
水大坳等處剿賊獲勝共斃賊二百餘名生擒  
賊目偽總管陳永年偽總領彭永年偽千戶彭

新明等數名及賊黨謝二舉等數十名奪獲紅  
巾旂幟軍械三百餘件十六日賊復竄踞蝦公  
井村莊周金城帶南勇分三隊出擊賊衆二千  
餘抵死抗拒周金城飭勇圍蹙逼入村莊舉火  
延燒賊冒火衝突南勇及臨武縣營兵勇把隘  
截殺斃賊一千餘名斬首二百三十七級生擒  
二十餘名奪獲旂幟軍械紅巾無數南勇陣亡  
二名受傷二十一一名二十四日午刻周金城復  
擊賊歐家灣殺賊二百餘名賊衆敗退南勇乘  
勝追擊復斃賊多名突遇伏賊陣亡南勇十一

名受傷四十餘名二十五日午刻賊由星子市  
傾巢入犯先分股數千牽制周金城南勇營盤  
一股由土橋直撲臨武縣城該知縣盧肇煦署  
臨武營參將趙永年預飭兵勇偃旂息鼓誘賊  
近城是夜二鼓賊至直撲縣城西南隅城上火  
光突發喊聲震天礮石如雨賊匪死傷枕藉天  
明見城上旂幟森嚴始行却退盧肇煦等督率  
兵勇開城追擊斃賊二百餘名生擒賊目歐陽  
忿勇等八名奪獲黃緞黃旂數十件大礮三尊  
籐籐鳥鎗刀矛多件陣亡官兵二名受傷七名

其竄過星塘坪者周金城督勇截擊斃賊數百  
名生擒偽總管何萬福等十九名奪獲大小黃  
旗四十餘面偽總管及洪勝堂印各一顆軍械  
各數十件此郴桂一路防剿廣東賊匪迭獲勝  
仗及臨武縣城解圍殺賊之實在情形也賊之  
從廣西灌陽入犯道州者署知州馮崑盤獲奸  
細栢宗貴等九名知賊將糾眾來犯九月初十  
日率紳士都司銜陳立紀等帶勇迎勦甫至長  
田賊已大至馮崑督兵勇開放鎗礮斃賊百數  
十名墮水死者無數賊踞貓兒嶺馮崑收隊入

城次日賊衆直逼城下該州城大兵單馮崑同署遊擊周玉佩等激勵兵勇紳民分門固守斬匪目何賤苟家屬之係獄待質者梟示城上以絕內應賊衆往來攻擊紅衣黃巾繞城呼譟馮崑等憑城用礮轟擊斃賊百數十名內有騎馬賊目數名兇鋒稍挫賊衆退紫橋背街一帶復有執籐牌賊數百滾地而來署千總詹榮升推擲木石壓斃百餘名賊仍敗歸橋背街是夜復搬運木梯數十架內薄城垣城土拋擲火礮石子擊斃數十名奪梯縋入十二日賊衆復分三



股每股約二千餘人一撲小西門一撲北門一撲西門均經擊退十三日賊復僞裝官軍赴援揚旂鼓譟而至馮崑訶知其詐開礮轟擊賊仍敗退十六日辰刻護永州鎮總兵朱瀚署永州府知府黃文琛商派護遊擊駱元泰管帶兵丁四百八十名赴援行至州城北五里亭遇賊接仗斃賊數十名陣亡外委蔣景亨及兵勇十餘名駱元泰力督兵勇繼進適臣派遣援勦之千總陸文德帶兵五百踵至會合將賊擊退遂同入城十七日巳刻升用游擊蘇元林帶兵五百

及調到武岡營弁兵永州所募鄉勇共千名亦  
至行至蛇皮渡遇賊接仗失利陣亡兵勇十餘  
名蘇元林退至濂濤灣是日未刻管帶湘勇已  
革同知直隸州知州王鑫護永州遊擊周雲耀  
自江華馳至出賊不意分路直搗橋背賊巢預  
派後哨湘勇設伏山下防賊抄襲賊果分兩路  
拒敵一股從街後抄出王鑫周雲耀各當一路  
直前搏戰賊衆悉力抗禦礮石如雨簾牌刀矛  
飛奔齊進王鑫身受鎗子傷三處周雲耀身受  
鎗子傷一處裏創血戰壯氣彌厲兵勇感奮立

斬兇悍騎馬賊目數人六品軍功王開炳劉開  
酌童生王開化百長張福田易普照等率兩哨  
湘勇橫躍入陣截斃賊匪百餘名生擒十餘名  
其從街後抄出一股約千餘人六品軍功張運  
蘭同哨長賀長春突出奮擊擒斬騎馬當先賊  
目一名連斃悍賊三十餘名生擒二名賊敗歸  
巢張福田易普照帶勇衝入賊巢生擒頭戴黃  
風帽賊目二名百長張廣勝六品軍功楊邦傑  
率勇自陣後衝出斃賊數十楊邦傑自首至足  
創痕幾遍猶持刀大呼殺賊回營力絕而死是

役也王鑫周雲耀以數百兵勇殺兇悍之賊二百餘人負重創者約數百人奪獲鑲黃大旗一面太平後營龍鳳旗一面偽太平天國將軍劉大黃旗一面公義堂旗太平後營旗朱洪英大黃旗共數十面大礮二尊抬礮鳥鎗刀矛藤牌紅巾號衣無數而兵丁陣亡二名受重傷者十餘名湘勇陣亡十餘名受重傷者至七十餘名之多其苦戰可想賊見官軍驍勇善戰賊目傷斃者多卽夤夜解圍西竄一股約千餘人潛由蔣家嶺至上江墟勾結本地土匪將乘虛襲踞

江華縣城王鑫周雲耀偵知遂由間道一晝夜  
行一百四十五里於二十二日五鼓行抵江華  
縣城偵賊至城外三里亭卽會同營縣督兵勇  
迎擊賊衆駭懼失措周雲耀挺矛大呼陷陣兵  
勇縱擊斃賊二百餘名生擒賊目謝邦甲蔣文  
異及餘黨十餘名奪獲太平後營黃旗十餘面  
馬五匹子母礮兩尊鳥鎗三十餘桿拍礮十四  
桿火藥旂幟多件餘賊四竄道州紳士陳立紀  
帶勇要擊擒賊百餘名適永明縣龍虎關外報  
有廣西恭城灌陽城匪及道州竄出之賊在界

外粟木地方勾結股匪人數聚至數千將竄入永明王鑫周雲耀遂由江華拔營馳往截剿其復由灌陽繞道零陵縣水口山一股連日勾結土匪約千餘人護永州鎮總兵朱瀚署永州州知府黃文琛商派護遊擊駱元泰管帶兵勇八百餘名二十九日馳往水口山進剿十月初一日巳刻賊分三路抗拒駱元泰率兵勇當其中路零陵縣訓導舒時煜署外委方振鵬率兵勇當其左署外委左光藻勇目劉士啓武生張顯祖率兵勇當其右駱元泰舒時煜身先士卒手

又騎馬賊目三人賊遂敗潰官軍乘勝追殺直  
過黃花嶺殺賊三百餘名呈驗髮辮三百一十  
五具奪獲抬鎗三桿鳥槍三十桿大紅旂四面  
黃紅白小旂八十餘面簾牌七面刀矛一百七  
十九件生擒賊黨二十五名餘匪翻山竄逸官  
軍兵勇並無傷亡初五日王鑫周雲耀率兵勇  
會集永明團勇數千出關剿賊已刻行近栗木  
地方飭永明武生周友豹湘勇王明輝率勇前  
往誘賊出巢預分兵勇爲兩翼伏於山坡左右  
又伏兵勇於坡後以待賊始遲疑不出但匿民

房開放鎗礮既見周文豹  
擊周文豹王明輝僞敗誘  
後兵勇突出彼此轟擊良  
王鑫周雲耀率兩路伏兵  
亦率勇戰而前斃賊二百  
始紛紛潰走然猶隨追隨  
鑫令兵勇散爲十數路步  
稻草一束遇幽僻處輒舉  
隊而走王鑫周雲耀率兵  
賊衆狂奔退入栗木街兵



燒其冒火逃竄者兵勇追斬之共燒斃者千餘名陣斬六七百名生擒七十餘名拔出被擄婦女五十餘名奪獲賊馬六七十匹牛二百餘頭大礮十五尊抬鎗五十四桿大黃旗九十餘面軍械無數兵勇無一傷亡者其由道州江華竄逸之賊連日四出勾結在甯遠縣屬水打鋪天堂墟兩河口一帶擄掠裹脅該知縣劉如玉會商守備王綏國於九月二十八日派委把總黎景星督同紳士駱時凱周承謨武生駱逢恩等帶領兵勇進剿行至拱橋頭遇賊接仗衆寡不

敵黎景星挺身格鬪登時陣亡周承謨亦被重創大小源汎把總黎景章帶兵馳至與駱時凱等合力堵擊斃賊二十餘名生擒賊目歐達毛賊始却退復竄該縣平田村柏家坪禮灣等處大肆焚掠會匪頭目楊得金自灌陽潛回糾合黨男二千四百人附之廣東東陂觀會匪二百餘亦潛入助道賊勢益熾知縣劉如玉先後盤獲奸細龔貴保賴污箕等七名審知賊情飛稟告急初六日卯刻賊衆蜂至四面攻撲劉如玉會集營汎紳民登陴固守礮斃賊匪約近百名

丙有騎馬賊目二名是夜密遣兵勇縋城焚燒城外民房斃賊不知其數初七初八初九等日賊結營城外山坡更番出隊攻撲城垣城上礮石轟擊每次斃賊各數十名初十日辰刻賊衆分撲四門甚急忽東南兩面賊營火起呼聲震山谷城下賊衆鼠竄探報王鑫周雲耀自永明關外剿賊凱旋聞甯遠被圍星夜馳至賊祇聞永州兵勇赴援不虞永明官軍從南路突至也驚懼不知所措王鑫周雲耀縱兵勇痛擊劉如玉卽飭紳士劉懷玉劉緒藜駱時凱率勇縋城

而下彼此夾擊復分路追殺數時間賊屍遍地約斃賊千數百名內戴黃風帽賊目三名紅風帽賊目五名生擒會匪頭目楊得金及賊黨四百五十三名奪獲太平後軍及朱洪英大小旂幟百數十面偽印妖書無數鎗礮刀矛亦無數是日紳團網送逃匪至縣正法者亦五百餘名其東北設伏阻遏援師之賊亦經護遊擊賂元泰千總陸文德分路搜剿初九初十等日共斃賊百數十名並生擒逆目何玉隴奪獲大小黃旂十餘面餘賊竄逸十一日賂元泰援師馳抵

縣城則圍解一日矣同時與甯遠藍山界連之  
嘉禾縣亦有奸匪縱火焚署監犯脫逃之事初  
九日署桂陽州知州梅震榮帶勇馳至適該匪  
糾衆撲城梅震榮督勇進勦飭署嘉禾縣知縣  
呂錫楨相機夾擊卽補知府王葆生飛調南勇  
四百名自臨武來援該■見援師遽至紛紛竄  
逸梅震榮呂錫楨率勇追捕斃匪百餘名生擒  
匪首蕭添學及黨夥三十七名餘匪由塘村墟  
仙人橋一帶竄逸十一日嘉禾縣屬蕭家村有  
賊千餘屯集嘉禾縣敗竄餘匪及道州甯遠逸

出餘匪亦往會合十二日巳刻王葆生所派軍  
功張宏勝陳正隆鄭德明等率南勇四旂掩至  
勇目李俊輝周玉圻周萃夫李友章尹泉發孫  
均陳貴等各踞山梁分隊圍勦斃賊二百餘名  
賊竄踞村莊南勇會合擄擊縱火延燒共斃賊  
數百名割取首級二百餘顆生擒四十餘名馬  
二匹奪獲洪順堂大旂一桿金蘭堂大旂一桿  
大小旂幟四十餘桿抬鎗四桿鳥鎗刀矛二百  
餘件火藥十二桶南勇陣亡一名受傷九名忽  
代理藍山縣知縣張嗣康飛報廣東東陂觀並

豐陽等堡賊衆由粵界雲霧洞翻山竄至將勾  
結甯遠土匪攻撲城池署臨武營參將趙永年  
急帶兵勇二百名及團紳羅耀南等馳赴縣城  
防守臣前以甯遠嘉禾藍山臨武一帶土匪素  
多恐廣東賊匪勾結爲患預調江忠濟及前永  
州府知府徐嘉瑞帶楚勇一千五百名由甯遠  
取道藍山相機防剿江忠濟甫於十二日馳抵  
甯遠卽於次日整隊馳赴藍山途間探聞藍山  
十二日有圍城之耗倍道疾進王鑫亦率湘勇  
同往王葆生亦飭南勇將嘉禾縣蕭家村股匪

剿畢赴援藍山未至之先代理知縣張嗣康率  
紳民登陣守禦于十二日將撲城之賊轟退斃  
賊數十名擒斬扒城之賊十二名賊衆退紮三  
里坪十四日巳刻江忠濟率楚勇王鑫率湘勇  
直抵藍山南勇亦從東北路飛奔前來遙見賊  
衆數千撲城甚急江忠濟卽派楚勇三百緝城  
而人以助防守一面親督百長出隊迎擊南勇  
亦鼓勇直前■斃賊二百數十名奪獲大小黃  
旂十六面刀矛叉鉞籐牌不計其數賊衆敗潰  
越溪而逃楚勇百長賈聯元率勇鳧水窮追遇



伏力戰手及數賊登時陣亡楚勇陣亡者十一名受重傷者數名十五日江忠濟率楚勇移營縣城西北門外高嶺王鑫率湘勇紮營縣城東門外高嶺十六日黎明賊分三路由東西北三面撲營狂呼鼓譟而來江忠濟王鑫飭各營歛兵勿動俟賊逼近而後擊之已而西北兩股果蜂擁齊進旛牌居前鎗礮刀矛繼進楚勇奮躍出營斫入賊陣斃賊百餘名陣斬偽統兵大元帥陳姓一名賊衆敗走復分三股駐紮山巔江忠濟督勇分三路仰攻賊衆不能抗拒復斃賊

六十餘名始紛紛潰竄奪獲偽統兵大元帥大  
旂一面大紅旗二十一面大黃旂十六面拍礮  
兩尊鳥鎗十五桿火藥三桶籐牌紅巾號衣無  
數而東路撲營之賊亦經王鏊擊斃數十名江  
忠濟復派勇夾剿又斃賊五十餘名生擒十三  
名奪獲大紅大黃旂十餘面刀矛軍械多件始  
行收隊賊之伏匿城外民房者軍功張宏勝率  
南勇縋城縱火燒斃多名是夜三鼓賊卽由廣  
東大路紛竄藍山圍解此永州一路防剿廣西  
賊匪迭獲大勝及道州甯遠殺賊解圍並援剿

藍山殺賊解圍之實在情形也現據各路探報  
湖南界內已無賊蹤惟廣東連州陽山三江營  
之賊會集切近楚界之星子司一帶賊數尚有  
萬餘廣西灌陽恭城之賊復窺永明富川賀縣  
之賊復窺江華江藍廳各處臣已飛飭江忠濟  
俟藍山搜剿事竣即馳赴臨武會同即選游擊  
李輔朝即補府經歷周金城防剿郴桂一路廣  
東入犯之賊並飛飭王鑫續募湘勇五百名會  
同護游擊周雲耀駱元泰等防剿永州一路廣  
西入犯之賊並令兩路察酌情形緩急彼此互

相策應復嚴飭道府州縣乘此兵威大振之時  
嚴諭團長戶長勒限緝送逃匪就地正法以靖  
內訌冀地方一律安堵隣匪迅速蕩平仰慰我  
皇上宵旰憂勤之意至此次南界軍務甚殷同時並  
急在事員弁及地方官且防且剿啓處不遑卒  
能掃蕩妖氛保固邊圉實屬著有微勞署道州  
知州慈利縣知縣馮崑循聲卓著臨事從容鎮  
定瞻識俱優甯遠縣知縣劉如玉廉明勤慎深  
得民心署臨武縣知縣盧肇煦甫履署任臨事  
瞻識俱壯代理藍山縣知縣卽補州同張嗣康

人尚明幹該員等此次保城殺賊不愧守土之  
官應請

優獎以資激勵馮崑請開缺以同知直隸州卽補先  
換頂戴並請

賞戴藍翎劉如玉請以同知直隸州補用先換頂戴  
盧肇煦請遇缺卽補並

賞加同知銜張嗣康請以知縣補用並

賞加同知銜管帶湘勇已革同知直隸州知州王鑫  
迭次奮勇出奇大獲勝仗義烈謀勇兼而有之  
該紳前因岳州剿賊輕進失利獲咎革職請開

復原官並

賞換花翎護永州左營遊擊嶺東營守備周雲耀忠  
勇廉正深得兵民之心每戰身先士卒出奇制  
勝口不言功實武職中傑出之材道州永明甯  
遠諸捷厥功甚著請以參將留於湖南補用並  
賞換花翎護永州中營遊擊升用守備駱元泰穩練  
勇往能得民心請以都司留於湖南遇缺卽補  
其餘實在出力之文武紳勇尚多可否容

明開單保

奏出自

天恩至陣亡之把總黎景星外委蔣景亨楚勇百長  
藍翎把總周興朝卽補把總賈聯元並請

旨交部照例賜卹以作士氣而勵戎行謹由驛具

奏伏乞

皇上聖鑒訓示施行謹

奏

咸豐四年十一月初二日拜發奉

硃批另有旨欽此

詳陳兩粵賊情片

再廣東自六月以來匪盜肆起自省城佛山鎮及三水清遠英德乳源曲江樂昌仁化抵湖南之宜章桂陽邊界自陽山連山連州抵湖南之臨武藍山邊界處處有賊分布水陸關隘不但官司文報不通卽商旅音書亦皆梗阻近據探報廣東省城大北門大東門外賊匪雖經官軍剿散而省城仍未解嚴八月二十六日官軍進剿順德縣踞城之賊九月杪尚未克復且傳聞有拖罟船被賊奪去之事近省之大瀝墟鄉團



尚強賊未敢犯餘則多被蹂躪其圍攻韶州府城一股九月初經南雄州募勇援剿斃賊甚多賊衆解圍退屯白土地方十月初七日韶州官軍進剿至烏石接仗失利聞賊現又圍撲府城其攻陷連州之賊探係該州壯勇頭目溫佑等爲首糾合會匪朱姓陳姓黨羽八九千僞稱統兵大元帥揚言首逆洪秀全約其起事並邀貓公山木坪兩處私梟共二萬餘人於閏七月二十三日攻陷三江城遊擊都司同時被害該逆等卽移三江城大礮攻撲連州八月初一日城

陷遊首溫佑等竊踞州城設立僞官佔據鹽埠  
招納黨羽連州所屬地方俱已淪陷昨竄撲臨  
武藍山卽是此股臣遵奉

上諭抽撥辰沅兵一千名已派署綏靖遊擊右營都  
司龍金源管帶於十月初四日由長沙馳赴韶  
州以資援勦前奉

硃批所辦尚是若有妥員可兼護提督應飭多順赴  
粵方好欽此臣維湖南一提三鎮提臣塔齊布旣  
帶兵東征現止鎮守總兵文安係實缺人員又  
久患足疾多願本係廣東南韶連鎮總兵原應

派其帶兵前往但該員未經行陣前接署提篆  
到省時臣數數面晤似其心地不甚明白且性  
耽翹彙實難放心通省武職不特鎮將乏人卽  
參遊都司俱係越級遞署且多未經行陣之員  
實屬無可派委又廣東廣西賊匪同時犯界雖  
迭經痛勦然耽耽窺伺股數實繁臣原擬增調  
兵勇馳援廣東此時邊患方殷東西並急未敢  
顧彼失此此粵東賊匪情形及調兵赴粵之原  
委也廣西一省匪盜之多與廣東無異籍隸廣  
西本省者謂之士碼兵燹之後田地荒蕪加以

近來土匪肆起大肆焚掠民人無所得食又無  
室廬可居遂至逼而從匪此其一種也鄉團良  
莠不一或挾嫌械鬪或貪財起釁彼此結黨爲  
奸無所忌畏馴至抗拒官兵攻陷州縣此又其  
一種也籍隸廣東者謂之廣碼廣東負山面海  
盜賊素多昔時官兵緝拏不敢公然抗拒每遇  
事急輒逃匿廣西結黨傳徒訂盟拜會其黨兇  
狠狡黠較土碼尤爲難治廣西自咸豐二年金  
田逆匪竄入湖南大軍跟蹤追剿大餉隨之廣  
西司庫一空無從設措各州縣多被殘破地丁

錢糧征納不前因軍餉之無資遂糜爛而莫救  
近聞廣碼一種並多散遣壯勇混跡其間勢更  
披猖股數難以枚舉臣前准廣西撫臣移咨借  
撥湖南庫銀三萬兩臣因東征兩軍大局所關  
前雖據實

奏明湖南供支大營水陸軍餉僅能截至九月嗣  
准會國藩迭次函咨江西陝西兩省籌撥大餉  
緩不濟急十月餉需無出仍須取給湖南臣當  
將南路郴桂永州一帶兵餉設法添措暫行挪  
移將東征十月分餉項陸續撥解而本省南路

兵餉缺乏已久刻須補發更何從籌款借撥廣  
西此又廣西賊匪情形及湖南無款借撥之實  
情也通計兩省大局糜沸不知伊於胡底在湖  
南固防不勝防在廣東廣西亦勦不勝勦臣惟  
有殫竭血誠隨時妥辦遇可相機助勦之處斷  
不敢稍分畛域置隣省休戚於不問亦不敢輕  
舉妄動致湖南全局復因越界而有疎失所有  
採防籌辦情形理合附片陳明伏乞

聖鑒訓示謹

奏

咸豐四年十一月初二日拜發奉

硃批另有旨欽此

飭委紳士監造礮位片

再湖南紳局捐辦船礮經

臣

奏明開局後該紳前翰林院侍讀學士丁善慶等  
卽多設船廠購料興工幸自秋徂冬天氣晴暖  
諸務易集在局各紳亦各併力催督實心經理  
事事求精已據丁善慶等呈開前後造成大三  
板七十隻長龍十隻所有需用器具雜物一律  
製備齊全現在趕造長龍快蟹等船務期刻日  
竣工以濟急用前准會國藩咨取大三板三十  
隻已派紳弁妥解至營交納茲復起解長龍十



隻大三板劈山礮三十四尊前往勘驗各船木料堅韌船身亦靈便合式並由紳局函致曾國藩如有須損益之處卽由曾國藩函知以便增改總期事有實濟克助軍威惟戰船所需礮位極多前次

奏調浙江委員龔振麟及其子之棠攜模來南鑄造當荷

俞允嗣浙江撫

臣

咨覆僅遣委員甯塏及龔振麟家

人朱姓前來

臣

屢次咨催總未見到昨十月二

十八日甯塏稟報到省

臣

詢以鑄礮事宜不甚

諸習水師爲東征大局所關船礮乃水師急務  
若令其輕爲嘗試貽誤堪虞查有紳士候選同  
知直隸州黃冕前在甘肅監製礮械出力經前  
署督臣林則徐保

奏嗣因咸豐二年賊犯長沙臣委該紳監造熟鐵

礮位礮身輕而膛口大擊遠有準長沙守城之  
礮多出其手實爲行軍利器但製熟鐵礮工價  
比較鑄生鐵礮費多而工遲蓋生鐵一鑄可成  
熟鐵必百鍊而始得也臣初意調龔振麟原望  
其早到開鑄得礮多而經費省今旣不能前來

正恐礙成而無可用徒耽時日而所費又覺虛  
糜現仍令黃冕一面多設爐座一面勸捐經費  
卽日興辦冀可以速補遲甯堪仍飭赴浙銷差  
免糜薪水理合附片陳明謹

奏

咸豐四年十一月初二日拜發奉

硃批知道了欽此

駱文忠公奏議卷之三目錄 湘中稿

乙卯上

永順奸匪撲城擒斬要犯首逆畏罪自盡摺

粵賊竄陷江藍廳城旋即收復片

覆陳兵丁疲乏難以赴黔片

鄂省兵潰賊竄漢口大局頓壞現籌防剿摺

請留發遣革員帶勇効力片

覆陳鄂督敗退武昌失守情形摺

請飭楊副將統領水師片

覆陳水師哨官乘亂搬搶餉銀片

廣東賊陷郴宜廣西賊陷東安衡陽武岡土匪  
響應剿辦情形摺

請調羅道一軍回湘防剿摺

援粵長沅兵丁回郴餉缺遇賊退走片

廣濟土匪脅從解散現在查緝首要各犯片

探報江南賊情片

逆船回竄籌辦情形摺

會鄂撫崇雙銜

覆陳武昌同知梅丞武昌失守並未在任片

委員持示偵探賊蹤解散脅從片

覆陳文道被參情由暫令蔣道署篆片

候選人員請留楚補用片



永順奸匪撲城擒斬要犯首逆畏罪自盡摺  
奏爲永順奸匪嘯聚攻撲府城經官兵擊退擒斬  
要犯多名首逆畏罪自盡現在搜剿餘匪恭摺  
奏祈

聖鑒事竊湖南永順一府地方自雍正年間改土歸  
流蒙業相安多歷年所永順桑植兩縣交界之  
泥湖塔塔臥堡兩處近因痞匪藉練團爲名往  
往恃衆抗官尋釁滋鬧二年七月間桑植縣民  
李老鍾等聚衆闖入縣城將前年計典被叅去  
任之知縣李朝廣戳傷致命之偏右右脇脊背



三處及不致命之右胳膊等處因傷重行至漕州永定縣斃命當經飭提聚眾滋鬧首先截傷李革令之犯李老鍾解省審辦並飭府縣搜拿餘黨十一月二十日革生彭蓋南在塔臥堡一帶潛糾痞棍吳和尚塗正路瞿三遠等乘署永順縣知縣孫翹澤在王村公幹未回突入府城搶掠府縣經歷衙署署永順府知府黃其表會同永順協副將愛紳帶兵役驅拿旋即四散彭蓋南等揚言大兵不日進剿須爲死裏求生之計塔臥堡內外龍堡顆砂堡及桑植之泥湖塔

等處愚民多被煽惑彭蓋南遂自稱珍明王詭  
托土司後裔多署僞官迫務鄉民聲言仍復土  
司故業二十三日率眾攻城焚燒城外民房火  
光燭天監犯莊世棟熊良柱張黃岡譚松兒瞿  
德成汪洪太乘變逸出二十四日黃其表愛紳  
商派永順協都司蔣培基開城擊賊鎗斃執旗  
賊目宋廷弼及匪黨十餘名賊勢稍卻蔣培基  
收隊回城失足落河淹斃是日署永順縣知縣  
孫翹澤由王村帶勇四百名回城署保靖營叅  
將任經元帶保靖兵三百名署保靖縣知縣張

准飭其子監生張世傑從九職銜羅淦屯外委  
羅應瓊募帶鄉勇二百名亦先後踵至守禦益  
固首逆彭蓋南同僞軍師宋朝武僞元帥瞿三  
遠塗正路等盤踞多男山二十九日首逆彭蓋  
南等復糾眾圍撲府城城上砲石雨下斃賊多  
名任經元張士傑督帶兵勇出城攻勦賊眾望  
風而靡任經元帶兵衝擊生擒僞先鋒吳和尙  
僞副元帥塗正興等三十餘名追斬百餘名奪  
獲鎗砲刀矛數十件餘匪退踞吊雞巖護辰沅  
永靖兵備道霍誥聞警卽調募漢士兵勇一千

四百名親自督帶馳赴保靖縣相機援勦逆目塗正路瞿三遠等赴各鄉村逼脅良民入夥鄉民知官軍四集賊勢已衰列崗崗士民卽將瞿三遠網送府城正法塗正路行至亂田溝亦被士民誘殺獻屍請驗首逆彭蓋南見人心不附同謀各犯多被擒斬又偵知漢士兵勇已齊抵府城震懼失措遂自縊死僞軍帥宋朝武欲自爲解脫之計負屍請功署永順府黃其表署永順縣孫翹澤驗明後剖屍梟示并將宋朝武拘禁一面飛稟止調各路官兵以節糜費臣前接

該府縣稟報賊匪滋事時卽札委護辰沅永靖兵備道翟誥統帶各路兵勇親臨督辦復因武

■委用乏人查有常澧失守案內之已革都司宋廣東技藝尙優已革前署澧州叅將張晰人尙明白飭令帶官兵三百八十名馳赴永定縣邊界防賊匪下竄常澧之路一面相機協勦并論知該革員等尙再不知奮勉立功卽當請

旨軍前正法復調把總張萬書外委鄒明英管帶健勇二百六十名馳赴保靖縣均聽翟誥調遣一面飭九谿營游擊侯鳳歧備兵聽調現據翟誥

稟報該員行抵永順府城卽監提僞軍師宋朝武正法探知首逆彭蓋南之義子吳廷有仍踞多男山而黃山坡劉家寨冷水澤溪大莊九關坪白蛇溪等處餘匪嘯聚尙各數百人永順府與湖北之施南府四川之西陽州本省之辰州常德澧州各屬壤地毘連巖壑深險逼近苗疆尙有紅匪黑匪出沒其間此次倡亂首從各犯雖擒斬細獻多名而餘黨竄伏山谷者實繁有徒且桑植滋事匪徒尙多未獲若官軍遽撤必至死灰復燃現在相機搜剿以絕根株

臣前次

接據該府協稟請止調官軍之時卽批飭其非  
仍札催該護道翟誥督帶兵勇前進妥速剿辦  
該護道所見適相符合蓋該處匪徒見時局紛  
紜本省調發頻煩不遑啓處竊意大兵不能分  
勦故敢妄肆鴟張臨之以重兵迫之以細獻或  
可期罪人斯得餘孽銷除免致重煩兵力辦理  
情形容俟隨時馳報所有永順滋事及首要各  
犯旋卽擒斬自盡現在籌辦緣由謹據實具

奏伏乞

聖鑒訓示施行謹

奏

咸豐五年正月初七日拜發奉

硃批勦辦情形續行奏聞欽此



源

源

五

粵賊竄陷江藍廳城旋即收復片

再十月十二日廣西清水賊匪勾結廣東連州賊匪三千餘人由黃竹寨竄逼江藍廳城時廳城存兵無多署守備賀炳翊往梅子岡一帶招募壯勇未回署江藍廳同知卽補通判顏培勳飛調團丁嬰城固守該匪分三股撲城顏培勳飭放守城大砲賊稍卻退旋踞城外之福至嶺俯瞰城中顏培勳急飭團丁出城逕撲賊營不防另股賊匪潛從東北角梯入城內百姓急扶顏培勳開南門出城退至城外五里鋪團丁羣

集適署江華縣知縣任立誠撥練勇二百名飛馳前來卽就地紮營賊分股攻撲均經擊退客商候選未入單永清客民張兆燮趙維俊鄒慶齡封國賢馮世昌捐資共募鄉勇六百名隨同勦賊顏培勳於十四日率壯勇奪踞福至嶺開袍向城轟擊圍紳汪際唐率團丁繼至賊以官軍四集棄城狂竄顏培勳卽率單永清汪際唐等跟蹤緊追至黃竹寨始行收隊沿途轟斃賊匪五十名擊斬百餘名生擒僞先鋒陳老五僞軍師何亞滿及龔一郎唐三唐亞興鍾鐵三關

亞會等十一名奪獲洪順堂紅緞大旗一面隨  
將廳城收復十二月初六日廣東賊匪復由毛  
氏塘竄至橫江分股竄往沂村顏培堽當調團  
丁六百名派兵五十名飭署黃竹寨汛額外六  
品軍功劉貴署高村汛額外韋鵬飛管帶先勦  
沂村之賊另募壯勇三百名分紮城中是日已  
刻橫江之匪竄至南門對河之大柳屯旋撲城  
垣顏培堽督率兵勇登陴守禦鎗砲齊施轟斃  
賊匪數十人適沂村之賊見兵勇大至旋卽遁  
走韋鵬飛劉貴追至大竹圍斃賊八名轟斃十

數名途間聞橫江之賊迫近廳城炮聲甚緊遂折回夾擊甫至大柳屯顏培稟在城上望見遂激勵兵勇由南門衝殺出城賊遂卻退韋鵬飛劉貴督兵勇追擊斃賊五十餘名奪獲小鎗刀矛令旗等件劉貴注意騎馬賊目奮勇直撲適馬蹄忽蹶該匪翻身轉鬪遂至被戕殞命顏培稟韋鵬飛合兵追逐至楚粵交界之西嶺地方始行收隊查點兵勇陣亡團丁九名此江藍廳被賊竄入旋即收復並二次守城擊賊之實在情形也臣查署江藍廳同知卽補通判顏培稟

前因粵賊滋擾一時疎於防範被賊竄入應卽  
撤任查辦惟該員於失守之後收集兵勇駐紮  
離城五里地方旋將廳城收復二次粵匪攻撲  
城垣又能守城殺賊功罪尙屬相抵應懇

皇上天恩免其查辦以昭平允署額外劉貴奮勇捐  
軀請

勅部照額外例賜卹惟查署中軍守備左哨千總賀  
炳翊當賊匪竄擾之時先日出城招募壯勇至  
十四日顏培鼎收復廳城該千總尙未帶勇前  
來其爲藉詞巧避已無可疑應請

馬  
旨革職以肅軍政謹附片陳明伏乞  
聖鑒施行謹

奏

咸豐五年正月初七日拜發奉

硃批另有旨欽此

覆陳兵丁疲乏難以赴黔片

再臣於上年十二月十五日承准軍機大臣字

寄咸豐四年十二月初四日奉

上諭據蔣蔚遠奏黔省勦匪吃緊請飭湖南省就近撥兵協濟等語現在貴州遵義地方勦辦匪徒極爲緊要安南普安二城雖經收復而興義安順等處土匪竊發尙多黔省兵力難分必須隣省派兵前往方足以資堵勦著賚章於近黔各營迅卽挑選兵勇一千餘名派委得力將弁統帶赴黔交蔣蔚遠調遣務卽刻日起程毋稍遲誤將此由六



百里加緊諭令知之欽此臣查湖南一省官兵除

調赴江南大營及東征水陸兩營外復遵

旨撥赴一千名馳援廣東現在本省行伍空虛實屬

無可派撥近黔之鎮筵綏靖各營弁兵軍興數

載調發頻煩現在存營兵丁多係由大營撤遣

回伍疲乏不堪且沾染軍營惡習已久驕怯難

用若勉強應調不但虛糜行裝鹽糧實爲可惜

且恐零星雜湊貽誤靡輕現在本省南路防勦

調兵僅止數百而鄉勇則多至數千永順與近

黔各營壤地毗連現在徵調赴援亦係勇多兵

少若使兵力可恃何須多調壯勇致多流弊此  
兵丁之無可調撥也至於壯勇之可用與否則  
專恃帶勇之人壯勇非如兵丁之久服營規頗  
難鈐束非得真能帶勇之人令其自募自練俾  
其卒長相習未可深恃而人才難得求其能管  
帶千人足當一面者所見亦罕本省南路現在  
帶勇各員臣亦嘗極意斟酌選擇而使然必謂  
其所向有功斷斷可恃臣亦未敢深信也黔民  
窮苦耐勞不乏可募之勇惟須慎選帶勇之人  
重以事權自可濟事臣前於胡林翼抵楚時卽

留心諮訪胡林翼極稱貴州文員韓超徐河清  
兩員人才實爲可用曾經指名

奏調來楚該省

奏留未遣昨於邊界探稟中知該兩員現在軍中

徐河清似亦曾獲勝仗想該撫臣亦知其材若

能令其自募自練別將一軍不爲人所牽制委  
任而責其成功亦可期其得力臣於該兩員並

未謀面不知其才畧何如然旣有所聞不敢不  
以入

告謹因本省兵勇無可調撥一併據實陳明伏乞

聖鑒謹

奏

咸豐五年正月初七日拜發奉

硃批另有旨欽此



鄂省兵潰賊竄漢口大局頓壞現籌防勦摺  
奏爲北省兵勇敢潰賊竄漢口大局頓壞現籌防  
勦情形恭摺由驛

奏祈

聖鑒事竊東征水陸兩軍自上年克復岳州後乘勝  
長驅所向克捷自田家鎮半面山水陸大勝後  
九江府城原可乘機克復因北岸廣濟黃梅賊  
勢尙盛北省兵勇不能得力塔齊布羅澤南等  
率諸軍繞渡北岸盡銳攻勦始克兩城賊以其  
暇得嚴密布置比塔齊布等回軍渡江則九江

已屹然堅城難以遽下矣曾國藩偵湖口以內賊船甚多江西戰船均爲賊奪慮其出江爲害卽分軍勦之是時黃梅又爲安慶之賊所陷九江對岸小池口一帶復有賊蹤曾國藩水師老營無陸軍夾護每被岸賊驚擾而所有三板戰船又已盡入湖口被賊沈塞冬令水枯急切不復得出以致有十二月二十五日劫營之挫北岸之賊自復陷黃梅後兇燄復熾北軍不能抵禦二十七二十九兩日連次失利督臣楊霽駐軍廣濟賊至卽潰正月初三日已退至黃州適

臣所遣解赴大營戰船水勇四百名行過武昌縣曾國藩所遣補用知府厲雲官亦於時繼至將率以前赴九江忽奉督臣札調令赴黃州堵禦比至則督臣又已退走初五日遂抵漢口矣督臣自武漢克復之後經曾國藩塔齊布等咨請入城非其本志其出也盡率兵勇萬餘以行武昌省會重地僅留逃潰疲弱之兵數百飭藩司夏廷樾等居守撫臣陶恩培到任甫數日一切未及布置當督臣退至漢口之時賊匪於初七日尾追而至至人民以事出倉卒扶老挈幼號



泣奔走情形極爲慘痛而督臣則又已不知退

駐何處矣厲雲官方率戰船往下游中途遇升

用道李孟羣相約回棹援鄂遂於初七日駛抵

城外之鮎魚套次日調赴大營之湖南永州府

知府張丞實亦奉曾國藩札率戰船駛赴武昌

阻江爲守賊未敢迫湖北臬司胡林翼亦帶勇

馳回救援倉卒之際皆未接據文報頃據平江

縣稟云賊匪大股均聚踞興國州其犯鄂無疑

鄂城餉竭兵空勢甚危急督臣所帶兵勇多已

潰散湖北大局敗壞之速竟至於此曾國藩塔

齊布糧台坐船多被燒毀軍實蕩然勢難驟振  
現尙未接函咨未知如何設措臣維湖北湖南  
水陸緊連勢同唇齒湖南本貧瘠之區又值兵  
燹之後東征之役官紳兵勇掃境以從軍火鹽  
糧悉索殆盡竭將士百戰之力甫將全楚肅清  
未及一旬大局復敗壞至此自去秋以來本省  
南路防勦兩粵之賊無日不事戒嚴搜除腹內  
之匪一時尙未就緒茲復值北路警報沓至時  
勢更非上年之比現一面抽調南路楚勇湘勇  
永勇赴省一面飭局趕造船砲一面飭北界各

府州縣督飭鄉團悉力固守一面添募壯勇爲  
援勦之計一俟諸務稍集卽當相機辦理所有  
探聞北路賊勢情形謹由驛馳

奏伏乞

皇上聖鑒訓示施行謹

奏

咸豐五年正月二十二日拜發奉

硃批知道了所造船砲仍應接濟曾國藩是爲至要  
欽此

請留發遣革員帶勇効力片

再臣前因保升副將周鳳山一營所募道勇自

克復武漢後多有因傷病告假歸籍者其本籍道州亦不乏曾經戰陣之人上年十二月底調募四百名赴省現因北路警報紛來亟應調其援剿惟該勇僅只勇目保升把總何紹彩一員管帶未免勇多官少難資鈐束正躊躇間該勇以前署該州知州王揆一在任素得民心懇請歸其管帶臣查王揆一係因道州失守革職發往新疆効力贖罪之人經臣於上年

奏留廢員差委摺內將原案聲明請

旨奉

上諭已革署道州知州王揆一於該州失守時率眾禦賊身受多傷經部議於斬罪上減等發往新疆効力贖罪已屬從輕王揆一著卽行發遣不准留營欽此

臣何敢再三瀆請自取愆尤願帶勇與帶兵不同非素識其才藝性情斷難期其用命湖南現在所用各勇係揀選本地官弁紳士管帶故能稍收實效王揆一年壯耐苦委帶道勇可期將卒相習合無仰懇

皇上天恩俯念軍務需人甚急准將革員王揆一暫  
停發遣留帶道勇以觀後效之處出自

聖裁理合附片具

奏伏乞

聖鑒訓示施行謹

奏

咸豐五年正月二十二日拜發奉

硃批王揆一獲罪甚大汝今又欲令其帶勇以觀後  
效預爲將來保舉地步著不准行帶勇或武弁或  
紳士皆可亦何必須一革員耶欽此



覆陳鄒督敗退武昌失守情形摺

奏爲遵

旨覆

奏事竊臣於三月十三日准兵部火票遞到軍機大臣字寄咸豐五年三月初三日奉

上諭本日據楊需奏稱武昌省城於上月十七日失守巡撫陶恩培等力竭捐軀覽奏殊深憤懣現據楊需奏胡林翼王國才石清吉等兵勇約計雖有六七千人惟糧餉缺乏急須接濟川陝各餉尙未解到賊眾兵單金口南岸恐難駐紮若湖南就近



可以接濟金口尚能駐紮則相機進剿若不能駐  
紮則設法渡江上扼漢川以固荆襄門戶等語著  
駱秉章悉心籌畫湖南兵勇倘有可抽撥卽當派  
委得力將弁管帶馳赴下游速爲援應所需糧餉  
就近設法接濟如或該省兵勇不敷抽撥而胡林  
翼等兵勇又復上扼漢川則金口一帶勢難兼顧  
恐逆匪乘虛上駛該省與湖北毘連在在可慮尤  
宜於南北交界處所水陸要隘加意嚴防毋得稍  
有疎懈將此由六百里加緊諭令知之欽此仰見

我

皇上通籌大局宵旰憂勤之至意臣前此接准北撫

臣

陶恩培械知鄂省情形卽籌撥餉項軍火並  
增募水勇千餘名配以戰船砲械資以鹽糧飭  
赴鄂省又因胡林翼一軍甚單飭駐岳防守之  
守備譚瓊林帶勇六百名及候補臬司魁聯於  
所帶楚寶各勇內抽撥五百名赴鄂助勦均經  
奏明在案嗣因逆匪勾結興國通山等縣賊匪竄  
擾崇陽通城分黨竄擾蒲圻窺伺南省之臨湘  
平江兩縣守備譚瓊林之勇未能卽進魁聯所  
帶之勇亦難以抽撥分擾蒲圻賊匪旋聚竄通

城三月十六二十兩日賊匪八九千人進撲平  
江縣北界上塔市營盤經臣預派管帶平勇五  
品銜卽選知縣何忠駿李源濬卽選訓導黃崇  
策卽選從九黃錫宇守備銜千總方城等會合  
練勇團勇兩次奮擊斃賊三百餘名生擒三十  
餘名內有僞指揮田士林一名滿髮賊一名僞  
指揮徐大志執令長髮賊饒敦五砲尉楊至傲  
僞先鋒楊時汰熊良鳳僞司馬僞兩司馬各一  
名立卽正法奪獲大砲五尊抬砲兩尊抬鎗二  
十五桿鳥鎗五十八桿鉛彈九桶火藥十五桶

黃馬褂二件刀矛黃巾旗幟不計其數賊匪敗後仍未遠竄現飭各界加意嚴防而催譙瓊林由臨湘星馳前進俟通城事定再添派勁旅赴鄂聽候胡林翼調遣北省水陸兩軍盼餉甚殷本省司庫早空無可接濟已撥糧道庫漕項銀一萬兩錢一萬串委永州府知府張丞實解往又代墊江西應解還湖北銀二萬兩委候補知府厲雲官解往並搭解軍火鍋帳等件凡水陸各勇由湖南赴鄂援勦者其口糧概由湖南支應合計解赴湖北款項已浮於督臣原咨三萬

馬之民名考商 乙卯上 才  
兩之數多矣但金口水陸各營每月需餉項六七萬之多湖南一省既無從剗肉以醫瘡金口諸軍亦終難望梅而止渴應請

勅下湖廣督

臣

荆州將軍四州總督源源接濟俾武

漢兩城迅速克復則湖北之幸亦東南大局之

幸也至督

臣

所慮金口不能駐紮胡林翼等應

設法渡江上扼漢川以固荆襄門戶奉

諭著

臣

悉心籌畫

臣

思督

臣

始終堅執者防賊北竄

四字以非竄之患倍重於南可藉以爲詞耳防賊北竄不能不歸重荆襄荆襄者南方可由之

以進窺陝豫北方可由此以窺矚江楚自漢魏六朝以迄宋元皆以荆襄爲重鎮蓋當南北割裂彼此爭戰之時其計不得不出於此若以現在形勢言之則江西湖南兩省雖屢被賊竄形勢猶完湖北安徽兩省皆有重兵討賊勝負尙未可知設使湖北水陸兩軍移駐漢川則長江千里盡委之賊其將置東南於不顧乎曾國藩塔齊布水陸兩軍隔在江西前後皆賊聲息中斷在在可危更何有直搗金陵之望此臣之所未解者一也移駐漢川亦祇能禦上竄襄陽之

賊其於荊州無足輕重逆賊水陸並進荊州門戶何存此臣之所未解者二也胡林翼等陸軍卽繞道上駐漢川水軍無所依附勢非退守監利之螺山岳州之南津港不可爲湖南門戶計尙未爲失然武漢黃各府豈可度外置之水軍旣去則武漢黃之克復無期此臣之所未解者三也督臣動謂賊衆兵單不思廣濟失利之初賊之前隊尾追督臣實不過千餘督臣麾下兵勇萬餘亦未爲少乃退黃州未一日卽退漢口退漢口一日卽退漢川由此而德安而隨州今

且退至棗陽矣是北竄者賊也引賊北竄者誰  
乎督臣以餉缺爲詞此日之餉誠絀矣不思自  
武漢克復之後督臣所用之餉不下二三十萬  
召募川楚無籍之徒臨時能得一割之用乎此  
輩散處民間姦淫擄掠無所不至沟沟之勢將  
何所底乃仍不知變計餉絀至此猶且隨意召  
募此臣之所未解者四也夫以形勢言之荊州  
據江水上游襄陽據漢水上游而武昌漢陽爲  
之鎖鑰是荆襄者中原之門戶而武漢者又荆  
襄之門戶也扼賊北竄必固荆襄欲保荆襄必



守武漢此固一定之局督臣既知北竄爲重何

以舍武漢不守而先顧荆襄既謂上扼漢川可

以固守荆襄門戶何以舍漢川不顧而節節退

走且胡林翼王國才等軍若不能克復漢陽又

何能設法繞道以進扼漢川武漢黃德既均未

克復胡林翼等縱能繞道而至漢川亦以孤軍

而駐於四面皆賊之地又何能爲荆襄門戶計

乎此臣之所未解者五也臣與督臣並未謀面

亦未嘗共事一方本無夙嫌祇以大局關係非

輕若不據實直陳於心實爲不忍臣自蒙

恩復任湖南巡撫以來鬚髮盡白咯血舊疾近益增劇僚屬紳民實所共睹雖值此時勢艱難萬不敢存乞休之想而自顧精力衰頹日甚一日職分應辦之事竭蹶不遑更何敢侈談大局特奉諭旨令臣悉心籌畫不得不披瀝愚忱是否有當伏乞

皇上聖鑒訓示謹

奏



請飭楊副將統領水師片

再水陸官軍之得力全在將領之得人將領既得其人尤必士卒素相親附其部曲均齊心并力然後可殺賊而立功水師一軍之陷入湖口者銳卒多而統馭之才少曾國藩既親往整理可期復整軍威其在外江現扼金口者士卒冗雜而營官亦覺太多彼此分屬等夷勢不相下自應選派統領以資督率聞前湖北撫

臣

奏請以廣西升用道李孟羣統領各營該員素懷忠孝膽略甚優原可期其勝任唯

臣

嘗留心體

察水師一軍多湖南人李孟羣所帶廣勇除傷  
病散遣外存營者不過數百名向與湖南水勇  
不相親附統領雖無彼此之分士卒終不免睽  
疑之見恐臨時調遣不能得力臣查現因傷病  
告假回籍調理之總兵銜常德協副將楊載福  
忠勇善戰自湘潭大捷以後轉戰千里每戰輒  
單舸衝入賊隊所向無前其人廉明樸訥素爲  
軍心所附與現在金口水營記名知府彭玉麟  
彼此忠義相許最稱契合若以該兩員統領外  
江水師則各營官士卒情意交孚勇氣自倍該

副將楊載福現經臣札調來省調養傷病就近

商辦水師事宜令其趕緊招集部曲臣一面飭

局紳修造戰船鑄製砲械俟該將病體小愈卽

督率師船東下援勦如能重清江面與曾國藩

湖口一軍會合則東南大局仍有轉機可否

飭令楊載福彭玉麟兩員統領外江水營仍歸曾國

藩節制之處伏候

聖裁至李孟羣所存廣勇人數無多應卽撤遣回籍

該員籍隸河南光州前安徽撫臣江忠源

奏調赴廬時原稱該員籍隸光固就近招募勁勇

必可得力昨准曾國藩移抄

奏稿亦有請

勅袁甲三增募光固勁勇出勦斬黃賊匪之議臣愚  
竊謂該員在廣西帶勇殺賊著有戰功原於陸  
路相宜廣勇既定議撤遣該員無須仍留水營  
卽請

勅令回光州本籍勸捐募勇或與袁甲三合或自爲  
一軍江北可添一枝勁旅一轉移閒水陸均可  
期其得力於大局似爲有裨是否有當伏候

訓示施行謹

奏

咸豐五年三月二十九日拜發奉

硃批楊載福仍可飭令統率師船速赴武昌軍營餘  
所奏俱不准欽此





覆陳水師哨官乘亂搬搶餉銀片

再前奉

寄諭據曾國藩塔齊布奏水營哨官乘亂搬搶銀兩  
請飭湖南巡撫嚴拿正法等語上年十二月二十  
五夜曾國藩等水營被賊匪用小划燒襲各戰船  
紛紛開動糧臺所僱之船無人看守右營哨官萬  
瑞書竟敢至糧臺空船搬搶銀兩嗣經永州府知  
府張丞實在萬瑞書船上搜出銀一千一百餘兩  
之多當此軍需支絀之際該弁膽敢乘亂搶竊實  
屬目無法紀據奏該弁已於正月初二日開船上

駛此時或在武漢或已回湖南均未可知著駱秉章迅派委員在水師營內及該弁湘陰原籍嚴拏萬瑞書到案卽行正法毋令漏網等因欽此臣比

密飭查拏旋據萬瑞書赴省投案據供上年十月二十五日賊匪用小划燒襲大營時戰船均開駛搶護惟各營坐船及糧臺笨重之船倉卒不能撐駕被賊放火延燒軍功救火回來見有糧臺船隻錨纜已斷洄流江面無人管駕隨卽上船看視見滿船載物狼籍中有皮包餉鞘並零星散銀一百餘兩恐爲賊得卽令各勇搬

回戰船因其時晝夜在船准備未敢輕離故未  
及隨時呈繳旋奉委員查點船砲當將搶護原  
銀繳出軍功若圖乘亂搬搶何敢停放船上等  
候搜查只求詳查實情聽候審辦等語臣當將  
該軍功飭司鎖押收禁一面密札各屬查拏乘  
亂搬搶銀錢潛逃歸籍之水勇已訪獲數起俟  
審錄供招起獲贓物卽行正法以示懲儆現因  
總兵銜常德協副將楊載福前在九江受傷患  
病告假赴省調治臣當面詢一切據云上年水  
營被賊燒襲之時伊已因病後打仗受傷告假

南歸該軍功萬瑞書是否搬搶糧臺銀兩無從  
知悉唯萬瑞書屢次打仗奮不顧身實所目覩  
臣以該軍功萬瑞書若果乘亂搬搶糧臺銀兩  
希圖入己固屬法所難寬雖平日打仗奮勇亦  
何能曲從原宥惟據所供各情較之搬搶潛逃  
者形跡雖同情節稍異既據投案赴審是否遵  
旨正法抑解交會國藩審明辦理伏候

聖裁謹覆

奏請

旨

咸豐五年三月二十九日拜發奉  
硃批著解歸會國藩軍營嚴訊欽此

新編 日本書紀

乙部上

三

廣東賊陷郴宜廣西賊陷東安衡陽武岡土匪  
響應勦辦情形摺

奏爲兩廣賊匪同時犯楚廣東之賊先後竄陷宜  
章郴州廣西之賊竄陷東安官軍攻勦互有勝  
負衡陽縣武岡州土匪乘機響應旋即撲滅現  
在籌辦情形恭摺由驛馳

奏仰祈

聖鑒事竊廣東羣盜蜂起攻城掠野所在皆然自本  
年入春以來該省軍威漸振以次搜勦於是各  
路賊匪相率奔竄湖南三月二十一日及二十



三等日湖南之桂陽廣東之仁化兩縣團紳孫承城劉廷英鄧國忠等會攻仁化踞城之賊擒斬僞知縣陳姓陣斬先鋒賊曾姓李姓等斃賊近千名收復仁化縣城僞大元帥曾佳及賊目李芷香等帶傷逃匿桂陽縣境魚王山及仁化縣界之青雲坳署桂陽縣知縣吳清鵬督同團紳孫承城於四月初九日將曾佳等擒獲並起獲廣東賊目何祿等往來書信知廣東佛山蘆包白土中宿各處及三水英德清遠曲江樂昌乳源等縣賊將分起北竄帶勇委員趙啓玉由

平石拔營十五日行抵廣東樂昌縣屬青草嶺  
謀先奪九峯之險扼之適樂昌賊首葛姓及鄧  
象王二潮陳受等率眾萬餘先夕已竄過九峯  
趙啓玉紮營未定郴州千總蕭紹鈴帶勇二百  
先往覘賊遇賊接仗小有斬獲被賊圍裏趙啓  
玉卽派勇七百馳往援之其地羣山攢繞路徑  
分歧官軍且剿且進賊匪隨敗隨伏彌山遍嶺  
四望皆紅黃旂幟帶勇守備黃輔鼎縱橫血戰  
身受十數創與蕭紹鈴奪路而出各勇尙未歸  
營賊已分路狂竄直逼趙啓玉營盤壓壘而陣

趙啓玉守營壯勇僅數百名加以長夫及隨征  
團勇人數不過千餘趙啓玉督令輪流轟擊賊  
之逼近營牆者刀斫矛戳斃賊甚多自十五日  
酉刻至十六日巳刻勢漸不支各弁勇強扶趙  
啓玉上馬衝殺潰圍而出趙啓玉厲聲叱之無  
何兩營被賊攻陷趙啓玉仍督勇裹創血戰手  
及數賊壯氣彌厲忽賊噴筒四注火飛入營羣  
賊乘勢躍入趙啓玉聲被數十創力戰陣亡叅  
將李輔朝時在宜章聞警倍道馳援則賊眾重  
重圍迫已無及矣趙啓玉旣全軍失利楚勇竇

勇陣亡至數百之多柳州宜章各營聞之未免  
奪氣臣以賊勢方張飛調通判周金城率南勇  
全軍由桂陽縣間道馳往援勦並以廣東韶關  
解圍調回援韶之署遊擊龍金源統帶辰沅五  
營兵千名由韶回郴助勦賊自攻破趙啓玉營  
盤後復勾結韶州匪黨進犯宜章二十一日分  
股由三鞏橋白石渡竄入卽補道王葆生所帶  
虎威勇李輔朝所帶楚廣各勇迎擊五退五進  
擒斬頗多賊殊死拒不退白沙巡檢謝德慶率  
團勇直前搏戰被賊叢矛攢刺陣亡團勇登時

潰散各勇前聞趙啓玉一軍失利銳氣頓減此  
次見團勇潰散亦紛紛卻退王葆生李輔朝嚴  
督不止其由白石渡竄入一股叅將積拉明阿  
署宜章縣知縣陳秀芝帶兵勇迎擊亦先勝後  
敗賊由五里沖會合襄陷縣城王葆生李輔朝  
率勇退保郴州適周金城帶南勇自桂陽馳至  
軍聲復振偵賊將由大路逕撲郴州王葆生李  
輔朝周金城等預商派勇前赴草鞋嶺一帶而  
以正兵從大路搦戰五月初三日李輔朝周金  
城出隊誘賊賊果蜂擁而來官軍詐敗引之入

伏回旂截擊四路伏發斃賊近千陣斬僞元帥  
李勝侯珍及不知姓名賊目四名生擒百四十  
餘名內有僞右軍都督譚得勝一名先鋒旗頭  
十數名奪獲大小紅黃旗幟砲械籐牌刀矛無  
數賊仍退竄宜章初十日賊復分三路冒雨上  
竄李輔朝周金城率勇迎擊於五里亭斃賊六  
百餘名內有紅袍僞元帥二名生擒七十餘名  
內有紅袍女賊二名署郴州知州戚天保亦督  
勇協剿斃賊百餘名生擒三十餘名而賊之旗  
幟砲械籐牌奪獲殆盡賊以兩次痛勦潰敗不

支遂分股一由黃茅嶺竄臨武而歸宜章一由  
間道竄撲嘉禾縣城其由黃茅嶺竄臨武縣境  
者戚天保及該署知縣盧肇煦督各鄉團沿途  
截殺斃賊千餘名賊首王二潮卽王義潮亦被  
擒斬賊首鄧象率敗匪數百由臨武竄出將入  
宜章署知縣陳秀芝會同叅將積拉明阿帶兵  
勇督鄉團節節圍捕生擒鄧象及賊目歐玉等  
斃賊四百餘名餘賊逸至母老村團勇圍殺殆  
盡其竄撲嘉禾縣城者知縣袁慧業汛弁陳佐  
清團紳李國榮嬰城固守七晝夜斃賊三百餘

名適署桂陽州知州梅震榮帶勇援勦至縣賊  
遂解圍轉竄甯遠縣之魯觀洞黨夥散逸頗多  
現飭新田甯遠兩縣帶勇會勦此粵賊鄧象王  
二潮等由樂昌九峯竄入攻陷趙啓玉營盤後  
竄入宜章官軍屢勦獲勝首逆就擒伏誅餘匪  
竄逸之實在情形也李輔朝周金城兩軍正擬  
分股搜勦餘匪復接探報粵賊何祿陳森劉順  
昌等帶賊數千續由廣東乳源平石一帶竄入  
楚界沿途裹脅多人勦敗餘匪復陸續歸附勢  
甚猖獗臣查何祿係廣東上年起事賊目兇狡



慣戰匪黨多東莞英德及惠潮之人愍不畏死  
密飭諸軍嚴加戒備十九日酉刻賊由摺嶺上  
竄王葆生李輔朝周金城等先派勇數隊伏於  
走馬嶺二十日辰刻大隊從中路迎勦賊眾開  
放洋礮傷我勇數名官軍屹立不動旋見籐牌  
悍賊飛奔而來南勇楚勇廣勇郴勇永勇直前  
格鬪立斃執旗先鋒賊數名籐牌賊數十正搏  
戰間伏勇四出或從後兜擊或從旁截殺賊陣  
始動忽北風大作賊眾施放噴筒毒燄反以自  
燔官軍乘勢感之勇氣百倍短兵相接立斃黃

巾紅衣賊目十數名賊眾由小路奔潰官軍合隊窮追陣斬賊千餘割獲左耳九百六十餘隻奪獲洋礮十餘尊洋鎗鳥鎗百三十餘桿拍鎗七十餘桿籐牌噴筒鋼叉刀矛多件大小旗幟二百餘件兇鋒已挫矣而韶州以北各匪因廣東重兵把住韶關已絕歸路不得不冒死上竄民間喧傳廣東官軍有勦洗村莊之說山谷愚民亦多結隊奔赴湖南逆賊何祿等裹其壯丁脅其從逆以故人數更增王葆生等一面出示解散一面商議速勦二十三日分四路出隊擊

賊於萬歲橋連踏賊營二  
首僞水陸副元帥陳森策  
勇曹照古躡蹤緊追擒之  
輝李海朝劉福林等衝入  
一名訊之生賊卽賊中託  
結之僞丞相陳姓也餘賊  
是役所獲礮械旗幟帳棚  
其時署遊擊龍金源帶辰  
由韶調回抵郴二十八日  
辰沅兵從中路迎擊鋒甫

分勇截殺斃賊百餘賊始敗走王葆生李輔朝  
周金城戚天保等會商賊匪屢經痛剿勢可一  
鼓殲除官軍當酷暑之時逐日出隊恐日久自  
疲不如乘勝大舉直搗賊巢迅復宜章一清邊  
圉三十日王葆生李輔朝周金城等率南勇廣  
勇楚勇全軍由獅子嶺大路進勦桂陽勇由東  
小路王仙橋繞出會合龍金源亦派辰沅兵在  
後接應南楚各勇行至五里亭適遇前隊籐牌  
賊突至南勇開放抬鎗斃賊十餘名賊猶屹立  
不退官軍大隊踵至刀矛並舉直衝賊陣連斃

執旗賊目數名始紛紛敗走官軍乘勝掩殺呼聲震天賊匪震懼莫知所措竟有跪伏道旁引領受刃者窮追四十餘里至良田首逆何祿見官軍追急持刀攔截敗匪折回抗拒楚廣各勇瞥見用矛猛刺正中其足籐牌賊趕至背負以走奪獲統領元帥大旗一桿偽印一顆良田巡檢鄭家牲亦由小路追至截殺賊數十名正擬午餐後乘勝徑撲宜章縣城忽送飯長夫飛報有青旗賊一股約千餘潛從西小路竄入州城辰沅兵始不疑其爲賊倉卒未及淮備遽行卻

退王葆生李輔朝等疑信叅半遂分軍扼住良田而帶勇馳回援救沿途迭遇城中長夫走報始知另股賊實已襲踞州城各勇腹饑不得食又恐兩面受敵遂紛紛退走是夜至窩鶴坪駐紮其分駐良田之勇聞警四路走散未能收隊宜章之賊聞已陸續竄入郴州臣接據各路稟報不勝詫異當派候選府經縣丞羅信南帶湘勇七百馳往應援仍飭王葆生周金城迅速調集散逸銳卒進剿一面分飭隣近之永興耒陽興甯各令速將所撥練勇均歸李輔朝節制迅

圖克復現計存營之勇及各路練勇已五千餘  
勇力尙不爲單辰沅五營兵丁全不得力卽撤  
遣歸伍以免貽悞嚴飭地方官及在事文武迅  
速戴罪圖功尙再有延悞情事卽據實嚴叅治  
罪此粵逆何祿大股竄楚官軍屢獲勝仗同日  
尙獲大勝而州城旋失現籌克復之實在情形  
也廣西富川之賊前竄入湖南永明縣境經委  
員王鑫痛剿後逆首朱洪英等復竄踞廣西灌  
陽縣城勾結兇悍賊黨及楚粵漏逸會匪結成  
死黨誓必北竄廣西文武約期會剿委員卽選

知府王鑫率湘勇會之四月初四初五等日與賊接仗小有斬獲適廣西兵勇被賊劫營退回全州賊卽於初六夜空城潛竄時露蹤於道州近界之文村新圩一帶倏行倏止而大股潛從全州道州零陵交界之徭山翻山四竄越零陵縣境直撲東安縣署知縣賴史直請兵未到率勇出城迎擊眾寡不敵十六日縣城失守王鑫周雲耀等率兵勇馳往援剿署永州鎮總兵朱瀚署永州府知府黃文琛會派已革都司駱元泰督帶兵勇繼至二十一日至白牙市會齊賴



史直由蘆洪司率勇前來商議進剿二十二日  
周雲耀出中路王鑫賴史直等出左路駱元泰  
出右路均搜伏而進沿途斃賊頗多行至草鞋  
街遇賊二三千列陣抗拒王鑫督勇衝殺周雲  
耀駱元泰從旁環擊斃賊約三四百名生擒十  
餘名奪獲鎗砲刀矛籐牌數百件乘勝直逼賊  
營兵勇奮勇直前連踏賊營四座賊敗退入城  
王鑫駐紮城外之孔明白周雲耀駱元泰各駐  
左右高山相爲犄角距城不及一里正築壘閒  
賊分大股直撲孔明白王鑫督勇下擊賊卽斃

退比收隊上山賊復回旗轉撲如是者數次並分撲周叅將駱都司營盤皆經痛剿擊退是日鏖戰竟日兵勇亦有傷亡二十三日王鑫等誘賊出擊斃賊百餘追至城下轟斃執五色大旗紅衣賊目一名紅黃大旗賊目六名餘賊多名賊自是固匿城中不敢復出王鑫周雲耀駱元泰賴史直等銳意滅賊會督兵勇團勇日日合圍攻撲賊從城上開放鎗礮子密如雨軍士肉薄攻城其勇銳者往往被鎗礮傷亡賊之從全灌竄陷東安也先分遣賊目鄧照籠率賊二千

餘由咸水東竄臣以逆賊既直撲東安又預分  
一股東竄恐其乘虛由新甯縣直竄寶慶府則  
湖南上游一帶俱震飛飭署新甯縣知縣張士  
寬嚴防西延一路而札調新甯紳士五品銜江  
忠淑帶楚勇二千赴東安會勦江忠淑未奉札  
之先已倉卒募楚勇千名前進適廣西亦遣千  
總趙慶祥等率兵勇數百越境會剿連日諸軍  
畢集直迫城下賊固匿不出閒出隊誘我俟追  
近城壕輒發礮石攻擊官軍雖小有斬獲未能  
痛剿二十八日賊出隊數百直撲廣西兵勇營

盤湖南各營均派隊策應賊敗退入城趙慶祥等追殺多名二十九日各營俱約齊進攻賊預分股遏截北路兵勇而以驍賊撲燒全州兵勇營盤全州兵勇遂退楚勇先夕聞西延有警恐爲逆賊鄧照籠所襲勇心不固至是亦空營潰歸賊乃悉銳攻王鑫周雲耀駱元泰三營自午至戎併力鏖戰斬驍鷙之賊百數十名賊始退卻王鑫等以逼城安營地勢高仰賊匪憑城開放鎗礮勇士折損者多全州兵勇及楚勇又已退回恐勢孤難以攻擊不如僞退誘之遂於五

月初一夜潛退井頭墟賊不敢追擊仍負嵎堅  
守適西延賊經守備蔣大勝擊退折回咸水江  
忠淑接奉前札仍選募勁勇二千於初十日由  
新甯前進臣復飭候選同知趙煥聯都司朱南  
桂守備張清和等挑募曾經戰陣之湘勇于  
由省城馳往會剿並以衡州爲南路水道總匯  
之所飭守備王佐清帶水勇礮船前往駐防以  
壯南路聲援而杜兩粵賊匪水路窺伺之漸趙  
煥聯江忠淑先後行抵東安縣境王鑫等遂於  
二十二日拔營齊進東安縣城外五里安營二

十七日卯刻賊二千餘分三路來撲王鑫等偵知賊蹤暗派兵勇布陣數里先搜伏賊正兵由中路迎剿斃賊百餘其潛伏林莽各賊經官軍搜剿所殺亦多比近城邊賊於城上開放鎗礮抵拒仍卽撤隊歸營是夜駱元泰及千總蔣榮華把總左光藻等帶勇潛襲淶埠頭賊營斃賊約百餘名蔣榮華生擒粵賊鄧穩等十餘名奪獲賊船二十七隻六月初一日王鑫等分三路繞城環擊賊匪出隊沿城抗拒官軍逼城攻擊斃賊二百餘此廣西逆賊攻陷東安縣城官軍

圍攻屢

安失陷

行勾煽

縣界漣

東安賊

岡州知

總銜武

自言機

夥以圖

升於一

睡將鎗礮移置他所用水漬其火藥中夜賊營  
喊殺聲起賊出不意卽大驚擾昏黑之中自相  
格鬪楊升等合力奮擊殺斃匪黨多名周光南  
爲賊所害附近各團總楊兆南楊敦禮等聞喊  
聲大起知楊升之計已行卽帶勇爲之接應斃  
賊數十餘匪鼠竄二十四日黎明硤口巡檢陳  
耀源及帶勇紳士州同銜楊彤壽州同銜鄭邦  
崙生員鄭邦岱等各帶練勇馳抵該處會督各  
團窮搜逸賊當將匪目尹祚第劉大五黃老八  
張起祖張文漢及匪黨八十二名就地正法其



竄邵陽淑浦黔陽者亦經各縣擒斬多名餘匪散逸現在嚴飭緝拏地方安謐如常五月十九日衡陽縣人陳得標等從賊中竄回該縣西鄉勾結滋事當經署衡陽縣知縣馮汝棻調知拏獲正法匪黨分布洪羅廟渣江金蘭市一帶正在調碼糾人升任臬司文格飭馮汝棻及在籍都司曠益茂衡州協千總喻元發把總吳定發等管帶衡州兵勇及水勇星速馳往剿辦二十六日行抵妙山峯遇賊喻元發吳定發督兵勇轟擊斃賊數十生擒六名乘勝追至沙林塘與

福寺斃賊百數十名生擒四名奪獲黃旗二面  
馬一匹吳定發同軍功廖效忠等追賊至金珠  
市鎗斃執旗賊目一名奪獲太平龍鳳旗一面  
殺賊百餘是日四戰皆捷兵勇受傷僅止數名  
馮汝棻短衣草履身先士卒故弁勇踴躍用命  
該匪等自此次痛勦後卽各分途鼠竄不敢抗  
拒署湘鄉縣知縣唐逢辰聞警卽派紳士監生  
曾國潢生員朱奠理問銜康景暉武生李長鑑  
及胡連王明倫王志賓監生曾國華等各帶團  
勇分赴衡陽衡山各界協勦擒斬多名管帶衡

勇在籍前貴州荔波縣知縣魏承祝帶勇在洪羅廟一帶搜查餘匪勒令戶首緝獻所有此案首從各犯王蒲粟子梁維谷沈汶義王朝斌等八十餘名均經兵勇團紳先後拏獲及戶長緝送審明正法地方安謐如常此武岡州衡陽縣通賊滋事土匪迅速勦除之實在情形也

臣維

廣東之賊竄陷郴宜屢經官軍擊敗擒斬至數千名之多兇悍賊目殲除實已不少卽據各營所奪獲礮械軍裝除留營備用外其先後解省呈驗者

臣

皆一一點視籐牌一項亦多至三百

數十面是官軍屢次攻剿不爲不力可知一起未滅一起旋來宜章尙未克復郴州復又失守頃據臨武縣稟廣東賊匪復竄撲城池桂陽亦報交界之文明司一帶亦有廣賊竄入每起人數動以萬計所獲賊中旗幟多佛山蘆包三水中宿白土惠潮清英等處地名是廣東北路之賊勢將全竄湖南在廣東雖有肅清之期在湖南何堪紛擾之害應請

旨速勅廣東督撫臣提臣嚴遏北竄以清其源并越境分剿以殺其勢庶兩省邊圉均有撤防之時

而該省亦無回竄之慮至廣西一省匪盜如毛漸成痿弛之證湖南永州寶慶兩府及靖州所屬防不勝防現竄陷東安一股陰鷲兇悍實與金陵巨賊無殊長髮紅巾蓄謀已久若不能聚而殲旃徒以驅賊出境爲事恐勢將滋蔓後益難圖臣現飭帶勇各員盡力攻剿期於殄滅淨盡無如武漢克復無期崇通賊勢復熾江西義甯又已告陷湖南北界東北界如岳州府屬之平江巴陵臨湘長沙府屬之湘陰瀏陽等縣在在堪虞剝牀以膚勢將漸及兵勇旣無可分布

餉項又早已空虛後此情形殊難設想惟有殫盡血誠勉力支持以求稍紓

皇上宵旰憂勤之意至此次青草嶺陣亡之卽補同知直隸州知州趙啓玉以良吏帶勇殺賊屢著戰功血戰捐軀死事最烈伏懇

天恩照知府例賜卹白沙巡檢謝德慶殺賊陣亡請勅部照例賜卹以慰忠魂而勵臣節其陣亡各弁勇團紳容臣查明彙案附

奏所有宜章郴州東安失守之地方文武及在事出力貽誤各文武請俟事竣由臣核明功罪據

實保劾以昭懲勸謹恭摺由驛馳

奏伏乞

皇上聖鑒訓示施行謹

奏

咸豐五年六月二十日拜發奉

硃批另有旨欽此

請調羅道一軍回湘防剿摺

奏爲隣氛四迫兵力不敷請調回湘勇一軍以資防剿事竊湖南一省南界兩廣西接貴州東距江西北連湖北現在廣東之賊竄陷郴宜廣西之賊竄陷東安本省南路永州寶慶兩府郴桂兩州所屬地方在在均急武漢旣未克復湖北興國州大治武昌通山崇陽通城各州縣皆淪於賊縱橫數百里閒土匪蜂屯蟻聚皆有長髮老賊爲之監督窺伺平江臨湘巴陵已久自江西義甯州失守以後賊黨積至數萬往來於江



西湖北交界各處黃旗紅巾漫村遍野揚言誓  
竄湖南本省北路之巴陵臨湘平江三縣固已  
防不勝防而義甯州又與湖南之平江瀏陽各  
縣緊連東路之防又不可緩近復接據晃州廳  
各路邊報貴州鎮遠府台拱廳一帶痞匪勾結  
苗民滋擾西路又須戒嚴湖南一省廣輸千餘  
里南防兩廣北防湖北東防江西西防貴州以  
一省而兼支五省之寇卽盡調本省兵勇嚴行  
防剿尙恐分布難周非若他省專辦本地土匪  
及防剿一面可比況本省兵勇之稍精鍊者旣

赴調江南安徽大營復隨會國藩塔齊布東征  
近如署湖北撫臣胡林翼一軍亦多從本省召  
募是一省兵勇既供四省調發又須防剿五省  
之賊其不敷分布情形諒邀

聖明洞鑒查現在隨赴江西之甯紹台道羅澤南湘  
勇一軍於克復弋陽廣信等府縣城池之後江  
西饒廣一帶業已肅清聞江西撫臣陳啓邁現  
調其帶勇赴省此時江西客兵尙多而湖南情  
形較江西尤急相應請

旨勅下兵部侍郎銜會國藩江西撫臣陳啓邁速飭

羅澤南帶湘勇一軍折回湖南以資防剿庶於大局有裨臣一面飛咨會國藩陳啓邁轉飭羅澤南帶勇閒道回南以期迅速伏乞

聖鑒訓示施行謹

奏

咸豐五年六月二十日拜發奉

硃批另有旨欽此

援粵辰沅兵丁回郴餉缺遇賊退走片

再五月三十日郴城之失實因辰沅五營兵丁堵禦不力所致查是日南勇楚勇廣勇由中路追賊直過良田擒斬甚多逆首何祿帶傷逃逸正擬乘勢直搗宜城賊之預伏西小路者人數不過千餘度官軍空城追賊守禦必疏故徑薄州城爲暗襲之舉其實各勇追賊時署游擊龍金源所帶五營弁兵千名並未派令出隊如肯悉力堵禦何難迅挫兇鋒乃見賊卽退以致州城失守前路得勝之師亦以退無所依紛然四

散事機一誤遂至於此

臣

查辰沅五營兵丁向

稱壯健然尙氣嗜利自昔已然上年八月經

臣

遵

旨派往廣東救援惟時韶州與廣東省城道路中梗

勢甚孤危該兵丁自赴韶以來隨同防守及屢

次奉調出城勦匪頗著微勞亦備嘗辛苦韶城

軍餉匱竭不能支給口糧廣東提

臣

崑壽諭以

俟省城道路疏通再行發給至本年五月十八

日只據提

臣

崑壽來咨轉據龍金源等呈開積

欠五營薪糧等銀共計約有四萬餘兩之多一

時無從籌辦茲先發給五營銀六千五百兩其餘應找之項請查照例案先行找給咨明廣東督撫臣核明另行解回歸欵該官兵等因該省餉道已通未能發給口糧又出征半載鍋帳軍裝多已朽敗無從請領未免心懷觖望二十五日回抵郴州二十八日出隊即不肯向前三十日見伏賊突來即紛紛退走不復如在韶時之出力是因口糧欠發遽爾灰心已可概見臣現飭署綏靖鎮遊擊龍金源將所帶辰沅五營兵丁撤回歸伍一面飭其選派弁目每營一二名

赴韶請領應得薪水鹽糧一面密訪實情分別  
從嚴辦理庶足以服兵心而申軍令謹據實附  
奏伏乞

聖鑒訓示謹

奏

咸豐五年六月二十日拜發奉

硃批另有旨欽此

駱文忠公奏稿卷之四目錄 湘中稿

乙卯中

南北兩路剿賊獲勝情形摺

覆陳永州防堵情形並查拏安福縣門丁片

魁臬司屢次告病據實直陳摺

委員接帶魁臬司楚寶各勇並留遊擊差委片

北路賊已敗退南路收復東安籌辦情形摺

李副將擅離防所請革職留營効力片

東安竄賊分撲祁新官軍大捷生擒首逆摺

東安賴令深得民心請免查辦片



張守擅離防所請革職示儆片

永興茶陵失守分路剿辦情形摺

南北兩路勦賊獲勝情形摺

奏爲南北兩路勦賊獲勝恭摺由驛馳

奏仰祈

聖鑒事竊逆賊自復陷武漢以後遣黨勾結湖北通  
山興國武昌大冶崇陽通城各州縣土匪刻思  
南犯經平江官軍團勇擊退之後敗賊仍據通  
城另股復至咸甯蒲圻前來會合候補臬司魁  
聯卽選道江忠濟分遣楚勇出境迎擊三月二  
十二日在通城花涼亭兩獲勝仗斃賊二百餘  
名生擒二十餘名二十七日賊衆大至分撲楚

勇營盤千總江上曉等血戰竟日擊斃長髮賊  
目數名餘賊六七百名賊攻益急團勇先潰團  
紳職員李治續附生李文淳職員袁毓龍童生  
胡際昌王拱平李克靖監生余湘重等力戰陣  
亡該勇之勢益孤遂潰圍衝出陣亡百長林志  
祺及散勇二百餘名然此次楚勇雖云失利而  
所斃悍賊甚多逆賊亦不敢復萌窺伺之想由  
此舍通城而轉竄江西自武昌逆賊襲攻金口  
經署湖北撫臣胡林翼三次擊敗之後其僞丞  
相萬姓等率餘黨竄入崇陽沿途號召土匪仍

踞通城江西義寧州賊又分股前來會合復竄  
擾通城北港一帶代理臨湘縣知縣姚榮卿帶  
國勇迎勦六月初八日遇賊接仗失利姚榮卿  
力戰陣亡逆賊分股屯聚通城巴陵交界之磨  
斗嶺通城臨湘交界之大界詹家橋等處意將  
由巴陵臨湘村僻小路直竄湘陰以撲省垣岳  
州官軍駐營鳳凰山原防通城蒲圻大路距小  
路遠或數十里百里勢難兼顧江忠濟前派守  
備徐志近郭漢雲等帶勇馳赴巴陵縣毛田防  
勦探報二十四日賊匪分道由臨湘縣桃林竄

及新牆江忠濟飛調徐志近郭漢雲等自毛田帶勇橫截賊匪南竄之路二十五日郭漢雲等帶勇行抵楊安橋遇賊數千蜂擁而來官軍攔頭迎擊斃騎馬賊目二名手執大黃旗賊六名陣斬長髮賊十四名短髮賊數十名奪獲抬鎗五桿大小黃旗數十面賊始卻退分竄關王橋四六坊楊林街木瓜山等處二十九日委辦湘陰團練已革同知直隸州恩霖候選訓導毛英卓會商長樂各團紳等糾集團眾四萬餘人分投進攻關王橋之賊賊偵知團勇齊心聲勢浩

大卽望風而潰僅燒斃賊匪數十名生擒八名  
燒燬營棚八十餘架適守備徐志近郭漢雲等  
帶勇追勦攔賊去路殺賊二百數十名奪獲賊  
馬四匹餘賊紛紛潰竄初一日徐志近郭漢雲  
等追賊至花古園殺賊數十名追至港日殺賊  
百餘名奪獲賊馬五匹追至楊安橋柳木厰等  
處復殺賊數十名生擒長髮賊目柯正桃及長  
髮賊五名餘匪拋棄紅巾四竄初二日追賊至  
方山洞轟斃大旂賊目二名騎馬賊一名殺賊  
百餘名復追至橋頭梨樹坳殺賊數十名生擒

十三名各路敗匪聞仍退歸詹家橋北港老巢  
臣聞北路警報當卽飭委守備銜千總楊虎臣  
軍功劉騰雲等各帶湘勇五百名候選訓導丁  
際可帶靖勇五百六十名一赴大荆新牆一赴  
長樂會團相機防勦比至而賊已散遁此北路  
勦賊獲勝情形也廣東另股賊匪數千於六月  
初七日竄撲臨武縣城署臨武縣知縣盧肇煦  
署臨武營叅將趙永年團紳在籍前戶部郎中  
杜學禮及在城文武士民兵勇分門固守初八  
初九兩日賊匪攻城甚急城上鎗礮火礮飛石

齊下斃賊二百餘名奪獲長梯數十架自初十  
至十三日斃賊約二百餘名十四日盧肇熙等  
派拔補把總周鳴謙募敢死士百餘縋城而下  
殺賊四五十名縱火焚燬賊據民房城上鎗礮  
齊施斃賊匪數十名十五日該文武團紳等催  
調各鄉團勇齊至分兩路齊進城中兵勇齊出  
奮勇衝殺斃賊百餘名賊匪紛紛敗潰奪獲粵  
東英州總營統領水陸大元帥大紅旗一面大  
小旂數十面銅礮鐵礮各一尊抬鎗鳥鎗藤牌  
刀矛多件乘勢追殺至宜章界之黃沙溪龍勝



墟等處始行收隊計斃賊數百名生擒賊黃亞  
溪等二十八名重圍遂解其由樂昌塘村竄擾  
桂陽縣文明司者六月十三日署知縣吳清鵠  
督團勇勦之於分界嶺陣斬二十四名鎗礮轟  
斃者約十餘名賊退竄樂昌縣平石地方十三  
日大股賊數千復犯文明司肆行焚掠吳清鵠  
飛調東嶺團勇二千餘名馳往救援時已革都  
司王殿邦帶兵百名團紳范繼元何應興等帶  
練勇四百名西南二鄉團紳帶勇四百名合營  
百丈嶺賊匪悉力圍攻已數日矣二十日該兵

勇等出賊不意奮勇衝殺下山百長范香賢首先躍入賊隊持刀亂斫兵勇繼之陣斬賊匪三百餘名內有乘轎賊目一名騎馬賊七名生擒黃壽奴等二十一名適滁口司巡檢萬立篋署知縣吳清鷄帶勇先後繼至賊奔磚頭隘二十三日吳清鷄飛調延壽大盈團紳陳達元等齊團速勦並飭東嶺團紳已保藍翎訓導劉廷英等從九峰前進四面環擊斃賊四百餘名生擒賊目譚昌福白占魁女賊甘李氏等十六名賊仍退竄廣東仁化縣境此南路勦賊獲勝情形

也現據署宜章縣知縣陳秀芝宜章營叅將積  
拉明阿稟報已會督團紳將縣城收復而郴城  
踞城之賊於六月十七十九兩日經叅將李輔  
朝等三路進勦署安仁縣知縣李逢春千總田  
興恕從九陳鈞和等督勇衝殺共斃悍賊三百  
餘名該逆現屯聚郴州尙未他竄臣前調桂陽  
縣東嶺團紳藍翎訓導劉英才劉廷楨等挑選  
勇丁千名赴郴會勦該紳等已將竄擾文明司  
巨股勦敗遵調赴郴並增募勇丁二千餘名前  
來頃據王葆生稟報該紳勇於六月三十日將

逆賊之分踞首家洞一股分途圍勦斬馘數百  
名餘匪有潰入郴城者有潰竄四散者該紳等  
擬於七月初一日帶勇直赴郴城進勦李輔朝  
稟報七月初一日督領各勇進攻株木山並飛  
諭劉廷英等由首家洞進攻李輔朝督勇將陳  
家樓松山伏賊擊敗追至距郴州十五里之株  
木山連踏賊營三座劉廷英等於是日分三路  
進攻窩鶴坪之賊連踏賊營兩座殺賊甚多奪  
獲器械騾馬無數現擬逕攻郴城迅圖克復其  
東安踞城之賊兇狡異常卽選知府王鑫參將

周雲耀卽選同知趙煥聯都司朱南桂訓導江忠淑等自六月初六日初十十一十四等日分路攻勦每處殺賊百數十名或二百餘名不等由賊匪負嶠堅守固匿不出該文武等設法誘擊所殺不多未能痛勦比官軍逼撲城垣則城上礮石如雨勇銳之士每被中傷據永州鎮府稟報前月二十五二十六二十八等日該文武等督勇進攻均獲勝仗而二十五日鏖戰尤苦與<sub>臣</sub>所接探報無殊尙未接據王鑫等稟報未敢率行入

奏又據署桂陽州知州梅震榮稟該員帶勇赴極樂隘口防堵郴州賊匪前月十九日有游匪突入州城肆行劫掠而前此由嘉禾回竄魯觀洞之匪復乘機竄撲嘉禾縣城意圖會合桂陽州之匪臣因桂陽州與衡州府屬之耒陽常甯等縣切近亟應撥勇防剿當調卽選同知趙煥聯都司朱南桂等帶所募湘勇千名折回衡州就近進剿竊維湖南以一省兼支湖北江西廣東廣西之寇南北同時並急各處警報紛來兵勇不敷分布能先清一路然後可撤一路之防庶

幾緩急得資調遣現飭南路管帶兵勇各文武  
迅速設法掃除以免牽制而杜蔓延至北路帶  
勇勦賊陣亡之代理臨湘縣事候補縣丞姚榮  
卿楚勇百長把總林志祺巴陵團紳職員李治  
續臨湘縣附生李文淳職員袁毓龍巴陵縣童  
生胡際昌臨湘縣童生王拱平李克靖監生余  
湘重應懇

天恩飭部照例賜卹以慰忠魂所有南北勦賊獲勝  
情形謹據實陳

奏伏乞

皇上聖鑒訓示謹

奏

咸豐五年七月初九日拜發奉

硃批另有旨欽此



皇朝通志

乙卯中

覆陳永州防堵情形並查拏安福縣門丁片

再臣前承准軍機大臣字寄咸豐五年五月初

七日奉

上諭翰林院侍讀周壽昌奏廣西餘匪偪近湖南永州一帶請添兵防勦一摺據稱廣西富川恭城等處與湖南永州府屬各州縣壤界毗連該處賊匪肆擾請飭候補知府王葆生候補縣丞周金城移兵屯紮永州以固湖南邊圉等語永州府爲湖南省西南門戶其界連廣西富川恭城等縣賊匪衆多自應實力堵勦惟界連廣東湖北等處逼近賊

氛堵禦均關緊要王葆生等練勇得力似未便專  
注一隅以致別處空虛其應否移屯永州之處著  
駱秉章體察情形妥爲辦理仍須於永州一帶派  
員嚴密防範毋任該匪入境潛相勾結並飭鄰境  
各地方設法解散脅從是爲至要另片奏湖南安  
福縣知縣薛湘縱容門丁駱福勒索捐輸解費加  
收耗羨經該撫查拏該縣匿不解交各情著駱秉  
章嚴密察訪如係官役通同舞弊卽著據實嚴參  
毋稍瞻徇原摺片均著鈔給閱看欽此 臣 維王葆  
生等所帶之勇卽係南勇經 臣 於上年春閒飭

候補縣丞周金城招募近省一帶壯勇一千六百名操練四月而後成軍每月九次在臣署箭道較閱其技藝如刀矛鋼叉籐牌抬鎗之類較爲嫻熟上年秋間派赴郴桂一帶與參將李輔朝所帶楚勇防勦廣東連州各處匪徒屢獲勝仗因連州蕝事之後韶匪繼作嗣又以廣東迤北一帶勦敗之匪相率犯楚本省郴桂一帶防不勝防勦不勝勦此南勇一軍所以未能調赴永州之實在情形也五月三十日該南勇等與楚勇全軍合勦廣東竄入宜章之賊大獲勝仗

正在乘勝追勦之時忽伏賊自西門小路襲踞  
州城該勇等冒暑追至中途前後受敵未及構  
帶鍋帳竟日飢疲遂繞道四散紛紛北歸沿途  
招輯未能歸除周金城以該勇等原係省城及  
近省之人非回省招輯勢不能齊亦遂趕緊赴  
省<sub>臣</sub>以該勇於郴州被伏賊襲踞之時尙獲大  
勝其潰散之故實因歸路被賊隔斷無從得食  
與賊潰之卒實有不同唯不於中途歸隊逕回  
省城則周金城之措置乖方實難辭咎當即將  
該通判周金城嚴加申飭摘去頂戴勒限三日

整理隊伍聽候調遣現據周金城稟已一律整齊聽調容卽察看各路情形酌量調遣責其後效倘再不知奮勉圖功卽當嚴叅治罪永州一帶陸續調派卽選知府王鑫江西補用知府劉長佑所帶湘勇楚勇及候補參將周雲耀所練之勇合計已共五千名一俟東安克復則勇力尙資分布至於解散脅從一事自宜相機籌辦

臣前因各處稟報賊情有稱廣東竄來之匪其中亦有男婦老弱夾雜者臣慮係愚民畏勦逃竄或亦有良民被賊裹脅一時不能自明之事當

飭王葆生製造良民免死牌票沿途散擲並出示曉諭資遣歸籍一面由

臣

咨會廣東督撫提

臣

並札駐韶之臬司沈棟輝一體分別安撫以

孤賊勢但細察賊匪情形可解散者約有兩種愚民因誤聞該省有勦洗村莊之說畏懼而來者此必須解散者也良民之被裹脅不得已而從賊者此可解散者也若頑獷悖逆之徒則嗜亂儼若性成不殺不止縱一時設法解散而若輩賊心不死官軍偶撤必復乘機思逞重煩兵力勢非大加芟薙斷不能望其革面革心

臣惟

有督飭在事各文武竭力勦除以求稍紓

宵旰憂勤之意至安福縣門丁駱福上年曾風聞有  
詐索蔣姓捐輸解費之事當卽密札帶勇在澧  
之貴東道胡林翼就近嚴拏旋據胡林翼稟稱  
駱福因詐索未成事卽敗露卽夜逃走該令薛  
湘現出賞格嚴拏並請查拏該丁駱福家屬其  
無通同舞弊各情似尙可信臣於接奉

寄諭之後復札飭將駱福之弟駱鑑美查拏監禁勒  
交駱福到案研訊確情再行分別辦理斷不敢  
稍有瞻徇所有遵



旨覆奏各情謹附片陳明伏乞

皇上聖鑒訓示謹

奏

咸豐五年七月初九日拜發奉

硃批知道了欽此

魁臬司屢次告病據實直陳摺

奏爲新放臬司屢次告病稟請回旂調理茲復續  
行請假恭摺據實直陳仰祈

聖鑒事竊候補臬司魁聯前在岳州府任內蒙  
恩簡放福建汀漳龍道欽奉

諭旨仍著暫留湖南俟軍務完竣再行赴任嗣於本  
年正月二十三日欽奉

上諭湖南按察使著魁聯補授欽此該臬司魁聯忽  
於正月二十九日由岳州稟報到省臣比以逆

賊竄陷漢陽湖北省城危急興國崇通土匪乘

機勾煽岳州防勦萬緊該臬司帶勇駐岳豈可  
遠離當飭其迅回岳州二月十二日復奉

上諭升任廣西按察使文格著調補湖北按察使魁  
聯著作爲候補按察使另候簡用仍留湖南辦理  
防勦事宜欽此五月二十九日忽據候補臬司魁  
聯稟稱本司生長北方慣歷風霜難經卑濕頻  
年染患痰飲氣喘病証醫治未痊二月十九日  
接武昌省城失陷之信氣憤填膺以致觸發舊  
症據醫云肝氣鬱結元氣過虧不早消導滋補  
必致轉入怔忡連日精神恍惚往往商畫軍情

竟難明晰對答恐因患病稍有失機稟請據情  
代

奏仰懇

皇上逾格恩施俯准回旗調理等情臣當批飭時局

艱難正臣子殫誠竭力之日縱使衰病侵尋亦  
當勉效馳驅稍圖報效況該司由候補知府甫  
一載擢至臬司又承

恩命留辦防勦豈可因偶抱微恙遽懇歸休臨戎既  
無告病之條怔忡亦非顯然之病未便准其所  
請嗣該臬司魁聯復於六月十一日具稟仍懇

馬名錄卷之四  
七列中  
察核原稟據情代

奏並聲明將原帶及續招楚寶各勇共一千五百名歸駐防岳州之紳士卽選道江忠濟統帶

臣

復批飭該司奉

旨留辦防勦岳州現在喫緊自萬無告病之理該司  
新承

恩眷時局又正值艱難亦非可告病之時且寶楚勇一千五百名均係該司所募驟易生手管帶非其所宜江忠濟一人管帶所募之勇二千餘名已恐照料難周岳州地勢平行又非僅江忠濟

一軍所能控扼該司如敢堅執不回不能不據  
實直陳請

旨在臣愚昧之見原以岳州正當多事之秋該司係

三品大員可資鎮壓不得不再三堅留聽候具  
奏請

旨乃六月二十一日復據該臬司稟稱仍請據情代  
奏并聲明發稟後即起程赴省聽候查驗臣接閱

之餘殊爲詫異該司於二十五日到省二十六  
日來見臣察其精神尙好步履如常痰喘係該

臬司向日舊病亦非一時增劇當復以大義責

之該司無詞可對惟連稱孤負

皇上天恩而已適三十日欽奉

上諭湖南按察使着魁聯補授欽此當卽恭錄行知  
旋據該臬司魁聯復稟請據情代

奏請

旨賞假一月一俟病痊卽照例詣

闕請

訓等因伏念該臬司以奉

旨留辦防剿大員責任甚重兩次赴省皆未曾接奉  
扎調舉動自由迥非意料所及當此逆賊縱橫

之時若人人引疾擅離防所大局何以支持既  
據該臬司屢請代

奏前來臣不得不據實直陳請

旨伏候

聖鑒訓示施行謹

奏

咸豐五年七月初九日拜發奉

硃批另有旨欽此





委員接帶魁臬司楚寶各勇並留遊擊差委片  
再新放臬司魁聯所募寶楚勇一千五百名向  
係該臬司管帶駐岳防勦該臬司於前月二十  
日告病赴省時將楚勇一千名交現在岳州帶  
勇卽選道江忠濟管帶其寶勇五百名交署岳  
州府知府曹源管帶臣思岳州府爲湖南門戶  
關係非輕現值賊匪縱橫出沒之時防勦萬緊  
江忠濟原帶楚勇已有二千二百餘名之多若  
再將魁聯所帶之勇千名歸其管帶誠恐一人  
照料難周難以得力且江忠濟遇有出境勦賊

之時岳州老營乏員經理亦難放心查有永州  
府知府張丞實上年經兵部侍郎銜臣曾國藩  
調赴大營適因公來省臣詢其在沌口水師營  
中並無經手緊要事件當卽委令前赴岳州接  
管魁聯募帶之勇會同江忠濟妥籌防勦以免  
貽悞又湖南軍務方殷武職乏員差遣查有安  
徽委護安徽撫臣江忠源靈樞來南之升用遊  
擊和寬年力正強曾經戰陣仰懇

天恩將該員卽留湖南差委以資得力理合附片陳  
明伏乞

聖鑒訓示施行謹

奏

咸豐五年七月初九日拜發奉

硃批和寬著留於湖南差委欽此



北路賊已敗退南路收復東安籌辦情形摺  
奏爲北路疊獲勝仗賊已敗退出境南路東安疊  
獲勝仗收復城池現在籌辦郴桂一帶粵匪土  
匪情形由驛馳

奏仰祈

聖鑒事竊湖南北拒湖北江西之賊南勦廣東廣西  
之賊兩路接仗情形節經疊次

奏報在案七月初二日卽選道江忠濟所派帶勇  
守備郭漢雲徐志近等甫將巴陵縣方山洞橋  
頭梨樹坳等處賊匪擊敗出境忽報臨湘縣賴

家坳地方來賊數千修築營壘初三日郭漢雲等率楚勇由小路掩至出賊不意賊卽駭走楚勇追逐數里殺賊二十餘名生擒二名奪賊馬一匹賊奔白水畝復築壘抗拒初五日郭漢雲等出隊追勦鎗斃騎馬賊目二名執大旗賊三名餘賊十餘名賊伏匿不出郭漢雲等僞退誘之潛分隊設伏山梁左右以待賊遽傾巢追撲郭漢雲等麾旗回拒伏勇左右抄出賊後連踏賊營二座斃賊二百餘名生擒賊目楊正才等十二名奪賊馬三匹抬鎗二桿鳥鎗十五桿大

黃旗十二面軍械無數餘賊四散初六日探報  
湖北蒲圻縣羊樓司有僞丞相萬姓率長髮賊  
數千屯聚意將南竄萬姓賊目前自武昌竄出  
時卽與諸賊約先遣數股分道竄擾巴陵臨湘  
各鄉冀分岳州兵力而徐以悍賊由大路乘虛  
竄撲岳州大營適各股賊匪均經官軍擊敗潰  
走出境江忠濟卽飛調郭漢雲徐志近等帶勇  
自間道出平山舖拒之初九日出隊進勦賊於  
羊樓街後紮大營兩座聞官軍至卽率眾抗拒  
官軍奮勇迎擊鎗斃騎馬賊目三名殺悍賊數



十名割首級三十七顆生擒二名賊始卻退十  
二日郭漢雲等復分三路進勦賊亦分三路拒  
敵鏖戰兩時之久斃賊數十生擒李光明等三  
名賊回巢不出官軍亦以日暮收隊歸營酉刻  
賊忽傾巢大至圍逼營盤更番疊戰郭漢雲徐  
志近等督勇力拒是夜月明如晝鏖戰三時斃  
賊數百名亥刻賊始敗退楚勇受傷陣亡者亦  
至八十餘名之多遂拔營歸岳州江忠濟以退  
駐示弱仍飭進駐雲溪驛相機進勦賊以受創  
甚鉅疑畏不敢進逼旋復下竄股匪千餘尙踞

蒲圻崇陽交界之白里畝十九日郭漢雲及千  
總楊振國等率勇越境往勦斃賊三百餘名生  
擒匪黨劉輝山等二十餘名餘匪紛紛散竄其  
由江西義甯州湖北通城窺伺平江北界東界  
者七月初六日有賊千餘屯聚通城之十里市  
初八日委帶平勇卽選知縣何忠駿黃榮及紳  
士黃崇象陳勁青等率勇進勦賊望風潰走奪  
獲紅黃巾刀矛等件是日東界防堵龍門委帶  
平勇卽選知縣李源濬千總方城探知有賊千  
餘在交界之路口地方築營卽帶勇分兩路直

搗賊巢刀矛甫交賊卽奔潰僅截斃數十人生擒十四名軍前正法是日東界防堵小坳委帶練勇卽選知縣張岳齡探知有賊數千自盤石地方蜂擁前來率同團勇出隊迎擊斬執大黃旗賊目二名賊始卻退各勇乘勝繼進刀矛並舉斃賊百餘名割獲長髮首級二十八顆生擒長髮賊姜光才等三名奪獲偽丞相頂大黃旗二面偽冬官又副丞相萬大黃旗二面小黃旗數面抬鎗鳥鎗刀矛二百餘件餘賊奔潰此北路勦賊獲勝之實在情形也廣西賊匪之竄踞

東安縣城者六月二十二日分股至花橋擄掠  
知縣賴史直帶勇截擊斃賊十餘名奪賊馬二  
匹生擒逆賊唐開純等三名軍前正法二十五  
日卽選知府王鑫參將周雲耀會同江西補用  
知府劉長佑等誘賊出城擊斃八十餘名內有  
大旗賊目二名署臨武營千總汪庭富衝入賊  
隊爲飛子所中被賊戕亡二十六日賊出大隊  
陣於唐帽山伏賊數百於荷葉塘南面之賊直  
撲楚勇營盤劉長佑督勇抵拒王鑫等分股搜  
勦共斃賊百數十名賊仍敗退入城二十八日

賊復撲楚勇營盤劉長佑督勇擊退斃賊七十  
餘名各營派隊分數起奮力攻擊各斃賊數十  
名七月初三日賊復出數股分撲楚勇營盤王  
鑫周雲耀趙煥聯朱南桂賴史直等率勇抄殺  
各斃悍賊數十名內有執五色大旗賊目及大  
黃旗賊目數名劉長佑麾楚勇於各礮臺施放  
鎗礮斃前隊悍賊甚多賊始敗退各營奮威追  
殺共斃賊二百餘名賊敗潰入城死拒官軍收  
隊歸營連日賊仍固匿不出初七夜丑刻王鑫  
周雲耀劉長佑賴史直等率勇潛往分路攻城

前隊甫抵東門城根各勇循城疾走足踐瓦礫  
有聲爲賊所覺大聲狂譟礮石如雨官軍收隊  
徐回賊開門緊追官軍返旗奮擊斃賊一百餘  
名十一日賊潛派百餘人赴百花沖擄掠賴史  
直督舉人葉兆蘭文生蔣筠唐楚翹等率勇截  
捕斃賊二十餘名生擒蔣世得等五名十二日  
賊眾二千餘分撲楚勇營盤並設伏周家嶺及  
河邊一帶劉長佑督勇抵拒並撥勇一布於營  
右山脊一伏營左五里牌王鑫偵知周家嶺伏  
賊頗多卽分勇由河邊進勦自率親勇繞出周

家嶺前衝賊爲兩段分路緊追沿途鎗擊矛刺斃賊甚多賊屍狼籍劉長佑潛令五里牌伏勇由營左橫衝而出營右山脊之勇亦從山嶺壓下殺賊七十餘名隊長李景剛斃大紅旗賊目一名周雲耀分勇兩路沿河進攻擊斃前隊悍賊數十名百長袁國興手刃賊目三名追至城邊鎗斃執大旗賊目一名是戰各營共計斃賊三四百名受傷之賊不計其數自是益固匿不出十九日王鑫劉長佑周雲耀賴史直等率勇逼攻賊始分股數百出城抗拒官軍且戰且伏

誘令離城稍遠突起搏戰斃賊百餘賊仍紛紛  
敗退王鑫督勇奮追將近城邊城內賊匪復出  
隊接應王鑫張左右翼擊之復斃賊數十名始  
行收隊二十一夜有賊二千由全州黃土井一  
帶竄入東安縣城二十二夜在南岸諸葛營山  
頂築立營壘一夕而就而附近東安之四里洞  
一帶均全州地界伏匪甚多小路處處可通王  
鑫等方稟請移咨廣西速定會勦之局頃接永  
州鎮守探稟二十四日王鑫等率勇接仗殺賊  
一百餘名二十七八等日均自黎明出隊攻勦



至黃昏收隊殺賊尤多二十九日未刻始將縣城收復尙未接據王鑫等稟報未敢輕率入

奏此攻勦東安賊匪疊獲勝仗之實在情形也賊踞東安城時廣西賊匪時於全州北界之廟頭黃沙河一帶往來嘯聚爲賊聲援六月二十六日有賊二千餘從廟頭攻撲永州之石基市千總蔣榮華所帶之勇僅三百五十名因衆寡不敵堅閉卡門潛從石基市小巷整隊突出殺賊百餘生擒悍賊陳維志該匪潰走已革都司駱元泰派兵勇乘勝尾追復殺賊百餘奪獲五色

大旗大紅大黃旗六桿籐牌刀子抬礮鳥鎗百餘件次日賊大隊數千復至一股撲蔣榮華卡座一股圍駱元泰營盤勢甚猖獗蔣榮華率所部壯勇奮威衝殺決盪而出殺賊百餘賊眾辟易竟不敢追遂併力圍攻駱元泰營盤正鏖戰間蔣榮華復率勇衝入會合兵勇開柵出戰賊匪紛紛逃潰仍回竄全州宜鄉廟頭等處此又永州勦賊獲勝之實在情形也廣東賊匪之陷郴州者自七月初一日參將李輔朝攻克木山賊營訓導劉廷英攻克窩鷓坪賊營之

後初二日李輔朝率楚勇湘勇等攻西門約劉廷英等率東嶺勇攻東門李輔朝帶勇甫至踞城五里之桂茅嶺賊匪亦分股出敵李輔朝督勇轟擊斃賊十餘名適南風大作賊匪噴筒火箭飛衝入陣各勇奮力堵殺頗有傷亡劉廷英是日爲另股賊匪所阻未及會攻李輔朝飭守備陳希昂率楚勇進攻東門被城上火礮磚石擊退旋折回夾擊斃賊三十餘名始行收隊初三日賊匪三路前來撲營李輔朝分起設伏以待賊至洞坑湖伏勇四起賊驚懼退走各軍追

殺至距城二里之百湖橋斃賊近百名生擒五  
名劉廷英等由秀坪進攻東路之賊追殺至蘇  
仙橋斃賊百餘名賊仍回城拒守適郴州土匪  
頭目許功化在和平墟聚集匪徒千餘將乘虛  
下竄十二日李輔朝派何其英帶東嶺勇二百  
名曹福勝帶楚勇二百名密往掩捕斃賊數十  
名餘卽四散當將頭目許功化並先鋒陳亞三  
等拿獲回營審明正法是日郴城賊匪分股由  
桂茅嶺前來撲營李輔朝督勇分四路追勦鎗  
斃先鋒賊目一名餘賊十餘名賊仍死拒不退

各勇分支痛擊刀矛並進殺賊頗多自辰至午  
賊猶未退適何其英曹福勝等自和平墟勦賊  
歸營卽率勇橫衝入陣賊衆披靡始紛紛潰敗  
歸巢忽廣東另股匪徒由宜章竄入郴城而郴  
城土匪王大才桂陽州土匪李石保等又糾聚  
匪徒數千赴郴會合賊勢愈張十六日賊衆傾  
巢而出分數路攻撲楚勇湘勇營盤李輔朝督  
勇分支拒敵楚勇百長外委夏士舉湘勇百長  
藍翎外委胡首法力戰陣亡賊匪猛撲湘勇營  
盤東嶺勇助戰將賊擊退是戰斃賊僅數十名

而楚勇廣勇湘勇之受傷陣亡者至四十餘名之多十八日辰刻賊復分五路由桂茅嶺黃茅嶺坡裏坪漢池塘前來撲營黃旗紅巾漫山遍野各勇因先日損傷頗多人無固志李輔朝以衆寡不敵又株木山地勢三面受敵難以駐紮遂退回永興臣前以賊勢猖獗由粵東竄楚者源源而來該處一帶土匪必將勾引爲北竄之謀李輔朝一軍只能堵其下竄永興之路若賊竟由興甯與安仁酃縣茶陵交界各間道下竄沿途各州縣無迎頭截勦之兵衡州長沙大局

均爲震動當卽密札委帶湘勇卽選同知趙煥  
聯都司朱南桂守備張清和速從東安拔營回  
衡州馳赴安仁進勦以遏賊衝復調補用通判  
周金城率南勇全軍由醴陵攸縣安仁相機前  
進頃據補用道岳州府知府王葆生稟稱七月  
二十九日賊匪二千餘竄至龍王舖擾及智沖  
當派虎威勇東嶺勇出隊往勦賊旋即退獲賊  
十六人訊稱粵匪頭目蕭發江月率悍賊將由  
安仁先赴下游餘匪繼至等語是夜賊復屯聚  
龍王舖八月初一日辰刻賊由杉樹下地方猝

至千總田與恕等正在督軍鏖戰間適趙煥聯  
朱南桂等帶湘勇行抵龍海塘卽出隊合擊斃  
悍賊二百餘名陣斬賊目五名奪獲籐牌抬鎗  
鳥鎗刀矛旗幟無數俟周金城全軍繼至卽行  
會勦此勦辦郴州賊匪之實在情形也臣維北  
路武漢未能克復則北界賊勢旋撲旋起不獨  
岳州平江兩路防勦兵勇萬不能撤且武漢據  
長江上游爲兩省關鍵實亦天下要膺形勢所  
宜急爭臣前

奏調浙江甯紹台道羅澤南回南助勦原欲藉以



掃除北路羣醜寬湖南一面之防俾得併力南路兩粵匪徒以杜其響應之念且以湖北兵不可用勇單餉竭迄少成功非得勁勇數千持數月之糧悉力會勦斷難望其成功羅澤南克復義甯州城後與臣籌議意見相同正擬由義甯前赴通城崇陽勦辦餘寇以次會師武漢忽接九江大營信知湖南提督臣塔齊布以忠憤致疾暴殞於軍兵部侍郎銜臣曾國藩擬調羅澤南赴德安防勦此舉尙未能決頃據探報武昌以南各處賊匪嘯聚如故義甯敗竄之賊又復

前往會合勢復披猖則湖北湖南之憂殊未有  
艾也東安縣城雖云克復然此股賊匪兇狡異  
常全州灌陽富川一帶素爲其出沒之所若不  
能掃穴擒渠不久必仍滋他患廣西撫臣勞崇  
光雖屢有會勦之咨而全州兵勇未能出境想  
亦因軍儲匱竭不遑遠畧之故現在王鑫周雲  
耀劉長佑必已相機追勦但賊去若遠勢亦鞭  
長莫及無可如何至於廣東賊匪之踞郴者人  
數日添而郴桂一帶土匪附和者亦復不少郴  
州東路雖經札調湘勇南勇前往以勦爲防而

西路未陽一帶路逕分歧亦不可不預爲籌及

臣現飭江西補用知府劉長佑挑選所部楚勇

千餘自東安拔營由未陽進勦一俟各勇齊集

當可迅掃狂氛惟探聞由粵東竄楚之匪內有

因上年被賊逼脅粵省查辦嚴緊懼罪逃生者

亦有親屬畏累避匿來南者不爲分別查辦則

誅之不可勝誅且適以堅其從逆之志臣已刊

刻免死牌票交王葆生查明印給並委候補府

經歷梁伯齡覓廣東客商之在楚者持諭前往

分別解散以孤賊勢而速戎機此又現在通盤

籌畫布置之實在情形也此次打仗陣亡之署  
臨武營千總事把總汪庭富湘勇營藍翎外委  
胡首法楚勇營外委夏士舉等伏懇

天恩勅部照例賜卹以慰忠魂所有各路接仗及現  
在籌辦情形謹恭摺由驛馳

奏伏乞

皇上聖鑒訓示謹

奏

咸豐五年八月 日拜發



李副將擅離防所請革職留營効力片

再統帶楚勇廣勇副將銜補用參將李輔朝於

七月十七日退回永興縣後單騎馳回省城二

十三日起

臣

衙門求見

臣

以郴州賊勢方張該

參將擅自來省殊爲意外當飭藩臬兩司傳其

查詢據該參將稟稱奉委帶勇勦賊曠日持久

州城未復日切焦愁因勇力單薄口糧欠發一

時愚昧將所帶各勇派防永興要隘暫交藍翎

守備陳希昂等管帶星夜赴省面求指示機宜

請領欠發口糧以免各勇藉口參將仍卽趕回

防勦臣以該參將所稱勇力單薄口糧欠發各情原可稟請籌辦卽行間一切緊要機宜亦可於稟牘批示遵行無須赴省面求指授該參將以此擅離防所實屬糊塗當卽嚴飭摘去翎頂勒令卽日馳回永興行營聽候叅辦一面由司籌湊餉銀五千兩委員吳經炳解赴永興點驗支放相應請

旨將參將李輔朝暫行革職留營效力以觀後效如再不能奮勉圖功卽當據實嚴叅以肅軍令謹附片陳明請

言

咸豐五年八月

日拜發





東安竄賊分撲祁新官軍大捷生擒首逆摺  
奏爲廣西賊匪自東安竄出後復分股回竄祁陽  
新寧官軍進勦各獲大勝生擒首逆縣城解圍  
永州寶慶兩府境內漸就肅清恭摺

奏祈

聖鑒事竊廣西逆賊竄踞東安七月二十四日經委  
紳卽選知府王鑫補用參將周雲耀江西補用  
知府劉長佑署東安縣知縣賴史直等督所部  
兵勇分由孔明臺寶塔腳唐帽山等處誘賊出  
擊斃賊百數十名內有執大紅旗兇悍賊目五

名二十七日復分三路出隊斃賊近二百陣斬紅巾長髮賊目一名執五色大旗賊目一名生擒賊目唐定國蔣昌榮等晡後始收隊歸營二十八日賊復分四股攻撲楚勇營盤劉長佑爲橫陣擊之賊攻右則繞擊其左賊攻前則繞擊其後王鑫周雲耀賴史直等各分隊接應鎗礮之中雜以刀矛斃賊百四十餘追賊直薄城下奪獲抬鎗鳥鎗十餘桿長矛五十餘桿大小黃旗十餘桿藤牌軍械無數二十九日官軍復乘勝進攻賴史直督舉人葉兆蘭文生周大健蔣

鈞唐楚翹等帶團勇攻隔河賊營王珍劉長佑  
督勇攻縣城東北正北一帶周雲耀督兵勇攻  
縣城東南一帶賊勢不支由南門一路竄出官  
軍躡蹤緊追斃賊二百餘踏毀河岸賊營一座  
生擒賊數十名獲馬十餘匹鎗礮旂幟軍械數  
百件遂復縣城臣以渠魁未獲餘黨猶多楚粵  
未能安枕飭在事各文武迅速追勦務盡根株  
王鑫周雲耀等帶兵勇越境至全州之黃土井  
連日搜擒逸賊五十七名訊明正法已革都司  
駱元泰率千總蔣榮華外委彭玉貴追至鴨塘

冲斃賊百餘生擒賊目胡友發卿宗燕大股賊均竄入全州之四星洞王珍周雲耀駱元泰等約會圍攻比八月初八日馳至則該逆等先夜已由四里洞分股翻山竄逸矣是日午刻劉長佑正由白沙移營鴨蛋舖途間忽遇大股賊偃旂息鼓而來卽列隊迎擊斃騎馬賊目一名執籐牌先鋒賊三名餘賊多名賊猶死拒不退劉長佑潛分軍從山後繞路抄擊賊始驚潰劉長佑督勇掩殺追過鴨蛋舖適賊後隊齊至敗退之賊復卓旂回撲勢甚兇猛劉長佑督勇力拒

擊斃大旂賊目二名斃賊百餘生擒十九名奪  
獲鎗礮刀矛旂幟偽印偽冊並賊所禮拜之銅  
像賊始由原路敗遁王鑫周雲耀等聞賊犯楚  
勇營盤是日帶勇疾馳成刻行抵白沙探報逆  
首偽號定南王胡有祿一股已由間道回竄至  
東安縣北花橋卽星夜疾趨比抵縣城探報逆  
賊將竄伯牙市五鼓拔營往追則又由燕桂塘  
竄新亭子矣王鑫以賊狂奔官軍尾追勢不相  
及遂率壯勇繞道桐子山逆截之初九日午刻  
甫抵桐子山果與逆賊大隊遇賊不意官軍速

至駭懼失措官軍奮威衝殺刀斫矛刺斃賊五百餘截斃騎馬紅衣賊目二十餘名生擒悍賊三十餘名奪賊馬八十餘匹大小紅黃旂二百餘面鎗礮軍械號衣五百餘件餘匪紛紛敗竄有折而南竄者有由間道翻山北竄者湘勇營藍翎千總易普照幫辦王開化等追至石板舖斃賊百餘奪馬十餘匹鎗械百餘件初十日周雲耀由油江橋追賊王鑫趨枕頭墟各督團練四處搜勦擒斬二百餘其中稱軍帥師帥百長者十餘名其由百花沖竄出一股賴史直率同

六品頂戴文生蔣筠等督勇會團擒斬百餘縲  
送縣城者又百數十名駱元泰亦擒斬數十均  
奪獲馬匹旂械多件其由桐子山石板舖逃出  
餘匪於是日申刻從零陵縣苦株山竄隆慶里  
經訓導舒時煜從九段經傳督同團長唐光國  
唐本秀等帶勇截勦斃賊百餘生擒賊目唐相  
驊王山仔等九名是夜王鑫周雲耀合軍西澗  
橋探知賊分兩路一由浦里橋一由下花橋將  
竄祁陽十二日巳刻王珍等先後抵陽明橋賊  
復合爲一股謀竄祁邵交界之四明山是山綿



亘數十里跨連數縣巖谷幽邃素爲賊匪伏匿之所王鑫周雲耀慮其喘息稍定將復蔓延遂督兵勇併千總蔣榮華等急起躡之追至良村王鑫周雲耀分兩路由左右抄擊賊衆拚死抗拒官軍盡銳攻擊賊不能支紛紛狂竄窮追二十餘里斃賊四百餘首逆僞定南王胡有祿策馬上山兵丁曠連升繞路迎頭擊之該逆墜馬兵丁陳洪春壯勇蔣德玉蔣德選徐興高彭王貴協同擒縛各兵勇亦生擒賊監軍潘大與並悍賊二十餘軍前正法餘賊千數百名竄入四

明山十三日王鑫周雲耀令祁邵零東四縣鄉團引路攻勦督同蔣榮華指揮各兵勇四面圍之賊入四明山寺拒守官軍舉火焚之悉數殲盡復分隊下山搜勦斃賊五百餘墜巖死者無算是日奪賊馬七十餘匹銅礮二尊鎗礮刀矛籐牌旂幟號衣不計其數於叢莽中擒賊數十斬之內有偽軍師跛者王姓素爲胡逆謀主驗明仍戮其尸其稔惡悍賊度不得脫多就樹林自縊者亦取其尸戮之各勇及團勇分路搜勦遇賊卽殺是日大雨如注溪流盡赤賊之逃入

登雲嶺者祁陽縣知縣陳秉鈞飭外委廖正祿  
團紳匡邦彥李宏猷等各率團勇四面兜剿先  
後生擒偽總統李龍士中軍元帥李必清右營  
軍帥唐訓總碼王玉龍師帥何二麻子旅帥蔣  
富百長雷昌等六十餘名餘賊四百餘名其逃  
入田子冲者邵陽縣知縣邵綬名督飭團紳黃  
精藻唐麟等迎勦陣斬黃衣賊目及賊目朱栢  
容先鋒李明玉廖阿兆軍師楊向漢等殺賊五  
十餘墜巖死者七八十生擒者百六十餘奪賊  
馬十餘匹軍械逆書多件此股遂就蕩平其窟

入新寧者爲首逆僞號鎮南王朱洪英一股該  
逆先期遁至全州萬鄉覘劉長佑所帶楚勇一  
軍正在白沙一帶與胡逆相持忽率所部悍賊  
三千餘乘間直撲新寧以楚勇皆新寧人欲傾  
其根本也劉長佑既將白沙之賊擊退聞警星  
馳回援十一日辰刻馳至則賊首隊已於初十  
日直薄縣城矣署新寧縣知縣張士寬署守備  
方開榜教諭易卓等倉卒率兵登陣召集居民  
嬰城固守以待援師連日憑城擊賊擒斬頗多  
劉長佑既至督勇於松風亭趕築營盤該匪突

出大隊來撲劉長佑親督各勇分路迎擊斃賊多名十二日松風亭新營未就該逆仍蜂擁來爭劉長佑派隊併力攻勦斃首先悍賊二十餘名賊始却退十三日正督諸勇移紮新營忽山霧晦冥大雨如注賊衆來撲楚勇陣亡四名受傷七名劉長佑會同在籍養病之訓導江忠淑催督各鄉紳士陳定國鄧善滙曹承雄蔣大勝李耀南等各帶勇協勦十五夜派六成隊分三路前進直抵賊巢該逆悉衆列陣勢極兇猛官軍及各團勇以賊蹂躪鄉里各懷忿恨縱橫血

戰呼聲震天鎗礮之中刀矛並舉先將凝秀閣  
賊柵拔毀殺斃大旂賊目三名餘賊死傷狼籍  
賊逼溪岸將鳧水而逃中路官軍分由城東及  
東南角衝出截之鎗斃騎馬賊目二名斬執大  
紅旂大黃旂賊各一名乘勝蹴踏士氣百倍北  
岸賊眾悉從東門灘撲水浮渡溺斃無算東岸  
之賊亦卽望風而遁鎗礮刀矛旂幟拋棄略盡  
共計斃賊五百餘生擒三十八名奪獲拍鎗二  
十桿鳥鎗三十桿大旂百五十三桿小旂百二  
十八桿偽印偽冊籐牌刀矛無數東岸賊由水

頭村竄逸城圍遂解劉長佑等派勇追勦十九  
十八等日搜斬多名賊仍由廣西全州萬鄉竄  
往黃沙河一帶現已飛咨廣西撫臣督飭各屬  
趁該逆等敗蹙之餘迅速堵勦此東安踞城賊  
敗竄出境後復分股回竄祁陽新寧官軍兩路  
痛勦迭獲大勝生擒首逆新寧縣城解圍之實  
在情形也臣維此起逆賊自咸豐二年八月由  
廣西南寧起事以來屢次攻陷楚粵邊界各縣  
城池兇狡異常所糾黨夥皆各省游匪而廣東  
廣西湖南邊界劇賊巨盜及廣西遣散鄉勇尤

多其獷悍之狀不亞金田初起諸逆兩省不得解嚴者已兩載有餘矣頃胡有祿檻送省城臣委員提署研訊據供係廣西武宣縣人其兄胡有福於道光二十七年與逆賊羅大綱攻撲廣西陽朔縣城被官兵擒斬該逆是時卽與羅大綱認識今年二月羅大綱有信囑其前往會合故下令蓄髮自稱定南王以便號召黨與又有朱洪英卽朱聲洪自號鎮南王與該逆契好各有徒黨萬餘上年攻撲湖南之道州甯遠江華永明均經擊敗仍糾集死黨並收召廣東湖南



决意北竄本年攻陷廣西之富川灌陽及湖南  
之東安縣城直認不諱前廣西撫臣勞崇光所  
奏此股賊首朱勝紅卽朱聲洪又詭名朱洪英胡  
供詞証之朱勝紅卽朱聲洪又詭名朱洪英胡  
南東安縣涿埠頭人吳大卽該逆胡有祿又詭  
稱吳有祿永州府揭其偽示賁呈書昇平天國  
定南王吳鎮南王朱則該匪之勢猶出朱逆之  
上特時變易姓名以便事敗潛逃耳質之祁陽  
所審生擒之偽元帥周必清偽軍師唐訓等供  
亦俱昭合周必清唐訓等在廣西應募當勇會

得六品功牌咸豐二年從逆得受僞職廣西富川縣知縣濟昌城被戕係周必清首先下手祁陽搜獲濟昌僕婦被擄之賀唐氏唐文氏張盧氏當時目擊質認明確臣當飭將胡有祿盡法處死傳首東安懸竿示衆以彰

天討而快人心並飭邵陽縣祁陽縣將搜獲敗逃各逆目就地凌遲梟示以免疎虞而昭炯戒此外陣斬各犯據該逆等供如僞右營都統陳可三在桐子山伏誅僞前營都統何文華在四明山伏誅查都統何姓據胡有祿供卽何文秀人呼

爲何賤苟乃頻年竄擾楚粵兇狡著名屢次漏網之犯其被官軍擒斬僅得之該賊口供尙未敢遽信爲實大約此次官軍擒斬及各縣鄉團搜勦其中著名賊目及兇悍匪黨實亦不少胡逆旣生擒伏法朱逆膽寒聞於新甯敗潰後已薙髮仍回廣西其勢已蹙矣現在永州寶慶兩府已漸次肅清在事文武官紳兵勇自四月至今冒暑鏖戰屢獲勝仗收復縣城後復將大股殄滅生擒首逆解省明正典刑實屬著有微勞委紳卽選知府王鑫忠勇奮發熟諳兵機應請

旨以道員歸部選用補用參將周雲耀忠實廉勇履著戰功此次指揮所部兵丁生擒首逆應請

旨以副將留於湖南補用藍翎千總蔣榮華膽略兼優前此石期市諸戰得獲奇捷該弁一門叔姪兄弟隨征陣亡者五人殺賊頗多賊恨該弁刺骨擄其父母存亡未卜該弁忠憤之氣愈勵實爲難得請

旨以都司留於湖南補用並請

賞換花翎首先擒獲首逆之兵丁曠聯升請以把總拔補並請

賞戴六品翎頂其餘實在出力之官紳弁兵壯勇可

否容

臣

核實勞績開單保

奏之處出自

天恩前此東安城陷罵賊不屈之把總鄭玉恩紳士

候選教諭周而溥應請

旨交部議卹以慰忠魂此次攻勦數月鏖戰甚苦陣

亡受傷弁兵壯勇頗多容

臣

核明分別請

旨賞卹以示激勸所有兩路勦賊大獲勝仗生擒首

逆新甯縣城解圍各情形謹據實馳

奏伏乞

皇上聖鑒訓示施行謹

奏

咸豐五年九月十二日拜發奉

硃批另有旨欽此



東安賴令深得民心請免查辦片

再署東安縣知縣賴史直居官廉慈勤慎深得民心東安當楚粵之交該令於上年賊撲廣西全州時不分畛域派勇越境迎勦共保危城比經臣據實保

奏並將該署令官聲素好之處明白聲敘奉

旨賴史直著賞加同知銜本年四月十六日逆賊胡有祿朱洪英大股從廣西灌陽翻山突由零陵縣界徑趨東安事出倉卒該署令請兵未至率勇抵禦因賊勢兇猛縣城旋即失守該署令衣



冠坐堂厲聲罵賊賊衆同聲不敢傷害好官以  
該署令求死甚急派賊黨數十勉扶上馬護送  
出城該署令夤夜奔至該縣之蘆洪司士民間  
該署令尙未遇害人心大定卽率近鄉各團勇  
隨同該署令前赴王鑫周雲耀大營殺賊自效  
該署令自抵大營後每戰率團勇助勦殺賊頗  
多當城陷之時官軍四集糧米甚缺該署令諭  
士民迅速輸納卽得米二千餘石老弱婦女或  
背負數升肩挑數斗絡繹奔赴其携斗酒隻雞  
來營問該署令起居者日數十輩其時軍餉告

竭該署令諭士民速完錢糧以濟軍餉倉皇攘  
擾之時亦得銀二千餘兩錢一千餘貫暫資接  
濟民心愛戴如此該署令帶勇隨同收復縣城  
之後復截殺敗逃賊二百餘現在各鄉團練亦  
倍加奮勉頃據東安紳士職員周元揚舉人葉  
兆蘭六品文生唐楚翹蔣筠以及各老民等數  
十赴臣衙門具呈乞留該署令本任情願代該  
令捐修倉庫城署各項據稱東安一日無賴令  
不能安其身家情詞迫切臣悉心訪察實出至  
誠該署令官聲素好得民如此實非尋常所有

近時匪盜縱橫幾半天下實由守令不得其人而守令之不得人實由督撫吏治不修舉劾不公所致此則臣等身膺封疆重任者之罪又不能盡諉諸守令也臣既深知賴史直之賢又據該縣士民呈訴如此不敢不據實上

聞仰懇

皇上天恩俯念署東安縣知縣賴史直於縣城失守後帶勇勦賊隨同收復縣城斃賊多名功過尙足相抵平日居官能得民心可否免其查辦以順輿情之處恭候

欽定謹附片具

奏伏乞

聖鑒訓示施行謹

奏

咸豐五年九月十二日拜發奉

硃批另有旨欽此



張守擅離防所請革職示儆片

再永州府知府張承實前經兵部侍郎銜

臣曾

國藩調赴大營嗣派外江水師營中差遣六月

間回省

臣

詢悉該員在水師營中並無緊要事

件適降補臬司魁聯自岳州擅離防所稟請開

缺回旗

臣

當據實陳

奏因一時委用乏人札委該員馳赴岳州接管魁

聯所帶楚勇寶勇一千五百名亦經附片

奏明在案乃該員於奉委之後遷延十餘日始報

起程途間逗留十餘日始抵防所抵防數日又

復擅回省城藉稱楚廣各勇不服約束擬請回  
省另募新勇當經藩臬兩司詳請參

奏前來

臣

維岳州當南北兩省之衝該員委帶楚

勇寶勇駐防該處責任匪輕即各勇不服約束  
亦宜稟請核辦聽候示遵乃當警報紛來人無  
固志之時輒敢仍蹈魁聯前轍擅離防所實屬  
藉端規避應卽請

旨將永州府知府張丞實革職以昭儆戒其魁聯前  
所帶之楚勇一千名卽交候選道江忠濟管帶  
寶勇五百名卽交署岳州府知府曹源管帶理

合附片陳明伏乞

聖鑒訓示施行謹

奏

咸豐五年九月十二日拜發奉

硃批另有旨欽此





永興茶陵失守分路勦辦情形摺

奏爲竄踞郴州粵賊勾結土匪迭陷永興縣茶陵  
州官軍屢獲勝仗賊勢仍復披猖現在增調各  
勇分路勦辦情形恭摺

奏祈

聖鑒事竊粵東竄楚之賊自襲陷郴州之後土匪乘  
機附和人數日增七月二十九八月初一等日  
官軍在安仁縣之龍海塘接仗獲勝情形前經  
奏報在案賊之大股一踞郴州一踞興甯安仁交  
界之龍王舖等處其踞龍王舖者八月初三日

分三路直撲龍海塘營盤補用道新授岳州府  
知府王葆生飭管帶湘勇卽選同知趙煥聯卽  
選都司朱南桂守備張清和藍翎千總田興恕  
等督勇迎擊朱南桂張清和及湘勇百長趙福  
元郭潤德等分四路衝入賊隊斃賊多名正慶  
戰間忽小路有賊一股飛奔而來官軍分隊迎  
擊藍翎把總梁開國腿受矛傷力戰不退田興  
恕勒馬橫衝入陣賊眾紛紛退走正擬躡蹤緊  
追忽另股賊數千翻山抄出將逼湘勇營盤趙  
煥聯督勇回救復將賊殺退各路乘勝掩擊共

斃悍賊三百餘奪獲英州合心營惠潮蘆包各色旗幟二十四面抬鎗八桿烏鎗三桿籐牌二十三面長矛短刀噴筒火箭子藥無數初五日賊復分三路前來朱南桂田興恕梁開國趙福元等亦分三路擊之斃賊百餘田興恕帶隊衝鋒陣斬僞元帥朱姓奪獲旗械無數卽補通判周金城帶南勇全軍初八日始抵龍海塘大營初九日該逆復傾巢來犯田興恕與從九陳鈞和帶虎威勇由中路周金城帶南勇由左朱南桂張清和帶湘勇由右賊由萬田洞先犯左路

周金城督勇抵禦鏖戰良久斃賊頗多朱南桂  
繞路助戰田興恕陳鈞和從中路突出衝殺署  
安仁縣知縣李逢春派從九勞崇鏞帶勇分伏  
山側合力圍擊鎗矛齊施賊益不支周金城等  
乘勢掩殺數里始行收隊賊以官軍力退龍海  
塘要路不能北竄初十十一等日潛由龍王舖  
竄洞口江口洲規田土地司安平司等處連營  
十餘里王葆生以其地有小路可以逕達茶陵  
一面飭委員鄭家姓同藍翎訓導劉廷英等帶  
東嶺勇四百五十名馳赴茶陵會同署知州王

宏謨扼要防勦一面督飭趙煥聰朱南桂等帶  
湘勇六百周金城帶南勇八百陳鈞和帶虎威  
勇四百及桂東勇百五十名於十三日進勦江  
中洲之賊李逢春亦率勇助戰是日卯刻各路  
齊抵賊營賊不及防倉卒拒敵官軍奮力衝殺  
斃賊三百餘礮斃斃紅袍黃巾賊目一名生擒十  
餘名連燒賊營十三座奪獲旗幟偽印器械多  
件餘賊翻山竄逃審訊生擒之賊據供擬由間  
道潛竄茶陵王葆生飛催劉廷英王宏謨加意  
防範十五日據劉廷英馳稟十四日未刻行至

五里亭賊之前隊已由界首竄至茶陵州王宏  
謨率勇出城迎擊眾寡不敵賊已闌入州城矣  
王葆生卽於十六日督同趙煥聯周金城田興  
恕等各營星速拔營援勦十六日湘勇虎威勇  
齊抵黃沙坪十九日辰刻趙煥聯朱南桂張清  
和帶湘勇田興恕陳鈞和帶虎威勇分五路整  
隊進攻賊眾亦分路抗拒官軍奮威衝殺鎗礮  
刀矛並進斃賊數百賊不能支紛紛敗潰入城  
趙煥聯等督勇窮追由西門躡蹤而入賊眾拋  
棄紅巾竄匿民房正搜勦間忽另股賊由東南

兩路飛奔而來圍裏官軍數各萬計趙煥聯朱南桂張清和田興恕等督勇縱橫挾盪人自爲戰遇賊卽刺衝出重圍賊衆辟易桂東勇黃由蘭勝勇樊篤周等於時馳至開礮助戰東南兩路之賊敗走入城瞥見城內之賊未勒紅巾自相殘殺死傷亦復不少是戰雖未能卽克州城而斃賊千餘之多官軍傷亡者僅五十餘名則趙煥聯朱南桂張清和田興恕等能以寡擊衆之驗也其踞郴城粵賊分屯五里牌一帶土匪頭目王大才分屯西鳳渡遙爲犄角八月初六



日永興縣紳士卽選通判劉茂廷率團勇擊賊  
油榨墟殺賊二百餘初七日賊蜂擁而至圍眾  
旋潰補用參將李輔朝初二日馳回永興行營  
劉茂廷請其援勦初十日李輔朝率楚廣勇千  
二百餘馳抵高亭司適署耒陽縣知縣張濟遠  
帶勇繼至會商次日日出隊十一日午刻張濟遠  
偃藍翎從九龍際時等率湘勇由中路李輔朝  
督同藍翎從九陳鳴志由左右兩路賊分三路  
蜂擁而來鏖戰兩時龍際時等轟斃執旗賊目  
二名楚勇百長張從右廣勇百長蔣克富各斬

大黃紅旗賊目一名各路殺賊約數十並奪獲  
抬鎗三桿籐牌七面中路躡擊賊後忽伏賊從  
後路襲楚湘勇營盤龍際時馳回援救敗賊復  
回旗追撲龍際時及武生龍虎臣龍吟等力戰  
陣亡李輔朝張濟遠率勇馳救斃賊數十賊始  
退走湘勇陣亡六十三名受傷三十九名廣勇  
百長陣亡六名受傷十五名踞郴之賊瞰楚廣  
勇已分紮永耒交界之公平墟而永興又素無  
城垣居民早已遷徙十三日已刻賊由烏泥鋪  
河灘躡淺竄入永興縣署知縣王雙福之勇及

李輔朝留防該處之勇同時潰退賊入永興後無所擄掠仍分路四竄此八月十三十四兩日永興縣茶陵州失守之實在情形也其桂陽州一股經署知州梅震榮在籍戶部主事陳士杰等督帶桂陽團勇於斗石渡一帶堵勦陳士杰於七月二十四二十七八月初五初八等日在斗石渡仙島等處勦賊均獲小勝二十一日梅震榮會同陳士杰督率桂勇並協義團勇於杏村設伏誘賊賊目李石保率千餘賊蜂擁而出從小路過三鞏橋圍抄圍勇後隊陳士杰揮勇

轉戰斃賊二十餘哨長六品軍功陳月星力戰陣亡梅震榮陳士杰督全勝團勇由小路分抄賊後賊始退走各勇乘賊過橋時猛躡之斃賊五十餘奪獲籐牌五面大紅旗四面抬鎗四桿烏鎗刀矛無數賊之負傷逃竄者不少二十二日復戰於打石坳斃賊二十餘二十三日賊由上塘攻撲全勝團團勇奮擊斃賊二十餘賊退走君子塘清盛仁和吉利三團各紳勇遮截之賊衆反走荷葉塘適陳士杰督帶桂勇及協義公平兩團紳勇會勦突與賊遇殺賊百餘生擒



芬鎗斃長髮賊目一名奪獲大元帥陳大旗一  
桿二十八日梅震榮陳士杰帶桂勇並糾集各  
團勇萬餘擊賊和平墟賊以團勇勢盛不戰而  
潰紛竄舍人渡瓦窰僅追斬三十餘賊此桂陽  
州團勇擊賊屢獲小勝之實在情形也 臣維廣  
東之賊竄入湖南者大約難民十之三漏網劇  
寇十之七其僞號元帥者何祿甘先葛廷黃崇  
開周春朱發劉順昌陳開馮三興朱子義矮崽  
陳歐坤盧三友林大年陳金剛羅高陳義和張  
三和鄧將李興單眼何祿陳受黃陽王一潮等

二十餘犯每股賊黨一二千合計不下數萬聲  
言由湖北江西與金陵逆賊會合湖南土匪頭  
目則郴州逸匪王大才桂陽州逸匪李石保興  
甯縣之焦姓戴姓郴州之女賊許氏永興縣李  
華芝等亦不下十餘起郴桂一帶亂民本多又  
自楚粵道梗以來商販不通小民失業無聊以  
饑寒而流爲盜賊者亦復不少故郴宜迭陷之  
後從亂如歸官軍前後擒斬計亦不止數千之  
多而賊勢蔓延勦不勝勦路徑紛雜防不勝防  
適值廣西逆賊竄踞東安萃精銳之卒能戰之

將竭力攻擊歷時四月甫就肅清未能及時會  
勦而北界岳州平江等處正須嚴防又不能爲  
反旆南征之計當此時局艱難餉需匱竭焦灼  
何可言喻幸諸賊目各不上下土匪與粵賊互  
相猜疑頗有連鷄不能俱飛之勢臣現調卽選  
知府王鑫帶湘勇千五百名由耒陽縣前進卽  
選州同蕭啓江守備楊虎臣武生彭忠信帶湘  
勇一千二百五十名由醴陵前進飭李輔朝一  
軍由耒陽永興安仁一帶相機夾擊飭王葆生  
督各營速攻茶陵嚴遏由攸醴北竄之路並飭



湘鄉縣知縣唐逢辰挑團勇千名預防衡山湘潭交界之朱亭司一帶相機布置杜賊旁逸之謀守備王佐清帶水師戰船巡緝湘潭上游一帶以壯長沙衡州之勢一俟各路抵齊卽當嚴督諸軍尅期掃蕩力遏北竄以稍紓

宵旰憂勞此次陣亡之卽選從九龍際時武生龍虎臣龍吟把總徐良積等請

旨交部議卹以慰忠魂其在事奮勉出力之文武紳勇及失事之文武容卽核實保劾以明賞罰而勵軍心所有永興縣茶陵州失守現在籌辦各

情形謹由驛馳

奏伏乞

皇上聖鑒訓示施行謹

奏

咸豐五年九月十二日拜發奉

硃批另有旨欽此



駱文忠公奏議卷之五目錄  
■湘中稿

乙卯下

北路官軍大捷克復湖北通城摺

江西劉守留楚剿賊片

追剿粵賊朱逆出境片

採買淮鹽濟食分岸納課濟餉摺

北路官軍先勝後挫籌辦情形摺

南路諸軍迭勝同日克復茶陵桂陽兩州摺

廣西賊匪竄陷永明郴桂逸匪竄擾甯遠摺

黔匪攻撲鎮筸官軍大捷立解城圍摺



北路官軍大捷克復湖北通城摺

奏爲北路官軍會勦湖北通城逆賊大獲勝仗縣城立即克復恭摺由驛馳

奏仰祈

聖鑒事竊官軍自克復江西義甯州後賊首鍾姓竄回湖北通城崇陽通山各縣糾聚黨夥仍圖抗拒其屯崇通交界桂口者約計萬餘其踞通城者約計數千臣以平江北界及東界駐防官軍不過二千五百該縣練勇不過千餘勢難越境進勦札催布政司銜浙江甯紹台道羅澤南帶

勇由義甯前進密飭平江巴陵各界官軍嚴裝以待一俟羅澤南師抵通城卽分途進剿以分賊勢而速戎機九月初三日派防巴陵縣毛田管帶湘勇軍功童生劉騰鴻藍翎從九毛英勃探通城之賊千餘分擾莊泉花涼亭等處距毛田三十餘里卽派隊由摩斗嶺分路掩捕劉騰鴻飭各百長分五路圍攻莊泉之賊斃賊二百餘生擒賊旅帥王老二孫二喬百總游義方兩司馬王元得石老三等四十三犯毛英勃議敘八品任應庚帶勇由三林坳進剿花涼亭之賊

亦擒斬數十奪獲抬鎗三桿烏鎗八桿刀矛無  
數初五日羅澤南軍至通城連營東南山上管  
帶平勇五品銜卽選知縣何忠駿李原濬藍翎  
候選知縣黃崇策藍翎千總方城等四營亦於  
是日到通城連營西南山上桂口之賊於初四  
初五等日陸續來援於城西門外樹木棚二築  
堅壘一層安砲眼深掘重壕壕外竹簽木椿密  
布希圖抗拒官軍羅澤南安營後帶勇數百登  
山察看情勢該逆出大隊來犯諸軍回旗擊之  
斃騎馬賊目三名生擒七名賊敗歸壘初六日



辰刻羅澤南正督各營進剿軍士傳餐未畢何  
忠駿李原濬黃崇策方城等督平江四營遞分  
三路直薄賊壘該逆礮石雨下各勇冒死撲近  
奮躍先登連破二壘羅澤南急督諸軍馳往接  
應記名道李續賓率右營湘勇候選訓導劉蓉  
率副右營湘勇候補直隸州知州李杏春率副  
中營湘勇攻城之西北羅澤南自率中營繼之  
參將彭三元率寶勇游擊普成翹率雲字營勇  
攻城之東南候補直隸州知州唐訓方率訓字  
營勇同知銜候補知縣蔣益澧率左營湘勇繼

之乘平勇攻堅得手之際麾諸勇急進斃悍賊數十直逼賊壘縱火焚燒壘中賊由西北渡溪而奔諸勇分路截殺溪流盡赤賊由西門北門狂奔入城諸勇躡蹤急追奪門而入賊拋磚下擊諸勇受重傷者多殊無退志東南諸勇亦攀援而登開兩門以納官軍縱橫血戰斃賊無算城賊倉皇失措從北門蜂擁而出官軍適從北門而八賊之被踐踏而死者多官軍亦有爲賊所踐者羅澤南飭各勇分伏北門外樹林中俟大隊賊奔出則截殺之如是者數次城中賊盡

而截殺亦不少矣共計羅澤南全軍及平江四營前後殺賊約三千內穿黃馬褂長髮老賊共數十生擒者共三百數十名奪獲大小旂幟百餘面馬百餘匹牛數十頭軍裝穀米無算審訊生擒之賊供稱武昌賊令賊首鍾姓率諸賊守通城以遏羅澤南一軍俾武昌之賊可以遙犯岳州其奸謀如此羅澤南於初十日率師進攻桂口據探報桂口之賊已竄回通山羅澤南急於援鄂將由蒲圻前進卽選道江忠濟率防岳楚勇二千初八日拔營馳赴蒲圻界之羊樓司

會援臣因湖北崇陽通山興國等州縣素爲賊  
藪鍾逆漏網餘匪尙多潛伏勢必回竄崇通湖  
北勢難兼顧臣已調何忠駿李原濟黃崇策方  
城等四管扼崇通交界之桂口兼爲羅澤南一  
軍聲援增調駐防巴陵毛田之劉騰鴻毛英勃  
等兩管勇一千前往助之並委卽選府經縣丞  
陳鳳舞會同各管帶勇紳士辦理崇通圍練搜  
拏餘匪以靖地方此次克復通城在事將士紳  
勇實著微勞除羅澤南一軍應由兵部侍郎銜  
臣曾國藩核明保

奏外所有平江四營紳勇自本年正月經臣札調  
赴該縣北界防堵繼因江西義甯州被陷復分  
赴東界迭次接獲勝仗逆賊不敢窺邊此次調  
赴通城會勦首先踏破賊壘追賊入城越境會  
勦成功迅速實屬有勇知方可否由臣核明分  
別保

奏外獎以勵軍心之處出自

天恩至該紳勇等因急於滅賊冒險攻堅陣亡至四  
十餘名受傷至百餘名之多均係一軍精銳殊  
爲可傷容再查明分別請

賜卹賞以慰忠魂而作士氣所有湖南隨同羅澤南  
一軍會剿克復通城縣城並現在籌辦情形謹  
由驛馳

奏伏乞

皇上聖鑒訓示施行謹

奏

咸豐五年九月十五日拜發奉

硃批另有旨欽此



江西劉守留楚勦賊片

再前准吏部咨咸豐五年八月初五日內閣奉  
上諭陳啓邁奏請飭回籍知府前赴江西差委等語  
江西候補知府劉長佑現回湖南原籍著駱秉章  
卽飭該員迅速前赴江西交文俊差遣委用欽此

臣查江西補用知府劉長佑籍隸湖南新甯縣  
由拔貢幫帶楚勇從征廣西湖南江西安徽積  
功洊升江西補用知府本年五月由安徽廬州  
護送前安徽撫臣江忠源靈柩回楚時適廣西  
逆賊竄陷東安經臣札委管帶楚勇馳往會勦



收復縣城嗣因逆賊竄回廣西全州界內復分股潛竄新甯劉長佑帶勇馳回援勦敗賊解圍均經

奏明在案臣前因東安收復調該紳由耒陽進勦郴桂之賊適該紳馳回新甯援勦未及赴耒而現在郴桂一帶賊勢猖獗臣仍飭該紳帶勇赴衡聽調查劉長佑從征數載所帶楚勇均係該紳本籍之人彼此相習故能屢立戰功陳啓邁請調赴江西管帶新募平江之勇未必即能得力而湖南勦賊吃緊又未便飭令散遣現帶楚

勇馳赴江西所有補用知府劉長佑請仍留湖  
南剿賊暫免其調赴江西謹附片覆

奏伏乞

聖鑒訓示施行謹

奏

咸豐五年九月十五日拜發奉

硃批另有旨欽此



追勦粵賊朱逆出境片

再廣西逆賊分竄邠陽新甯兩縣經委紳卽選知府王鑫補用參將周雲耀委紳江西補用知府劉長佑等先後痛勦克獲大勝業經臣馳

奏在案其竄新甯之賊首僞鎮南王朱洪英一股自新甯敗竄八月二十一日復由全州界竄入湖南零陵界之隆慶里團紳職員趙履祥文生楊星平齊團迎勦斃賊三四十名奪獲大旗二面烏鎗腰刀二十餘件另股賊目譚宗榮竄近辛興里團紳舉人屈鼎新廩生李榮賜齊團迎

勦轟斃執旗紅衣賊目一名賊卽紛紛潰走朱  
逆一股竄至道州永明交界之大江源據險建  
立石寨冀圖抗拒二十六日周雲耀及已革都  
司駱元泰率兵追至預伏兩翼令前隊佯退誘  
之賊傾巢來追伏兵突起賊卽反奔署守備侯  
國恩百長陳順廷把總殷得善外委楊尙烜帶  
隊緊追兵丁沈大和等轟斃守寨悍賊眾勇奮  
躍先登立將賊據四寨踏毀斃悍賊百餘名墮  
巖澗死者約二百餘名奪獲抬鎗抬礮四十餘  
桿大小紅黃旗幟百餘桿火藥四石賊馬六十

餘匹藤牌刀矛無數生擒賊匪七十餘名二十七日探報該逆由潘家圍竄至都盤嶺復經署永明把總陳佳陞帶領兵丁及猛勇一百六十名督同軍功譚廷魁率團丁百餘名追至灌陽縣界之茅坪殺賊六十餘名生擒賊目李一蕙周老三文一萬趙亞仁等四名奪賊馬三匹抬鎗二桿刀矛二十餘件三十日周雲耀復派把總陳佳陞帶領各勇越境搜勦陣斬數賊生擒十三名內有僞先鋒唐竣華僞百長羅亞蕙兩名現探朱逆潛竄灌陽文村地方勢甚窮蹙

臣

仍飭周雲耀等設法擒斬一面飛咨廣西撫臣  
勞崇光飭屬迅速兜剿以淨根株而除兩省之  
害所有追剿朱逆一股實在情形理合附片具  
奏伏乞

聖鑒訓示謹

奏

咸豐五年九月十五日拜發奉

硃批覽奏均悉欽此

採買淮鹽濟食分岸納課濟餉摺

奏爲採買淮鹽以濟民食淮楚兩岸納課以濟軍餉實爲平賊要務敬抒管見仰懇

乾斷施行事竊自逆賊竄湖廣擾江皖而陷金陵長江梗塞淮鹽片引不抵楚岸者三年於茲矣湖南一省例食淮鹽州縣十居七八從前無事之時商民販運穀米煤炭桐漆油竹木紙鐵及各土產運赴漢口銷售易鹽而歸分銷各岸計淮南之鹽銷數多者惟湖南爲最每年正引之外尙融銷湖北之引十餘萬論者每謂淮南引鹽



行銷西岸漢岸而其實湖南從漢岸分銷幾敵  
淮綱之半誠以江西有粵鹽浙鹽閩鹽之浸灌  
湖北有川鹽潞鹽淮北鹽之浸灌湖南則距產  
鹽各省稍遠而川粵之私又有三峽五嶺之險  
爲之阻隔浸灌較難故行銷淮鹽較江西湖北  
兩省爲尤暢也自江淮道梗淮南片引不到兩  
粵多故粵鹽亦不時至而鹽價日昂四民重困  
湖南爲產米之鄉近年稍稱豐稔穀賤如泥又  
武漢疊陷米糧無路行銷農民買穀一石買鹽  
不能十觔終歲勤動求免茹淡之苦而不得如

是而農困商販貿遷阻滯生計蕭條向之商賈  
今變而爲窮民向之小販今變而爲乞丐如是  
而商困兵勇出征鹽與銀並重既不能賣鹽自  
隨勢必隨地購買近則墟市荒儉購買維艱南  
人數日不嘗鹽味則筋力疲乏甚或重腿成疾  
如是而兵勇亦因此患之中於湖南者也淮南  
各場煮海爲業丁竈而外窮民賴以營運爲生  
者奚止數十萬狀類年片引不行各場鹽素山  
積鹽一觔僅易一錢尙苦無從銷售生理日窮  
坐以待盡上年兩江督臣怡良曾經據實陳

奏急以恤丁爲請其竭蹶可想此患之中於江南者也

國家兩淮鹽課正雜各款每歲共銀六百餘萬兩爲經入一大宗三載以來兵餉增數千萬之出鹽課失二千萬之入兵事方殷餉源早涸用兵各省均抱隱憂武有七德豐財居一財不能豐且日憂饑潰主兵之臣以乏餉而號令難行負戈之士以乏餉而壯氣易餒兵勇之應裁者以欠餉而不能裁事機之應辦者以欠餉而不能辦錢糧漕折追呼急而民力難支捐輸釐金括

索類而膏脂已竭日復一日何堪設想此患之  
中於

國家者也且自古鹽筴之利不歸於官則歸於民  
歸官則利權一而國用紓歸民則豪猾橫而民  
生蹙事勢所必然也今淮鹽之利不歸於官不  
歸於民而且潛歸於賊何以徵之淮南片引不  
行轉運之路已斷矣而民間買食之鹽亦有產  
自淮場者謂非奸民與賊販易此鹽何自而來  
風聞各處並有販運穀米硝磺潛越下游荒僻  
洲渚搬堤轉壩與賊易鹽獲利之事奸民冒死

趨利本爲法所難防小民方虞買食維艱豈遑  
問其所自官軍明失淮鹽之利而餉無可籌逆  
賊陰據淮鹽之利而禍以愈烈以此言之則採  
買淮鹽之舉不獨爲籌餉計在所必先卽爲剿  
賊計亦刻不容緩也明矣歷代籌邊裕餉之策  
多出於鹽誠以鹽之爲利與地丁漕米同一取  
之於民而小民惟知買鹽不知納課較之地丁  
漕米尤無追呼徵比之煩但令成本輕減足以  
敵私小民盡食官鹽卽小民盡完  
國課是有益於

國有益於民爲

朝廷收自然之利並爲閭閻銷無窮之患莫便於此  
明代開中法及王守仁權鹽濟餉之策所爲識  
時要著行之有效也兵部侍郎銜臣曾國藩曾  
慮及此而有借撥浙鹽之請已蒙

皇上俞允第所請三萬引爲數甚少濟江西民食尚  
且不足更何能波及湖南曾國藩非不知浙鹽  
三萬無濟江楚兩岸之需亦非不知淮鹽較浙  
鹽成本更輕行銷易暢特以淮鹽運銷楚岸必  
假道浙河浙中官商方暗侵淮南引地爲浙鹽

壟斷之謀必將藉淮鹽入浙浸灌浙江引地爲  
言危詞聳聽其勢終扞格而難行不如卽借浙  
鹽稍資軍需之接濟臣愚則以浙省所產之鹽  
斷不足敷江楚民食而於軍餉裨益無多不若  
採買淮鹽於民食有不匱之源而於剿賊機宜  
及各省軍餉尤有裨益且湖南旣例食淮鹽之  
地淮鹽又係行銷湖南之引浙鹽可借淮鹽豈  
反不可行應請

敕下兩江督

臣

轉飭運使郭沛霖監製同知許惇詩

運判馮國柱鹽大使萬啓彬陳本鎮等設法倡

導勸諭各場有鹽之商先運一十萬引趕赴湖  
南俾全省兵民得免淡食之苦其應納之課以  
一半由兩淮投納以一半歸湖南投納以充兵  
餉在戶部以失課之鹽抵餉無俟仰屋而籌在  
江楚以滯銷之引變銀不至束手待盡不獨江  
楚兵民商賈兩有裨益且於數省軍務大有轉  
機至淮鹽由浙河轉運湖南經過江西亦係淮  
鹽引地原無慮其浸灌惟由蘇過浙必經浙河  
係浙鹽引地然程途僅止三百餘里責成領運  
之商督運之官限以程期亦無難杜其浸灌且



楚岸鹽價倍昂於浙商人惟利是趨豈肯以貴  
銷楚岸之鹽賤售浙岸以人情物理推之似可  
毋庸過慮如果試行有效湖南所收鹽課漸有  
成數則東征水陸兩軍亦有可指之餉臣斷不  
敢稍存畛域置大局於不顧當此時局艱難萬  
狀之時公家之利豈可知而不爲若身任封疆  
而徒顧一隅私計致所濟者小而所誤者大是  
何異於鹽商各護引岸之見乎並懇

諭浙江撫

臣

及鹽務諸

臣

毋爲奸商私議所脅持則

東南大局幸甚

臣

一得之愚謹據實直陳伏乞

皇上聖鑒訓示施行謹

奏

咸豐五年九月十五日拜發奉

硃批軍機大臣會同戶部速議具奏欽此

五

目録

一

三

北路官軍先勝後挫籌辦情形摺

奏爲北路官軍越境勦賊均先勝後挫現在籌辦情形謹據實

奏祈

聖鑒事竊自湖北通城克復之後布政使銜浙江甯紹台道羅澤南率師攻崇陽擬克崇陽後卽由蒲圻節節搜勦前進規復鄂城臣以羅澤南一軍尙單而逆賊大衆盡在蒲圻及崇通兩路與湖南北路官軍相距不遠亟應迅速助勦以壯聲援因調岳州官軍赴蒲圻之羊樓司平江四

營之駐通城者進屯崇陽桂口駐防巴陵毛田  
軍功劉騰鴻藍翎從九毛英勃兩營並移營助  
防均相機會勦以期迅殄羣兇九月十二日駐  
防岳州卽選道江忠濟率楚勇二千前進途間  
搜拏餘匪於白里畝等處殺賊數十生擒二十  
五名十四日抵羊樓司聞羅澤南一軍方攻崇  
陽縣城擬俟崇陽事竣會勦蒲圻巨股探報蒲  
圻賊目韋姓楊姓議乘官軍營盤未定卽來撲  
營江忠濟令各備弁整隊以待十五日黎明賊  
分三路來犯每路約三四千江忠濟飭補用府

經劉國慶帶寶勇二百千總楊振國帶楚勇六百迎擊中路守備徐志近千總徐士松率楚勇六百迎擊其右守備郭漢雲帶楚勇六百迎擊其左每路又各分三股左右抄截賊衆整隊徐進旗幟鮮明耀目每進輒卓旗呼譟聲震山谷比三路均撲近營牆江忠濟督各營空壁齊出大呼陷陣徐士松楊振國等督勇縱橫衝擊轟斃騎馬賊目四名劉國慶手刃二賊賊陣始亂左右隊從旁抄出刀砍矛刺斃賊甚多共割取長髮首級二百餘顆短髮首級三百餘顆奪獲

大黃綳緞及黃布旗幟百數十面馬五匹鎗礮  
刀矛無數陣亡外委黃承佳及楚勇三名受傷  
十二名官軍收隊回營急修營壘西刻賊復三  
路蜂擁而來江忠濟仍令分三路出全隊擊之  
中右兩路正鏖戰間忽左路郭漢雲所帶之勇  
自相驚潰棄營而走郭漢雲督之不止賊眾乘  
之江忠濟正遣弁持令嚴督賊已從左路包襲  
中左兩營之後各勇前後受敵無心戀戰遂奪  
路而走兩營俱失共陣亡楚勇三四十名受傷  
四十餘名從九吳憲武陣亡江忠濟仍率勇回

岳州鳳凰山大營賊亦旋回蒲圻此九月十五日岳州官軍越境擊賊羊樓司一日兩戰先勝後挫之實在情形也羅澤南於十四日攻克崇陽聞十五日岳州官軍新挫十九日分軍駐羊樓崗扼賊上竄之路而自率湘寶勇二千搜勦崇陽餘賊不料逆渠偽翼王石大開率悍賊三萬上犯眾寡不敵是以有二十五日之挫石逆旋踞崇陽縣城平江四營之會克通城者僅二千人未及移駐桂口而臣所調赴桂口之劉騰鴻湘勇一營經羅澤南札調進營羊樓崗其毛



英勃一營因賊復踞崇陽可由間道直犯巴陵  
毛田未便移營前往管帶平勇五品銜卽選知  
縣何忠駿李源濬藍翎知縣黃崇策守備銜千  
總方城委員補用府經縣丞陳鳳舞會商以石  
逆踞崇陽兇燄甚熾現據探報賊之前隊已陸  
續上犯而四營勇數甚少當先挫之以示威十  
月初二日出隊六成會哨於交界之鐵舟港適  
與賊遇何忠駿等督勇奮擊斃賊數百收隊回  
營初三日卯刻賊由澗田販蜂擁而來何忠駿  
李原濬等督勇分支迎擊鏖戰四時斃賊八九

百生擒三十餘追至鐵舟港始收隊回營初四  
夜石逆率大股至濶田畷上至九眼橋通城各  
處頑民均仍從賊助逆初五日黎明圍撲各營  
何忠駿黃崇策兩營由營右分擊李原濬方城  
兩營由營後分擊鎗礮刀矛並進賊不能支四  
營奮力猛追斃賊各百餘賊敗退九眼橋下何  
忠駿等以賊隊尙整仍收隊回營站牆嚴堵甫  
兩時許賊大隊復至一股從營右山後蜂擁而  
出勢尤兇悍先撲李原濬營盤李原濬督勇從  
山上壓擊方城亦出隊助之斃悍賊百餘賊猶

死戰不退正鏖戰間忽騎馬賊目數十由營後衝上山梁羣賊呼譟猛進火箭射入各營各營火起李原濬猶督勇力戰手刃三賊被賊羣矛攢刺陣亡其弟監生李原漢童生李原溥生員吳國安等亦同時遇害何忠駿黃崇策方城等督勇血戰左右衝突殺出重圍退至平江上塔市老營四營勇陣亡者共計百二十餘受傷者二百餘此十月初二初三初五等日平江四營至湖北通城擊賊兩勝一挫之實在情形也逆渠石大開旣復陷崇陽通城卽思由平江南犯

初八日北界練勇盤獲賊探江松壽供稱逆渠已派賊黨二百餘潛入平江界內爲內應將以初八十三日夾攻上塔市營盤其日平江北界團總國子監學正銜何選亨紳士王奇選等在界巡緝忽有兵勇三百餘兩起持刀從小路而來口稱赴岳州投効皆安徽貴州崇陽等處口音形跡可疑當集鄉團圍捕該逆知事露卽拔刀殺斃團勇二名又傷十餘名頃刻鄉團數千畢至將該逆百十餘全數斬之生擒馮贊春等十七犯其後隊百數十賊聞前隊悉被擒斬遂

鼠竄而去逆渠知平江北界不可犯遂竄擾江西義甯州而通城尙爲賊踞時窺巴陵毛田各界十月二十日賊分股千餘至巴陵白箬築營壘以圖南犯藍翎從九毛英勃等議乘其初至挫之是夜四更率勇潛進行二十餘里至相思崗遇賊擊之立斃執旗頭目二名殺賊數十乘勝追至白箬賊巢殺賊二百餘將賊巢焚燬奪獲鎗礮刀矛百餘件火藥鉛子三石生擒僞旅帥余福亭師帥郭祖元等十三犯餘匪仍退通城此又平江擒斬奸細巴陵擊退賊匪之實在

情形也 臣維平江一縣士民淳樸知義團練整齊頻年防勦逆賊屢著戰功北界一帶數十里間聞警傳呼頃刻可集數萬之眾賊屢窺伺皆不得逞此次四營在通城失利退保上塔市眾團聞警負戈上界者絡繹不絕復擒斬賊百數十名而逆渠奸謀頓沮該縣上年防勦出力士民蒙

天恩獎叙又荷

殊施增廣該縣學額士民咸沐

皇仁尤爲踴躍實有眾志成城之效惟該縣東界與

通城義甯毗連之處地勢險易不一民風勇怯  
攸殊尙難一律完固臣已調管帶平勇之五品  
銜卽選知縣張岳齡守備銜千總方城等帶所  
部壯勇分防東界並飭該縣增募練勇以壯聲  
威其巴陵毛田一路已飭江忠濟撥勇千餘駐  
防桃林以期兼顧惟據探報江西義甯一帶賊  
蹤往來無定而前由茶陵竄往江西之粵匪復  
由分宜竄陷萬載其地與湖南瀏陽緊連又可  
繞越醴陵均爲兩省往來孔道亟應嚴防因調  
卽選州同蕭啓江等帶湘勇前赴瀏陽會同該

知縣袁青綬督團堵截並催飭南路帶勇各員  
迅將鄱縣郴州大股逆賊剿除免其勾結此又  
現在籌辦北路東路之大概情形也此次陣亡  
之擬保同知五品銜卽選知縣李原濬力戰捐  
軀死事最烈應請

旨照同知例

賜卹藍翎卽選從九黃錫宇卽選府經縣丞黃金鑑  
外委黃承佳拔補把總何忠駿均請照例

賜卹從九吳憲武議敘從九陳鳳彩監生李原漢文  
生吳國安童生李原溥李滋癸何忠主均請照



從九品例

賜卹武生何敬椿武童方向陽均請照外委例

賜卹以慰忠魂所有北路官軍越境勦賊先勝後挫  
及現在籌辦情形謹據實陳

奏伏乞

皇上聖鑒訓示施行謹

奏

咸豐五年十一月初七日拜發

南路諸軍迭勝同日克復茶陵桂陽兩州摺  
奏爲南路諸軍迭獲勝仗同日克復茶陵桂陽州  
兩城現飭速勦鄱縣郴州以期一律蕩平恭摺  
由驛

奏祈

聖鑒事竊廣東之賊竄入湖南土匪乘機附和蔓延  
郴州桂陽州永興興甯茶陵等處適永州一路  
肅清臣札調卽選道王鑫帶勇由耒陽以圖郴  
桂之賊調卽選州同蕭啓江等帶勇由醴攸前  
進隨補用道岳州府知府王葆生等攻茶陵之

賊所有布置各情形業經

奏報在案其進攻茶陵者九月初九日王葆生飭  
候選同知趙煥聯等率諸勇分三路進攻州城  
蕭啓江一營逕逼南門奪門而入與賊巷戰斃  
賊數十遁西門外民屋內賊眾齊出計圖抄截  
官軍蕭啓江及武生彭忠信急率勇衝突而出  
守備銜千總楊虎臣都司朱南桂等由西路夾  
擊賊不敢逼徐徐收隊歸營共斃悍賊二百餘  
名陣亡湘勇百長黃佐清及壯勇十一名自是  
踞城之賊一分竄江西永新一分竄衡州府屬

之安仁縣界亦有自興甯回竄郴州者而大股  
仍踞茶陵如故十一日王葆生飭守備田興恕  
衡永郴桂道李維醇飭卽選縣丞張翔帶鳳字  
營勇卽選從九張毓杰帶新田勇擊賊於安仁  
之船頭地方斬賊二十餘名生擒粵賊頭目盧  
潮選奪獲大礮二尊次日會同署安仁縣知縣  
李逢春擊賊於黃泥舖田興恕張毓杰張翔李  
逢春等三路迎拒復分途設伏以待之俟賊入  
伏正兵回旗猛撲斃賊七八百陣斬黃衣賊目  
一名生擒紅黃巾賊目數十並僞軍師何進德

奪獲偽太平天國正丞相印一顆偽印二顆偽丞相劉偽大將軍余及各偽目大黃旗二十餘面銅礮一尊大鐵礮一尊九節礮三尊抬鎗十四桿鳥鎗八桿火藥鉛子八桶刀矛軍械無數連日已革叅將李輔朝率勇擊賊於永興大河灘未陽縣樹兜下油榨坪紅廟等處共斃賊四百餘名內有紅衣賊目四名偽先鋒五名生擒偽都督黎平有偽元帥如來堂僧及餘賊五十餘名十八日攸縣團紳歐陽淦會同藍翎訓導劉廷英等擊餘賊於清水舖斬賊二十餘生擒

八名二十日趙煥聯等各營分三路進攻茶陵州城蕭啓江彭忠信率勇由中路先進賊背城列隊相持良久趙煥聯朱南桂等左右兩路爲賊遮截賊忽猛撲中路而以另股賊襲其後蕭啓江分隊抗拒勢頗危急田興恕躍馬衝入率勇夾擊斃賊數十名賊始敗退趙煥聯朱南桂等亦將左右兩路賊擊敗收隊回營查點湘勇陣亡三十一名受重傷者亦數十名蓋由州城三面高山一溪環繞地勢逼促進攻尙易而收隊較難也二十二日趙煥聯等商議出隊誘賊

至地勢稍寬之處擊之是日辰刻賊果傾巢而出至十八坵地方黃旗紅巾彌塞山谷朱南桂張清和策馬衝鋒田興恕梁開國分左右抄擊斃賊多名賊猶不退眾勇刀矛並進呼聲震天適蕭啓江之勇丁轟翻騎馬督戰賊日落馬賊陣始亂各弁勇悉力搏戰殺悍賊三百餘名奪獲旗幟礮械籐牌刀矛各數十件賊自是閉城不出矣趙煥聯等每夜派隊近城轟擊以驚之復遣勇丁隨投誠難民鍾文亮賀阿才鍾家清等混入城內爲內應二十七日五更諸軍分路

潛進署知縣王宏模率團勇導之直逼州城鎗礮轟擊城中火起賊紛紛由文星門東門西門出城逃竄官軍入城搜斬賊匪百數十名卽躡蹤緊追斃賊二百餘名立將州城收復賊之由東門出者竄江西永新縣由西門南門出者竄衡州府屬之鄱縣其竄鄱縣者復留數股屯踞鄱茶交界之湖口墟坎老墟小汾東流平塘窰腦等處眾尙萬餘趙煥聯朱南桂等進紮古塘基以山險路雜易被抄襲未敢輕入賊負固不出十七日趙煥聯等僞退誘之比行三里許卽



擇地而伏午刻賊果分五路來追趙煥聯朱南桂張清和田興恕等各麾軍回擊正鏖戰間山谷伏兵盡發賊眾驚潰田興恕朱南桂等督勇猛撲之各手刃數賊眾勇刀矛齊發陣斬悍賊二百餘名生擒十五名奪獲大礮五尊子母礮一尊拍鎗十五桿大小旂幟四十餘件烏鎗藤牌刀矛多件十九日巳刻賊復分五路來撲官軍趙煥聯等以七成隊分路出擊朱南桂手刃先鋒賊王姓張清和殺斃手執大旗賊目各一名田興恕梁開國藍翎外委劉吉三等從左路

衝突而出連砍數悍賊劉吉三被矛傷右腿田  
興恕亦帶矛傷裏創血戰賊勢大潰六品軍功  
趙福元率勇從中路猛撲而出殺斃僞將軍資  
姓一名各勇躡蹤緊追屍橫遍野共計斃賊六  
七百名生擒二十餘名奪獲抬鎗八桿鳥鎗十  
餘桿旗幟刀矛無數此官軍克復茶陵及追勦  
竄匪疊獲勝仗之實在情形也其踞郴之賊首  
逆雙眼何祿等分遣賊黨竊踞桂陽州李石保  
及永興李華芝等糾合粵匪土匪思由永甯竄  
耒陽臣以逆賊不得逞於安仁茶陵必由耒陽

以窺衡州調江西補用知府劉長佑帶楚軍赴  
耒陽進勦適其時廣西賊竄新甯劉長佑帶勇  
回籍勦賊未至而廣西賊之竄祁陽者已經委  
紳選用道王鑫叅將周雲耀勦滅臣卽札調王  
鑫由祁陽赴耒陽進勦並飭該紳之兄卽選府  
經縣丞王勛募湘勇五百名由長沙前往會合  
進扼耒陽之公平墟七月初七日賊目李華芝  
王大才糾粵匪土匪數千分竄永興之花園墟  
耒陽之太平墟前隊甫至王鑫等卽出隊先勦  
太平墟之賊署耒陽縣知縣張濟遠派耒勇三

百名助之時值大雨火器難施王鑫等出其不意飭千總王開佶易普照知縣張運蘭等率各勇盡持短刀突襲墟市復督湘勇耒勇繼之斬墟內之賊三百餘燒斃賊匪百餘其逃竄墟外者湘勇百長張蘭桂翻山追殺八十餘名餘賊紛竄初八日賊目李華芝率賊二千直撲王勛營盤王勛督百長周先敬等衝入賊陣斃賊數十名賊始敗退百長戴奉聘王文瑞左右抄截王鑫率勇乘勢掩擊殺賊百數十名初九日賊復糾黨仍來撲營王鑫等堅壁不出賊眾搖旗

吶喊直奔向前距營僅十丈許忽營中鼓聲大振四面伏兵齊出賊卽棄械狂奔周先敬鎗斃騎馬賊目一名諸勇刀矛並進殺賊百數十名生擒僞都督鄧亞五僞先鋒趙朋貴奪獲旗幟砲械無數賊目王大才李華芝等屢爲官軍所挫糾合粵賊頭目陳金剛江發朱開發如來堂僧各逆首率衆萬餘踞永興縣花園墟十二日分五路蜂擁而來撲營王鏊派幫辦百長王文瑞王開信張運蘭程寶文劉本傑王開來唐自陶康金門等分五路設伏營前派兩營長夫伏

左右山內多張旗幟爲疑兵王鑫王勛親督湘  
勇爲正兵百長章厚坤陳見菴周先敬衝鋒力  
戰賊死拒不退王勛督百長戴奉聘王明輝大  
呼陷陣連斃廣東悍賊二十餘名生擒十餘名  
王鑫督百長黃萬友陳品南陳盛世斬首先撲  
營悍賊數十五路伏兵齊發賊勢慌亂乘機奮  
擊立斬二百餘賊官軍七路併爲兩路追殺三  
里至魯壁冲該逆復回旗返撲適張濟遠及千  
總余懷麟率兵勇團紳從後殺出與王鑫等三  
路夾擊斃賊約三百名王鑫等復督勇分路縱

擊遇賊卽殺斬馘甚多賊奔花園墟王鑫等率  
勇猛追墟內賊二千餘分路接應敗匪湘勇彭  
聲發蕭明星等直前搏戰生擒僞軍帥僞師帥  
女帥僞都督各賊目斬之賊益股慄百長李竟  
成張榮光等揮刀躍進墟口湘勇未勇繼之殺  
賊數十賊棄巢穴狂奔所遺軍器輜重山積王  
鑫恐諸勇恣取悞事一面縱火一面督勇窮追  
至板嶺馬田墟小隴復殺賊二百餘將賊棚燒  
盡始收隊回營查看花園墟火勢尙熾匿匪死  
者無算是役斃賊近千解散之匪約二三千生

擒土匪三十一名粵匪四十三名內有偽軍師  
師帥先鋒等十一名偽印四顆旗幟器械除燒  
燬外陣前奪獲旗幟百餘桿拍鎗鳥鎗藤牌各  
數十件自此該逆膽落不敢復窺耒陽矣王僉  
以賊踞郴桂相犄角而以郴州爲老巢非先克  
桂陽州則郴州不可驟復且該州團紳戶部主  
事陳士杰等屢與逆賊鏖戰獲勝急望官軍應  
援遂於十九日率勇千名赴桂陽州結營城外  
十五里之仁義墟而留勇五百仍駐耒陽縣公  
平墟以防餘匪二十日陳士杰來營會商預挑



團勇三千分三路協攻州城王鑫由中路繼進賊之竄擾烏桐舖者經團勇圍殺七八十名遽回竄州城王鑫陳士杰等帶勇逕抵城下分攻各門賊由北門突出湘勇百長陳盛世劉榮截殺三四十名賊遽折竄入城王鑫督勇猛躡之城門遽閉其未及入城之賊約三百餘竄伏城外民房團勇縱火燒斃之生擒四名其由西門出者王勛督百長周先進等奮力衝殺斬賊數十追至城邊城上礮石齊下湘勇受傷者六人其由東門出者陳士杰率團勇圍斃百餘名

諸營鼓勇撲城然皆以仰攻不利先登者傷亡  
十餘名王鑫陳士杰傳令收隊議誘其野戰殲  
之仍一面造雲梯捐橋等攻具以待連日誘賊  
賊固不出惟於官軍收隊時則以賊數百尾追  
雖俱有斬獲仍未得痛勦也二十六日辰刻探  
報踞椰首逆雙眼何祿遣賊千餘來桂助戰城  
內之匪將分三股來撲營盤王鑫陳士杰與署  
桂陽州知州梅震榮密商預派湘勇團勇持攻  
具繞道襲城而各出全隊迎勦王鑫一軍遇賊  
於馬舖橋百長易普照陳盛才力戰斃賊百餘

王勛督百長戴奉聘周先敬從小路橫穿賊陣截爲兩段殺賊二百餘名陳士杰督團紳文生李光白武生陳吉祥軍功陳克猷匡文瑯黃以權等擊賊於十里亭殺賊二百餘內有執大旗賊目數名王勛從後兜截復共斃賊百餘賊由北路狂奔梅震榮率團紳議叙八品曾肇昆文生孫箭鳴武生張首魁等截之竹子嶺亦殺賊百四十餘名官軍三路會合且追且戰預派城守把總許朝林訓導譚英督團勇伏於東門外上燕山州同金德輝吏目馬開智督團勇伏於

東門外十里之八十石地方官軍環城攻擊城  
上火箭火彈齊施鎗礮如雨傷亡湘勇四名受  
傷十餘名王鑫陳士杰梅震榮督勇佯攻西南  
西門北門之賊狂奔援救潛派弁勇速架雲梯  
呼譟而上諸勇繼之搜斬賊匪三百餘生擒粵  
西土匪共百餘桂陽州城克復賊由東門逸出  
者約一千有奇許朝林金德輝等兩路伏兵攻  
擊共斃賊一百餘餘賊遁入郴州三十日餘賊  
竄擾保和墟梅震榮陳士杰及在籍都司曠益  
茂軍功顏比達擊之殺賊二百餘是日戊刻土

匪頭目李石保仍糾郴州粵匪前來犯境十月  
初一日卯刻陳士杰率團勇由風箱舖大路迎  
勦王鑫督勇由招旅地方抄賊之後午刻兩軍  
均抵曹家村在村逆黨千餘以前阻一溪無路  
可逃誓死抗拒王鑫陳士杰麾勇進擊斃賊約  
三百餘賊始大亂各勇刀矛並進除斬獲外盡  
逼入溪溺斃者數百忽隔溪山上又來逆賊約  
二千餘王鑫等分軍一由下三里淺灘渡水攻  
賊之右一由上里餘淺灘攻賊之左賊正分股  
抵拒湘勇李敬堂單刀直前生擒偽都督周國

彪復翻身陷陣手刃數賊忽爲流礮所中陣亡  
湘勇陳得勝揮大刀連斬七賊鄒昌餘手縛僞  
軍師周國彩藍翎千總易普照陣斬紅袍騎馬  
賊目賊大驚潰各勇乘勝緊追斃賊百餘擒粵  
匪土匪十餘名奪獲馬十六匹器械無數初三  
日乘大風雨復擊餘賊於油山賊狂奔郴城僅  
殺百餘名初五日辰刻賊首李華芝王大才王  
光徠伍啓月率賊衆撲耒陽馬田墟湘勇營盤  
王鑫所派幫辦王文瑞張運蘭朱衢王開來等  
督勇空壁迎勦湘勇李三星奮躍入陣被賊矛

刺小腹未及裏創連刃悍賊二名其一卽賊目  
伍啓月也各勇競奮殺賊三百餘適張濟遠所  
派胡俊彥等帶耒勇柳勇從後截擊歸路李維  
醕所派之新田勇海勇及署郴州知州戚天保  
所派之團勇俱至四面圍剿復殺賊約三百名  
生擒賊約百名馬田墟團練雷先賜等率本族  
壯丁亦斬賊二十餘餘賊翻山竄油塘南香一  
帶初六日王鑫甫回馬田墟卽派五成隊隨王  
勛一營躡蹤追勦新田勇海勇俱會合同進酉  
刻抵油塘殺賊數十追至五里牌地方沿途復

殺賊百餘張濟遠所派耒勇勦賊梓木沖斬賊  
二十餘生擒僞先鋒朱亞義等六名初七日  
田勇海勇勦賊五里牌均有斬獲餘匪均退竄  
郴州瓦窰坪是處距郴城三十五里爲該州水  
陸總滙之所賊之資糧甲仗均聚於此初十日  
王鑫移營五里牌以逼之郴州之賊果分三路  
由瓦窰坪中伙舖街洞來撲王勛督勇迎擊中  
伙舖之賊守備黃輔鼎督勇迎擊街洞之賊王  
鑫親督湘勇耒勇郴勇迎勦瓦窰坪之賊共斃  
賊二百餘賊遂潰退黃輔鼎追至唐家沖王勛



追賊至荒沖殺賊百餘內有紅衣賊目三名王  
鑫追賊至瓦窰坪賊由河岸上下逃竄王鑫分  
柳勇耒勇追勦親督湘勇五百名擬過浮橋直  
攻賊巢忽粵賊千餘由浮橋突過鎗礮火箭齊  
施壯勇陣亡一名受傷者十餘名王鑫派百長  
易普照等帶勇二百名由黃牛灘晒淺潛襲賊  
巢而自督勇力戰賊見官軍甚少皆持籐牌撲  
陣勢愈兇猛鏖戰片時忽瓦窰坪烟燄突起呼  
聲震山谷則易普照等已入賊巢縱火賊驚顧  
不知所措王鑫遠督勇猛撲之賊折由浮橋逕

過多擁擠撲水者遠王勛等追賊回營中途聞  
瓦窰坪礮聲甚緊急來助戰遂會合猛追斃賊  
七八百生擒百餘各收隊回營沿途經過瓦窰  
坪見燒殘旗幟尙百數十面拾得銅鐵礮拍鎗  
烏鎗刀牌約三四百件偽印二十餘顆生擒之  
賊內有僞官二十餘皆登時正法郴勇耒勇殺  
賊一百餘生擒十餘戚天保所派團勇亦獲賊  
百餘此官軍由耒陽追勦克復桂陽州及攻勦  
郴州巨股屢獲大勝之實在情形也臣惟廣東  
賊匪之竄入湖南者皆慣戰漏網悍賊楚粵邊

界並無重兵駐紮以故廣東北路肅清而湖南  
獨受其累又郴桂一帶匪黨素多粵匪大股入  
境莠民從而附之人數之多實不止數萬現在  
茶陵州桂陽州業經克復宜章永興雖無賊蹤  
而何祿大股尙踞郴城由茶陵竄出一股萬餘  
猶踞鄱縣皆與竄往江西賊匪聲息遙通爲牽  
制官軍之勢若不尅期勦滅勢將蔓延四散貽  
害無窮臣現飭王燾專勦郴城之賊各營弁勇  
均聽其調度以一事權復飭李輔朝一軍由興  
甯前進會勦以杜旁竄王葆生督趙煥聯朱南

桂田興恕等勦鄆縣之賊以該處山險路歧鄉團全不可恃復飭江西補用知府劉長佑率楚勇一千五百名先將此股會勦再移師南下以期悉數殲除現在郴州桂陽州宜章臨武桂陽桂東各州縣團眾齊心士民助官殺賊者甚多聲威尙壯臣密飭王鑫等四面兜勦毋令兔脫致滋後患如鄆縣股匪迅速掃除則劉長佑一軍南下兵力更厚矣卽選同知趙煥聯都司朱南桂守備張清和六品軍功趙福元自東安勦賊卽屢次獲勝旋調赴安仁茶陵扼賊北竄前

後十數戰克復茶陵州城嗣勦辦鄱縣股匪每戰首先衝鋒頻獲勝仗出力爲多朱南桂請以遊擊留於湖南補用並請

賞換花翎張清和請以都司留於湖南補用趙煥聯請加知府銜並請

賞戴藍翎趙福元請以把總拔補

賞戴藍翎千總田興恕膽氣甚壯每戰衝鋒殺賊身受多傷請以都司補用並請

賞換花翎以示激勵其餘在事員弁團紳勇丁尤爲出力者尙多可否容臣核明分別保

奏之處出自

天恩至選用道王鑫一軍由耒陽進勦節次獲捷克復桂陽州城復進勦郴城逆賊迭獲大勝請俟郴城克復之後併入東安案內從優保獎而永州寶慶及郴桂一帶殺賊出力官紳卽一併附入是否如斯伏候

皇上訓示施行謹

奏

咸豐五年十一月初七日拜發奉

硃批另有旨欽此

馬之月之表諱

乙卯同

三七

廣西賊匪竄陷永明郴桂逸匪竄擾甯遠摺

奏爲廣西賊匪竄陷永明縣城郴桂逸匪竄擾甯遠一帶現籌勦辦情形恭摺

奏祈

聖鑒事竊逆賊朱洪英自新甯擊敗之後仍回竄廣西復由全州竄零陵道州永明交界各處經保升副將周雲耀疊次躡蹤追擊斃賊甚多該逆回竄廣西灌陽地方勢甚窮蹙曾經臣

奏明在案嗣永州探報九月底廣西永福賊匪孔亞福鄧興爵及另股女匪李氏數股合併復招



朱逆入夥陷踞興安縣城人數又已逾萬署永  
州鎮總兵朱瀚署永州府知府黃文琛會稟已  
飭周雲耀帶所部兵勇及千總左光藻所帶永  
勇由廣西全州進勦臣以永州一路近年防勦  
均得委紳候選道王鑫副將周雲耀之力王鑫  
一軍於逆賊胡有祿一股勦滅之後臣卽調由  
耒陽進剿郴桂賊匪永州所恃僅止周雲耀一  
軍未可令其越境進勦且廣西羣盜如毛周雲  
耀孤軍深入尤虞有失當批令相機斟酌全師  
速歸以期妥慎旋據周雲耀稟十月十五十七

等日在沙口亭唐家市兩次勦賊獲勝殺賊百數十名直薄興安縣城仍收隊回營十八日廣西誠勇報賊已空城而遁周雲耀恐賊復他竄急起追之甫至城邊伏賊二股突出圍抄官軍誠勇先潰周雲耀督隊衝擊斃賊數十陣亡兵勇三十七名折回全州朱逆等隨攻陷灌陽縣城襄陽日衆二十七日周雲耀率師駐道州之蔣家嶺嗣偵知該逆將由灌陽竄攻永明代理永明縣知縣曾德麟飛函告急周雲耀卽星夜赴援十一月初一日馳抵永明縣城內人民遷

居殆盡守具不完初二日賊衆蜂擁而至曾德麟卽藉稱招勇馳赴道州矣是日逆賊更番攻撲城垣周雲耀督勇出城迎擊斃悍賊三百餘白象汎把總朱耀中砲陣亡周雲耀收兵登陴誓死固守逆賊晝夜更番攻撲周雲耀督勇百計禦之礮石雨下城外賊屍山積賊之踞城外民房者鑿牆安礮向城轟擊守陴士卒亦多損傷周雲耀頭顱爲飛石所中血流滿面以巾裹之督戰如故自赴援以來日不交睫者蓋五晝夜初四日申刻賊用火藥轟開西門周雲耀猶

手刃緣梯上城之賊三名既知事無可爲遂麾  
諸兵勇下城謂當殺賊以報徒死無益我義不  
爲賊刃所污遂自刎而死把總周佑得手刃數  
賊相繼陣亡訓導張起鵬隨同守城頭額左眼  
受石子傷左腿受鎗子傷當經團丁搶護負赴  
道州此廣西賊匪合股竄撲永明縣城副將周  
雲耀城陷殉節之實在情形也桂陽州城克復  
之後候選道王鑫移師赴郴攻勦未至之先郴  
州賊分三四千仍思襲攻桂陽州城爲牽制官  
軍之計十月十七日由村頭沙坪一帶蜂擁而

來直撲州城署桂陽州知州梅震榮紳士戶部  
主事陳士杰飛調各團紳率勇七百餘名十八  
日內外夾擊斃賊九百餘生擒僞大都督胡黃  
連副都督李吐元僞先鋒黃誇口等數十名奪  
獲大黃旗四十餘桿僞印六顆抬鎗鳥鎗三十  
餘件軍械無算餘賊敗竄嘉禾又自嘉禾縣分  
兩股一竄新田常寧兩縣交界地方已經勦散  
一竄寧遠縣下灌墟一帶人數不過千餘署臨  
武營參將保升遊擊趙永年帶兵勇由臨武至  
嘉禾搜捕餘匪寧遠縣知縣劉如玉邀其過境

勦賊趙永年於十一月初二日赴寧遠初五日  
分兩路進攻下灌墟該處山谷高邃臨武兵勇  
不熟路徑是日大霧迷漫咫尺難辨兵勇行抵  
墟日正覓路前進忽兩山伏賊抄出官軍之後  
勢不能支趙永年督兵勇左衝右突斃賊數十  
力竭陣亡署臨武營千總唐仁高嘉禾縣文生  
胡化宣臨武縣六品軍功傅周年相繼陣亡此  
桂陽州擊敗逆賊竄擾臨武縣境署臨武營參  
將趙永年勦賊陣亡之實在情形也臣維廣西  
一省羣盜如毛刻思竄楚永明旣陷則道州江

華均屬吃緊而榔桂逆匪竄擾寧遠縣境當官軍新挫之後兇燄復張若由江華而竄永明與朱逆及各股會合勢將益熾南路官軍之可恃者悉調赴郴州圍勦大股粵賊現雖迭據委紳王鑫江西補用知府劉長佑等稟報接仗情形各已獲勝十餘次將賊四面困逼可望聚而殲旃然賊數尚有萬餘負嵎死守一時未能尅期蕝事臣已密飭王鑫等如榔城可期速拔固可移師西向一掃妖氛倘克復需時亦當分撥一軍赴永以期兼顧現在周雲耀所部壯勇已飭

署江藍廳同知顏培羸馳赴道州收輯管帶可  
期得力朱瀚黃文琛亦派都司蔣榮華帶勇前  
往會勦王鑫派新田勇千名由甯遠江華前進  
兵力尚不甚單或可稍資防勦臣惟有相機督  
飭妥辦以期仰紓

宵旰憂勤至保升副將周雲耀忠勇樸誠素爲兵勇  
所服自上年至今大小數百十戰衝鋒陷陣屢  
著戰功一片血誠祇知報

國實屬武職中不可多得之員此次誓守危城捐  
軀殉難大節凜然請



勅部照副將例從優

賜卹陣亡之署臨武營參將保升遊擊趙永年白象  
汎把總朱耀署臨武營千總唐仁高把總周佐  
德均請照例

賜卹文生胡化宜請照從九品例六品軍功周傳年  
請照外委例

賜卹庶足以作士氣而慰忠魂其失守城池之代理  
永明縣知縣曾德麟應請

旨革職拏問外委楊尚烜陳學校在周雲耀營中帶  
勇聞初二日開城擊賊時卽避往上江墟並未

歸隊現密札道州知州馮崑就近查詢明白如  
果屬實卽飭押解來省據實參辦以肅戎行至  
茶陵州鄱縣勦賊兩獲大勝現在搜查餘匪及  
圍勦郴城賊匪屢獲勝仗情形容再彙案陳  
奏理合聲明伏乞

皇上聖鑒訓示施行謹

奏

咸豐五年十一月二十九日拜發奉

硃批另有旨欽此

駢字類編

乙卯下

五三

黔匪攻撲鎮筰官軍大捷立解城圍摺

奏爲貴州賊匪攻撲鎮筰城垣官軍大獲勝仗立  
卽解圍恭摺馳

奏仰祈

聖鑒事竊貴州逆苗滋事勦辦未能得手湖南永綏  
鳳凰乾州晃州各廳壤地毗連均獲喫緊十月  
初二日貴州銅仁府屬有逆首舉人徐廷杰等  
因徵收秋糧起釁煽聚糧戶闖陷府城知府葛  
景萊被戕身死該逆等竊踞城池號召川黔匪  
黨及銅仁松桃各峒痞苗旬日之間嘯聚已及

萬餘聲言由松桃廳犯楚取道辰州順流而下  
湖北十一月初一日復陷松桃廳城逆燄日張  
楚邊悉震臣維湖南三廳內鎮苗疆外控川黔  
數百里閒兩設重鎮形勢最爲扼要近因軍書  
旁午調發頻煩存營兵丁無多不敷防勦而黔  
省苗患未平賊氛復熾其勢必駸駸入楚永綏  
鳳凰乾州晃州麻陽等廳縣地屬苗疆踞湖南  
西北上游一有疎虞則辰州常德兩府水陸防  
不勝防禍且不測比將調防省城三廳兵勇共  
一千五百餘名撤遣回營協同防勦並咨署提

臣永州鎮總兵樊燮移駐辰州相機策應飭護理辰沅永靖兵備道翟誥以此時黔省民苗蠢動大局鼎沸本省兵力不厚餉項萬難與其進勦而無把握一挫之後悔不可追則不若嚴密準備俟其竄近一痛劊之庶可挫兇鋒而寒賊膽旋據翟誥稟稱初九日銅仁賊匪已由大興場撲入楚境復由木林涼水井鴉拉營落壕等處分路蜂擁而來隨飭舉人吳自烈管帶幹勇三百餘名土守備龍子明龍子亮各帶土兵于名嚴行堵截初十日吳自烈遇賊廖家橋整隊

迎敵斃賊七十餘生擒四名奪賊馬三匹旂幟  
刀械無算吳自烈手縛執旗騎馬賊目一名身  
受矛傷四處鋼傷二處復裹創窮追忽西北山  
坳一股賊匪突出抄襲幹勇腹背受敵勢不能  
支吳自烈當將生擒之賊斬首奪路衝出適龍  
子明龍子亮等帶兵追到礮斃偽將軍烏姓賊  
眾始潰奔踞山梁龍子明等督眾仰攻賊從山  
上分兩路壓下士兵同時敗退十七日賊眾分  
路直撲鎮筵城一由水塘均撲南門一由木村  
橋攻西門一由山屯巖攻東門鎮筵鎮總兵文

安會同翟誥督飭在城文武弁兵紳勇分門守禦布置已定賊匪蟻聚環攻勢甚猖獗文安翟誥飭兵勇開礮轟擊斃賊頗多隨飭署守備包順科帶兵下城殺斃騎馬賊目數名餘賊辟易其攻東門西門之賊肉薄糞城昇置火藥木桶意圖轟開城門翟誥飭道標屯守備陳開甲營于總周洪印督兵勇下城奮擊斃賊無算均將火藥桶奪獲而賊之踞東門外民房者仍肩梯負牌攻撲不已署外委熊占元屯弁高明升士守備龍秀實麻學道龍子亮吳國楨龍廷興舉



人吳自烈監生呂慎修軍功鄧坤等各帶兵勇  
馳來援應與周洪印等兵勇前後夾擊士氣百  
倍城上拋擲火罐焚燒民房兵勇開城縱擊斃  
賊七百餘生擒一百五十六名其被逼撲水淹  
斃及藏匿民房焚斃者不計其數奪獲賊馬五  
匹大轎四乘紅黃大小旂幟百餘桿鍋帳刀矛  
抬礮拍鎗等項共八百五十餘件餘賊仍從小  
路鼠竄回黔查點傷亡兵勇僅止三十餘名此  
黔賊竄撲鎮筵城池官軍擊賊獲勝卽日解圍  
之實在情形也惟貴州近楚一帶民苗胥變風

聞松桃廳土弁已有與賊潛通之事苗路如梳無要可扼誠恐輾轉勾結則湖南苗疆大局在在堪虞乾隆嘉慶年間苗疆之役用兵數載力竭財殫其禍亦萌於黔而鍾於楚此次雖倖挫兇鋒然黔亂一日不平卽楚疆一日不能安枕臣於接到該鎮道捷報後仍催飭在途兵勇迅速回營以資防勦並咨

欽差大臣湖廣總督臣官文將前調乾州廳等處官兵四百名暫止勿調以重苗防仍嚴飭各廳縣切實團練約束各土弁搜查奸苗毋令潛相勾

煽致釀事端以期仰副我

皇上綏疆弭亂之至意所有此次在事出力之文武

員弁紳士漢士兵勇可否由臣核明分別保

奏外獎之處出自

天恩謹據實馳

奏伏乞

皇上聖鑒訓示施行謹

奏

咸豐五年十一月二十九日拜發奉

硃批覽奏均悉著准汝擇優保奏欽此

駱文忠公奏議卷之六目錄 湘中稿

丙辰上

郴州克復陣斬逆首摺

黔匪攻撲鎮筵綏靖沅州官軍擊退克復麻陽

晃州摺

覆陳派員帶兵會剿黔匪片

援軍克復貴州松桃廳銅仁府兩城摺

陣斬僞軍師楊逆片

永明江華克復南路肅清摺

援江官軍兩路獲勝克復萍鄉縣城摺

彙保寶衡永三府肅清出力文武官紳摺

郴州克復陣斬逆首摺

奏爲官軍會勦踞郴粵賊壘獲勝仗收復州城分道窮追迭獲大勝陣斬逆首何祿及賊目多名  
郴桂各屬一律肅清恭摺由驛

奏祈

聖鑒事竊廣東逆賊竄擾湖南其起事著名賊渠尙以數十計而皆推何祿爲首曾經

奏明在案逆首何祿自竊踞郴城後分遣賊黨竄踞桂陽州茶陵州兩城其陰謀秘計以郴州縮穀楚粵可以號召兩省匪徒桂陽州可資爲犄

角茶陵州可以北犯衡湘旁通袁吉也而其歸重則仍在郴城糧糗甲仗礮械均聚於此自桂陽茶陵兩城同日克復之後茶陵鄱縣之賊先後奔竄江西又分股竄鄱茶交界之湖口墟小汾一帶桂陽州之賊奔回郴城臣札飭選用道王鑫專圖郴州之賊而以衡永郴桂道李惟隨所帶之勇統歸其調遣飭委紳江西補用知府劉長佑及候選同知趙煥聯守備田興恕等速勦鄱茶交界之匪又慮郴賊從東路竄擾興甯鄱縣以併竄江西調暫革參將李輔朝一軍從

永興與甯直抵郴城之東截之其時郴桂兩州各屬士民恨賊刺骨羣起團練捐貲派丁分布各隘與賊相持計各屬團勇不下十餘萬之衆該地方文武竭力董勸衆志益奮賊勢已漸衰矣王鑫自十月初十日以前屢次勦賊獲勝而瓦窰坪一捷賊之輜重甲仗俱失所斃悍賊尤多郴城外數十里地方漸次肅清遂於十九日移營進逼郴城北路十五里之株木山署知州戚天保督團勇隨之是日及二十二二十一兩日賊分路撲營王鑫督各勇預伏以待令聞鼓則



起三次共斃賊八百餘名陣斬僞元帥侯姓生擒吳亞江等二十餘名二十三日李輔朝帶楚廣勇進駐郴州東路二十里之唐濟二十六二十七二十八等日督同郴州興甯各團勇分路勦賊擊斃先鋒悍賊鄧亞苟賊目劉芳大及餘賊六七百名生擒七十二名賊自兩路挫敗之後固匿不出官軍屢次攻撲輒憑城開礮飛石火罐齊施卒不得近十一月初五日李維鵬王鑫李輔朝署郴州知州戚天保等密約四路環攻大舉並進賊背城布陣分支迎拒北路王鑫

等斬賊三百餘東路李輔朝等斬賊三百餘將  
誘賊出巢殲之賊知官軍難敵惟恃城上鎗礮  
得以相抗終不遠離城根官軍僞退賊亦卓旗  
不追相持不決管帶衡勇紳士同知銜前貴州  
荔波縣知縣魏承祝憤甚棄馬而步持刀突前  
連殪紅袍騎馬賊二名乘勝衝殺至北湖橋忽  
水星樓側伏賊二百餘齊出魏承祝挺身格鬪  
爲賊叢刃所刺陣亡親勇王福羅繩祖殉之勇  
丁潘玉海等奪其屍而還王鑫等傳令收隊回  
營初七初九兩日賊來撲營均各有擒斬劉長

佑一軍既會同都司朱南桂千總趙福元等於十月二十四二十八日兩次在鄴茶交界之界首及太平頭等處痛勦鄴茶股匪擒斬千數百名賊首資姓亦被官軍擊斃生擒賊目歐發寶徐昌劉德開數十名奪獲礮械旗幟轎馬無數土匪紛紛竄匿有竄往江西者有逃歸郴城者地方漸次肅清卽遵臣前札將搜勦餘匪事宜交駐營茶陵之卽選同知趙煥聯辦理而自率楚勇赴郴會勦十一月初十日前隊甫抵郴州梯子嶺適郴賊分股數千出外掠食李輔朝卽

督同于總李承立等及興甯團紳分途截擊斃賊四五百名盡將所擄米糧牲畜奪回十一十二十三等日賊眾分路撲營王鑫劉長佑李輔朝及郴州宜章興甯各團紳均獲勝仗擒斬共千餘名逆賊因米糧接濟俱斷食盡求戰每次撲營兇悍更劇於前王鑫等輒堅壁挫之十九日賊分股赴朱江橋掠食劉長佑等出隊掩擊擒賊目李意而歸二十五日逆賊分由正東大路東北小路偷竄劉長佑李輔朝潛師截擊斃悍賊四五百名奪獲礮械無算逆賊食盡援絕

將悉數冒死逃竄王鑫劉長佑等偵知之密約各路帶勇文武及團紳等於二十六日大舉進攻王鑫派軍功胡倭彥帶耒勇守備黃輔鼎帶健銳勇軍功林滙元等帶海勇由花園裏進戚天保督團紳李雲峰曹雲快等帶團勇由黃茅嶺進王鑫親率湘勇由北大路進劉長佑帶楚勇由東路梯子嶺進團紳蕭啓樑陳善溶勇目崔大光繼之李輔朝帶楚廣勇由長嶺進與甯團紳李若霞張震聲繼之積拉明阿陳秀芝蕭紹鈴等帶兵勇及團紳張選明等帶團勇由南

路進二十六日卯刻官軍齊逼郴城賊不虞官軍速至卽紛紛奪路逃竄王鑫劉長佑戚天保積拉明阿蕭紹鈴等及各團勇縱兵痛擊王鑫一軍及戚天保所帶團勇殺賊五百餘名生擒一百餘名奪獲旗械騾馬偽印冊簿不計其數劉長佑李輔朝一軍殺賊四百餘名生擒賊目李向元等二十餘名積拉明阿陳秀芝等一軍殺賊三百餘名生擒五十餘名同時收復州城賊由郴城西路雷大橋逃竄王鑫已預囑桂陽州團紳戶部主事陳士杰守隘以待並傳令郴

桂交界各處團紳集勇守險節節攔截而自率所部湘勇緊追之是日殺賊約三千名生擒偽元帥劉順昌一名劉長佑李輔朝擒獲賊諜賊將由桂陽州境竄臨武宜章邊界卽率楚廣勇全軍由南路疾進迎頭擊之王鑫於二十七日馳至桂陽州境之羊山沿途郴桂各鄉團衆已皆挺刃以待見賊卽刺自州城至羊山五十里間枕屍相藉斃賊不知其數斬戴紅風帽穿紅袍賊目約近百名所獲旗幟礮械偽印簿冊無算二十八日王鑫追賊至桂陽州之永甯鄉

陳士杰帶桂勇黃輔鼎帶健銳勇遮賊去路王  
鑫令軍中不得俯拾器械及遺棄輜重違者斬  
各勇併力衝殺至酉刻斃賊約二千名圍眾之  
零星截殺者不與焉劉長佑李輔朝追賊至烟  
堦坪沿途殺賊四百餘生擒劉高李元等二十  
餘名廣勇百長羅福隆曹福勝王丙恒團紳陳  
順等生擒偽三軍都總尉定國伯朱顯輝卽朱  
發偽總管糧臺鄧金龍卽鄧西就解省二十九  
日賊踞黃茅嶺野牛洞王鑫派湘勇圍剿斃零  
匪四五百名是日劉長佑追勦蔣家洞芙蓉洞



零匪殺斃十餘名生擒五名三十日卽選府經歷縣丞王勛冒雪勦黃茅嶺之賊是處亂峰環繞人跡絕稀賊眾見官軍至卽駭走其饑疲之甚者或投巖死或自縊死或負創僵臥以待斫所斃實亦無數可計餘匪分竄宜章界之安源及臨武界之水東其竄水東者是日王鑫追及之臨武團勇遮其前共斃賊數百有自刎於途者其竄安源者於三十夜四更後逃至泗溪是時劉長佑李輔朝已分途追及殺賊一千數百名生擒百餘內有僞元帥谷先棟搜出銀印一

顯其由安源追賊之勇亦殺賊二百餘奪獲刀  
矛旗幟無數馬匹尙多而鎗礮則絕少矣餘賊  
竄宜章瑣石地方十二月初二日劉長佑李輔  
朝追賊至毛栗墟有悍賊百餘潛由芙蓉橋逸  
出劉長佑督勇及團勇圍擊全數殲之初三日  
卯刻賊由毛栗墟竄出劉長佑由泗溪一路李  
輔朝由梅田一路各率宜章團紳及廣東恩貢  
生謝大德軍功盧登谷所帶樂平勇引路截擊  
直至鷓鴣坪約共斃賊二千餘內有大紅旗紅  
衣賊目楊三友生擒賊目何位馮甫田及餘賊

六百餘名王鑫追賊至牛頭汾分路搜斬約殺賊數百初三日賊竄宜章境黃沙堡王鑫督勇追及賊復竄逸乘勢掩殺至廣東連州境之十八間地方斃賊千餘初五日追至潭源洞搜斬零匪二百餘劉長佑李輔朝率勇追至兩廣墟又窮追至水尾一帶生擒悍賊多名內曹子儀一犯卽十一月初五日在郴城戕害帶勇紳士魏承祝之賊也訊據生擒賊目羅禮供稱逆首何祿於初二日在毛栗墟經官軍截傷後賊眾紛紛逃竄初四日伊同賊黨逃至黃沙堡查問

各賊黨知僞右軍元帥陳義和僞參贊軍機洪子雲僞大司馬陳洪卽陳雄僞平安公楊天保僞總管三軍鎮楚大元帥黃胡連僞左輔正軍師何龍驤僞右弼副軍師朱瑣卽朱三僞右軍軍師陳森僞兵部蘇玲等均先後經官兵殺斃僞都總尉朱發卽朱顯輝僞總管糧臺鄧西就卽鄧金龍俱經官兵生擒其餘各僞目經官軍擒斬者甚多不記確數其首逆何祿於郴城破後改裝易服一路潛逃因帶傷不能遠竄初二日已經官軍擒斬割去左耳髮辮當經劉長佑

等派勇押同羅禮查認在毛栗墟近處  
獲何祿屍首適生擒何逆親隨梁忍至  
辦認確係何祿屍首髮長近尺左眼角  
當將該逆首級並羅禮梁忍兩犯解省  
臣提署嚴訊並發交長沙府質審供認  
將該首逆首級懸竿示眾並飭將朱顯  
發凌遲處死羅禮梁忍兩犯一併斬梟  
鄧金龍卽鄧西就一犯因受傷甚重行  
縣界已伏冥誅經護解弁勇割取首級  
一併懸竿示眾其曹子儀一犯訊係戕

魏承祝兇賊已札飭衡永郴桂道就近迎提該犯設立魏承祝神位將該犯凌遲處死割心致祭斬首示眾以快人心至首逆何祿自上年在廣東東莞縣石龍墟糾聚黨夥起首滋事攻城掠野流毒楚粵兩省罪大惡極覆載難容仰仗皇上天威將士用命兇渠得以授首計自收復郴城之後甫及旬日官軍沿途追勦各州縣團勇沿途截擊共計斃賊實不下二萬餘之多所獲軍裝器械山積郴桂一帶一律肅清實足仰紓宸廑現在零星餘匪竄入連州牛仔營地方與該處

落花匪徒會合該處山嶺奇險楚軍不悉地利  
難以進攻臣已飛咨廣東督撫提臣韶州總兵  
札飭南韶連道及連州文武乘此賊勢饑疲窮  
蹙至極之時迅速堵截免致蔓延據劉長佑李  
輔朝稟報該州文武已飭弁兵團勇迎勦頗有  
斬獲臣仍札飭李輔朝駐營宜章邊界之黃沙  
堡遇有會勦之約卽帶勇星馳協同勦辦務期  
悉數殲除免遺兩省後患詳閱各州縣所訊粵  
賊口供此次犯楚逆賊除周春王崇開葛廷李  
興現踞江西外其餘各頭目經官軍擒斬者實

已不少惟賊首陳金剛一犯據黃成章稱該犯業經官軍抬礮轟斃賊目朱子儀之妻朱白氏口供目見伊夫朱子儀經官軍陣斬宜章團紳呈解奪獲旗幟等件內有大黃緞馬褂上縱團龍及大紅風帽一件均血跡濃染據稱所斬之賊實係逆首陳金剛俱未敢據爲確證土匪頭目李石保頃據王鑫稟報已經陣斬亦恐尙未確實王大才一犯迄無下落臣現飭各屬文武傳諭團紳嚴密搜查毋因各逆有已死之傳稍事鬆懈此次在事文武弁勇及各局團紳奮力



圍攻克復城池後分途搜勦殲除首逆實屬備  
歷辛勤始終奮勉不遺餘力選用道王鏊由未  
陽進勦克復桂陽州城後連復郴城星夜追勦  
斬殺最多厥功甚偉其行兵進止有度深協機  
宜尤爲難得該員已疊蒙

天恩甄敘年方正壯效力承

恩之日方長惟該員父母年老兩子王勛王鏊頻年  
戎馬馳驅未遑啓處向例非實任人員不得邀

請

封典可否叩懇

逾格鴻慈准將該選用道王鑫照實任道員例

給予該紳父母四品

誥封以彰

錫類之仁而示教忠之義伏候

聖裁江西補用知府劉長佑自東安勦賊迭勝以後

在新甯擊賊解圍嗣經

臣

調赴郴桂一路先勦

鄴茶之匪兩獲全勝此次克復郴城窮追逆賊

殺獲甚多克殲巨憝該員慮事精詳賦性醇篤

久歷戎行深通方畧應請

旨以道員歸部卽選暫革副將銜補用參將李輔朝

被參後尙知愧奮屢獲勝仗追賊迅速斬殺甚多應請

旨開復革職處分以參將留於湖南補用桂陽州紳士戶部額外主事陳士杰自賊陷桂陽州後倡率團紳帶勇殺賊屢著戰功會同王鑫克復城池後又帶勇援勦攻撲州城之賊及此次迎勦郴城竄逸之賊殲斃獨多厥功甚偉應請

旨以員外郎儘先補用並

賞戴花翎署耒陽縣知縣張濟遠帶勇會勦屢次獲勝並派勇隨同攻克城池人尙樸實官聲亦好

請以同知升用先換頂戴署安仁縣知縣鄧縣知縣李逢春帶勇奮勦獲勝守城殺賊著有勞績請以同知升用先換頂戴並請

賞戴藍翎同知銜前貴州荔波縣知縣魏承祝辦理衡陽團練殲除土匪多名擬保同知茲復帶勇殺賊首先衝鋒手刃悍賊慘被戕害死事最烈請照同知例

賜卹以慰忠魂此外在事實在尤爲出力文武官弁紳勇及陣亡紳勇人數最多容<sub>片</sub>核明分別彙案開單請

旨獎卹以作士氣而勵戎行其失事文武如署郴州  
知州戚天保署桂陽州知州梅震榮留署宜章  
營參將積拉明阿宜章縣知縣陳秀芝興甯縣  
知縣陸費棻茶陵州知州王宏謨雖於失事後  
督帶兵勇隨同克復城池究屬疎防於前均應  
請

旨革職以示懲儆惟戚天保梅震榮兩員現在督辦  
團練尙頗出力可否暫留該處幫同後任辦團  
搜匪以觀後效之處出自

聖裁署鄱縣知縣梁作霖於失事後雖旋即督同紳

勇收復城池惟事前未據稟報未免意存規避  
仍應請

旨革職署永興縣知縣王雙福於該處失事後旋卽  
收復該縣又向無城垣情罪較輕惟遇事張皇  
辭誇膽怯實屬無能應請

旨革職永不敘用此外失事文武各臣核明功罪請  
旨辦理以昭公允是否有當謹據實陳

奏伏乞

皇上聖鑒訓示施行謹

奏

咸豐六年正月初三日拜發奉

硃批另有旨欽此

黔匪攻撲鎮筰綏靖沅州官軍擊退克復麻陽  
晃州摺

奏爲黔匪攻撲鎮筰綏靖兩鎮逼攻沅州府城均  
經官軍勦擊獲勝解圍並克復麻陽縣晃州廳  
大獲勝仗恭摺馳

奏仰祈

聖鑒事竊貴州近楚一帶民苗俱變銅仁府松桃廳  
失守之後賊撲鎮筰城垣官軍大獲勝仗立即  
解圍情形曾經臣

奏報在案嗣據探報該省思南石阡思州三府均



先後失守楚邊情形日急臣比卽飛催由省撤回之兵勇星速趨程前進十一月二十二日逆眾復撲鎮筵城垣官軍迎擊獲勝業經鎮筵鎮臣文安

奏報護辰永沅靖兵備道翟誥於十一月二十六日派屯弁梁友芳朱興貴苗守備麻學道龍子明舉人吳自烈等各帶練勇土兵幹勇乾勇共二千六百名飭前署鳳凰廳同知洪慶華管帶勦銅仁西南界新場堡之賊斃賊八十餘名適由省城撤調之道標守備田宗蕃守備張萬春

熊興柏管帶兵勇回鎮聲勢益壯翟誥卽與文  
安會商派委田宗蕃總辦勦賊事務並將洪慶  
華所帶之兵分一千一百三十名交其管帶探  
報銅仁之賊萬餘已至廖家橋松桃之賊數千  
已過烏草河田宗蕃督兵勇先勦廖家橋之賊  
甫至苜蒲塘賊遽駭走跟追至廖家橋斃賊數  
十名生擒三名奪獲銅礮三尊抬礮抬鎗七桿  
旗幟刀矛各械二百餘件馬二匹賊衆卽紛紛  
鼠竄而去初四日苗守備吳永清龍再霖等勦  
烏草河股匪斃賊一百餘陣斬從逆苗舉人吳

國清生擒賊黨十七名奪獲礮械旗幟甚多賊亦旋遁此鎮筸一路情形也賊自竄陷貴州思州府之後連陷玉屏縣湖南晃州一廳三面孤揔黔疆該廳通判楊泰來練勇防堵支持半載適鎮筸屢次告警該鎮道將前調赴晃助防之兵勇三百名撤回所續調之綏靖長安二營官兵三百又尙未到賊於十一月二十八日分五路來犯晃州故無城垣練勇星散遂致失守十二月初三日由晃州分撲沅州府城麻陽縣城沅州府知府方長穆署沅州協副將常明芷江

縣知縣嚴升偉署都司黃文燦等率兵民嬰城固守賊從窪灣塘渡河蜂擁而來四面環攻黃文燦率兵丁江登恒龍登桂等親開大礮各城兵勇鎗礮齊施斃賊約數百餘名並轟斃紅旗賊目一名賊退踞近城水府廟及焚燒未盡之民房兵勇舒安得楊宗倫等奮勇下城縱火賊無所匿仍肩負木梯攜牌冒死撲城城上兵勇鎗礮齊施拋擲磚石復斃賊多名奪獲雲梯二十餘架攜牌三十餘面是夜四鼓賊始敗退初四日辰刻復齊攻四城該文武等督飭兵勇開

放連環鎗礮轟擊斃賊十餘賊仍敗退方傳穆常明緝兵出擊監生唐鍾泰陳宏恩童生曹价藩常鞏昌等帶勇預伏近城山坡伺便夾擊賊匪見官軍下城列陣抗拒兵勇奮躍而進截斃執大紅旗賊目一名賊陣大亂官軍乘勝搏擊斬賊四百餘生擒百餘賊遂奔竄唐鍾泰帶勇截擊手及騎馬賊目一名而奪其馬勇目吳雙生擒二賊各勇亦生擒二十餘賊復合隊追擊十餘里沿途斃賊三百餘奪獲鳥鎗刀矛小旗多件兵勇共受傷二十七名練勇鄉勇共陣亡

十餘賊仍由大路竄逸方傳穆常明飭黃文燦  
率沅州協署千總李斗南署把總羅宏黔吳得  
章靖州營署把總吳自申綏甯營把總曾貴隆  
等嚴升偉派團練涂士桂楊兆松等督帶兵勇  
躡蹤緊追至巖田圩斃賊四百餘生擒一百五  
十餘團總武生楊祖校生員毛會之杜文彬署  
晃州守備熊廷烈等迎頭截擊斃賊百餘生擒  
十五名奪獲賊馬二匹旗幟刀械甚多餘賊仍  
卽竄回銅仁其分股賊匪於初四日竄入麻陽  
縣城翟誥聞報卽會同文安飭張萬書統帶各

兵勇於初七日馳往勦辦並飭代理鎮標中軍  
遊擊王坤酌帶弁兵洪慶華等募帶新勇隨後  
策應初九日張萬書等分三路前進賊亦分股  
出城迎拒其由韓子坳小路前進一軍先與賊  
遇兵勇排列抬鎗連環轟擊賊匪驚潰追至近  
城二里許張萬書大隊兩路馳至先截白巖坳  
韓子坳兩路敗回之賊鎗礮齊施刀矛並舉斬  
首七百餘級梟水溺斃者不計其數城外之賊  
見兩路之賊俱敗蜂擁進城張萬書率軍功吳  
宗德等卽躡蹤奪門而入署鎮標後營守備包

順科署麻陽縣知縣楊以寶汎弁楊正科等各帶兵勇繼進生擒頭戴紅風帽身穿黃馬褂騎馬賊目二名賊黨三十餘內有偽軍師陳開勳斬首三百七十餘級奪獲偽印一顆轎馬礮械旗幟無算縣城立即克復晃州廳亦經該文武團紳自行收復其沅麻交界之榆樹灣向多土匪適前都司宋廣東帶兵踵至搜斬數十生擒李三崽田光全李二惠李富喜李五桂五名奪獲鳥鎗刀矛數十桿此沅州府擊賊解圍官軍援勦麻陽大獲勝仗克復縣城並晃州廳收復



之實在情形也其分犯永綏廳股匪亦於十二月初五日分五股撲鎮城署綏靖鎮總兵榮山署永綏廳同知但文恭督飭兵勇分布塚口開礮轟擊兵練告請奮勇下城殺賊生擒執旗賊一名團勇隨之斃賊二百餘是日戌刻賊僞將軍烏姓率賊攻撲榮山飭令都司龍金源派兵下擊斃賊百餘生擒賊目二名奪獲旗械多件初六日有從逆已革守備石宏德郎石文蘭等裹脅各苗前來撲城縱火焚城外民房延燒甕城當經兵練救熄連拋火礮燒斃賊匪數十生

擒數名奪獲雲梯數架賊始卻退猶竄踞隆團寨希圖乘虛竄撲適委署永綏廳同知長惠馳抵廳城接印任事署提臣樊燮調派儘先都司楊名聲等亦帶兵繼至長惠隨選派紳士賫示分赴各苗寨宣布

國威剴切開導令各苗寨緹獻匪黨免其剿辦並購線誘擒從逆之石宏德石含玉等十六日長惠帶兵行至六里排樓地方卽據上下六里各苗寨紛紛投誠緹獻匪黨長惠卽於軍前分別辦理十七日兵進隆團苗人跪道乞撫所遺暇

線亦誘同石宏德石含玉吳國鴻等縛黔賊偽  
將軍孫正基至營十九日柴山帶兵至隆團長  
惠押犯回署分別良匪勦撫兼施以期迅就肅  
清此又永綏廳守城殺賊擒獲首逆情形也銅  
仁逆賊瞰鎮筸官軍分援麻陽意圖乘虛復犯  
田宗蕃等偵知飛調張萬書馳回協勦十二月  
十六日探賊已入境卽督兵勇迎頭擊之遇賊  
柳木屯田宗蕃熊興柏張萬書三路鼓勇齊進  
田宗蕃及屯兵梁友芳轟斃騎馬賊目一人三  
路掩殺十餘里始行收隊殲賊甚多墜巖死者

無數賊退銅仁界大興場人數尙復不少文安  
現加派署鎮標右營遊擊陝西舊洮營都司侯  
光裕帶兵勇前往助戰而鎮筸西北路苗地經  
苗守備吳永清龍子明麻文貴龍再霖舉人吳  
國瑞搜勦從逆苗寨亦迭獲勝仗初九日復攻  
松桃逆苗於蘇麻寨斬首六百餘生擒十餘現  
正移勦西涼苗寨苗守備龍子亮麻學道龍秀  
實吳成先等搜勦新寨田坪痞苗分投招撫山  
牛塘苗衆十八寨鳳凰廳苗地漸可肅清惟永  
綏廳苗地尙須乘勢分別搜薙以淨根株翟誥

擬俟鳳凰苗地肅清之後分遣鳳凰廳得力苗  
備弁前往幫同辦理期收以苗治苗實效此又  
鎮筸官軍截勦銅仁賊匪鳳凰廳苗備搜勦苗  
寨獲勝及現在辦理情形也臣維貴州銅仁思  
州兩府松桃一廳與湖南晃州鳳凰永綏三廳  
及四川酉陽秀山等處接壤苗地毗連以苗疆  
而論則鳳凰廳永綏廳最爲吃緊昔時平苗之  
後於此兩建重鎮原有深心以兩省而論則晃  
州廳沅州府扼黔楚津要踞西北上游形勢尤  
重臣故於黔省銅仁松桃失守之後卽撤調省

防三廳兵勇回伍並咨署提臣帶兵進駐辰州  
蓋欲以壯三廳聲勢並策應沅晃也銅仁賊匪  
連陷黔省數府廳勾結愚苗逆焰頗熾然人數  
雖多率皆一時烏合之衆迥非百戰悍賊可比  
黔中文武未曾一矢相加坐視披猖遂成滋蔓  
非果逆賊兇狡鋒不可當也惟鳳凰乾州永綏  
三廳地方苗巢環集乾隆嘉慶年間平苗之後  
前辰沅永靖兵備道傅鼐創設屯防所有屯田  
均係取之苗產意在鈐制苗民令其不至富強  
免生他釁六十餘年治安之效可觀然當時均

富苗之產以養屯丁苗民豈無咨怨特迫於積  
威而不敢逞耳此次銅仁匪徒滋事勾結黔苗  
倡言苗地歸苗之說廣布逆示冀以歆動楚苗  
而破屯防之局幸官軍屢獲勝仗而該苗民等  
久沾

聖化苗守備苗舉人等頗多稍明大義之人助官搜  
勦從逆之苗多經擒斬被賊煽脅各寨亦多就  
安撫屯防大局尙未被其牽動惟屯倉多被賊  
掠屯丁授食無資實爲可慮現在鳳凰永綏兩  
廳及沅晃一帶兵力漸足如苗地一律肅清卽

可以勦爲防迅圖撲滅臣前已咨四川督臣貴州撫臣矣但客兵會勦可暫而不可常且路逕非所素習人地生疎非黔省有可恃之官軍客兵亦恐難期得力一切防勦機宜容卽隨時妥籌辦理具

奏此次在事出力之文武兵勇著有微勞可否彙入前次請保案內一併核明開單保獎伏候聖裁至失事之晃州廳通判楊泰來麻陽縣知縣楊以寶雖經隨時收復城池並未出力應卽請旨革職拿問失事各武職容再核明請



旨所有防勦情形謹據實馳

奏伏乞

聖鑒訓示施行謹

奏

咸豐六年正月初三日拜發奉

硃批另有旨欽此

覆陳派員帶兵會剿黔匪片

再上年十二月二十七日欽奉

旨諭蔣蔚遠奏下游各匪日熾請飭川楚兩省帶餉  
會剿一摺貴州下游齋匪與夷苗各匪勢日鳴張  
兵力不敷分派川楚兩省毗連自應會同以剿爲  
防庶賊匪不致蔓延爲患前據黃宗漢奏已派遊  
擊傅岷帶兵一千名赴黔聽調並據文安奏賊由  
松桃分股逕撲鎮筵經該總兵奮力擊退是黔匪  
不靖川楚壤地相接非合兵會剿不足以禦兇鋒  
現在蔣玉龍傅岷剿辦黔邊竄匪如已得有頭緒

著黃宗漢飭令該副將等相機進搗與黔首官兵協力夾擊毋得區分畛域專顧本境並飭提督萬福扼守川省門戶以爲蔣玉龍等後路聲援至窺伺楚境之賊雖經文安擊敗惟該總兵探有思南石阡思州三府先後失守之信晃州沅州相距切近是否令文安督兵由楚入黔藉資堵剿之處並著駱秉章妥籌調派欽此臣維黔匪滋擾連陷數府廳川楚邊界俱爲震動自非合兵會剿不足以迅掃狂氛誠如

聖明指示臣於鎮筵擊賊解圍之後曾咨商四川督

臣貴州撫臣妥印尙未接准咨覆現在銅仁賊踞大興場邊界道標守備田宗蕃守備熊興柏張萬書及新升陝西舊洮營都司侯光裕等管帶兵勇正在追勦若能得手卽可由此路躡蹤前進據探川兵現在秀山查該處出境卽係黔楚交界之所自可約期會勦惟永綏廳苗民未盡帖伏鳳凰廳屬苗寨亦尙須料理將欲進勦黔邊必先肅清楚境庶師行可無後顧之虞又川楚兩軍越境勦賊人地生疎須黔省派有能事文武帶領得力兵勇前來會合彼此商

同勦辦較爲周妥擬卽一面咨商貴州撫臣一  
面咨商文安並札飭護辰沅永靖道翟誥就近  
密酌情形妥爲籌畫兵機瞬息千變未可遙制  
如官軍克獲大捷賊膽已寒則乘屢勝之威風  
馳電掣亦或不俟川黔兵勇到齊始行進勦容  
再隨時馳

奏以慰

塵念至文安久任鎮筸於地方情形本爲熟練昨次  
擊賊解圍膽識堅定調度有方以之帶兵會勦  
原可勝任但該總兵足疾未愈舉動需人不便

鞍馬於行陣實不相宜本省近來帶兵領隊各文武官紳每遇接仗緊急之際類多親率兵勇迎敵衝鋒山徑崎嶇必須下馬步戰其體質肥重者往往須人擁護轉覺出隊兵單古云肩輿督陣今則絕無其事也文安從容坐鎮固屬有餘臨陣指揮或恐難強臣不敢稍事遷就致負垂詢之意道標守備田宗蕃與守備張萬書熊興柏皆係屢經戰陣之員現已數獲勝仗派其會勦或可得力愚昧之見是否有當伏候

皇上訓示施行謹

奏

咸豐六年正月初三日拜發奉

硃批另有旨欽此

援軍克復貴州松桃廳銅仁府兩城摺

奏爲官軍越境攻勦疊獲勝仗克復貴州松桃廳  
銅仁府兩城恭摺由驛馳

奏仰祈

聖鑒事竊貴州自銅仁松桃被陷川黔匪徒及痞苗  
聞風響應從亂如歸先後攻撲湖南鎮筭鎮綏  
靖鎮沅州府城垣隨經官軍擊退斬獲甚多並  
收復麻陽縣晃州廳兩城一切辦理情形均經  
奏報在案臣維黔賊以松桃銅仁爲老巢距川楚  
邊界甚近緊接苗疆逆賊雖敗遁歸黔然日久



蔓延不獨三省邊疆均將受其荼毒且苗疆大局攸關深虞潰裂前於鎮筸敗賊解圍之後卽咨商四川督臣貴州撫臣妥籌會勦嗣奉

寄諭黔匪不靖川楚壤地相接非合兵會勦不足以禦兇鋒現在蔣玉龍傅峴勦辦黔邊竄匪如已得有頭緒著黃宗漢飭令該副將等相機進搗與黔省官兵協力夾擊是否可令文安督兵由楚入黔藉資堵勦之處並著駱秉章妥籌調派欽此臣以兵機瞬息千變川黔道路遙遠若待兩省咨覆到日辦理恐涉遲延前於覆

奏內曾聲明如官軍克獲大捷賊膽已寒則乘屢  
勝之威風馳電掣亦或不俟川黔兵勇到齊始  
行進勦隨飛咨鎮筸鎮文安札飭護辰沅永靖  
道翟誥一面搜勦楚境餘匪一面妥籌進勦機  
宜維時鳳凰永綏廳屬逆苗疊經該文武等督  
飭苗守備龍子明龍秀實麻學道麻文貴龍再  
霖龍在位等次第殲除漸有頭緒翟誥密飭鳳  
凰廳苗守備吳永清舉人吳國瑞等於上年十  
二月十五日會貴州松桃廳同知恩柳出賊不  
意兩路進勦直搗賊巢楚兵由東路至五里牌

遇賊二千餘直前迎敵吳永清等縱士兵痛擊斃賊多名陣擒僞將軍余老五賊眾大奔吳永清等率眾掩殺與西路松桃之勇會合復斃賊三百餘乘勝斬關而入遂復松桃廳城十七日適攻撲永綏廳之賊經永綏官軍勦敗回巢吳永清等伏路截殺斃賊三十餘名賊之大股萬餘仍聚銅仁府境之大興場都司侯光裕吉隆阿守備田宗蕃張萬書熊興柏知縣洪慶華舉人吳自烈率苗備弁等逐日分路出隊每戰必勝先後攻破各隘生擒僞將軍吳長壽僞參謀

萬林敖及田朝開等三十餘名斃賊無數賊屢挫之後克威頓滅遁回銅仁府城官軍躡蹤緊追直迫城外分紮距城半里之紫雲山架梁坡虎爪巖桐子巷各處自正月初旬安營以後連日鎗礮環攻斃賊甚多賊勢益蹙適三元屯等處匪徒及牛欄場匪徒數千前來助逆官軍於十三十四十五等日接戰斃賊約三四百名股匪驚懼潰逸城中賊見外援已絕十六日總悍賊數千併力衝撲官軍營盤侯光裕田宗蕃千總周宏印外委唐本隆等分路奮擊斃賊數百

生擒賊目潘長璧等三十餘名奪獲旗幟礮械  
無算十七日賊復由東門便水門潛來劫營復  
被官軍擊敗十八日侯光裕田宗蕃等商派營  
屯兵勇更番攻城賊亦分三路迎拒斃賊百數  
十正相持間忽股匪千餘由便水門潛出計抄  
土兵之後經屯外委田慶品等奮力擊退三路  
賊匪亦敗遁歸巢十九日貴州松桃協始以黔  
兵二百至營二十三日寅刻侯光裕吉隆阿田  
宗蕃等派守備張萬書熊興柏千總周宏印署  
千總吳支陞外委唐本隆署把總左元勛千總

舒萬年舉人吳自烈監生洪文源軍功楊逢新  
苗守備麻學道吳正邦等分督兵勇環城攻擊  
噴筒鎗礮齊施城上烟霧迷漫咫尺莫辨預簡  
勇敢士卒豎梯蟻附而上大呼官軍上城賊衆  
奪路狂奔自相蹂踐兵勇吶喊追殺立斃城上  
之賊二百餘名隨開東北二門延納官軍侯光  
裕吉隆阿田宗蕃等整隊而入分數隊留紮城  
外以備截殺署千總吳支陞監生洪文源各帶  
兵勇殺入考棚賊巢斬首三百餘級內有黃馬  
褂賊首一名賊拚死由江宗門衝出官軍躡蹤

掩殺屍橫街市其已出城外者兵勇截殺百餘  
賊復折而北竄適侯光裕田宗蕃等大隊追至  
擊斃二百餘殲之教場河邊溺斃者無數其泗  
水得過者兵勇悉追斬之共計擊斃溺斃賊匪  
約二千餘名生擒楊光沅等一百六十餘犯賊  
目劉季宗等九名奪獲騾馬八十餘匹旗幟大  
礮鎗矛器械不計其數並奪回銅仁府印一顆  
銅仁城守副將關防一顆首逆徐廷杰是否被  
戮因無確據未敢冒昧敘

奏現正札飭護長沅永靖道翟誥督飭搜捕逸匪

撫綏難民分別撤留兵勇以節糜費此楚軍先  
後克復松桃廳銅仁府兩城之實在情形也臣  
以銅仁賊匪因錢糧靡費原與久蓄異謀者不  
同特以遷延既久川黔楚三邊亂民乘機附和  
遂致展轉滋蔓連陷數城並敢煽誘黔楚苗民  
撓壞屯防大局若必待川黔會勦正恐曠日需  
時賊勢更熾楚軍無可濟之餉而三邊懷不測  
之憂故於楚境界畧定後恪遵我

皇上由楚入黔諭旨次第督飭辦理仰仗

天威得以迅速竣事惟黔省近日盜賊橫行松桃銅



仁雖經克復而首逆就戮與否尙未可知逃匿  
餘匪甚多尤須迅速搜捕以弭後患楚軍駐黔  
日久不獨餉饋難繼兼恐人地生疎徒勞無補  
且銅仁之變據各路稟報皆謂因錢糧起釁似  
官吏之征收不善頑民之煽惑有詞如果屬實  
則爲拔本塞源之計亦非可徒恃兵威也仰懇  
勅下貴州撫臣簡擇廉能勇敢文武員弁酌帶兵勇  
迅抵松桃銅仁妥爲經理一面搜緝逃匪以淨  
根株庶三省生靈免遭蹂躪而邊防可期永固  
矣至此次辦理進勦事宜鎮筸鎮總兵文安鹽

運使銜記名道員護辰沅永靖兵備道翟誥調  
度有方機宜允協應請

旨交部從優議敘以獎微勞在事出力文武及營屯  
漢土兵勇紳民可否核明併案保獎之處出自  
天恩理合恭摺馳

奏伏乞

皇上聖鑒訓示施行謹

奏

咸豐六年十二月初九日拜發奉

硃批另有旨欽此



陣斬僞軍師楊逆片

再貴州松桃廳既經克復之後該廳同知恩彬留楚軍同駐廳城以資鎮壓正月二十日有賊目僞將軍鄔黑虎僞軍師石阡府舉人楊大鏞帶賊千餘攻撲廳城經兵勇開放鎗礮斃賊十餘名賊退紮西門外獅子巖二十一日辰刻賊眾復至恩彬會同鳳凰廳苗守備吳永清預派兵勇截擊砍斃坐轎賊目一名斬首三十八級生擒八名奪獲抬鎗二桿烏鎗十五桿僞印一顆刀矛無數據生賊口供砍斃坐轎之賊卽僞

軍師楊大鏞也。馱賊及餘匪逃至平浪壩。復經該處練勇殺斃五十六名。生擒七名。現正會商勦捕。謹附片。

奏報伏乞

聖鑒謹

奏

咸豐六年二月初九日拜發奉

硃批知道了欽此

永明江華克復南路肅清摺

奏爲官軍收復永明江華兩縣城池晝夜窮追疊次大獲勝仗南路肅清恭摺馳

奏仰祈

聖鑒事竊上年十月內廣西逆賊朱洪英孔亞幅鄧興爵由廣西灌陽攻永明縣城副將周雲耀殉節城陷其郴城賊首蕭元發焦玉晶女賊許氏等以官軍方攻郴城率夥黨數千潛襲桂陽州城經官軍擊敗轉竄嘉禾甯遠兩縣交界各處署臨武參將趙永年接戰失利死之均經臣先

後馳

奏在案賊後襲踞江華縣城與永明之賊遙相犄  
角委紳選用道王鑫時方攻郴未下臣密飭王  
鑫先分軍援剿俟郴州事竣以大隊乘之並檄  
署江藍廳同知顏培嘉接帶周雲耀舊部勇丁  
會督署永州鎮總兵朱瀚永州府知府黃文琛  
所派兵勇先圖永明之賊上年十二月初四日  
官軍紮營永明之午田橋該逆率賊數千分三  
路撲營都司蔣榮華從九張毓杰外委蕭榮芳  
縣丞張翔等出隊迎剿各獲賊數十名次日戰

於上江墟亦獲小勝適其時郴城克復首逆就  
誅王鑫追剿屢獲大捷旋卽捲旆西向十二月  
十二日已帶湘勇全軍馳抵道州十四十六十  
七等日顏培蔣榮華等督勇分路出隊均獲  
勝仗而十七日新墟一戰以二千餘勇擊六七  
千之賊鏖戰竟日擒斬頗多王鑫以江華永明  
兩城相距僅數十里賊餒尙張擬分途並攻以  
殺其勢密約顏培蔣等於二十日各率所部前  
進是日卯刻顏培蔣等正傳令出隊忽探報永  
明巨股已於十九夜三鼓捲甲出城分兩路向



江華疾走亦有竄回廣西者顏培勳急督諸勇奮追截其尾隊斃賊二百數十旋卽入城搜斬餘匪數十名收復縣城是日卯刻王鑫分湘勇五哨同道州江華團勇千餘赴江華縣城外江東埠誘賊而自督大隊乘之忽探江華之賊由毛坪潛來撲營王鑫急引軍回伏營前俟其近營突出擊之斃賊六七十名賊由三路敗走官軍亦三路追之卽選府經縣丞王勛追賊五里至永固橋忽探隔河賊旗林立不下六七千之衆敗匪已與合隊正錯愕聞適永明報至方悟

隔河之賊卽永明竄出之股匪也王勛遽前薄之斃賊百餘名賊分由山徑竄赴江華縣城王鑫追賊至江華城外之三里亭城中賊出迎拒湘勇擊敗之擬遂乘勢入城適永明股匪已到卽揮勇轉戰而前賊陣衝散卽補府經歷郭品珍等督湘勇及團勇截殺百餘守備黃輔鼎追賊至羅坪亦殺賊數十日暮收隊回營是日三路約共殺賊四百餘生擒二十三名奪獲鐵礮兩座抬礮抬鎗五桿烏鎗二十二桿大小紅黃旗八十二面火藥鉛子八石馬三匹刀矛雜械

三百餘件此收復永明縣城進剿江華永明合股之賊獲勝情形也二十四二十七兩日賊來撲營均經官軍擊敗共奪獲大小旗幟三十餘面鎗礮刀矛四十餘件是時賊匪有零星竄回廣西者王鑫預派千總周文豹駐永明七都松柏地方連日擒斬數十內有賊目數名奪獲旗械數十件署江華縣知縣任立誠率團紳張錦堂截剿逃匪連日亦有斬獲王鑫慮賊西竄添派千總左光藻帶勇四百與周文豹合隊截之本年正月初八日王鑫顏培肅分兩路攻城連

破城東兩營賊悉退匿城內左光藻未到永明  
七都之先適粵西賊目馬廷柯盧維新馮振彩  
率股匪合撲周文豹營盤周文豹以眾寡不敵  
敗卻王鑫又添派守備黃輔鼎及永勇百長杜  
義品彭玉貴先後馳援初九日王鑫等率勇大  
舉攻城賊固不出鎗礮連環施放僅斃城上賊  
百餘賊知官軍志在必克廣西賊已陸續逃回  
廣西廣東賊及永柳之賊欲仍竄廣東是日棄  
城東走王鑫以輕騎追之斬賊數十追之於河  
溺斃無數初十日收復江華縣城郭品珍及千

總詹榮升率道州勇隨知縣任立誠入城防守  
顏培燾回江藍廳督團守險防賊由此竄廣東  
王鑫自率湘勇新田勇躡蹤緊追十二日及之  
甯遠縣路亭賊見官軍至踞險列陣以待王鑫  
督中路爲正兵以奇兵分左右抄之復派卽選  
知縣張運蘭等帶勇五哨潛由塘下村出擊路  
亭之背賊目奉光球率悍賊直犯中路湘勇王  
道達手刺奉賊墜馬餘賊辟易有紅衣女賊持  
矛躍馬率其黨鏖戰正相持間忽賊陣大亂王  
鑫知三路兵到督勇奮威衝殺左右盪挾斬賊

千餘生擒仁義堂賊目歐陽順軍帥蔣五師帥  
黃在位蔣飛天蕭二等八十餘名立斬之其爲  
亂刃所斃者則不及辨識也日暮收隊賊拋棄  
旗械服物狼藉道路未暇拾取是夜探賊由藍  
山小路竄去卽拔營追擊十三日午刻及之楠  
木橋賊奔晡時戰於三眼頭又大敗之乘月追  
至嘉禾之土橋圩共殺賊七八百名生擒賊軍  
師楊茂枝等四十五犯夜閒聞深山密箐中號  
哭呼伴聲蹤跡之得百餘名分別斬釋十四日  
沿途大索山谷擒斬二百餘探知逆首朱洪英

率死黨將由臨武徭山出廣東連州東陂觀王  
鑫卽率勇追之師行懸崖峭壁閒徭附而前荒  
山人煙絕少軍士饑勞殊甚乃選健者三百餘  
以行是夜抵八畝田探賊甫由此過十六日追  
及連州屬之茶坪賊奔各勇且追且殺行四十  
餘里殺賊二百餘獲賊軍師謝順太及先鋒十  
餘賊十七日復追及連州屬之東陂觀除沿途  
搜斬外其由鄉民擒送正法者百餘並擒獲朱  
逆妻妾三名正法十八日官軍及鄉民擒獲賊  
黨百三十五犯斬之其孫行五陳光全兩賊則

朱逆死黨也據生賊供朱逆有隻身藏匿陽家觀之說移文連州索之未獲連日搜山共獲八十餘賊內有賊目許四蔣四仔兩犯其分捕新田東山嶺嘉禾普安圩及桂陽州境者亦均有斬獲此江華收復後賊匪東竄王鑫追剿八晝夜直過廣東連州界連獲大勝擒斬多名之實在情形也其先由王鑫派出永明七都剿賊之守備黃輔鼎等於正月十一日追賊至廣西富川縣麥嶺月塘等處殺賊數十該匪旋竄踞江華白芒營黃輔鼎等於十四日追至白芒營殺



賊二十餘十五日復督各勇分路奮擊殺賊五六百生擒三十餘奪獲偽印二顆子藥兩石大小旗幟七十餘面抬礮十一位鳥鎗五十餘桿籐牌刀矛多件餘匪四竄江華永明境內亦已肅清臣惟江華一股多廣東及郴桂積匪而肅元發爲之魁永明一股多廣西及永州各屬積匪而朱文英爲之魁其由永明併竄江華蓋思由甯遠嘉禾竄出與郴城巨股會合也旣聞郴賊敗滅逆渠授首始變計由嘉禾藍山迅竄粵東以合連州陽山敗殘之匪非王鑫督勇窮追

晝夜兼程痛剿則稽誅猾寇必又展轉勾結貽害無窮現據甯遠藍山嘉禾臨武各屬稟報當賊匪竄過時督勇截剿及團紳擒獲解審正法者不下數百名據衡永郴桂道轉據嘉禾縣稟解自行投案之首逆焦三卽焦玉晶女賊許氏卽許月桂到省當卽飭臬司提訊據焦三供卽咸豐二年廣西陣擒首逆洪大全之弟許氏女卽洪大全之妻臣查焦三一犯卽臣上年所奏土匪頭目之興甯縣焦姓許月桂卽前摺內所指郴州女賊許氏其是否逆首洪大全之弟與

妻固無從查詰當廣東賊窟陷郴州時該犯等乘機倡亂聚眾數千許氏女自稱大元帥焦三充當三省賊營軍師攻城掠野罪大惡極因官軍疊次痛剿力窮勢蹙始束身歸命希圖免死與尋常盜賊乞撫者不同當卽恭請

王命將該逆焦三許氏女兩犯綁赴市曹凌遲處死以昭炯戒隨接甯遠縣稟拏獲騎馬女賊許香桂卽許月桂之妹解赴郴州審訊臣當札飭就地正法以儆兇頑其首逆蕭元發一犯據王鑫稟據賊供該逆於正月十三夜在嘉禾縣虎渡

口地方服毒自盡尙無確據朱洪英一犯現已  
咨兩廣督撫臣飭屬密速躡緝并札飭南路各  
州縣督團嚴拿矣此次在事員弁紳勇奮勉出  
力現在南路肅清可否由臣核明彙案保  
奏之處伏候

聖裁委紳選用道王鑫督勇追剿艱苦備臻勞績卓  
著該紳前於奏保同知直隸州後因咸豐四年  
在羊樓司剿賊失利經臣

奏請革職嗣於道州等處剿賊疊著戰功蒙  
恩開復前官准部咨訪飭令該紳繳納捐復銀兩可

學之... 丙辰上  
四  
否免其繳捐以道員歸部卽選出自

天恩其失事之署江華縣知縣任立誠把總李貴方

雖隨同收復縣城然究屬疏防於前應請

旨革職以示薄懲所有收復城池大獲勝仗情形謹

據實馳

奏伏乞

皇上聖鑒訓示施行謹

奏

咸豐六年二月二十四日拜發奉

硃批另有旨欽此

援江官軍兩路獲勝克復萍鄉縣城摺

奏爲官軍援剿江西兩路均獲勝仗克復萍鄉縣城恭摺馳

奏仰祈

聖鑒事竊臣於上年十二月十六日欽奉

諭旨選派精勁兵勇二千名交劉長佑管帶刻日前赴江西協力攻剿本年正月初三日謹附片覆

奏江西西路臨江瑞州袁州三府所屬均已淪陷吉安府城亦正被圍劉長佑帶兵勇二千名仍嫌單薄已抽調南北兩路各勇先赴澧陵瀏陽

邊界俟劉長佑進剿分隸數營合成四五千之數以厚其勢拜摺後據委赴醴陵管帶平勇藍翎從九毛英勃先後稟報踞袁州府城逆賊遣僞監軍田姓帶賊闖入萍鄉縣城萍鄉縣知縣萬清移請迅卽援剿毛英勃等帶勇三百率同虎威勇遽往攻之斃賊數十卽入縣城踞守臣比以援師未集逆賊詭詐多端該從九孤軍輕進可慮批飭相機出險旋據管帶靖勇儘先訓導丁際可稟報毛英勃於上年十二月二十九日出隊至蘆溪遇賊衆數千突至毛英勃率其

第六品軍功毛英俊督勇力戰殺賊數十名嗣  
因路逕生疏眾寡不敵被賊四面圍裹毛英勃  
左右衝突身受二十八創毛英俊身受三十餘  
創力竭捐軀陣亡勇丁二十六名幸前調之都  
司田興恕守備梁開國適於本年正月初一日  
帶勇到界結營楚東橋賊始卻退卽選道劉長  
佑於正月十七日抵省臣面與商酌楚軍越境  
須由瀏陽醴陵分攻萍鄉萬載兩縣克復始可  
規復袁州蓋以江西西路諸郡縣均淪於賊賊  
已遍設僞官迫脇士民蓄髮立團爲抗拒援軍



之計千餘里間頓成異域湖北之賊又隨時添  
入援軍若祇從一路前進賊必悉力抗拒攻克  
爲難且進剿一處則附近邊界股匪均須乘勢  
掃除否則懸軍深入餉道堪虞前既無會剿之  
兵後且虞抄襲之寇所當預爲籌慮以策萬全  
也臣當札飭瀏醴兩界官軍歸劉長佑統領合  
之劉長佑舊部楚勇一千五百又增募六百餘  
名共近五千之數令其馳赴醴陵相機進剿並  
札駐瀏陽界之卽選同知直隸州知州蕭啓江  
等聽劉長佑調遣以一事權二月初四日劉長

佑兵進黃花渡初六日出隊至青山鋪遣守備  
梁開國千總石有周帶勇數十前往覘城賊且  
以誘之逆賊三四百自萍鄉城突出遮擊梁開  
國石有周猛撲之斃賊十餘忽城中賊三四千  
分三路奔來梁開國等且戰且誘將至青山鋪  
劉長佑督大隊分三路拒之梁開國躍馬衝入  
立斬執大旂紅衣賊目一名餘衆敗退楚勇及  
虎威勇從旁抄擊斃賊數十其右路之賊從山  
後抄來虎威勇目沈宏富與楚勇梁熊彪衝上  
山梁千總李承立帶勇抄出賊後賊紛紛墜崖

死兩路追逼城根賊固匿不出其左路之賊將  
從青山鋪抄官軍之後劉長佑督諸勇返擊衝  
賊陣爲兩追殺七八里始收隊回營是日斃賊  
二百餘割獲首級七十五顆奪獲抬鎗四桿烏  
鎗五桿刀矛九十餘件賊敗退後邀袁州府城  
長髮老賊前來助逆十一日卯刻賊傾巢分路  
來撲營盤劉長佑傳令分路痛擊其由中路先  
來者黃衣騎馬賊目扼葡萄嶺峽口督之鎗礮  
噴筒齊施官軍開放連環鎗礮刀矛隊蛇行而  
進立斃執紅旂賊目一名並生擒僞百長一名

賊殊死戰不退劉長佑率百長石有周黃威嶽  
等由路旁村莊抄出陣後衝賊爲兩後隊賊敗  
退峽口之賊三百餘急欲退走已爲官軍前後  
遮截黃衣賊日走匿路旁賀家大屋衆賊隨之  
官軍四面圍逼老賊數十人騰躍上屋擲瓦下  
擊楚勇百長李光祝鄭金華李道遠虎威勇百  
長沈洪福劉義方王輝二等短刀直入斃賊多  
名賊紛擲火彈抵拒延燒門壁各勇見火起始  
反身走出賊隨冒火衝突各勇挺矛以待出卽  
刺之須臾火勢益熾屋上之賊紛墜火中黃衣

賊目知無可逃遂卸衣帽撲火死餘俱燒燼無  
一脫者其左路之賊經千總李承立督同楚勇  
百長李明惠翟國彥從山梁壓下陣斬先鋒賊  
數名餘賊潰走右路之賊經祁勇百長唐三祚  
羅忠餘文士平楚勇百長殷開選漆盛年等奮  
擊鎗礮之中雜以刀矛斃賊二百餘亦紛紛敗  
潰賊黨旋聞賊目被官軍圍逼左右兩路仍返  
旗來撲都司田興恕守備梁開國萍鄉縣知縣  
萬清把總余步鰲勇目余謀忠軍功向朝洗署  
袁州都司桂英宜春縣知縣錫榮各帶兵勇助

勢掩殺賊復敗走官軍分路尾追沿途斃賊甚衆敗賊入城固拒官軍收隊回營是夜四更遙見城外火起劉長佑知賊將遁傳令出隊守備銜千總黃三清帶裨勇百長李明惠殷開選鄧在富石有周等帶楚勇由西路田興恕梁開國帶虎威勇與桂英萬清錫榮拔貢黃敬熙廩生張可坊武舉辛文魁由北路截殺後隊賊二百餘該逆由袁州大路竄去遂復萍鄉縣城共計斃賊千餘名生擒副疏附施天祿長髮賊周啓太等四十二名奪獲大鐵礮三尊拍鎗二十一

桿鳥鎗三十二

護天豫胡大黃

旅帥軍帥師帥

雜械不計其數

陵一路疊獲全

其帶勇駐瀏陽

守備楊恆升於

十一日袁州府

橋之賊數千四

馬上山審視賊

時隱時現賊約千餘一枝渡橋而北將抄官營  
之後者約二千餘一枝繞出河岸趨珠樹潭市  
者約一千餘又一枝繞出山下蕭啓江合湘勇  
百長藍翎把總周崇高秦華祝軍功周蘭書率  
勇二百列隊平岡以遏橋南樹林之賊令百長  
軍功彭文德羅全新率勇二百先剿山下之賊  
楊恆升親率外委周友勝余萃隆黃開榜軍功  
王文友王光明李忠恕寧世杰藍翎外委李世  
顏戴文嵐軍功余得貴王九思黃星堂馬明祥  
等擊渡橋而北之賊派外委黃鵬飛李忠楷軍



功楊恒德助剿撲營之賊彭文德等正與山下之賊相持蕭啓江親率藍翎把總朱桂秋藍翎千總鄒上元由東北山梁馳下分路抄擊山下之賊先潰蕭啓江等遂抄出樹林之前適周崇高等由平岡奮擊將賊盡數逼入樹林楊恒升等擊橋邊之賊賊走平岡乘勢猛撲斃賊甚多復分爲兩翼助剿樹林之賊賊被官軍四面圍逼紛紛亂竄蕭啓江楊恒升督弁勇盡銳衝殺此股鮮得脫者其撲營之賊經候選訓導李績禔率彭文德及黃鵬飛李忠楷等扼之橋邊守

營軍功蕭啓淮黃紹山等遂空壁出擊逼之河  
岸賊沿河潰逃多撲水死者四路賊俱敗始收  
隊回營是日共計斃賊近千生擒五十二名奪  
獲籐牌十餘面長矛四百餘桿烏鎗三十餘桿  
抬鎗四桿大黃旂二十餘面官軍無一陣亡者  
此十一日瀏陽一路剿賊克獲全勝實在情形  
也其由江西義甯州瑞州各屬窺瀏陽東界者  
經團紳黎端甫邱兆祥廖文謨劉方昭等督率  
團勇先後截擊斃賊百數十內有長髮賊目三  
名生擒十餘現復增調都司劉培元帶長勇五

百五十名都司田與恕帶虎威勇四百名併赴  
萬載一路會同蕭啓江楊恒升迅將附近股匪  
剿洗進攻萬載以免後顧之虞臣維此次應援  
江西實與三年之局不同彼時逆賊由該省北  
路而來水陸並注省城西路尙無梗阻其旁掠  
郡邑亦颺忽狎至過而不留有避賊之民而無  
從亂之民故楚軍馳援得以逕抵省會此次逆  
蹤由義甯而擾西路首逆石達開先陷瑞州次  
陷臨江袁州探聞吉安亦於正月二十五日被  
賊攻陷江西西路州縣望風瓦解其不肖士民

且以畏賊之故轉而媚賊獻財輸貲  
正士良民之勢孤奸徒痞黨之燄熾  
之間無一官一兵相爲聲應楚師出  
萍鄉萬載將附近各賊殲除則不能  
克復袁州之後非又將附近各屬賊  
不能進剿各郡未復之處旣須客軍  
之處又須客兵代防楚師五千雖皆  
然越境以後兵分力單顧後瞻前動  
恐師行濡滯有誤事機此事勢之不  
石達開悍而多詐此次肆擾江西不

不直指南康而先旁收郡縣遍置僞官迫其士民劫以助逆因糧因兵愈蔓愈廣其陰謀詭計似思落其枝葉以撼其本根此賊情之不同也江西風氣積柔兵勇見賊卽靡僅恃兵部侍郎臣曾國藩水陸兩軍爲之楮格而曾國藩陸路之兵勇不滿七千戰守俱形單薄以江西現在局勢而論鄂城速下則羅澤南一軍可以倍道馳援固爲上著倘堅城難以遽破而江西盼救甚殷似非閩浙廣三省各簡銳師由該省東路南路由東南四達之

區於目前剿賊局勢關係非淺臣既有所見不敢不畢獻其愚是否有當伏候

聖裁所有援江官軍兩路迭獲全勝克復縣城情形

謹據實馳

奏此次打仗出力文武員弁兵勇可否由臣核明

彙案保獎之處出自

天恩其追賊陣亡死事最慘之藍翎從九毛英勃通

城案內擬保縣丞請照縣丞例

賜卹六品軍功毛英俊請照把總例

賜卹以慰忠魂伏候

皇上訓示施行謹

奏

咸豐六年二月二十四日拜發奉

硃批另有旨欽此

彙保寶衡永三府肅清出力文武官紳摺

奏爲遵

旨保奏懇

恩甄敘以資激勸事竊湖南上年四月廣西逆賊竄  
陷東安官軍圍攻四月之久始將城池克復首  
逆朱洪英復竄撲新寧縣城經卽選道劉長佑  
等擊敗解圍首逆胡有祿竄入祁陽經卽選道  
王珍前保副將周雲耀等猛追痛剿全股蕩平  
並生擒首逆解省審明磔死方逆賊鳴張之時  
衡陽武岡土匪乘機響應亦經該文武先後設



法攻剿得以迅就收平斷其勾結凡賊蹤所至  
各屬文武團紳皆戮力同心或迎剿或尾追或  
阻擊或搜斬俾兇氛迅掃永州寶慶衡州三府  
一律肅清實屬著有勞績節經臣隨時陳

奏上年九月二十一日欽奉

上諭在事出力官紳弁勇准其擇尤保奏候朕施恩  
欽此除由外咨記拔補並賞記功牌咨部註冊外  
茲謹擇其尤爲出力者彙列清單伏懇

皇上天恩加以甄敘庶賞行而有功者勸以彰前勞  
而策後効均於是乎在矣其王珍永明一戰出

力弁勇曾奉

恩旨保奏亦謹彙入案惟已保副將周雲耀一軍弁  
勇東安之後原有應邀

獎敘者

臣

以該副將身殉永明所部弁勇護救不力  
概予刪除理合一併聲明伏乞

皇二聖鑒訓示施行謹

奏

咸豐六年四月二十三日拜發奉

硃批另有旨欽此

關天河公姓譜一 丙辰

三

駱文忠公奏稿卷之七目錄 湘中稿

丙辰中

援江官軍進逼袁州克復萬載縣城現籌進剿  
情形摺

王道越境追剿粵匪迭勝因病請假未能速援

江西摺

覆陳夏藩司朱牧能否帶勇片

江西賊匪竄犯瀏攸鄱茶桂各屬邊界官軍團  
勇擊退獲勝摺

賊犯湖北通城江道血戰捐軀摺

江巡撫之母捐助軍餉請封片

已革晃州廳楊通判請留任戴罪圖功片

保舉省城團防出力官紳摺

援江各軍會攻袁州鄂省援軍收復新昌上高

進攻瑞州摺

湖北崇通股匪狂竄入境截擊獲勝摺

澧州石門奸民滋事剿捕完竣摺

剿辦潭源洞粵匪片

酌議抽收鹽稅章程摺

援江官軍進逼袁州克復萬載縣城現籌進剿  
情形摺

奏爲援江官軍兩路疊獲全勝一路直逼袁州府  
城連破賊營一路克復萬載縣城恭摺

奏祈

聖鑒事竊湖南援江之師克復萍鄉縣城之後逆賊  
悉力拒守蘆溪鎮宜風鎮一帶計圖穩抗援師  
得以堅踞袁郡卽選道劉長佑駐軍萍鄉城外  
十里舖地方一面相機進剿一面安撫民人搜  
勦伏匪以清後路二月二十日卯刻賊邀集瑞

州臨江兩府老賊數千分五路前來撲營劉長  
佑預令楚勇分伏於麻子坪蘇家灣萬家沖一  
帶令守營者堅壁勿出度賊已過伏而後擊之  
又探蘆溪之賊可由台原白洲小路襲官軍營  
壘飭守備黃三清帶祁勇頓於楊家灣飭楚勇  
百長鄧在富權華魁帶楚勇頓於橋口要擊之  
賊三路絡繹而來漸次逼近營盤楚勇百長李  
明惠鄭金華江孝義李光祝鄔世堂石有周守  
備伍乾典文生宛宗昌等分路衝擊陣斬先鋒  
悍賊各數名蘇家灣萬家沖所伏各勇穿入賊

陣遇賊卽砍賊衆敗潰中路之賊直撲十里鋪者猶據街口不退黃衣騎馬賊目持刀督賊甚急劉長佑令楚勇熊彪楊立德等佯敗誘之賊悉衆追來營中開放劈山大礮諸勇乘之亦旋卽敗去官軍之頓楊家灣橋口者將收隊矣忽見東壁山後果有賊二千餘由台源白洲而來黃三清奮起迎擊袁州都司桂英千總馬章榮把總余步鼐率兵勇助戰鄧在富等亦從橋口衝出賊猶不退藍翎從九劉長健督同百長殷開選漆盛年隔河開放抬鎗適斃紅衣騎馬賊



目賊隊驚亂始紛紛敗走麻子坪之賊正與楚  
勇百長翟國彥朱維德等相持見東壁山賊敗  
始奪路而走適千總李承立帶勇從老虎冲截  
出鮮得脫者是戰共計斃賊數百割取首級一  
百五十三顆生擒陳金農等十七犯奪獲抬鎗  
二十三桿鳥鎗三十桿官軍受傷十二名陣亡  
一名二十六七等日賊分股撲管官軍出隊賊  
卽反走是處榛山稠密易於設伏官軍未敢輕  
進三月初三四等日劉長佑移軍進駐高岡埠  
近偏蘆溪賊營賊固匿不出復於蘆溪東岸之

石灣猪浦

等處添筑

一日劉巨

率楚勇五

總李承吉

崔大光中

典劉長健

刀矛齊湛

賊從山帝

劉坤一本

百餘賊退劉坤一率勇越街左攻聖岡祠賊壘  
踰溝而進火及營帳壘垂破矣忽老鴉山一帶  
賊壘及獅子巖賊壘各出賊數百圖襲我後以  
救聖岡賊壘之危劉坤一黃三清梁開國及袁  
州都司桂英勇日崔大光等麾兵邀截擒斬甚  
多各路賊俱敗退收隊而歸劉長佑以聖岡賊  
壘不破則蘆溪要隘終不可奪然官軍專注聖  
岡則各營之賊猶可分路救護十二日仍親督  
各營五路並進右路撲獅子巖賊營左路撲老  
鴉山大山殿一帶賊營大隊由中路前進直逼

蘆溪兼禦蘆溪田隴之賊又分三路爲奇兵斷  
各營賊衆往來援應之路以便直攻聖岡賊壘  
飭本地監生歐陽承生員劉立基爲嚮導中路  
更番擲戰賊固匿不出官軍扼其街口賊從蘆  
溪之右田隴中突出數百楚勇百長李明惠李  
得魁羅揚吉奮勇截殺乘勝奪取礮台賊勢不  
支仍退伏街內爲街口官軍所扼不復得出其  
時黃三清等已從大山腳繞攻獅子巖賊營李  
承立劉長健等逕撲老鴉山大山殿一帶賊營  
皆值得手之際中路遂分兵與右路合攻聖岡

之賊逼圍數重楚勇百長郭成璋李光裕李道  
達率勇李華敏高光政鄧善喜夏順春郭有書  
陳開倫等越壕躍入賊眾驚亂爭出營門楚勇  
百長鄧在富漆盛年文生許繼衡等堵截廝殺  
有騎馬賊百餘從壘後突出各勇奮往截之賊  
猶死鬪傷官軍二人一賊騎白馬穿黃馬褂尤  
驍悍百長劉世鵬李光祝等挺矛刺之而奪其  
馬並將各悍賊悉數戮斃所刺斃黃馬褂騎馬  
之賊則賊目總制楊姓也其獅子巖一帶賊營  
適經黃三清梁開國及宜春萍鄉各官弁帶勇

攻破一時火起陣殺黃衣黃帽騎馬賊目二名  
並搜獲偽將軍印一顆及偽官憑文冊其老鴉  
山大山殿賊營見聖岡及獅子巖一帶賊巢均  
破將棄營而奔劉長健崔大光等乘勢薄之斃  
賊甚多溺死者無數各營甫破劉長佑急令劉  
坤一李承立李明惠伍乾典等悉力攻蘆溪之  
賊賊方驚亂有滿髮悍賊百餘人持刀督令死  
鬪巷戰逾時官軍被創者十餘人百長崔國彥  
等仍鼓勇直前賊始敗卻適左路右路各勇均  
鳧水繞截市後而猪婆山石灣四營之賊亦皆

棄營而逃官軍分途掩殺十餘里始收隊回營  
兩戰共破蘆溪一帶賊營十一座斃賊一千數  
百內賊目稱總制將軍者各一稱軍帥師帥旅  
帥者約數十生擒逆賊王繼興等一百五十名  
割獲首級六百餘顆奪獲大礮十三位抬鎗五  
十六桿烏鎗八十七桿大小黃旗三百一十九  
面刀矛五百五十六桿籐牌七面紅黃風帽十  
三頂紅黃先鋒帽九十五頂黃馬褂紅馬褂共  
九件黃繖紅繖各一頭巾號衣火藥騾馬鼓角  
文冊無數而官軍之受傷者共至百餘名之多

蘆溪破而宣風之賊亦喪膽竄回袁州府城守  
城之賊憤其屢爲官軍所敗不許入城另調臨  
江萬載之長髮賊二千餘來宣風以圖復拒官  
軍劉長佑已由蘆溪移營前進十七日賊分三  
路來撲官軍亦分三路擊之中路賊先至百長  
鄭金華江孝義許繼衡李光祝鄔世堂大呼陷  
陣楚勇李曉光彭有功劉通國鄒耀麟陣斬騎  
馬賊五人皆髮長二尺餘者賊始卻退其由左  
路來者李承立劉坤一督勇奮擊楚勇翟紹常  
挺矛連刺黃衣賊目二人墜馬賊遽駭走各勇



呼譟乘之賊多擠陷水田殲斃甚衆兩路之賊雖敗然猶頓旗嶺上不遽奔也右路之賊見中左兩路俱敗復敢持牌舞躍而來官軍列爲橫陣施放鎗礮斃斃牌賊數名賊乃分股直趨山坡圖抄官軍之後劉長佑麾楚勇及虎威勇馳據山坡截之復麾朱維德等潛由田隴橫過以襲山坡之後賊大驚潰而中左兩路賊匪之頓旗嶺上者遂相率大奔各路官軍從後掩殺賊均棄械狂走有一賊坐龍槓黃轎者棄轎竄逸各勇追之不及僅奪其轎共斃賊四五百名生

擒十餘名奪獲抬鎗十桿鳥鎗二十一桿大小黃旗三十二面籐牌八面刀矛各械無數生擒十餘賊二十五日劉長佑移營進駐宣風鎮賊屢次撲營均經擊退袁州府城近歲新修樓堞堅固賊復於城外堅築營壘冀誘官軍深入得憑險以老我師劉長佑以攻堅必損精銳且各屬匪徒蜂屯蟻集非節節移營搜勦則後顧堪虞四月十一日移營進紮沙田僅距袁城十餘里是日午刻賊分三路前來撲營官軍陳於十里舖見賊列隊山上卽向前搦戰賊屹立不動

官軍火箭齊施飛中賊隊賊始驚亂遂分隊乘之賊敗回城外大街而城西鳳凰山一帶賊營各出隊遮截官軍劉長佑令楚勇追及大街之賊楚勇百長漆盛年等及黃三清梁開國崔大光各率所部及袁州分宜宜春兵勇圍撲賊營正相持間嶺腰之賊千餘從榛山內突出崔大光督勇截殺逾時賊始敗退而黃三清漆盛年等已將鳳凰山賊營攻破矣其越壕竄出者官軍節節追擊擒斬甚多惟附城兩營牆厚壕濶又恃有城上礮石火器得以相護猝難得手且

暮收隊歸營大街之賊復敢尾追而來官軍反  
施擊之擠陷水田者均經官軍刺斃追至城下  
而返二十二日劉長佑復督各營分三路進剿  
中路之勇直抵街口賊負固不出於牆隙施放  
鎗礮郭城璋雷榮耀崔大光帶勇從水田繞過  
山後賊急退踞民房官軍拋放火彈火箭頃刻  
火起燒賊無數李明惠鄭金華黃三清及把總  
何魁甲等帶勇從左路至見樹林內有伏賊遂  
分支裏之賊敗入城一騎馬賊目帶悍賊自城  
中馳出督諸賊轉鬪鄭金華裏創鏖戰各勇短

兵相接復斃賊多名適楚勇從林旁開放拍鎗將騎馬賊擊斃餘賊始奔追斬過半李成立梁開國及袁州兵勇分撲鳳凰嶺賊壘賊憑壘開放鎗礮城上賊亦開礮護之各勇蛇行而前甫近城壕城中賊分兩路來抄官軍之尾適中左兩路賊俱擊退劉長佑麾令併力助攻右路城中賊見官軍大至當卽潰走各勇施放噴筒火箭火彈賊壘火起其從壘中竄逸者又爲黃三清等截殺殆盡官軍旣連克二壘遂乘勝攻城城上飛石火器密如雨下士卒多受傷者遂

收隊回營兩日斬賊七八百生擒者四十餘破賊營七座奪獲拍鎗鳥鎗三十餘件黃旗五十四面其焚毀者不計此萍鄉一路官軍破賊要隘連破賊營十七座直逼袁州府城之實在情形也其由瀏陽以攻萬載一軍自二月十一日珠樹潭大捷以後賊悉眾扼守荆樹舖及大橋以抗我師大橋距萬載縣四十里路通上高新昌及銅鼓營荆樹舖距萬載縣六十里路通宜春分宜而皆有股匪分踞冀圖乘官軍進勦則截其餉道以困我師卽選同知蕭啓江都司劉

培元田與恕等以兵分則力單而由一路進勦則必墮奸計乃揚言攻大橋之賊而實則乘賊不意以搗荆樹三月初二日夜半捲甲疾趨天明抵一息亭距荆樹僅十二里分兩路潛行賊不意官軍猝至方吹螺聚抗而官軍已據其街口賊奪路欲走而官軍已合圍縱火矣各營方圍捕時忽銜後山上黃旗招颺有賊千餘前來策應蕭啓江田興恕分兵縱擊斃賊數十賊卽翻山四竄官軍掩殺十餘里始行收隊是戰除焚斃外斬賊約七百餘生擒一百二十餘燒賊

船二十餘隻奪獲大小黃旗三十九面抬鎗十六桿鳥鎗十四桿大礮一座籐牌十二面號衣六十件黃袍一件刀矛雜械無數官軍仍收隊回珠潭大營十五日蕭啓江田興恕劉培元楊恒升等帶勇進勦大橋之賊甫行二十餘里抵栗樹坳忽大雨如注乃就林中安碣造飯探報有賊千餘突至旗幟遍滿山谷楊恒升急登嶺審視賊蹤隨令兵勇分路拒敵蕭啓江田興恕劉培元各分隊爲數路凡山間有蹊逕可通人者則遍布以截之賊踞山嶺擲石下擊楊恒升



劉培元田興恕等各棄馬持短刀冒險上山力  
戰斬黃衣賊目數人田興恕身受石傷猶手刃  
二賊蕭啓江恰由中路山坳馳來湘勇百長易  
鴻達周崇高亦率隊繼至賊知不敵遂紛紛棄  
械由山後逃走官軍亦四散追之賊至山下溪  
邊頓旗抗拒官軍挺矛齊刺立斃執旗賊十餘  
餘賊奔潰官軍以空腹鏖戰未便窮追遂卽收  
隊是戰共斃賊二百餘生擒三十五犯奪獲大  
小黃旗十一面火藥十五桶鉛子八桶抬鎗十  
二桿鳥鎗十五桿繡花袍一件號衣五十三件

僞印二顆刀矛無數十六日卯刻卽拔營趨大橋大橋賊營十座計賊不下五千聞昨栗樹之敗震懼失措其夜遂棄營而走蕭啓江等旣駐營大橋而上高新昌之賊二千餘於十八日突至白梁地方將圖抄截官軍後路適蕭啓江等各營派隊巡哨半途遇賊擬保把總蕭啓淮易鴻陸藍棚把總奈斌元均係劉吉三等所帶之勇不過千餘整隊迎戰賊分三枝一據右路高岡一據左路山坡其大隊則排列中路田隴欺官軍少吹號搖旗而進勢甚兇猛官軍分三路

拒之每路僅三百餘人然皆屢勝之卒視賊蔑如前隊鎗礮施放未畢刀矛隊大呼陷陣賊遂驚潰官軍乘勢掩殺追至十餘里共斃賊七百餘生擒九十三犯奪獲大小黃旗二十四面號衣四十六件抬鎗十桿烏鎗十一桿子藥十三桶刀矛雜械無數賊訶知官軍駐大橋時調上高新昌之賊往來各界以牽綴我師而暗約袁州之賊三千餘將由荆樹直搗珠潭二十一日守備楊恒升自大橋拔營回駐珠潭午刻甫抵河岸適賊分三路驟至萬載知縣李吉言原帶

珠潭之瀏勇勢正不支楊恒升拍馬疾馳分所  
部長勝軍六百名爲五隊奮威衝殺賊不意援  
軍速至卽相率驚潰藍翎把總奈斌元藍翎外  
委黃鵬飛李忠楷等挺矛大呼乘勢掩殺斬賊  
數百名生擒數十奪獲大小黃旗四十一面籐  
牌十面抬鳥鎗十二桿長矛二百三十九桿雜  
械無數賊意官軍旣回珠潭則大橋之備必虛  
二十二日復率賊衆數千潛來撲營蕭啓江田  
興恕劉培元嚴陣以待賊知有備不敢遽進時  
日已正午各傳令士卒飽餐出隊以八隊爲正

兵以兩隊伏山谷爲奇兵湘勇先進遇賊正相  
持間榛山內伏賊突起各勇稍卻湘勇胡中加  
劉喜益等飛馳助戰伏賊始敗適田興恕劉培  
元已將各股賊擊退尾賊而來見賊勢猶猛遂  
各分路抄之田興恕從左路衝入手刃三賊劉  
培元從右路衝入奮力衝擊始將此股盡數殲  
除各營合隊乘勝追殺賊頓旗則撲之賊走則  
追之約二十餘里始收隊歸營共殺賊七八百  
生擒四十七名奪獲大小旗三十九面抬鳥鎗  
十五桿籐牌七面刀矛無數四月初三日萬載

竹埠高城等處賊匪糾合上高之賊萬餘分三路齊來撲營蕭啓江與田興恕劉培元以眾寡不敵宜俟其倦乏乃傳令謹守營壘捲旗閉柵故示以弱踰兩時許左右兩路之賊漫山而至中路繼之每路又各分三路呼噪索戰一從山坳撲田興恕營一從山巔而下撲劉培元營一從田隴渡水撲蕭啓江營火箭噴筒鎗礮齊施烟燄迷漫咫尺不辨各勇始卓旗開鎗拒敵忽大雨如注賊之火器盡濕技無所施蕭啓江等令各勇以劈山礮向賊隊密處轟擊斃賊頗多

賊之後隊亂而前隊猶冒死紛撲蕭啓江田興  
恕劉培元等乃列隊營外各分爲數隊穿入賊  
陣刀矛並舉前隊賊始敗走官軍薄之於河溺  
斃無數是戰共斃賊千餘生擒百餘奪獲大小  
旗幟三十四面抬礮五桿抬鳥鎗二十六桿號  
衣紅巾籐牌藥包無數十三日蕭啓江田興恕  
劉培元進擊高城竹埠之賊賊傾巢出拒旋卽  
敗潰田興恕劉培元分隊抄擊且追且勦共斃  
賊六百餘生擒四十二犯奪獲大小旗幟一百  
一十面抬鳥鎗十三桿收隊回營萬載賊於十

四日棄城遁走屯於近城二十里內外意俟官軍入城則襲攻之而絕其後路官軍詎知其詐按兵不進賊復踞城如故並邀吉安粵賊葛廷黃崇開等率賊助守二十八日蕭啓江田興恕劉培元等自大橋拔營卸縣李吉言及弟李審言率萬載縣紳舉人辛辰雲謝大舒曹瑞祥等督勇隨之楊恒升自珠潭拔營兩路約攻萬載會於竹埠甫安營而賊已分三路來撲鏖戰良久賊勢不支且潰且走官軍且戰且追直薄城根連踏西門外賊營一座南門外賊營一座北



門外賊營二座賊踉蹌入城官軍躡蹤追之賊由東門狂走官軍掩追十餘里始收隊而還二十九日蕭啓江田興恕已革千總伍化蛟藍翎把總黎得勝營於南門外劉培元楊恒升營於西門外正蒸營間探報有賊三千餘前來撲營蕭啓江等列隊迎之行二里許卽與賊遇官軍以百數十人向前誘戰而分伏大隊於左右山岡以待賊見官軍退走遽前逼之四路伏兵齊發田興恕怒馬衝截連及五賊楊恒升劉培元所部勇各由兩路抄至鎗礮之聲震撼山谷賊

衆敗潰官軍追至二十里外收隊而退兩日斃賊九百餘生擒四十餘奪獲大小旗幟六十九面拍鎗二十八桿鳥鎗三十六桿號衣紅巾雜械無數此萬載一路官軍節次鏖戰均獲全勝共破賊營十餘座克復萬載縣城之實在情形也臣維逆賊竄入江西迭陷該省西路各府州縣城池徧設僞官劫民從逆湖南與江西連界各州縣南自桂東北抵平江界小皆淪爲異域文報已久不通援師自瀏陽醴陵出境節節攻勦共計兩路大小各十數戰先後斃賊實一萬

有奇而官軍受傷者僅百餘陣亡者不過二十  
餘名將士之用命賊匪之無能亦可概見然曠  
日持久始克兩城不能成長驅席捲之勢者實  
以江西西路城邑市鎮遍爲賊踞其與湖南接  
界各處南北綿亘千餘里勢若長蛇援師從醴  
陵瀏陽分道出境轉戰而前雖速克萍鄉萬載  
徑抵袁州城下然其勢正如擊長蛇之腰防其  
首尾俱應萬載之北則義甯銅鼓上高新昌等  
縣袁州之南則蓮花廩安福永新永甯等縣皆  
有間道可抄援軍後路欲分兵馳勦則恐袁萬

之賊乘吾虛欲合兵進勦則虞各廳縣之賊躡  
吾後屢據劉長佑蕭啓江等稟請增調勁勇臣  
已陸續撥三千餘名合之原調出境之師已近  
八千矣然合之當一路而覺其有餘分之勦兩  
路而仍嫌不足論湖南南援江全局除現由醴瀏  
兩軍並進爲中路外北路應從平江出一軍勦  
新昌上高以復瑞州南路應從鄱茶出一軍勦  
永新永甯蓮花廳以復吉安庶彼此不爲賊所  
牽制得以一意進取而湖南之援可速江西之  
禍可紓無如餉項搜括早空兩路援師且虞饑

潰更何從籌辦兩軍之餉前准湖北撫臣胡林翼咨稱已派曾國華劉騰鴻等帶勇援江將由崇通勦賊以抵新昌與蕭啓江一軍會合並進是北路一軍尙有可望頃據劉長佑蕭啓江稟報袁州新添臨瑞悍賊數千距萬載二十里之斗門一帶亦新添奉新上高賊數千大橋一帶亦有新昌之賊數千臣擬察情形如兩路賊勢日增兩路官軍實形單薄尙應隨時派撥以厚其力兵機瞬息千變臣維當悉心籌畫以求稍紓

皇上宵旰憂勤此次援江官軍節節攻勦迭獲全勝  
克城奪隘殺賊極多在事文武兵勇實爲出力  
可否准臣彙案保獎之處出自  
天恩謹據實馳

奏伏候

聖鑒訓示施行謹

奏

咸豐六年五月十七日拜發奉

硃批另有旨欽此

卷之三

丙辰中

丁

王道越境追剿粵匪迭勝因病請假未能速援

### 江西摺

奏爲官軍越境追剿廣西賊匪直至連州陽山地  
方屢獲勝仗並覆陳卽選道王鑫因病請假未  
能速援江西情由恭摺

### 奏祈

聖鑒事竊委紳卽選道王鑫於江華克復之後追賊  
直過廣東連州東陂觀地方迭獲勝仗情形已  
經臣

奏明在案王鑫以頻年湖南南路均受兩廣之害



上年柳桂所殺之粵賊實  
逆陳金缸及土匪頭目蕭三  
漏網逸去廣東連州匪盜幸  
城池之後未及搜剿比陳金  
州匪徒乘機響應嘯聚日久  
英聞亦竄匿粵東慮其勾結  
督勇徑赴連州會同連州兵  
雲霧洞何木灣湖江頭夏道  
賊八百餘斬之二月初三日  
連州西岸股匪斃賊千餘十

縣西江墟股匪所殺近二千名餘賊奔聚踞陽山縣四十里之青蓮地方三月初二日一戰斬賊近千賊仍竄英德之大灣屯聚王鑫擬卽乘勝殲之而所部湘勇追賊出境兩月有餘不習水土染受山嵐瘴癘每日病死者以數十計維時臣以江西賊氛甚熾而廣東又已有兵勇剿賊飛飭王鑫回軍鄱茶聽候調遣并飭其來省面授機宜王鑫亦積勞成疾沿途感受瘴氣病日益增遂班師回楚旋卽稟請恙假就近歸籍調理四月初一日欽奉

寄諭湖南南境業已肅清選用道王鑫帶勇素稱得力著駱秉章添撥兵勇飭令該員由茶陵州進剿蓮花廳吉安府一帶以爲劉長佑後路策應臣當

卽恭錄行知該員以病尚未愈懇請另行派委

臣維用兵之道擇將爲先該員王鑫勇而有謀

能以寡擊衆現在湖南帶勇文武中實罕其比

茲因一時病難驟愈既未便強之速行而此外

堪當一面之寄者又殊難其選容再隨時察看

情形妥爲籌辦江西與湖南輔車相依苟可稍

爲盡力臣亦必竭蹶圖之也所有王鑫越境剿

賊獲勝及因病未能馳援江西原由謹據實陳  
奏伏乞

聖鑒訓示施行謹

奏

咸豐六年五月十七日拜發奉

硃批知道了欽此



覆陳夏藩司朱牧能否帶勇片

再臣前奉

寄諭降調湖北藩司夏廷樾因病告假聞在長沙就醫業已痊愈前郴州知州朱孫貽丁憂後尙在湖南省該二員均籍隸江西若令協帶兵勇赴援能否得力並著駱秉章查明具奏欽此臣查夏廷樾

朱孫貽兩員由湖南知縣洊升今職歷著循聲均曾帶勇剿賊咸豐三年援江之役該兩員均經臣派委帶勇前往著有勞績夏廷樾於咸豐四年赴四川鹽茶道任途次連奉

恩命擢任湖北藩司溽暑過征感受風濕致患足疾  
降調後來南就醫雖精神一切均已如常惟步  
履尙未全愈現在趕緊調理可冀復元一俟痊  
可即馳赴援江行營協同剿辦朱孫貽丁憂後  
因留算交代在楚現委辦局務從前所帶湘勇  
久已散隸江西湖北各營一時難以復集惟現  
在帶勇之劉長佑蕭啓江等皆與兩員素稱契  
合若令前往各營協帶壯勇自可期其得力容  
臣察看情形如夏廷樾足疾全愈朱孫貽能招  
集親信得力弁勇當卽調赴各營協剿謹據實

覆

奏伏候

訓示謹

奏

咸豐六年五月十七日拜發奉

硃批覽欽此



馬三才公集

丙辰中

三

江西賊匪竄犯瀏攸鄱茶桂各屬邊界官軍團  
勇擊退獲勝摺

奏爲江西賊匪先後竄犯瀏陽攸縣鄱縣茶陵州  
桂東各屬邊界均經官軍團勇擊退迭獲全勝  
恭摺

奏祈

聖鑒事竊逆賊竄擾江西該省西路自贛州以北各  
府所屬地方千餘里均淪於賊而皆與湖南東  
路所屬爲隣臣於援師出境之後一面調派官  
軍酌各屬之衝僻險易分布防堵並飭各州縣

嚴飭團紳帶勇守隘以補兵力之不逮其由江西萬載上高犯瀏陽南界者十月二十三日派防虎垵之守備銜卽補千總楊虎臣率存營湘勇三百名前往迎擊甫至小洞遇賊大隊數千突至黃旗紅巾遍滿山谷楊虎臣以地勢崎嶇不便布陣且賊衆勇寡宜據地利令各勇誘賊至虎垵營次而後擊之賊謂知虎垵駐勇五百其二百名已分防鐵樹關欺官軍勢單蜂擁而進直迫對面山岡岡下懸巖一徑陡仄湘勇排隊施放鎗礮斃賊多名賊不敢過然猶屹立不

退左路之賊忽翻山徑撲營前楊虎臣連開劈  
山礮飽以羣子向賊最多處擊之立斃紅巾騎  
馬賊一名餘賊紛紛倒地各勇鼓譟乘之刀矛  
並進斃賊數十賊始潰走山岡之賊見左路賊  
敗亦紛紛驚竄各勇急起躡之營中長夫亦空  
壁逐利挺矛追賊賊自相蹂藉紛紛墮巖而斃  
比鐵樹關分防之勇聞警馳回則賊已敗退半  
時矣團紳李咸熙率勇由小路繞截而來亦生  
擒敗匪十一名當即正法共計斬賊百數十級  
傷賊無數奪獲抬礮十一桿鳥鎗十六桿籐牌

九面刀矛百數十件是役雖斬馘無多而以三百之勇敗數千之賊僅陣亡壯勇一名實亦僅見之事其由江西義寧奉新竄擾銅鼓犯瀏陽東界者管帶靖勇訓導丁際可於二十一日派軍功候選未入流吳宗渭軍功儲開香文生戈鑑等率所部督同團勇由鐵樹關三路進剿排埠之賊百長張長慶龍啓貴吳文衡文明卓等奮勇衝鋒殺賊百數十名生擒五名焚燬賊巢兩處奪獲抬鎗鳥鎗並妖書偽示等件官軍受傷二名四月二十三日瀏陽縣知縣袁青綬帶

勇巡防東界忽報銅鼓營賊匪數千潛犯橫山  
上莊西界袁青綬當即派外委高峻團紳冷祖  
綬帶勇馳往策應已刻賊分三路先犯橫山坳  
經團紳李明雲劉文波等督勇奮擊上莊團紳  
廖文謨等帶勇馳援並力夾擊斃賊百餘生擒  
長髮賊童躍龍等五名奪獲大紅旗一面大黃  
旗二面小黃旗二面刀矛一百四十餘件黃帽  
紅巾號衣多件此瀏陽縣剿賊獲勝情形也其  
由江西蓮花廳犯攸縣東界者管帶譚勇善化  
汛把總胡國安扼之於鷺山四月初九賊由三

斗嶺分竄至漕泊木宅七里山等處胡國安率  
勇迎剿斬賊數十賊退去漕泊木宅一帶官軍  
進迫之賊出巢抗拒陣斬數十拋擲火彈燒燬  
賊巢賊死無算餘賊逃赴三斗嶺官軍猛蹙之  
嶺上賊分十餘起齊出抵禦官軍分爲三隊以  
一隊當中路兩隊分左右抄擊之賊復退踞嶺  
巔推擊木石官軍奮威衝上殺賊百數十焚燒  
賊巢七座生擒賊監軍黃添威賊目王約餘李  
大山等二十一名奪獲旗幟礮械各數十件收  
隊回營五月初四日胡國安會同把總蔡呈祥

言秀山哨賊七里山斬賊十餘此攸縣剿賊獲勝情形也其由江西蓮花廳竄犯茶陵東界者三月二十七日賊二千餘人由高隴分股一撲腰陂行營一犯州城知府銜卽選同知趙煥聯率勇禦之行至貝江遇賊百長黃理元喻萬才督勇迎敵藍翎千總趙福元躍馬衝入賊陣百長喻均懷黃少春由左抄出百長胡有元談心正由右抄出百長鍾明倫趙明亮督勇接應賊勢不支紛紛奔潰官軍乘勢掩殺陣斬賊匪三百餘生擒十餘奪獲劈山礮一尊抬礮五桿鳥



鎗二十一桿長矛五百餘桿大小旗幟五十餘  
面火藥鉛子九石藤牌雜械無數四月十七日  
賊復竄至高隴趙煥聯於十八日分路擊之斃  
賊百餘生擒長髮賊彭一德等十名奪獲鎗礮  
百餘件此茶陵剿賊獲勝情形也其由江西永  
甯竄犯鄢縣東界者衡永郴桂道李惟醕調前  
署衡陽縣千總喻元發帶衡勇馳往助剿三月  
十八日賊由薯頭小路徑撲縣城攻撲東南兩  
門署鄢縣知縣章保順會同喻元發嬰城固守  
斃賊數十生擒謝文新等四犯正法隨派典史

周賡岐把總劉平壽會督團紳譚振浪段寅清  
陳章魁等帶團勇二百分兩隊出西門潛飭沔  
渡外委金超羣督勇伏於賊後章保順同教諭  
鄧丙奎訓導蘇大鏞分門守禦喻元發帶衝勇  
由南門突出衝入賊陣周賡岐劉平壽金超羣  
等各率勇四門圍剿斬執旗賊目七名餘賊五  
百餘生擒三十二名奪獲抬鎗三桿鳥鎗二十  
五桿刀矛三百五十餘件大小旗幟八十七桿  
十九日金超羣劉平壽帶勇追賊賊見官軍即  
狂走追至界口收隊而還李惟醇以鄆縣勇力

尙單增調把總鄧湘藍翎外委李誠義藍翎千  
總周玉輝帶勇四百名赴鄴助剿四月二十日  
賊築營黃烟堡章保順喻元發等派衡勇二百  
同鄧湘李誠義周玉輝扼沔渡擊之先飭典史  
姚登瀛周賡岐督團勇四百伏九都小路以待  
二十一日賊眾千數百撲沔渡之營相持未決  
姚登瀛周賡岐等帶勇潛襲黃烟堡賊營斬守  
營賊六十餘而奪其營縱生擒二賊往沔渡沔  
渡之賊聞本營被襲不戰而潰衡勇及鄧湘李  
誠義周玉輝所帶之勇乘勢縱擊斃賊四百餘

生擒五十二名奪獲大礮二尊抬鎗鳥鎗二十  
一桿火藥鉛彈七百餘觔旗幟刀矛三百四十  
餘件僞印兩顆此鄆縣守城擊賊獲勝情形也  
其由江西龍泉上猶竄犯桂東邊界者四月初  
六日升用同知直隸州知州桂東縣知縣苗如  
璋率紳勇迎擊之二都下堡殺賊十餘生擒穿  
黃馬褂長髮賊目一名初七日有賊千餘由大  
汾大沙分路前來帶勇六品軍功童生胡保南  
迎剿斃賊百餘生擒十一名十九日有賊四五  
百突入大汾三都團紳帶勇星夜馳抵下堡賊

方酣臥民房二十日黎明團紳督勇潛至將民房圍住截殺殲斃甚衆生擒十餘并奪獲旗幟器械等件二十一日賊二千餘由大汾大沙左安三路來犯六品軍功文童李耀南武生何演清帶勇擊其左六品軍功武生羅貴奇帶勇擊其右軍功文童胡保南帶勇由中路迎剿行抵中堡遇賊轟斃執大旗黃馬褂賊目一名賊始潰走團練四面圍攻李耀南何演清羅貴奇等亦分路抄截適典史陳霖千總何來德率武生陳冠裳羅冠卿等帶兵勇二百由上堡馳來會

剿附近居民男婦齊上山巔大呼殺賊聲震山  
谷文生李召棠九品軍功黃德才各帶勇均由  
間道繞出截殺共斃賊數百割獲首級二百顆  
生擒十餘奪獲大小黃旗四十面拍鎗二桿拍  
礮五尊鳥鎗六桿大轎一乘竹轎八乘馬一匹  
二十二三兩日胡保南等連擊賊於大汾等處  
復斃賊數百割獲首級二百餘顆拔貢吳齊乙  
監生黃桂芳等帶勇剿江西上猶之賊於猴子  
嶺等處亦斃賊數十賊竄入龍泉併爲一股吳  
齊乙等從後追至胡保南等分隊設伏伺之三

都下堡比賊至四面圍擊斃賊甚多內有長髮  
賊目十七名奪獲器械馬匹旗幟多件此桂東  
縣剿賊獲勝情形也臣惟湖南東路與江西毗  
連各處僅一山之隔江西有事則湖南防不勝  
防賊隨地設僞官江西各處土匪蜂屯蟻聚其  
士民多以身家之故勉被迫脇受賊驅使不能  
自拔以故長髮賊數百入境旬日之間嘯聚以  
數千計其窺伺湖南各屬邊界者每起多則數  
千少亦于餘苟一處疏防則各路爲之奪氣幸  
仰仗

天威士卒紳民敵愾同仇均獲全勝楚疆晏然所有  
在事出力之文武員弁紳勇可否擇其尤者核  
明保  
奏之處出自

天恩伏乞

聖鑒訓示施行謹

奏

咸豐六年五月十七日拜發奉

硃批知道了著准其擇尤保奏欽此





賊犯湖北通城江道血戰捐軀摺

奏爲賊犯通城湖南帶勇委紳血戰捐軀懇

恩優卹以慰忠魂事竊上年武漢復陷後臣調委紳

候選道江忠濟統帶楚勇往駐岳州兼堵崇通  
之賊所有節次剿賊獲勝情形均經

奏報在案自上年十一月以後通城復陷逆賊倏

聚倏散颺忽無常江忠濟屢請移軍防勦臣以

岳州縮轂江湖形勢最要移重鎮以防一隅殊

爲失策且賊匪聞大隊前往必預先避匿難期

得手若僅以偏師移鎮又恐形見勢絀反啓戎

心不如多發偵探派隊雕剿爲宜江忠濟隨派  
藍翎千總徐以祥江孝聞等帶勇時赴通城邊  
界相機辦理先後在通城土坳馬家橋一帶接  
仗獲勝擒斬賊目簡金堂等解送岳州大營正  
法徐以祥等旋收復通城搜斬土匪旋擊崇陽  
沙坻之賊擒斬三百餘名將拔營回岳而通城  
士民紛紛籲留請俟湖北派兵下縣再行撤回  
自是徐以祥等遂駐通城先後防剿撲營之賊  
及大橋白泥橋高規大溪洞龍窖園之賊均擒  
斬多名並斬賊目毛玉恒僞旅帥徐致得等數

名探報武昌城中逸出賊目指揮何姓僞將軍  
謝國俊等帶賊眾二三千到崇陽糾合通山興  
國土匪將撲通城江忠濟慮徐以祥等勇力尙  
單不能抵禦而通城士民又懇請濟師卽帶勇  
馳赴通城督戰二月初十日賊四五千分三路  
來撲營盤江忠濟見賊隊甚整呼謀搦戰而不  
近前知其有伏令各勇堅壁勿出以挫其銳踰  
兩時許賊眾蜂擁而至近迫壕邊江忠濟始開  
營門躍馬大呼突出各勇刀矛齊進陣斬騎馬  
賊目四名而獲其僞印僞照其一則僞將軍謝

國俊也賊眾敗走楚勇乘之沿途分隊搜伏且戰且殺復斃賊六七百名內有騎馬賊目二名生擒楊善成等五十名割取滿髮首級二百一十八顆奪獲大黃旗四十七面抬鳥鎗三十二桿刀矛六百餘件火藥五桶火箭數百枝火包一石十三日賊復分三路來撲營盤適平江北界帶勇委紳卽選從九品黃新祿帶勇馳至賊當新挫之後又見官軍益增知不可敵甫交鋒卽敗走官軍追之翻山竄去僅斬賊數十而已自是賊目何姓遂由通山而竄江西之義甯州

將合湖北通山興國江西武甯義甯之賊并擄  
脅壯丁誓圖報復通城良民益皇皇然惟恐楚  
勇之去江忠濟以湖北咸蒲無賊岳州之防稍  
緩又以賊方往來湖北江西接壤一帶通城適  
介其間不可不留兵以資控扼遂日夜督辦團  
練冀由通城而漸及通山崇陽俾賊不得蔓延  
四竄庶於三省大局有裨臣壯其志不忍抑之  
而亦未嘗不慮其疏也屢於批稟中示以通山  
崇陽民情叵測官軍獲勝則薙髮反正貌爲良  
民及賊勢稍張則白挺紅巾甘爲賊役通城民

情雖不如各處之頑悖性成然苦於柔靡成風不能振作恐團練雖成仍不足恃也四月初一日猶接江忠濟稟報通城之團丁赴營點驗者一萬五千有餘崇陽通山亦漸有去逆效順之意乃初三日來稟則賊自檢點何姓指揮姜姓等從義甯入通山潛至崇陽桂口率興國通山崇陽之賊八九千於是日辰刻突撲營盤相距僅里許江忠濟以賊來既眾恐四面圍繞不便出隊隨下令各勇以七成列隊營外俟中營鼓聲起則齊力猛撲之三呼三進賊之後隊已潰

各勇急起乘之賊衆大奔追至數里斃賊約二三百遙見山岡有賊正修築營壘十餘座遽前薄之復殺賊數百毀其四營而還初四日賊仍分三路來撲比近營二里許則分支繞截將各營圍住而通城塘湖麥園一帶土匪二三千亦來助勢江忠濟督各百長分投攻擊自辰至申殺賊約數百賊猶不退忽團勇營中火起江忠濟督勇回救賊四面圍之江忠濟左右衝突身受十餘創猶掣佩刀連刃數賊力竭遇害賊仇其屢斬賊目並將其手足支解楚勇之同死者



數百人藍翎千總擬保守備徐以祥固守營盤  
開放鎗礮斃賊最多直至三更忽大雨如注礮  
聲始息而全營五百勇丁無一免者此江忠濟  
移軍通城血戰捐軀四營俱陷死事最烈之實  
在情形也臣接岳州府平江縣各探報即飛札  
管帶由鄂援江之同知曾國華知縣劉騰鴻參  
將普承堯湖南卽補同知吳坤修等由威甯蒲  
圻便道進勦而調管帶新練長勝軍之都司余  
星元守備銜益陽縣千總洪定陞率兵勇二千  
二百餘屯駐岳州其由通城敗績之楚勇一千

零數十名概行撤遣歸籍其駐岳州老營之楚  
 勇八百名亦一併裁撤臣查卽選道江忠濟係  
 廬州殉難安徽巡撫江忠源之三弟江忠源兄  
 弟凡四江忠源居長次則現在安徽帶勇之江  
 忠濬次卽江忠濟次則曾經帶勇現告病在籍  
 之江忠淑自粵逆起事以來湖南紳士之帶勇  
 者惟江忠源最早昆弟四人俱帶勇立功而江  
 忠源江忠濟先後殉難事尤可憫江忠濟賦性  
 樸直臨陣勇敢屢著戰功忠義實出天性其遺  
 骸臣已飭平江紳士設法覓獲棺斂回籍可否

馬之... 丙辰中 三

籲懇

皇上恩施照臬司陣亡例

賜卹藍翎千總徐以祥原係江忠源舊部勇敢樸實  
常為軍鋒岳州通城防剿最力擬保都司此次  
力守孤營一晝夜斃賊甚多主將雖殉猶矢死  
鏖戰至夜分大雨力竭捐軀實為可惜可否照  
都司例

賜卹之處出自

天恩江忠源會奉

特旨許立專祠江忠濟徐以祥應請

恩准一併附主崇祀庶足以妥忠魂而昭激勸此次  
楚營員弁陣亡者多容再核明

奏請

卹典謹恭摺馳

奏伏乞

聖鑒訓示施行謹

奏

咸豐六年五月十七日拜發奉

硃批另有旨欽此

馬子思方表南

丙辰中

三

江巡撫之母捐助軍餉請封片

再上年四月廣西賊竄陷東安縣城

臣

飭官軍

嚴扼由祁陽竄衡州由蘆洪竄寶慶之路而新

甯一縣緊連東安山徑叢錯均可由此直趨寶

慶

臣

飛札在籍花翎五品銜訓導江忠淑募勇

二千赴東安會剿一以壯東安之勢一以固新

甯之防維時郴桂告警巴平戒嚴武岡衡陽士

匪又以時竊發兵增餉竭焦灼難堪江忠淑奉

札募勇因口糧無措正在萬難之時其母陳氏

以所生四子均以帶勇殺賊渥被

天恩當時事艱難之秋尤宜毀家紓難先後湊捐錢  
一千串銀一千零四十七兩以資其行又懸賞  
錢六千串以鼓勵各勇用能殲除醜類保固城  
池事後江忠淑具稟前來臣覆核無異查原任  
安徽巡撫臣江忠源殉節廬州已蒙

皇上天恩照總督例賜卹江忠源故父歲貢正江上  
景存母陳氏均未得有封典查籌餉事例一品  
封典捐銀一千兩今江忠源之母江陳氏傾家  
圖報捐數實近萬緡雖據呈稱不敢仰邀議敘  
惟一門忠義炳耀湖湘有子四人兩殉

國難可否仰懇

天恩給予江忠源父母三代一品封典之處出自

恩施至江忠源中年乏嗣赴廣西帶勇時始立姪孝  
椿爲嗣現年十六歲江忠源殉節之後月餘遺  
腹生一子孝棠現年僅三歲從前奏報未經敘  
及合併聲明謹附

奏請

旨

咸豐六年五月十七日拜發奉

硃批另有旨欽此





已革晃州廳楊通判請留任戴罪圖功片  
再前因貴州匪徒竄陷晃州廳旋經收復臣以  
該廳通判楊泰來並未出力與麻陽縣知縣楊  
以寶一併參

奏請

旨革職拿問奉

上諭晃州廳通判楊泰來麻陽縣知縣楊以寶於廳  
縣失守雖卽收復並未隨同出力著革職拿問欽  
此臣查晃州廳孤插黔疆向無城垣廳署後卽係  
黔地楊泰來平日居官勤慎操守亦好頗得楚

黔士民之心臣早有所聞自黔苗不靖以來聯  
黔民合團數月並無疎失此次失事實由銅仁  
大股匪徒分道猝至團勇未能速集衆寡懸殊  
失事又經隨時收復情罪原可未減臣以其時  
黔中苗匪勢甚鴟張黔省連失數城人無固志  
若不將失事之員從嚴參辦恐地方官不明守  
土之義羣起效尤故特附

奏嚴參以昭儆戒嗣據署辰沅永靖道翟誦稟稱  
據該廳士民張日崙等及貴州思州銅仁玉屏  
等府縣邊界士民紛紛赴道呈懇暫留楊泰來

原任旋據張日崙等數十人赴臣衙門投遞呈  
詞條舉該革員政績願竭力練團殺賊爲該革  
員贖罪而該革員未卸任之前仍帶黔楚團丁  
格斃著名匪黨至數十名之多不以待罪稍形  
鬆懈合無仰懇

天恩俯念邊防吃緊暫留該革員晃州廳通判原任  
戴罪圖功以觀後效之處出自

逾格鴻施謹據實陳

奏伏乞

皇上聖鑒訓示施行謹

奏

咸豐六年五月二十四日拜發奉

殊批楊泰來平昔居官若何前奏并未聲明遽因士  
民懇留卽免其罪向來無此政體該革員旣能殺  
賊數十或者尚能奮勉著暫緩拏問仍撤任留於  
該處協防欽此

保舉省城團防出力官紳摺

奏爲省城團防出力文武團紳懇

恩鼓勵以昭激勸事竊湖南一省南通嶺嶠北界荆湖西控巫黔東連章貢自咸豐二年粵逆竄過之後內殲土匪外禦隣封警報頻仍日不暇給在事文武員弁或辦理局務或分守城壕或盤結奸細或修葺城垣或監製器械或整理街團時逾三載勢處萬難而在事文武官紳夙夜從公均戮力同心不辭勞瘁以故賊蹤屢逼旋就救平奸謀潛窺隨地七獲臣與同城文武惟時

以忠義激勵人心未嘗以獎敘寵榮爲歆動之  
計卽各文武官紳亦皆馳驅匪懈勞不言功特  
其中歷時最久著有微勞者實不乏人未便任  
其掩抑謹繕列清單恭呈

御覽伏乞

天恩加以甄敘庶人材益奮衆志成城一亦得藉收  
指臂之助矣謹繕摺陳

奏伏乞

皇上聖鑒訓示施行謹

奏

咸豐六年六月二十二日拜發奉

硃批另有旨欽此





援江各軍會攻袁州鄂省援軍收復新昌上高

進攻瑞州摺

奏爲援江各軍疊獲勝仗現在會攻袁州鄂省所  
派援軍由萬載進勦收復新昌上高縣城進攻  
瑞州恭摺

奏祈

聖鑒事竊援江官軍兩路疊獲全勝一逼袁州府城  
連破賊營一克復萬載縣城經

臣

奏明在案卽選道劉長佑自連破袁州城外賊營  
後賊急邀臨江安福萬載股匪助逆固守四月

二十七日劉長佑三路出隊斃賊百數十五月  
初三日移營進駐洞里舖初四日仍出隊誘賊  
出擊斃賊二百餘因收隊時被伏賊抄截陣亡  
楚勇十八名外委劉祖貴力戰遇害十五日卯  
刻復分三路進勦選勁勇數隊過河挑戰而大  
隊排列河岸轟之賊甫出城列隊抗拒旋即漸  
漸縮退比官軍追擊近城則礮石火彈紛下如  
是者數次官軍乃佯敗誘之賊遽前追逐直過  
橋南大股賊從南門蜂擁而出繞下游沙灘過  
河圖抄河岸官軍之後卽選教諭劉坤一守備

黃三清梁開國把總何魁甲張萬成及各百長等分途截擊斃悍賊各數十其由沙灘過河者爲官軍所阻逼溺無算一執黃旗賊目麾餘賊力戰當經楚勇殺斃一執黃旗賊目飛馳來援亦中礮倒斃餘賊仍徐徐收隊入城是戰約斃賊二百餘奪獲黃旗九面抬鳥鎗十餘桿偽印一顆賊憤爲袁州萬載官軍所挫思覓路繞出萬載之珠樹潭撲瀏勇營壘卽分由南界攻瀏陽由萍鄉攻醴陵以絕援軍餉道約於十八日兩路賊會由洪塘前進萬載局紳舉人謝大舒

等獲賊探李發林訊得其詳飛稟蕭啓江劉長佑而其時崇通南竄湖南之賊亦將逼澗陽縣西界矣十七日劉長佑接洪塘坐探飛報洪塘已有賊蹤急派軍功崔大光把總張萬成何魁甲百長李德魁等帶勇疾馳是夜五鼓至洪塘近村崔大光等令諸軍飽食訖卽分三路進逼洪塘街日天明賊正吹螺齊隊向珠樹潭進發崔大光急帶勇自嶺馳下大呼殺賊賊驚懼失措遽回旂走何魁甲帶勇截之街日張萬成橫擊之賊紛紛亂竄各勇盡銳衝殺十餘里斃賊

四百餘奪獲騾馬數匹器械旂幟無算劉長佑  
既派崔大光等要擊洪塘之賊卽派隊分三路  
攻袁州府城以牽制賊勢是日誘賊出戰亦斃  
賊百餘二十五日賊訶知由崇通南竄之賊方  
犯醴陵意官軍必已空援遂分三路來撲營壘  
劉長佑部署已定令各營掩旂堅伏靜以待之  
賊疑官兵留營者少鼓譟而前勢殊張甚前隊  
已薄外濠矣劉長佑開壁縱擊賊惶懼卻走崔  
大光張萬成及楚勇百長李明惠鄭金華郭成  
璋漆盛年劉世鵬霍國彥伍乾典等及袁州兵

勇分路掩殺立斃長髮賊目數人賊大  
陷入水田及墮落溪澗者盡爲官軍所  
城根始還是日斃賊三四百名奪獲拍  
小鎗十一桿木礮四尊大小黃旂二十  
矛火器無數二十六日復出隊攻城鎗  
三名餘賊百餘六月初六七等日賊兩  
均經擊退頗有擒斬十五日復率勇攻  
二百餘此袁州一路援軍攻城疊獲勝  
情形也蕭啓江等於克復萬載縣城之  
新昌土高臨江之賊互相糾約誓圖報

於縣東南北三面之洋橋斗門三百坵三處每處五六千將於五月初八日更番撲營復陷萬載萬載廩生黃槐密探以報蕭啓江與都司田興恕劉培元守備楊恒升商議分三路迎敵仍互相策應遇賊至某路則以某營爲正兵而某路爲接應是日北路及西北路賊先至直薄田興恕劉培元營壘田興恕劉培元開壁出擊蕭啓江親督湘勇三哨助田興恕戰北路楊恒升督長勝軍兩哨助劉培元戰西北路賊不能支均紛紛敗潰官軍分路抄擊橫截其尾薄之於



河溺斃無數復渡河掩殺五壘方收隊而返甫  
渡河而東路之賊至湘勇兩哨奮力迎擊以衆  
寡不敵卻走適田興恕楊恒升率勇而來橫衝  
入陣湘勇返旗復戰賊始敗退會蕭啓江劉培  
元亦續至與田興恕楊恒升策馬上山望此路  
賊來甚衆敗去者僅其前隊之二千許知大隊  
必將復來乃下令每哨百人爲一隊橫列一字  
嚴整以待賊近前則以鎗礮齊轟之須臾賊大  
至呼譟之聲震動山谷官軍屹立不動賊近至  
十丈許始開放鎗礮賊多斃者少頃復進官軍

仍不動俟其近而復轟之如是者三賊乃潰走  
田興恕見賊陣脚已亂怒馬衝入賊陣刃賊二  
名生擒二名蕭啓江楊恒升劉培元等麾勇衝  
殺賊棄旗械狂奔自相蹂藉斃者傷者不可勝  
計蕭啓江田興恕率勇追殺劉培元楊恒升折  
趨東南以防斗門之賊中途登山瞭視則黃旗  
招颶蔽塞平原相距僅三四里矣遂飛調防正  
南路之長勝軍湘勇前來助戰而蕭啓江田興  
恕既擊退正東之賊亦適由此路而來賊見官  
軍四集無心戀戰劉培元楊恒升等麾勇衝殺

各營乘勢左右縱擊此股賊亦敗遁蕭啓江等率勇追賊而分長勝湘勇六哨及李審言率領親兵轉旗而南以勦南路之賊賊不知各路之已敗也猶燒茅屋作烽烟爲號官軍伏樹林靜以俟之賊疑甫近官軍從樹林突出擊之立斃前隊賊數十賊大駭狂奔適蕭啓江田興恕等追賊收隊至遂共追數里而還是戰賊以五路先後沓至人數四倍官軍幸次第奮擊一日四戰克獲全捷共計斃賊一千數百內有滿髮賊目十餘名生擒兩司馬潘原見等二十餘人奪

獲大小旗幟數十面拍鎗三十桿小鎗十五桿  
銅礮一尊騾馬十匹子藥十桶刀矛籐牌雜械  
無算自是賊不敢復撲官營會由崇通南竄之  
匪逼近瀏陽縣西界賊意萬載官軍必回顧瀏  
陽十八日賊復糾集各處股匪及臨江分宜上  
高之賊屯集斗門江南八角亭均約以月出前  
進至黎明齊撲官軍營壘蕭啓江等偵知之令  
各營募食以待十九日天甫曉重霧迷濛咫尺  
不辨湘勇於南路出隊伏於樹林突與賊遇隨  
開鎗轟擊蕭啓江急率勇出營從鎗聲響處助

戰三路混擊不知勝負其由東南路出者亦與賊遇但聞喊聲震天不辨賊之多寡蕭啓江督勇縱橫衝突逾時之久而天亦晴朗隨率勇窮追直抵江南八角亭燒其營壘四座田興恕率勇出正東路與幫辦百長杜家星劉義方楊巖寶劉桂堂等五馬齊馳衝入賊陣田興恕連刃三賊百長楊巖寶帶傷墜馬田興恕急揮刀搶救而右臂忽爲賊矛穿透杜家星急挺矛格拒又被賊矛刺傷右胯劉義方劉桂堂等均中礮子正危急間適把總沈宏富等督虎威軍齊呼

衝殺而至奮力格鬪賊始敗退楊恒升在北路  
聞東路鼓聲甚急遂分長勝軍兩哨防北路親  
率四哨馳赴東路見賊已敗走遂從左繞道抄  
截斃賊百數十劉培元率勇由東南路馳至適  
賊經各營擊敗將歸遂橫截而出轟斃賊匪百  
餘躡蹤緊追直逼賊營賊閉壘固拒頃刻各營  
追賊俱到四面環攻立將賊營燒毀斃賊甚多  
午刻始收隊回營計共斃賊千餘生擒三十九  
名奪獲大小旗幟八十三面抬槍十八桿小鎗  
十四桿馬三匹刀矛無算而外委杜家星歸營

後旋以傷重殞命據生擒賊匪供稱是戰僞將軍徐姓及賊目潘姓張姓羅姓均經陣斬其在臨江之邀來僞將軍易姓亦負傷而逃惟僞東王楊秀清以湖南援江之兵甚勁自金陵發悍賊一萬令僞國宗楊義清楊輔清李大華等率之自安慶九江以趨瑞州不日可到蕭啓江等議按兵候之六月初三日接廩生黃槐等密報僞國宗楊義清果自金陵擁賊一萬並合各股敗匪前隊已至距萬載縣城三十里之帶塘地方將由東路東南路來撲官軍營盤初五日卯

刻蕭啓江等登高望之見南路十餘里石灰嶺  
一帶賊旂颯颯排列一字勢如長蛇而東路未  
見賊蹤楊恒升劉培元已由小南門繞山而進  
蕭啓江急令湘勇兩哨從右接應撥湘勇兩哨  
及把總黎得盛已革千總伍化蛟等所帶鳳字  
勇由中路緩進俟楊恒升劉培元所部勇到始  
合力擊之賊見從右接應之湘勇人數尚單卽  
搖旂猛撲而來湘勇奮力抗拒而大股賊忽從  
田隴蜂擁而至勢正不支適楊恒升帶勇飛馳  
由田隴橫截而出劉培元又帶勇從山坡馳下



縱橫衝突賊鋒始挫乃四散狂奔楊恒升等率  
勇追逐二十餘里直抵柏木地方始收隊回營  
是戰共斃賊二百餘生擒李德盛等二十六名  
奪獲大黃紅旂二十七面抬鎗鳥鎗二十六桿  
賊轎一乘馬八匹刀矛雜械數百件此萬載一  
路勦賊疊獲大勝之實在情形也是時鄂省所  
派援江之同知銜曾國華知縣劉騰鴻參將普  
承堯同知吳坤修等亦經臣札飭由瀏陽馳抵  
萬載縣城軍威更壯六月初九初十等日蕭啓  
江等帶勇出隊搜勦東南路餘匪斃賊十餘生

擒三人奪獲大銅礮兩尊曾國華等由斗門田  
心等處勦賊亦頗有擒斬擬遂由洪塘進攻新  
昌上高以搗瑞州蕭啓江楊恒升劉培元等遵  
檄助攻袁州府城而以田興恕一軍留防萬載  
十八日駐營石楠鋪十九日蕭啓江等前隊甫  
至登龍橋卽遇袁州賊三四千自城中迎拒蕭  
啓江督各營前隊衝殺賊敗回城袁城外秀江  
三面環之賊於秀江橋上砌石爲壘層安鎗礮  
石壘有門甚狹以鐵皮包裹守禦甚固敗賊擁  
擠爭渡蕭啓江督勇薄之刺斃溺斃無算楊恒

升與劉培元麾勇前進城上鎗礮與橋上鎗礮  
齊發各營扛劈山礮對轟苦戰經時卒不能過  
蕭啓江密令收隊賊復從橋上撲出各勇折轉  
返鬪如是者三計斃賊三百餘擠溺橋下者無  
數可紀奪獲大小旂幟二十九面抬鎗三桿小  
鎗五桿陣亡勇丁兩名受鎗礮傷者二十餘名  
收隊後卽移營距城七里許之士嶺二十七日劉  
長佑督勇三路與蕭啓江會合攻城賊固匿不  
出官軍收隊時忽悍賊數百從南門突出楚勇  
百長李明惠鄧在富返旂轉鬪百長李光祝率

踞瑞州府城官軍已於二十九日拔營前進此  
又蕭啓江等由萬載移營會攻袁州府城曾國  
華等由萬載克復新昌上高兩縣城直搗瑞州  
之實在情形也臣維逆賊自金陵起事以來每  
遇雄師則圖踞堅城老之蓋以攻之百不及守  
之一客之勞不如主之逸也賊憑堅城用大礮  
而將士以血肉之軀當之驍勇者以避賊爲恥  
往往冒險仰攻畢命于丸彈之下而於賊究無  
所損且一軍精銳幾何折損無多士氣自挫若  
徒以攻堅爲能而不思變計恐適墮奸術仍於

事無裨也

臣

前以江西西路之賊全注萬載袁

州值鄂省援江之師追崇通股匪來長沙

臣

以

江西盼援甚急飭卽由萬載趨新昌上高以搗

瑞州蓋竊計賊方注意袁萬瑞州之防必疏似

可爲批亢搗虛之計且江西與湖南道路梗阻

已近半年閩浙廣三省援師尚未會集局勢絕

少轉機若不及早疏通勢將坐困而瑞州水陸

距江西省城均不過百數十里彼處近省賊蹤

尚稀如果瑞州速下則西與袁州萬載兩路聲

息可通官軍往來相機雕勦當可收漸次廓清

踞瑞州府城官軍已於二十九日拔營前進此  
又蕭啓江等由萬載移營會攻袁州府城曾國  
華等由萬載克復新昌上高兩縣城直搗瑞州  
之實在情形也臣維逆賊自金陵起事以來每  
遇雄師則圖踞堅城老之蓋以攻之百不及守  
之一客之勞不如主之逸也賊憑堅城用大礮  
而將士以血肉之軀當之驍勇者以避賊爲恥  
往往冒險仰攻畢命于丸彈之下而於賊究無  
所損且一軍精銳幾何折損旣多士氣自挫若  
徒以攻堅爲能而不思變計恐適墮奸術仍於

事無裨也臣前以江西西路之賊全注萬載袁州植鄂省援江之師追崇通股匪來長沙臣以江西盼援甚急飭卽由萬載趨新昌上高以搗瑞州蓋竊計賊方注意袁萬瑞州之防必疏似可爲批亢搗虛之計且江西與湖南道路梗阻已近半年閩浙廣三省援師尚未會集局勢絕少轉機若不及早疏通勢將坐困而瑞州水陸距江西省城均不過百數十里彼處近省賊蹤尚稀如果瑞州速下則西與袁州萬載兩路聲息可通官軍往來相機雕勦當可收漸次廓清

之效但猾賊詭計多端若悉力穩踞袁兩城  
官軍專務攻堅與之死鬪似非所宜臣擬飭諸  
路一面相機搜勦將旁近股匪次第殲除賊如  
出城援應即可乘機痛勦倘仍負固一城則枝  
葉凋枯本根亦當自萎似亦反客爲主致人而  
不致於人之一說也至袁州萬載兩路援軍已  
增至八千有餘閱時半載前後共獲三十餘捷  
在事文武實屬不避艱險著有微勞而兩月以  
來酷熱異常將士冒暑力戰備極辛苦帶勇各  
員往往有收隊回營倒地直臥暈悶不省人事



者殊堪憐念前此克復萍鄉萬載會奉

恩旨准

臣

開單保奏現正一一稽查務期核實所有

最爲出力人員謹先保數名可否仰祈

天恩予以獎敘以勵軍心卽選同知蕭啓江謀勇兼  
資每戰匹馬當先不避艱險請以知府歸部卽  
選教諭劉坤一督勇衝鋒膽識俱壯請以知縣  
歸部卽選並

賞加同知銜花翎都司田興恕每次匹馬陷陣必擒  
斬數賊始歸迭受多傷幸卽乎復英勇絕倫兼  
明方畧請以遊擊留於湖南補用並請

賞給勇號藍翎守備楊恒升軍令嚴肅膽識最優屢  
次克獲奇捷請以都司留於湖南卽補

賞換花翎花翎都司劉培元軍務明練人亦勇敢請  
以遊擊升用先換頂戴藍翎外委崔大光膽技  
俱優請以千總拔補並加守備銜藍翎守備黃  
三清隊伍整齊樸實勇往請以都司補用

賞換花翎陣亡之外委劉祖貴因傷殞命之藍翎外  
委杜家星並懇

天恩勅部從優議卹以慰忠魂此外出力員弁兵勇  
容卽核明開單保

奏伏候

皇上訓示施行謹

奏

咸豐六年七月初九日拜發奉

硃批另有旨欽此

湖北崇通股匪狂竄入境截擊獲勝摺

奏爲湖北崇通股匪狂竄入境官軍截擊迭獲勝仗餘賊奔逸出境現籌防剿情形恭摺馳

奏仰祈

聖鑒事竊湖北崇通股匪自竄攻通城卽選道江忠濟陣亡後賊勢日張該逆圖竄蒲圻擾新隄以斷鄂軍餉道適鄂省派援江西之同知銜曾國華知縣劉騰鴻參將普承堯等各營自咸甯掩至中途擊賊迭獲勝仗追至崇陽賊遁回通城又糾合江西義甯州境另股賊匪潛由平江巴

陵通城交界之月田等處竄入湖南五月十二日由僻路逕撲湘陰縣之長樂團臣於十四日得報卽飛調駐岳防守之都司佺星元千總洪定陞等率所部兵勇由岳州拔營追賊賊將由新市轉趨平江聞平江有備遂由長沙之尊陽都趨瀏陽抵焦溪嶺下臣前委赴瀏陽督辦團練之外委高峻集團扼險以待賊不敢犯臣又飭管帶長勝軍之甘肅洪廣營遊擊補用參將萬年新陝西舊洮營都司侯光裕率新練兵勇由長沙徑趨瀏陽截之賊偵知追兵將到而瀏

陽不可犯星夜由普蹟市竄醴陵縣臣以此股  
竄匪颯忽叵測揣其詭計將由瀏醴以牽動袁  
州萬載援江之師斷其餉道使援軍腹背受敵  
可乘我之擾亂逞其狂謀雖人數多至數千隨  
處裹脅號稱萬餘然所由皆山僻小路晝夜狂  
走不敢逕撲城池其無能爲亦可概見遂嚴飭  
余星元萬年新兩軍躡蹤緊追而飭千總洪定  
陞率所部兵勇一千二百名仍回岳州以重北  
路之防飭卽選道劉長佑卽選同知蕭啓江等  
嚴軍袁州萬載防其突出掩襲仍按兵勿動徐

觀其變適曾國華普承堯等由通城平江至長沙臣卽飭其率各營仍由瀏陽出江西攻新昌上高以搗瑞州俾蕭啓江得以移師助攻袁州庶賊之詭計不行而官軍之聲威益壯又慮萬年新余星元等兩軍尚單遂撤省防千總彭定大帶所部長勝軍兵勇七百名徑趨醴陵與之會合五月二十三日戌刻萬年新侯光裕等追至醴陵賊卽夜由醴陵竄攸縣界二十四日辰刻適臣調回醴陵之駐防鸞山把總蔡呈祥言秀山等一軍六百人行至棕洲恰與賊遇賊欺

官軍勢單併力攻撲言秀山率前隊勇三百遽與之戰殺賊八十餘奪獲旂幟刀矛百餘件蔡呈祥率勇繼至施放鎗礮轟斃多名忽賊大隊四路抄擊蔡呈祥被賊刺傷胸膛左腿並陣亡勇丁十餘名勢漸不支乃斂軍徐退已刻萬年新侯光裕之兵追及石灰鋪賊仍列隊抗拒把總向顯章安長慶張武魁滕加揚等分三路並進鏖戰兩時萬年新侯光裕督大隊從中路衝殺連斃執旗賊目數名賊始敗走乘勝追殺二十餘里至黃土嶺共斃騎馬賊二十餘名長髮



賊二百餘名奪獲大小黃紅旂五十四面長矛一百一十五桿大小刀二十八把抬鎗四桿鳥鎗二十四桿火箭二十九枝火藥九桶鉛子半桶馬二十餘匹拔出沿途裹脅難民二千餘名賊遂由攸縣大路竄去是日余星元彭定太兩軍繼至會合前進二十六日抵攸縣北之烏鴉坪探報賊正擄船筏搭造浮橋是夜五鼓萬年新侯光裕余星元彭定太等分三路並進甫至河岸見賊衆紛紛由浮橋爭渡遽大呼馳擊刺斃長髮賊數百名擠溺河中者約千餘被裹之

難民亦多溺斃者已過河之賊遽將浮橋拆斷  
官軍鼻水過河衝殺斃賊數十因水深溜急兵  
勇之不善水者溺斃八名後隊遂止惟隔河開  
劈山礮遙擊斃賊亦多是役共奪獲抬礮十餘  
尊鳥鎗三十餘桿大小旂幟百餘面偽印七顆  
籐牌刀矛無數生擒長髮賊三十餘內有賊目  
數名其被官軍擊敗潛逃由衡山草市司攸縣  
醴陵縣搜捕正法者五十餘名由官軍陸續搜  
獲及鄉團網送者百數十名拔出被擄難民三  
千餘人餘賊由茶陵州大小路逃逸適大雨如

往河水驟漲民船預避下游追兵未能徑渡管帶湘勇駐防茶陵之知府銜卽選同知趙煥聯分撥湘勇在蘇家壩潞水周陂等處截擊共斃賊數百比萬年新佘星元等六月初二日追至茶陵州餘賊已從九路沖竄出江西蓮花廳界矣據陣擒活賊口供此股賊目卽前破通城之僞檢點何姓等因攻蒲圻屢爲鄂省援江官軍所敗轉由崇陽竄通城義甯糾合賊黨數千與江西賊目密約由僻徑突犯湖南邊界以牽動援江袁萬兩軍乘勢由瀏醴竄出江西以取腹

背夾擊之勢其用計殊爲險毒江西賊自經袁萬兩軍屢次痛勦之後已負隅不出當此賊竄至瀏陽邊界時斗門田心盧家洲之賊卽撲萬載蕭啓江營當此賊竄至醴陵袁州城內之賊卽撲劉長佑營其彼此聲息潛通已可概見幸已預燭其奸援江兩軍未爲牽動反因賊來撲營俱獲全勝而曾國華普承堯劉騰鴻等各軍又續由瀏陽出江西軍威更振萬年新奈星元彭定太等將此股竄匪連次追擊克挫兇鋒惟賊目逃出江西勢必糾合江西蓮花廳永新永

甯安福等處賊匪潛窺邊界臣已飭萬年新余

星元等暫駐茶陵之大田趙煥聯分軍駐高隴

並調千總彭定太所帶兵勇七百暫回駐萍鄉

醴陵交界之楚東橋均飭勤發偵探覘賊所向

併力截勦本省境內仍安堵如故至此股賊匪

突竄入境晝伏夜行勢極颯忽鄉村各團因一

時倉卒未及防範受害甚多黃土嶺攸縣兩捷

拔出難民爲數雖近五千然被賊驅脅出境者

尚恐不少臣現飭在事文武分別安集遇被擄

逃出者妥爲護送毋俾失所查賊自醴陵攸縣

竄過時署醴陵縣知縣崔斌署攸縣知縣德鈞  
旋卽督團收復並拿獲竄匿餘匪多名正法該  
兩縣並無城垣應請

旨將署醴陵縣知縣崔斌署攸縣知縣德鈞革職仍  
留原任以觀後效所有此次追賊出力之將弁  
兵勇酷暑遄征備極辛苦可否由臣彙入邊思  
各州縣防勦出力案內酌保數名之處出自

天恩謹據實陳

奏伏乞

聖鑒訓示施行謹

奏

咸豐六年七月初九日拜發奉

硃批崔斌德鈞均著革職留任此次出力之將弁兵  
勇並准其彙保欽此

澧州石門奸民滋事勦捕完竣摺

奏爲澧州石門奸民藉團滋事現在勦捕完竣首要各犯均已拏獲正法地方一律肅清恭摺

奏祈

聖鑒事竊湖南澧州地居荊州常德之間自成豐四年逆賊竄過之後民間籌辦團練一時轉弱爲強其公正紳團固皆兢兢守法相庇以安而貪狠兇戾之徒則好勇疾貧往往恃衆逞強肆行無忌上年澧州津市籌辦抽釐卽有奸民譴成祚糾衆阻撓搶毀富紳吳經采等數家之事經



嚴飭查拿尚未獲案而州屬燕子山匪首陳正  
卯牙前寺匪首陳庭傑櫻桃岡匪首陳緒儒與  
湖北松滋縣匪首彭生科卽彭連甲等自號窮  
團又名忠義團樹立旗幟揚言劫富濟貧勒典  
減息勒田主減租勒增雇工工價煽誘南北窮  
民陰懷不軌四月二十一二十二等日焚搶澧  
州及湖北松滋公安交界各處村莊署澧州知  
州鄒道堃聞報馳至張家廠督飭團紳嚴密掩  
捕適公安縣軍功王開瑞松滋縣監生蘇林等  
泣請救援鄒道堃卽飭團總會浴春伍卿一黃

學濂何定山胡大經等各挑練丁數百會同王  
開瑞蘇林赴三聖廟相機圍捕該匪等膽敢恃  
衆抗拒當將匪目鄧祖烈格斃奪獲大小礮六  
尊抬鎗二桿火藥二百餘斤該匪等退踞八角  
祠紙廠河有煽連兩省匪徒互相接應牽制官  
兵之謠鄒道堃請飭提標九谿營兵嚴裝聽調  
臣以澧州各團良莠不分其獷悍無賴之徒藉  
團誘聚愚民箝制良善若不厚集兵力速加懲  
創誠恐滋蔓日久良團勢孤且將屈而從匪非  
可徒藉虛聲以資鎮壓當卽飛調守備張萬書

熊興柏等帶所部兵勇，擐勇馳赴澧州。又慮該守備等一時難以速到，更加調都司滕遇春等挑選提標及常德協精兵赴之。一面密飭岳常澧道桂亮署澧州知州，鄒道堃迅速聯絡公正勇幹士民齊心勦匪，許以論功獎敘以作其氣。務將首要各匪一律擒斬，不准藉安撫爲詞草率了事。致貽後患。鄒道堃卽與澧州參將祥慶商派把總榮年芳等管帶營兵，順林巡檢汪榮督同團紳曾浴春、勇目譚甸邦管帶團勇於四月二十九日進勦八角祠之匪，行至舒家橋有

匪數百蜂擁迎拒兵勇奮力衝殺陣斬執旂騎  
馬匪目各一名而奪其馬餘匪辟易隨躡蹤追  
至八角祠適松滋縣軍功王開瑞等帶領團丁  
二千餘人由北路趕至併力夾擊陣斬匪黨三  
十餘名生擒僞軍師許理耕僞千長鄧顯其及  
汪順華李青雲彭大寬熊和尚王缺牙等二十  
餘名奪獲大小黃旗十餘面抬礮鳥鎗多件火  
藥數十斤匪首陳正卯時踣澧州之燕子山恃  
險抗拒匪首陳庭傑率餘黨前往會合石門縣  
匪首陳緒儒賈澤柱等亦糾匪數百將由櫻桃

岡出澧州王家山相爲犄角而上年阻撓抽釐  
主搶數家之逸匪譚成祚亦潛竄葺蒲峪圖與  
陳緒儒合股勢頗鴟張鄒道堃馳至王家廠飭  
團紳呂必榮王宏望等會各團捕獲匪目彭傳  
觀密委順林巡檢汪榮西汎把總周宗翼約會  
附近團紳將該匪譚成祚擒獲正法其由櫻桃  
岡竄出股匪經澧州石門各團紳皮道和等迎  
頭截擊斃匪目羅興惠及著名齋匪劉大章鄒  
順禮等數十名生擒六名奪獲大礮二尊抬鎗  
兩桿偽印三顆刀矛百數十件燕子山盤亘數

十里介乎松滋澧州石門之間洞壑幽深路徑  
險雜各匪恃爲負固之所鄒道堃分派各文武  
委員及各紳團一一密爲布置五月初八日署  
提標參將都司滕遇春率兵由燕子山後真武  
殿進圍紳譚兆元譚羽儀等帶團丁從之署澧  
州參將祥慶率本營弁兵由燕子山前普安寺  
盧家河進圍紳陳子謂胡森甲孫得昌戴世胄  
彭君恩王孫猷等從之候選鹽提舉吳經邦捐  
募練勇二百名隨征武舉盧三友文生盧步雲  
等爲之嚮導匪首陳正卯見官軍環逼退踞龍

洞峪紛擲木石圍抗官軍兵勇冒險猱附而登  
鎗斃執旂匪目一名刺斃匪黨八十餘名生擒  
夏添表等四十餘名奪獲大紅旗兩面藍白旗  
各一面大礮一尊鳥鎗二十餘桿刀矛八十餘  
件匪衆翻山亂竄官兵緊追團總貢生劉凌霄  
監生劉鴻達等首將陳正卯及匪目唐開藻擒  
獲各營兵勇復擒獲匪目鄧世運卽王士太等  
三十餘名連日復經各團捕獲著名逸匪譚紹  
書張明訓高大文盧文卜劉義周盧文錦汪先  
退汪希樹盧尚玉晏人佑賈澤柱高德和等三

十餘名脅從之匪立即解散旋據石門縣知縣  
劉耀藜稟報六月初十日會同官紳於剝頭巖  
捕獲匪首陳緒儒及要犯劉永固張學禮署湖  
北監利縣知縣史維基稟報六月十一日于縣  
屬姚家集地方協獲匪首陳廷傑而澧州藉團  
聚眾謀逆匪首始次第就擒伏法無一漏網通  
計兵勇臨陣殲斃者三百二十餘名生擒正法  
首要各犯六十餘名零星逸匪仍飭印委團紳  
查緝細獻其被脅未曾隨同抗拒官軍者均飭  
各團紳族長嚴行約束地方一律肅清

臣維團



練爲禦寇良法良民藉以自衛莠民卽因以爲  
奸非乘萌蘖初生之時臨以兵威使良團有所  
恃以無恐則良民之氣沮莠民之燄張辦理更  
形掣肘此次匪首陳正卯等滋事之始頗有以  
該匪人衆勢橫爲疑議及安撫者臣以好勇疾  
貧爲作亂之本勇敢強有力者用之爭鬪則爲  
亂人是固刑戮所必加而

國典所不容寬也當卽調兵赴澧追勦並飭嚴拿  
首要各犯務絕根株比據該州呈閱各犯供詞  
其詭謀秘計原擬五月十三日起事突襲荆澧

以犯長沙不料彭生科先期焚搶致奸謀大露  
要約未定遽爲官兵所乘狂悖至此實堪髮指  
幸在事文武官紳戮力同心辦理妥速將首要  
各犯全數擒誅得弭異變署澧州知州鄒道堃  
督辦此案深協機宜可否請

旨賞換花翎以示優獎其出力之員弁紳民可否由  
臣核實保

奏以資激勸之處出自

天恩謹恭摺馳

奏伏乞

聖鑒訓示施行謹

奏

咸豐六年七月初九日拜發奉

硃批另有旨欽此

勦辦潭源洞粵匪片

再廣東賊匪自上年竄入湖南經官軍痛勦首  
逆伏誅之後餘匪被勦竄逸由連州之牛嶺營  
回竄陽山乳源一帶糾聚日衆兇焰忽張卽選  
道王鑫由江華追賊過連州東陂觀又從東陂  
過連州會同連州兵勇痛勦竄踞連州西岸股  
匪又從連州過陽山勦青蓮墟竄匪殺賊甚多  
餘匪退竄英德縣之大灣地方王鑫因病引還  
臣以此股賊匪屢經痛勦計死灰難以再燃而  
桂東鄱縣茶陵各州縣與江西吉安南安兩府

毗連逆賊時窺邊界因調帶勇駐防宜章之參將李輔朝撤防赴鄱防剿五月初二日該參將行抵郴州卽據探報廣東大灣餘匪復竄連州牛嶺營比卽帶勇三百名於初四日趕回宜章防勦而撥勇七百名赴鄱十一日李輔朝馳抵連州界之潭源洞潭源洞居楚粵之脊山南之水入粵山北之水入楚千巖環峙聳入雲霄古名黃岑嶺卽五嶺之一也洞故少土著之民有田可耕而地氣高寒歲收歉薄惠潮嘉應窮民取煤造紙搭寮居住者數百千戶奸民往往藏

匿其間李輔朝因其地距牛息營最近遂帶勇入洞據之進扼佗子角要隘一面飭洞中居民速辦團練以清內匪十五日賊衆數千自牛息營前來撲營李輔朝督勇轟擊刀矛並進斃賊七八十名奪獲抬鎗六桿大小旂幟二十三面刀矛四十餘件籐牌十餘面甫收隊而洞中土匪忽蜂擁而至李輔朝以衆寡不敵且戰且退陣亡勇丁十餘名賊旋踞潭源洞臣飭補用府經縣丞海瑛募勇三百把總齊福珍募勇五百郴州千總蕭紹鈴募勇五百助防宜章一路藍

翎軍功張聲訓募勇五百助防臨武一路仍以時互相策應隨賊所向擊之務將潭源賊匪掃除淨盡以莫邊圍並飭赴鄱楚勇七百仍回宜章以厚其勢二十一日洞內賊目黃聲洪率賊七八百竄至小水李輔朝麾勇擊之生擒黃聲洪正法斃賊數十生擒八名奪獲大小旂幟十桿籐牌四面抬礮五桿二十八日賊匪四五千撲文珍洞署宜章縣知縣李逢春參將李輔朝補用府經縣丞海瑛督勇分三路進剿斃賊數十賊遽潰退六月初七日賊匪數百往掠油田

官軍仍三路勦之亦斃賊數十。十二日卯刻賊復攻撲鐵矢埕官卡圖。竄楚疆李輔朝李逢春督勇從三水沖鐵矢埕截擊陣斬僞大司馬周姓一名。餘賊數十海瑛帶勇同署宜章營參將鍾萬陞從小路抄至亦有斬擒賊見官軍四集知勢不支遂紛紛潰走。官軍進逼文珍洞卽駐營其中密約宜章三堡及莽山各團於十六日子刻同時進剿。十六日官軍由文珍洞前進賊已將要路掘斷官軍橫木架梁而過黎明齊抵雷神塘見對嶺有賊數百據險結營遠前薄之。



轟斃執旂賊數名賊遂駭走李輔朝李逢春督  
勇緊追海瑛亦從華塘攻入賊並聚潭源洞老  
巢連開大礮子母礮向官軍轟擊百長鄧福新  
王福元全其政陳飛熊黃玉書李尊祿等冒險  
衝入賊陣數伏數起立時將大礮奪獲郝勇段  
發魁殺斃騎馬賊目而奪其馬賊衆膽落退駐  
澗東適團紳吳廷庚江銀燾周樹棠黃道傳劉  
道南廣勇百長曹福勝等由小東坑殺來賊遂  
拋棄旂幟滿洞狂竄官軍見賊卽斫共斃賊三  
百餘生擒百餘溺死跌死者無數餘匪翻山四

竄官軍追殺二十餘里沿途斃賊復數十共計  
奪獲大礮四尊大小旂幟百餘面抬鳥鎗六十  
餘桿籐牌三十餘面刀矛雜械不計其數焚燬  
賊營四座賊柵五百餘間潭源洞一律肅清李  
輔朝留駐搜捕督辦團練探報另股賊匪竄撲  
乳源縣宜章南界又形吃緊齊福珍蕭紹鈴募  
勇已齊卽與海瑛移駐良口海寮一帶相機防  
勦臣以潭源股匪旣經勦散而宜章勇力漸厚  
已札調李輔朝赴鄴聽候調遣所有勦辦潭源  
洞粵匪情形謹附片陳

奏伏乞

聖鑒謹

奏

咸豐六年七月初九日拜發奉

硃批知道了欽此

酌議抽收鹽稅章程摺

奏爲遵

旨酌議抽收鹽稅章程恭摺具

奏仰祈

聖鑒事竊自粵氛竄擾長江淮運中梗湖南例食淮

鹽各州縣民虞淡食先經前撫臣張亮基具

奏請借撥粵鹽接濟嗣因粵省官鹽價值昂貴借

引不行經戶部於咸豐三年

奏准此後湖南湖北應仿明臣王守仁設廠抽稅  
之法凡川粵鹽餉人楚無論商民均許自行販

鬻不必由官借運惟擇楚省通私隘口專駐道府大員設關抽稅或將本色抽稅或合折色輸納均十取一二以爲定制一稅之後給照放行由各省妥議章程權宜辦理此項鹽餉旣不在本省引地銷售應令減半完交正課其商支外款不得絲毫攤派以輕成本又准戶部咨湖南之郴桂等州向爲粵鹽浸灌若不講求抽稅之法鹽利歸私豈非可惜據廣西撫臣勞崇光奏議抽鹽稅章程內稱粵鹽赴楚要路應如何設關抽稅應由楚省督撫妥議奏辦各等因奉

旨依議欽此咨行到臣維時粵匪迭次擾及邊疆未能卽時籌辦復經戶部迭次

奏奉

諭旨飭催妥議章程經臣欽遵行據前署鹽法道裕麟會同藩司文格酌議每鹽一包暫抽錢七百文稟覆由臣飭委候補知府師映垣候補知縣李熾福前往郴州宜章二州縣擇要設卡試辦抽稅正擬繕摺覆

奏接准兩廣督臣葉名琛咨據樂桂埠商稟稱樂桂一埠引繁餉重全賴湖南引地行銷概需船

載惟私販則係挑馱陸運今楚省於郴桂兩屬設卡以船載爲私販以引地爲越境是粵商先完正課再納課外釐金成本倍增難期利運陸路私販既無餉課又免釐金獲利愈豐將見引地悉爲私佔粵商每受楚私之苦斷無有將例定界址置之不問委員來楚咨<sub>臣</sub>遴委大員會同粵員查勘界址勿任郴桂設卡抽釐等因當經<sub>臣</sub>飭據司道會議如查實係在粵納課之官鹽應免抽稅飭令粵省委員顧炳章平翼先行回粵銷差另由楚省查案核辦茲<sub>臣</sub>檢核迭次

部議參考例案湖南各屬除郴桂等十一州縣外其餘皆係淮鹽引地自淮運中梗民憂淡食借撥粵鹽之請後又難行戶部始有設卡抽稅之議部臣所以指明郴桂地方者非不知郴桂之爲粵鹽引地也誠以借引則行之自粵原有引地可分設卡則主之自楚不能援例定界址爲說卽如湖南之永州府同一粵鹽引地而廣西撫臣勞崇光原奏如何設關之處應由楚省妥議奏辦是其明證今粵商乃以郴桂設卡謂湖南置例定界址於不問蓋祇知粵鹽行銷粵



省引地爲百餘年遵辦之舊章不知粵鹽行銷淮南引地乃百餘年未有之創舉郴桂設卡抽稅戶部已有明文屢奉

諭旨進行固非粵商所敢爭亦非湖南置例界於不問此郴桂不得不設卡之定局也又部議凡粵鹽入楚若不講求抽稅之法坐視鹽利歸私毫無補救豈非可惜是設卡抽稅必先防鹽利歸私將欲化私爲官必先於私之來源預爲稽核查粵私侵楚有由陸路挑運者有由船裝載者而究之陸路挑運之私其實皆自粵船售買而

得而湖南宜章臨武兩縣牛頭坳良田河口等處歷爲楚粵商船起卸埠頭粵省私販由此而止楚省私販卽由此而起是欲防陸路之私販必先杜船運之私銷也明矣乃粵商輒稱粵鹽入楚處處需船惟私販偷漏畏人盤查遂百十成羣恃衆挑馱陸運歷年每受楚南私販肆充之苦一似陸運者爲私而船運者非私不知椰桂私販所挑之鹽果販自廣東產鹽之所乎抑仍從粵船轉販而來乎粵中官鹽非船不能運楚豈椰桂私販之鹽能不由船而運楚是湖南

榔桂設卡抽稅斷無捨船運大宗之私不抽而專抽陸路零星私販之理且楚省自設卡試辦以來並未見粵商裝運官鹽到埠卡局亦未抽過官鹽之稅粵商以概設水卡謂湖南重征課外之釐實則有意預爲借引行私地步戶部議覆廣西設廠抽稅摺內有云商人借引行私船戶吞包夾帶爲鹽務痼習正不止私販之難於巡緝蓋實已早慮及之此榔宜設卡不得不兼抽船載之鹽之定局也惟粵商旣以重科爲詞若湖南查私過嚴勢必有所藉口臣與司道悉

心商酌楚稅固關軍需緊要粵課亦難虛懸自宜全局通籌務期粵餉楚釐兩無窒礙溯查順治十一年部臣題准廣西分銷廣東引鹽除在廣東納課外每引納軍餉銀九錢盤割五項銀三錢七分有奇戶部則例有每引徵稅之條會典有按包抽稅之則斯皆粵鹽官引於納正課之外再議抽稅之成法惟所抽軍餉盤割銀數過重或照湖南現在試行粵鹽每包抽錢七百文科算比之廣西現議一包抽稅銀四錢八分之則更爲輕減如粵商仍以正引重科爲疑或

卽照前明兩廣總督王佐議每正鹽一引許帶  
餘鹽收稅其夾帶多鹽許其自首仍計納稅如  
隱匿不盡盤出沒官治罪一條令嗣後埠商運  
鹽一引必運餘鹽六引始准稅六引而免一引  
之稅均經臣縷悉聲敘咨商兩廣督臣迅速酌  
核咨覆臣維粵鹽之行銷湖南者引地向止郴  
桂十一州縣今於郴桂卡局抽稅之外不復問  
其所之粵鹽銷路旣廣銷數自增以溢銷之鹽  
補正引之稅不惟楚釐得稍資接濟卽粵課亦  
自無短絀之虞實屬兩有裨益現軍需萬緊粵

省咨覆需時勢難停待臣與司道覆加熟商擬  
卽照明臣王佐議每官鹽一引許帶餘鹽六引  
官鹽一引免稅餘鹽六引抽稅以杜借引行私  
之弊俾免影射而資接濟除咨明兩廣督臣轉  
飭照辦外伏乞

皇上聖鑒勅部迅速議覆施行謹

奏

咸豐六年七月初九日拜發奉

硃批戶部速議具奏欽此



駱文忠公奏議卷之八目錄 湘中稿

丙辰下

勸捐牙帖酌議變通辦理摺

遵保堪勝道府各員摺

覆陳周委員被參勸捐激變各情摺

出師他省傷亡卹賞請歸用兵各省支領摺

貴州東界民苗俱變添派兵勇越境征剿摺

懇陳軍務繁難請

旨勅撥協餉摺

援江官軍克復袁州分宜郡縣兩城摺



籌撥兵餉援剿江西吉安片

北路官軍越境剿賊獲勝現辦情形摺  
援黔官軍攻克三元屯三角莊逆巢摺

銅仁漸次肅清請

勅黔撫遴員履任治理片

賞戴花翎謝

恩摺

北路官軍肅清湖北通崇蒲通回駐岳州摺  
貴州銅仁府境肅清首逆擒斬楚軍凱旋摺  
覆陳籌畫援剿貴州黎平摺

勸捐牙帖酌議變通辦理摺

奏爲遵照部文勸捐牙帖因地制宜酌議變通辦理恭摺

奏祈

聖鑒事竊臣接准戶部咨議覆湖北撫臣胡林翼奏

請由部頒發牙帖勸捐以濟軍餉並請推行各直省一摺奉

旨依議欽此抄錄摺稿章程行令一體遵辦當經臣

欽遵行司通飭各州縣遴委公正官紳分赴各屬會同地方官察看情形妥爲辦理去後茲據

各屬查明情形由藩司文格核議詳請具

奏前來

臣

覆加查核戶部原議各條籌畫極爲周

密各省自應推行惟查地方情形各有不同辦理章程難期畫一部議條款內稱各行牙帖改由部頒商人捐領新帖應分晰名目某爲上行某爲中行某爲下行分爲三則造冊送部立案其捐輸銀數上則捐銀一千兩中則捐銀七百兩下則捐銀五百兩次下捐銀三百兩永爲定額等因現據該司查覆一州一縣之中行銷貨物各有區別如湘潭地方以藥材爲上茶葉及

他貨次之常德地方以棉花茶油爲上而他貨  
又次之同一貨物有在此處可列土則移之彼  
處又在中下之列者亦有在彼處可列上則而  
移之此處較之中下則猶有不逮者總視其貨  
物之多寡爲貿遷之大小未可卽一物之名目  
定三則之等差因地制宜自不得不量爲變通  
以歸核實臣悉心籌酌應請士民捐請牙帖責  
成地方官於呈報捐輸時卽就所報貨物名目  
察其本處商情權其本利厚薄實在應列何則  
據實詳報藩司於牙帖內註明則次令其照例

交銀如此辦理在牙戶無可趨避在州縣亦難欺飾仍由司將報捐行戶姓名捐納銀數以及開張何處是何名目逐細造具清冊專案報部備查惟各省牙行向由州縣照額召募取具保結詳司核給牙帖今准其報捐由部頒帖原冀其輸將踴躍以裕軍需湖南現在已有商人呈請捐充若必俟頒到新帖方准開張自京至楚道理較遠誠恐稽延時日阻其急公報效之心似不足以廣招徠而示鼓勵應請將新例增刊牙帖仍照舊章由藩司印發各商人兌捐後卽

准持赴所報市集開張貿易較爲便益此外如  
有小貿情願捐帖而力不能按照部則繳銀者  
隨時變通辦理又部議舊帖商人准其減半完  
納普律更換等因查湖南連歲軍興以來地方  
疊遭蹂躪民情極爲凋敝兼之上下游湖北江  
西鄰氛未靖商賈不行多半歇業現在各屬牙  
行懸缺者共有二百八十餘戶召募無人頂補  
若令舊帖之商一律交銀更換部帖不但事涉  
紛更且恐商力疲乏無貲交納歇業之戶更多  
殊於額稅大有關碍應請領有舊帖各行戶准

其照常開設毋庸更換以示體卹此後遇有事  
故歇業請帖頂補者概令遵照新章按則捐銀  
辦理並由地方官認真嚴查毋許冒名頂替以  
杜朦混之弊每年稅銀照舊完納如無舊章者  
隨時比例征收於季冊造報聽候部撥其捐帖  
銀兩歸於軍需項下開支造報此外一切事宜  
悉照部議章程辦理除咨明戶部查照外所有  
勸捐牙帖酌議變通辦理緣由理合恭摺具

奏伏乞

皇上聖鑒訓示謹

奏

咸豐六年七月二十一日拜發奉

硃批戶部知道欽此





遵保堪勝道府各員摺

奏爲遵

旨保舉堪勝道府各員恭摺

奏祈

聖鑒事竊

臣

前准吏部咨咸豐六年二月初九日奉

上諭現在江蘇安徽江西湖北湖南廣西貴州各省

正當辦理軍務之際著該督撫於所屬各員中秉

公察看如有官聲才具堪勝道府之任者著各酌

保數員以備簡放欽此

臣

維爲治之要首在得人

安民之方必先察吏誠以吏治之整理與否爲

生民休戚所關即時局安危所繫也方今時務之急首在平賊治之於已亂固資將帥之臣治之於未亂尤重守令監司之選臣於通省各員中與藩臬兩司詳加遴擇謹酌保數員詳其實政另繕清單恭呈

御覽惟其中賴史直一員曾蒙

天恩逾格免其治罪本不應再行開列臣因該員居官實優未敢壅於上聞亦一併附入伏懇

皇上聖鑒施行謹

奏

咸豐六年七月二十一日拜發奉

硃批另有旨欽此



覆陳周委員被參勸捐激變各情摺

奏爲遵

旨委員詳細查明恭摺覆

奏仰祈

聖鑒事竊

臣

承准軍機大臣字寄欽奉

上諭有人奏上年湖南瀏陽縣勸捐抽釐委同知周溥前往據考棚爲公館安居數月將捐費聯絡紳士攜挾優妓開設筵宴致鄉民飲恨激變聚集二千餘人周溥聞信先逃經該縣令代爲解散醴陵縣亦有鬪毆委員之事該委員等卽藉是而得保

舉又稱帶勇者每一千名報二千名其虛報之口糧卽以肥已勸捐者凡捐例應京錢一百千文者輒取制錢一百千文仍以京錢之數繳公以多取之半肥已亦有取之以實銀而照官價折錢繳公者致同一職銜而捐出兩手價卽多寡互異各等語勸捐濟餉借資民力原屬不得已之舉自應秉公核實辦理若如所奏各情種種骹法營私侵漁肥橐爲害閭閻尙復成何事體著駱秉章派委妥員將所指各款逐層詳細查明如果實有其事卽著據實嚴叅毋稍徇隱等因欽此當經臣欽遵行

司遴委候補知縣洪琅前赴瀏陽醴陵二縣嚴  
密確查去後茲據該委員逐一查明稟覆由藩  
司交格署臬司謝煌卽用道裕麟覆查詳請具  
奏前來臣覆加查核如原奏所指瀏陽縣勸捐抽  
釐委同知周溥前往據考棚爲公館安居數月  
聯絡紳士携挾優妓開設筵宴致鄉民飲恨激  
變聚集二千餘人周溥聞信先逃該縣代爲解  
散一節現據委員洪琅會同瀏陽縣知縣袁青  
綬查得周溥係候補通判咸豐四年七月委赴  
瀏陽縣勸捐係在縣署設局並未住宿考棚遇



有出力最優紳士及急公捐戶該縣袁青綬會同周溥待以禮貌款以酒食事間有之並非濫行交接該縣袁青綬與周溥朝夕共事耳目易周周溥在瀏陽勸捐時服尙未滿常住縣署委無忘哀越禮携挾優妓情事五年七月周溥復經委辦瀏陽釐金商稅該縣公事向在考棚會議是以紳民公議仍在考棚設局議定章程捐抽釐稅城市商舖大小不及五百戶均無異詞其鄉村小商經紀並未查辦無所庸其飲恨更無激變聚眾至二千餘人之事且周溥委辦抽

釐僅止月餘卽經省局調回辦理城工局務當將該縣釐局事務遍集紳商交割清楚始行回省亦並無激變聞信先逃之事惟周溥回省後有水販商人初到不諳抽釐章程與行戶商舖互相爭執邀約行戶數十家赴局請示經該縣袁青綬督同在局紳士詳細論知各商遂照章遵辦並無爭執且事在周溥回省之後原奏所稱聚眾解散聞信先逃之處自係因此訛傳又如原奏所指帶勇者每一千名報二千名虛報之口糧卽以肥已一節查上年賊陷江西義甯

州與瀏陽縣接壤其時周溥與該縣袁青綬在上莊鐵樹橫山各界輪流督同團紳防禦所有勇丁均係本團之人均由團紳管帶周溥與袁青綬不過互相查點督率操防據實稟報有案可查實無以少報多之弊又如原奏所指凡捐例以京錢之數繳公以多取之半肥已亦有取之以實錢仍照官價折錢繳公一節查外省捐例並無收捐京錢之事亦無京錢名色固不能倍取半繳而湖南辦理捐輸先將章程捐數明刊告示揭諭城鄉又刊例本遍發各屬捐局無

論黃童白叟悉知捐輸章程更不能絲毫弊混亦並無收銀折錢繳公之弊如有其弊捐戶豈肯甘心現奉查訪豈有不行首告之理又如原奏所指醴陵縣亦有鬪毆委員之事該委員等卽藉是而得保舉一節現據委員洪琅會同署醴陵縣知縣崔斌查覆咸豐四年九月奉委紳士湘陰縣舉人卽選知縣郭家彬前赴醴陵縣會同該前縣黃恩溥勸捐邀集公正士紳並殷實之家婉爲勸導諭以軍餉繁鉅均應竭力輸助以濟急需該縣紳民急公好義者無不踴躍

樂輸即閒有心存慳吝者一經反覆開導亦皆  
量力勉從實無鬪毆之事郭家彬亦並未因勸  
捐得有保舉有案可稽等語臣查原奏所指各  
節種種骫法營私情節俱重果有其事誠如

聖諭卽應據實嚴叅斷不肯稍事徇隱茲經委員逐

一確查或咨訪輿論或稽查案據俱無情弊臣

復詳細查察亦均無異應請無庸置議臣惟湖

南素鮮殷實之戶自連年防勦以來餉需繁鉅  
不能不藉助捐輸紳富於籌餉之外又有城工  
船礮兩局之捐及本地團練之費一戶數捐力

本難繼勸捐之官紳易招嫌怨本在意中至飭法營私如原奏所云亦或有所不敢况瀏陽醴陵距省城均不過百數十里如有前項情弊臣聞見有所不周豈無一人一戶受累具控之案臣檢查本署及司道府各衙門并無上控之件則該印委等所稟非屬子虛至虛冒勇丁日糧一節在團勇各衛鄉間口糧均係自捐官只查點名數固無所容其虛冒至於招募之勇管帶薪水及百長大旗什長散勇長夫口糧均有定章入營之始必造冊點驗而後發餉傷亡事

故隨時開報填補

臣

常密委員弁前赴各營

查往往足額之外尙有餘丁均係各該勇親屬子弟隨營待補缺額者有一缺出卽紛紛求請管帶之人豈能虛報一倍之多掩人耳目且湖南界連六省惟與四川交界之二百餘里及湖北之荊州施南等處尙屬安謐此外則沿邊列戍烽火相望又須派遣官軍越境援剿若如所奏所云每一千名報二千名無論無此項可目之錢糧亦無此等易支之時局上年郴桂茶峽之役官軍萬餘剿粵寇六七萬之衆是以一而

敵五也現在萬載諸戰官軍以四千餘眾剿賊  
萬餘或一日數戰或每戰數路是以一而敵三  
也卽以瀏陽而論虎坳之戰湘勇五百分兩百  
助守上峯適大橋賊匪四五千分路突至虎坳  
官軍以三百人奮擊敗之尤爲奇捷均經臣屢  
次叙

奏在案若如原奏所云二千始得一千之數恐亦  
力不及此惟各營接仗出隊之時少則四成五  
成多則八成而止其餘留爲更番迭戰及守營  
之用有時賊眾披靡偶有空壁出擊之事然實



未可爲常言者或但知臨陣出隊之數不及營額之多遂至傳訛亦未可定總之勸捐爲不得已之舉慳鄙者以免捐爲幸慷慨者以屢捐而疲辦理維艱浮言易起用兵日久軍營惡習悉數難終亦不僅虛糧缺伍之顯而易見雖據湖南情形論之飢法營私斷不至如此之甚然防檢稍疏流弊安知其極臣惟有與司道各員勤加體訪遇有作弊之人及致弊之事隨時叅劾釐剔以求仰副我

皇上諄諄訓誡之至意所有遵

旨查明緣由理合據實覆

奏伏乞

皇上聖鑒訓示謹

奏

咸豐六年九月二十八日拜發奉

硃批知道了欽此

馬方寸之書

丙辰下

三

出師他省傷亡卹賞請歸用兵各省支領摺  
奏爲湖南出師他省傷亡各勇人數較多應得卹  
賞銀兩現因庫款匱乏難於籌給請歸用兵各  
省支領以免積延恭摺

奏祈

聖鑒事竊照前准部咨軍營兵勇應得卹賞等銀兩  
咨會原省發給其陣亡者由營先給燒埋銀兩  
受傷者由營先給養傷銀兩卽咨原省在於應  
領項下相還等因當經轉行防堵總局遵辦在  
案茲據總局司道以湖南兵勇出師他省傷亡

較多卹賞等銀難於籌給仍請歸用兵各省支領會詳請

奏前來

臣

查逆賊自竄擾湖北江西安徽江南等

省以來歷次調派湖南各營弁兵召募湖南各州縣壯勇隨同攻剿原以湖南民風樸實強固尙爲出力故凡賊蹤所及省分湖南兵勇較他省爲多連年打仗陣亡及受傷之員弁兵勇應給卹賞銀兩歸原省發給者湖南亦較他省爲多前准部咨卹賞一項半發寶鈔半發銀兩湖南係未行寶鈔省分前說應無庸議惟查湖南

自軍興以來至今賞費日增筋疲力盡以現在情形論之南防粵寇北禦鄂氛西堵黔邊東防江右以一省而防五省之寇且援剿兩省之寇經費已屬不貲而湖北則遊擊張榮貴參將鮑超等奉委回南募勇江西則副將周鳳山知縣劉騰鴻等派人回南募勇貴州苗民勾煽較前勢益蔓延連界之沅州府晃州廳靖州沿邊地方又復添撥重兵分途守禦湖北水師所需船礮及各營來南招勇水陸軍械藥鉛鍋帳等項及盤川路費多係湖南接濟外省增一營本省

卽多一營之費本省招一勇卽增一勇之糧總計各路所需每月常十餘萬及二十萬兩有增無減湖南額征錢糧除支放營餉養廉兵穀價銀等款及災傷蠲緩外其存留者不足供兩月支發雖動漕折勸捐輸收釐金抽鹽稅搜括不遺餘力而供支尙無已時若再照部議將卹賞等銀概歸原籍支領現在羅掘一空不隨時給領則無以慰忠義之心隨時給領又無以爲挹注之計愈積愈久愈多再四躊躇實屬無從設措因思聚之一省則費重而難籌散之數

省則費輕而易給應請將各省前後調派湖南各營兵丁陣亡卹賞等銀仍歸湖南原籍辦理外其出師各省各壯勇陣亡卹賞及養傷銀兩自軍興以來及此次

奏明後均請改歸用兵各省隨時給領如此辦理在軍營酬之既速足以勵士氣於戎行在湖南用之稍舒亦可資軍儲於涓滴除分咨戶兵二部暨用兵之廣東廣西湖北安徽江蘇江西浙江等省查照外理合恭摺具

奏伏乞



皇清聖鑒訓示施行謹

奏

咸豐六年九月二十八日拜發奉

硃批該部議奏欽此

貴州東界民苗俱變添撥兵勇越境征剿摺  
奏爲貴州東界民苗俱變勢愈披猖本省防剿疊  
獲勝仗現在添兵北剿銅逆南禦黎苗恭摺馳  
奏仰祈

聖鑒事竊湖南西界南自靖州通道綏寧會同等州  
縣北至晃州廳麻陽縣芷江縣及乾州鳳凰永  
綏三廳皆與貴州毗連重巖複沓鳥道縱橫地  
雜民苗素爲奸匪盜賊出沒之所上年冬間貴  
州銅仁府松桃廳失守遵

旨調集兵勇越境進剿幸克兩城彼時因黔省不遑

兼顧卽酌留楚兵代爲防守迨貴州撫

臣委同

知王敬烈署銅仁府到郡後於撫綏搜緝諸務  
經理失宜府屬諸民漸喪其樂生之心鋌而走  
險向之好民得以乘機勾煽而銅仁之亂復作  
矣自五月二十八日賊撲黔兵江口大營五崗  
團練羣起從逆黔營同陷軍火盡爲賊有湖南  
遣往援黔之候選知縣吳自烈所部幹勇亦多  
傷亡自是而賊勢益熾居然署僞號署僞官招  
聚亡命之徒及教匪痞苗圖爲大逆比經

臣咨

雲貴督

臣

恒春速委賢員猛將來銅仁督辦一

面咨鎮守鎮臣文安批飭辰沅水靖道添撥兵  
勇助楚軍固守銅城並分駐邊界聽調而黔省  
所委署銅仁縣知縣兼護知府彭瀾適至方一  
意主撫且以五崗人心初附止楚軍且駐邊界  
恐撓撫局其實銅仁之賊初無意就撫也七月  
二十四日賊四路撲湖南晃州廳龍溪口營盤  
已革晃州廳通判楊泰來屯于總王占鰲署晃  
州廳通判洪慶華屯額外李光良土守備龍子  
明督漢土兵勇團眾更番迭戰斃賊數百割獲  
首級七十二顆生擒二十三犯奪獲大白旗八

桿刀矛多件賊鋒稍挫而黔省委護貴東道署  
銅仁府知府楊書魁於八月初六日赴任行至  
閔家場被賊圍困拘禁三角莊窘辱備至劫去  
餉銀四千兩鎗礮一百七十件藥鉛五十石所  
帶勇三百名均行潰散隨員被戕楊書魁以死  
自誓罵不絕口聞已遇害彭瀾往三元壘杳無  
消息旋聞在孟溪地方被賊拘執黔之文武在  
銅仁府城者僅新署副將閃雲一人而已文安  
翟誥等以銅仁所駐楚兵尙單復委前龍山縣  
知縣兆琛帶勇及楚兵馳往策應一面調兵三

百赴交界之大興塲練勇二百士兵三百赴亭  
子關相機援剿銅賊嚴占鰲趙子濬等已將銅  
仁縣屬三元壘攻陷聲言三路犯楚臣當飭羣  
誥銅賊所以不遽竄楚者畏楚軍之扼其前駐  
銅仁之楚軍擬其後耳銅仁一軍尙孤應增調  
以厚其力而鎮筸鎮麻陽晃州廳三路之防亦  
不可疏臣一面調駐岳州防守之參將萬年新  
都司侯光裕督帶所部長勝軍千餘迅赴沅晃  
一路扼之九月十五日貴州松桃廳石峴苗匪  
復起強占屯田收割聚眾數千而鳳凰永綏之

防又急旋據翟誥飛稟逆首嚴占鰲踞三元壘  
劉士美踞壩盤吳大刀踞壩黃趙子滄踞江口  
賊眾不下數萬欲徑撲銅仁府城代守銅仁鎮  
軍都司吉隆阿屯守備田宗蕃擒獲偽將軍耿  
文招所供亦同九月十七八等日賊三股直逼  
銅仁府城隔河十餘里連營二十餘座二十二  
日賊一由鷺鷥巖撲銅仁西門一由文筆洞撲  
江宗門一由龍魚坡撲中南門吉隆阿田宗蕃  
等憑城開礮斃賊十餘賊遽退至文筆洞山頂  
吉隆阿田宗蕃急派營弁雷振春陳宏順屯弁

熊三喜陳俊雲土守備吳正邦開城分路出擊  
兆琛吳自烈士弁吳士榮等麾兵勇由北路繞  
赴西南助戰營兵張臣練勇張宏順首先陷陣  
斬馘甚多奪獲偽令一枝旗幟刀矛七十餘件  
二十六日銅賊三千餘將由大興場乘虛趨撲  
鎮筓翟誥已商之文安預派千總周宏印外委  
唐本隆帶兵三百駐大興場土守備吳永清帶  
土兵四百名駐落潮井屯弁鄒明英王占鰲帶  
練勇屯丁駐亭子關是日賊至周宏印首先陷  
陣連及執大白旗賊目二人唐本隆亦立斬執



旗賊目一名土弁吳國楨龍延興自落潮井鄒明英自亭子嶺聞警馳至合力兜擊陣斬逆賊二百餘滾巖跌死者不知其數追至尖巖山收隊奪獲抬礮一尊火藥兩桶旗幟刀矛百餘件生擒賊李滿鄧老受等餘賊仍遁回銅仁縣境是日銅仁之賊將渡江撲城并攻瓦窰河幹勇營盤吉隆阿田宗蕃兆琛扼之河岸施放鎗礮斃賊多名賊退二十七日賊三股由文筆洞攻後水門一由桐子巷攻中南門一大股由清水塘過河襲攻兆琛營盤而分由芭蕉坪徑趨鎮

算吉隆阿田宗蕃將賊擊退派營弁陳宏順屯  
弁田慶品等會同前署銅仁協圖塔納從中南  
門縋城而下過河追擊該匪敗走兆琛派所部  
勇及屯弁李光良所帶健勇吳自烈帶所部幹  
勇吳光德帶士兵分路迎擊大股撲營賊匪吉  
隆阿督營弁吳支升左元勛屯弁熊三喜等出  
北門爲之策應李光良吳光德遇賊桐子坳正  
酣戰時首逆嚴占鰲趙子澧率賊衆踵至吉隆  
阿等一軍驟到吳自烈等一軍又由和尙田橫  
截而出四面夾擊陣斬騎馬賊目四人斃賊數

百賊眾驍懼紛竄逆首趙子澂棄輜逃走官軍乘勝掩殺追至清水塘賊營縱火圍燒立將賊營燬平斃賊無數餘賊潰逸官軍追至西河口始各收隊生擒賊目張友等四名奪獲大小紅黃白旗三十餘面鎗礮刀矛共二百餘件賊敗退後糾聚另股四千餘匪卽夜屯紮清水塘山頂圍絕楚軍糧道二十八日吉隆阿田宗蕃兆琛吳自烈等帶兵勇分四路進剿陣斬執旗賊目數名賊匪紛紛潰敗官軍四面乘之火牌噴筒迭發刀矛并進賊死傷枕籍橫屍遍野立將

清水塘賊營焚燬適文筆洞馬坳各處應援之賊繼至官軍扼之河邊鎗礮轟擊賊不得渡復增調大隊從上游躡淺過河蹙之賊眾駭懼失措陣斬當先悍賊數十餘賊奔竄山谷自相蹂踐官軍分隊追擊斃賊無數連踏賊營十六座奪獲大小旗幟三百餘件鎗礮刀矛二百五十餘件賊船六隻而近城賊營祇剩野雞坡毛漢四座矣二十九日吉隆阿田宗蕃兆琛乘大霧帶兵勇銜枚疾馳掩賊不備並將四營襲破斃賊無數奪獲旗幟器械多件餘賊潰竄此官軍

分路防剿銅仁賊匪及固守銅仁府城連陷賊營二十一座立解城圍疊獲勝仗之實在情形也其黔苗之犯楚界者四月初一日永從苗匪入湖南通道縣境獨坡等處竄至蒼坡草坪知縣吳熊督同署外委陳有魁團紳周述等帶練勇四百名團紳黃漢潮等帶幹勇三百名分路迎剿敗苗於土嶺紅泥岡等處鎗斃苗目二名斃苗百餘生擒三名奪獲黃旗九面軍械數十件次日逆苗二千餘直撲播揚西所柵門吳熊督飭陳有魁及團紳等憑高俯擊木石併下陳

有魁等開壁出擊黃漢潮從山後僻徑抄出共斃賊百四十餘內有麻李二苗目生擒十三名薄之於河淹斃無數奪獲刀鎗旗幟數十件署靖州知州鄂峯飭把總吳自申臧傳照等督團紳李光照周援廷周述等帶領兵勇繼至初七日遇賊於半江地方斃賊三十餘奪獲黃旗四面十一日署典史張豫同陳有魁等督率兵練團丁進攻龍嶺坡陣斬黃馬褂苗目一名斃賊百三十餘生擒五名團紳黃漢潮率幹勇由龍嶺坡後抄出轟斃黃袍賊目一名乘勝掩殺斃

賊一百四十餘生擒四名奪獲大小黃旗十餘  
面鳥鎗刀矛各數十件十六十七十八等日吳  
自申率同靖州團紳儲迺昌通道團紳陳有魁  
分路搜剿均有擒斬餘匪遁回黔境六月二十  
三日黔苗復竄縣境半江地方陳有魁率團紳  
及靖州團紳黃炳燮陳師舜盧昌言楊敏忠等  
合擊於大高山腳斃苗一百三十餘轟斃無算  
奪獲紅旗八面生擒黃衣賊目戴老申粟老金  
吳老裨石占科龍冒冒等五名礮械多件逆苗  
復糾聚黔粵交界寨高等苗誓圖報復二十六

日陳有魁及黃炳燮陳師舜武生盧昌言黔紳  
裴文秀裴文灼等合擊於牙屯堡斃賊百五十  
餘七月初一初二兩日靖州吏目陳斯信督同  
黔楚團紳進攻大高山苗寨由山後懸崖取道  
突入賊巢斃苗百三十餘墜巖澗死者不計其  
數生擒逆苗吳老長等十一名旋分路搜捕殲  
斃餘匪三十五名而通道邊患稍紓七月二十  
三日貴州首逆余老科及逆苗羅姓牛姓等攻  
陷古州鎮城古州於雍正初年始經戡定設立  
重鎮以控制漢土苗夷額兵四千鎗礮之多甲



於黔省茲既以援絕食盡被賊攻陷文武殉難  
屠掠甚慘黎平府民心渙散遷徙入楚者紛紛  
而該府屬之六洞苗匪卽乘機滋擾附近湖南  
靖州各邊屯寨焚掠殆盡八月十九日苗匪千  
餘撲靖州之培坡卡團紳吳文煥等率練勇擊  
退斃賊二十餘內有執旗賊目二名二十及二  
十一等日苗匪復聚數千攻撲州境各隘均經  
擊退賊復翻山至黎平府屬四鄉所地方近逼  
靖州署靖州知州鄂峯署靖州協副將常英督  
吏目陳斯信及各團紳等帶兵勇分途扼之二

十五日逆苗分三路逕撲州境每路約千餘人  
一由藕園撲馬路口三眼橋一帶陳斯信及巡  
檢陳延弼督團紳陸萬通等率練勇擊之陣斬  
白旗苗目一名斃苗匪二百餘直追至鴉嘴口  
出境沿途斃苗數十滾崖落澗者不計其數一  
由姚家鄉撲風車坳靖州學正劉杜督團紳儲  
梅燮戈聿安吳文渙儲迺昌等擊之斃苗七十  
餘追至新場收隊一由黃家坳撲沙堆營盤署  
副將常英督署千總吳自由團紳陳師舜吳正  
昌梁啓富儲蘭亭盧昌言吳宗岐黃世春等分

起擊之共斃苗三百餘生擒十一名奪獲鎗礮  
刀矛旗幟五十餘件追至黔境而還此靖州通  
道官兵團練防剿黎平逆苗屢獲勝仗之實在  
情形也臣接據靖州文武稟報貴州古州鎮失  
守後旋准貴州撫臣咨請就近調派永州靖州  
一帶官兵由靖州救援黎平九月初九日復  
准軍機大臣字寄八月二十九日奉

上諭蔣蔚遠奏古州廳城失守請飭湖南派兵救援  
黎平一摺湖南靖州與黎平接壤赴援較便著駱  
秉章迅卽派調永州靖州一帶官兵由靖州馳往

救援如該處兵力不敷卽著酌撥練勇以資協剿  
欽此旋復准雲貴督臣恒春咨請派楚兵一二千  
進剿銅仁賊匪臣竊維貴州一省近年民苗肆  
逆在在蟻聚蜂屯不可勝數聞該省府廳州縣  
城垣失陷者頗多難民遷徙入楚者紛紛謠傳  
不一其近湖南邊界者類皆有賊無兵任其蔓  
延衝突卽城池無恙亦皆岌岌可危不僅銅仁  
黎平有關黔省大局也而以賊勢較之以地形  
較之則銅仁視黎平爲尤急銅仁之亂聞由前  
任知府徵收秋糧激變而起臣曾屢咨黔省撫

臣速委賢員猛將迅速來銅辦理原冀曲突徙薪稍紓邊患迨楚軍克復之後委署之員不速赴銅仁抵銅之後又復經理失宜致資亂民口實馴至銅仁府屬五崗糧戶概起從逆招聚川黔楚亡命之徒及各種教匪僞立名號迫辱新署府縣橫加戕害黨羽日聚日多屢議大舉犯楚其所以不卽犯楚者蓋忌駐銅仁之楚軍掣其後而鎮筭一鎮及三廳邊民向以強悍著名故也若不及其羽翼未成之時增銅仁之守而益各邊防戍之軍則銅仁危而鎮筭晃沅均將

可慮賊若自銅仁江口順流而下勢若建瓴不  
數日即可越辰州而抵常澧放虎出林勢更難  
制非若黎平僻在一隅跬步皆山尙易控禦可  
比且黎平所患惟苗苗匪志在劫掠非有狂謀  
銅仁則莠民倡亂兩載於茲愚民爲所迷惑良  
民亦被其誘脅失今不圖正恐燭火遂成燎原  
之勢此現擬速剿銅仁之愚見也由湖南越境  
赴銅仁征剿營屯漢土兵勇現計四千五百有  
奇實已浮於雲貴督臣恆春原咨之數而防邊  
各軍又五千餘每月需銀五六萬兩湖南頻年

勉強支撐早已筋力俱盡而局勢所急又不得不竭蹶赴之祇盼事機順利得以迅速凱撤或可暫免饑潰之虞至黎平軍事現尙未續接靖州警報臣已調駐防瀏陽東界之通判銜卽選訓導丁際可原帶所部靖勇四百三十名馳赴靖州相機防剿該紳勇本籍隸靖州於地方情形熟悉且前年冬間調省訓練成軍曾經戰陣膽技尙優或可得力此時計已行抵州境矣至黔撫臣請調靖州永州官軍臣查靖州一營現在存城官兵不過二百餘名本州防守尙且不

敷何能越境若永州則係湖南邊郡現防廣西  
灌全一帶賊匪正在喫緊之際且距靖州千里  
而遙未便調派亦實無可調派也理合一併聲  
明所有官軍屢獲勝仗現添派兵勇越境征剿  
銅仁逆賊防禦黎平苗匪情形謹據實馳

奏伏乞

皇上聖鑒訓示施行謹

奏

咸豐六年十月十五日拜發奉

硃批覽奏均悉欽此





瀝陳軍務繁難請

旨勅撥協餉摺

奏爲瀝陳湖南軍務繁難餉需匱竭情形請

旨勅催四川迅解撥欸並請

勅戶部指撥有著之欸以資接濟事竊湖南南界廣東廣西北界湖北西界四川貴州東界江西以現在時局言之湖北武漢未復崇陽通城興國通山等處爲賊匪淵藪湖南北界之防不可撤廣東之賊自上年郴桂痛剿之後本年春間卽選道王鑫又自藍山越境至廣東東陂觀連州

轉戰至陽山英德各縣界斃賊甚多而餘賊自楚師撤後又各嘯聚山谷分股蔓延英德乳源陽山連州各界而湖南東南界之防不可撤廣西之賊倏聚倏散旋撫旋叛股匪之多寔難數計良民變而爲賊武弁亦有叛而爲賊者大抵飽則爲民饑則爲賊散則爲民聚則爲賊敗則爲民勝則爲賊時窺伺零陵東安江華永明道州邊境而湖南西南界之防不可撤江西與湖南之南境均接廣東自郴州桂陽縣以北歷桂東鄱縣茶陵州攸縣醴陵瀏陽平江諸縣延一

千數百里界外皆江西州縣除萍鄉萬載業經  
援軍越境克復外餘皆爲賊竊踞雖屢次截剿  
獲勝而咫尺卽爲異域地偏勢危時虞闖入而  
湖南東界之防不可撤貴州銅仁松桃鎮遠黎  
平各府廳與湖南之永綏鳳凰乾州三廳晃州  
廳會同通道靖州等州縣接壤黔屬民苗構逆  
蟻聚蜂屯刻思下窰而湖南西界之防不可撤  
通計湖南接連六省惟與四川交界二百餘里  
尙無賊蹤餘則環境數千里無一處無賊賊之  
起於隣省者咨湖南援剿而隣省並無會剿之

兵賊之竄入湖南者惟湖南防剿而隣省並無  
追剿之兵自咸豐二年至今四載湖南除剿辦  
本省賊匪外剿湖北之賊剿廣西之賊剿廣東  
之賊剿貴州江西之賊各省但有賊入湖南從  
無兵勇躡蹤追入湖南也中間兩次分援江西  
現在合圍袁州府城並籌發瑞州一軍吉安一  
軍以蹙賊勢一援廣東之韶州一進剿廣東之  
連州一進剿廣東之連州陽山等處一進剿廣  
東之仁化現又搗平連州牛嶺營賊巢一進克  
貴州之松桃廳銅仁府代爲防守十月之久現

又大舉而解銅仁之圍至湖北則本係唇齒之  
邦陸軍水軍可以通融協濟者惟力是視尤不  
待言但有湖南兵勇出境援剿各省之事從無  
各省兵勇出境援剿湖南之事此湖南軍務之  
繁難也湖南通省錢糧僅抵江浙一二富郡通  
省漕米十五萬石有奇僅及江西五分之一非  
有鹽筴之利關稅之饒也土產米煤竹木而外  
無珍異之貨民間務農小貿生計儉嗇非有大  
商巨賈之富頻年兵燹民困未蘇以隣省較之  
非若廣東之富強四川之完善也軍興以來湖

南首辦軍需首辦防堵迄今七年財力久殫官民交困而用兵之多軍需之繁日增一日計自咸豐五年正月起至六年八月止除州縣辦理防堵應付兵差外發本省兵勇及援江援黔兵勇鹽糧米折夫役并撥解湖北江西軍火子藥鎗礮器械盤川賞卹等項共用過銀一百九十七萬餘兩錢九十七萬一千餘串湖南旣防剿五省又分援兩省又通融撥解湖北江西兩省餉需爲時旣久悉索已空現在積欠各營及援師口糧計已四十餘萬兩軍士枕戈待哺眾口嗷

敷庫欸蕩然無從羅掘此湖南餉需匱竭勢難  
再支之實在情形也臣受

殊恩忝膺疆寄當時局艱難之會仰見我

皇上宵旰憂勤刻以滅賊安民爲急故凡心所可盡  
者不自量其力之能否竭蹶圖維以求仰慰

聖懷於萬一固不敢以窘苦爲詞稍分畛域亦不敢  
以請撥巨欸屢瀆

宸聰茲則勢不能支無可挪湊有不得不據實瀝陳  
者查上年八月臣

奏撥四川省銀十二萬兩蒙



皇上天恩俯允所請嗣經臣再三咨商并委員守催

僅據前督臣黃宗漢解撥銀二萬兩餘俱不應

查四川本完善省分近又專據鹽利如數撥解

實非所難合無仰懇

皇上天恩飭下四川督臣將未解銀十萬兩迅速委

解稍資接濟此外不敷欸項甚鉅並仰懇

勅下戶部察明有著之處量爲籌撥庶湖南得稍資

周轉而各路兵勇知餉源未竭亦可稍固軍心

感激

恩施實無涯涘謹據實馳

奏伏乞

聖鑒訓示施行謹

奏

咸豐六年十月十五日拜發奉

硃批另有旨欽此

漢文通考

卷之四

三

援江官軍克復袁州分宜郡縣兩城摺

奏爲援江官軍疊獲大勝擊敗援賊克復袁州府城分宜縣城殄除賊匪淨盡恭摺

奏祈

聖鑒事竊湖南援江官軍自克復萍鄉萬載兩縣城

後會攻袁州各情形經

臣

奏報在案自七月後卽補道劉長佑率所部各營進逼袁城西南卽選知府蕭啓江率所部各營進逼袁城東北出隊攻城大小數十戰均有擒斬每次殺賊數十多或一二百而止逆賊堅

距袁城爲死守待援之計每遇官軍出隊輒出城一二里施放鎗礮抗拒比官軍衝突近前則急縮退城下城上之賊憑城開礮鎗子如雨官軍與賊日以鎗礮互相格鬪未能以刀矛鏖戰痛加剽洗也臣於各營稟報到時細察情形竊見賊謀日狡以官軍野戰鋒不可當故圖憑堅城用大礮以老我師而挫其銳披閱每次呈賞傷亡清冊皆係中賊鎗礮所致而刀矛傷者百無一二爲之惻然慮促戰日急則敢死之士傷亡必多而一軍之銳氣漸減袁州城垣三面

阻水自近年新修以後樓堞森然賊匪專以守  
爲長策地道雲梯不能攻有備之城肉薄仰攻  
不能敵俯擊之勢而游兵四出先清旁邑一策  
各營將士又以兵分力薄爲嫌城外士民亦以  
兵撤賊出爲慮再四籌維苦無把握因思自古  
攻城諸法雖多總以斷接濟覓內應爲主屢次  
批令劉長佑蕭啓江等善爲籌辦毋專以仰攻  
力鬪爲能旋據劉長佑稟稱城中米糧尙多而  
油鹽漸就匱乏八月十一日賊於南門外嶺上  
築大營一座意圖通南路接濟劉長佑蕭啓江

等督勇■鼓平之殺賊數百生擒賊日韋甘惠  
方澤久奪獲銅礮三尊大鐵礮四尊抬鳥鎗二  
十二桿旗幟刀矛子藥無數自是劉長佑派隊  
梭巡南路之油橋東南路之厚田蕭啓江派隊  
梭巡東路之夏浦陸續捕獲偽司馬張明三溫  
茂才孫習百劉士榜所得油鹽硝磺前後共計  
一百餘石是時分宜土高之賊窺蕭啓江及游  
擊劉培元都司楊恒升駐萬載各營均會攻袁  
州遂率股匪四千餘人乘虛襲攻萬載以圖牽  
制官軍留防萬載之游擊田興恕會商萬載縣

知縣李吉言率虎威軍及劉勇禦之斗門陣斬  
僞指揮艾春榮奪其僞印與馬斃賊三百餘生  
擒二十七名奪獲大小黃白旗二十面鎗礮十  
桿鳥鎗刀矛數十桿賊自是不敢復窺萬載八  
月二十九日吉安有賊三千餘攜油鹽子藥將  
由彬江赴袁蕭啓江楊恒升夤夜帶勇疾趨潛  
伏隘口截之賊至伏發斃賊數百奪獲旗幟大  
小百二十七面馬五匹抬鎗四桿鳥鎗九桿燒  
賊船十一隻追至昌山而返九月二十五日臨  
江吉安援賊六千餘復由分宜昌山分三路一



由彬江趨夏浦一由五嶺出獅坡峽一由洋橋  
出石壁長驅而來旗幟綿亘數里輜重居中前  
後護以大隊劉長佑蕭啓江等亦分軍三路截  
之隨地設伏均約俟賊隊過伏見火箭仰射則  
伏兵齊起擊之賊三路行近袁城文筆峯瞥見  
官軍一字橫列嚴陣以待方整隊欲進忽火箭  
上射各伏悉起截賊爲數段賊遂大潰油鹽子  
藥衣服輜重拋棄山積官軍不顧躡蹤猛追鎗  
礮刀矛并進斃賊四五百奪獲大小黃旗四十  
二面抬鎗八桿鳥槍十一桿馬二匹籐牌五面

刀矛二百餘件油鹽子藥數百石餘賊盡夜潰  
竄分宜官軍以日晡收隊難以運載恐復爲賊  
所得則盡傾棄於水田中夜分歸營二十六日  
袁城之賊以官軍追賊或未回營四門各出賊  
千餘乘虛來撲城上鼓角齊鳴劉長佑蕭啓江  
等各督勇擊之斃賊二百餘二十九日援賊復  
糾黨至彬江築營蕭啓江督勇擊走之斃賊二  
百餘生擒十六名奪獲大小黃旗六十四面賊  
印一顆抬鎗鳥鎗刀矛各數十件燬其營而旋  
三十日哨勇獲賊謀搜出瑞州臨江吉安各賊

目僞文稱於初三日各路糾集萬餘人於分宜取齊初四日大舉來援囑袁城賊目僞春分副侍衛李僞殿右四十二檢點黃等死守以待初三日探報賊衆大至定於初四日分路前來劉長佑蕭啓江會商卽夜派隊一伏厚田一出夏浦一出獅陂而老營各嚴陣以防城賊衝突布置甫定初四日官軍先出夏浦列陣廣潤橋日午賊果蜂擁而來官軍堅陣不動俟賊逼近開放排鎗擊之刀矛隊如牆而進賊陣始動正乘勢掩殺間官軍之伏厚田者忽從旁鼓譟而出

立斬騎馬賊目二人賊大驚潰逸賊之從左路  
出者亦隨之而敗官軍出獅陂峽者甫抵峽口  
卽與右路賊遇是處山林叢雜幫帶虎威軍江  
西補用府經歷陳鈞和百長擬保千總余謀忠  
策馬當先適前隊賊百餘從山內抄出陳鈞和  
余謀忠馬驚不止登時遇害同知銜卽選知縣  
劉坤一等急督勇從厚田馳救蕭啓江亦分軍  
橫躍入陣賊遂反奔各路併力追殺十餘里聞  
賊屍遍地東南團勇亦乘勢蹙之餘賊僅以身  
免是役斃賊千數百生擒六十餘割獲首級七

百餘顆奪獲大小紅黃旗幟三百一十一面黃  
緞馬褂十二件鐵礮七尊抬鎗二十一桿鳥鎗  
五十六桿籐牌刀矛計一千三百餘件訊據生  
賊供稱吉安賊目偽檢點傅姓亦於是日中礮  
帶傷甚重其餘賊目傷斃者約十餘名城賊聞  
之喪膽自是始謀棄城逃竄而城外官軍密布  
賊黨受傷者多出亦知其難免遂更番出城攻  
撲官軍營盤爲死裏求生之計初六初七初八  
初十等日撲營均經官軍擊退合共斃賊三百  
餘名而援賊之剿敗者又收合餘燼築營合山

人數尙五六千劉長佑蕭啓江復稟請駐醴萍  
交界之都司余星元所部長勝軍駐萬載之遊  
擊田興恕所部虎威軍赴袁助剿蓋冀掃除援  
賊則城賊之望自絕城可速下也適探報吉安  
賊目僞檢點傅忠信於初四日受傷十三日死  
於花橋羣賊洶洶更無鬪志是日劉長佑蕭啓  
江田興恕匹馬當先手刃三賊擬保千總劉吉  
三沈宏富擬保把總楊巖寶劉義方田興奇全  
祖凱怒馬衝殺蕭啓江親督湘勇繼之賊由昌  
山潰走分宜官軍躡蹤猛追離分宜十五里始

收隊回營共斃賊三百餘生擒五十餘奪獲大小旗幟五十一面大小礮兩尊抬鎗鳥鎗二十三桿刀矛雜械不計其數二十四日劉長佑蕭啓江復派隊夜襲分宜距城里許賊方驚覺城上旗幟紛動眾聲喧譟官軍大呼衝殺賊啓東門逸出官軍截其後隊斃賊一百數十內有斷後黃馬褂賊目數名立復縣城分軍駐守自是賊之外援盡絕而城中兩月餘以來油鹽既斷米糧火藥亦日就匱竭長髮賊與廣賊彼此怨憤益洶洶不知爲計矣劉長佑蕭啓江等會商

賊已困極且耀兵晝夜環攻以擾之一面射示城中長髮賊能殺廣賊投誠者免死廣賊能殺長髮賊投誠者亦如之僞殿右四十二檢點黃毓生僞春分副侍衛李能通益各懷疑懼互相猜貳各賊目均知城破在旦夕多冒死出投者劉長佑蕭啓江晝夜列隊環城急攻之二十七日卯刻正轟擊間忽城中兩騎馬賊自西門投出棄械跪稱李能通願棄械投誠乞恩自効劉長佑立飭同知銜卽選知縣劉坤一單騎覘之須臾李能通及書使喻春榮十餘人果徒手來



奔俯地叩頭上其僞印劉坤一察其情詞真切  
遂領到劉長佑營次劉長佑一面遣急足飛稟  
候示一面責其速覓內應始免其死自李能通  
出投之後城中恇擾益甚官軍於賊中動靜無  
不知之劉長佑晝夜派隊潛伏各路截其竄逸  
一面督隊攻城十一月初一夜卯刻僞檢點黃  
毓生率死黨潛由東南門逸出適守備銜千總  
崔大光伏兵急起遮之旋即驚縮入城李能通  
黨報知官軍約潛啓西門以待在城降賊均裹  
白巾以爲識別劉坤一督同楚勇各百長都司

黃三清守備梁開國各率所部奪門而入登城  
周麾而呼見賊卽殺城下官軍紛紛架梯緣城  
而上賊由南門突出墜城死者不可勝計僞檢  
點黃毓生以死黨百餘斷後甫行里許官軍追  
及楚勇胡盛久等四人擒之以歸其由東南路  
繞竄逃逸者官軍已節節密布劉長佑蕭啓江  
復加隊緊追前後夾擊共計各路斃賊五千餘  
內賊目之號稱指揮將軍監軍總制及師帥旅  
帥各僞官者約數十名生擒四百三十九名內  
有僞指揮楊如松旅帥李春等十數名而鄉團

之擒斬者不計割取首級二千三百零三顆而  
髮辮左耳不計奪獲大礮三十九尊抬鎗五百  
二十五桿鳥鎗三百六十七桿大小旗幟四百  
四十三面刀矛雜械不計奪獲僞印七十二顆  
僞執照十八張而黃紅衣帽及各賊服飾不計  
惟騾馬僅只二百四十四匹則以賊因飢而宰  
食者多火藥鉛子僅獲八石米糧亦不過百數  
十石而已其投誠者二千六百餘現飭劉長佑  
妥爲安置一面設法遣散此十一月十一夜克  
復袁州府城初二日追斬賊匪全股殲滅之實

在情形也臣維逆賊金田倡亂以來糜爛半天  
下徒恃其黨堅交秘足以鈐束羣賊就其驅使  
而僞目兇渠又各以威詐脅其黨眾令其顛倒  
於鋒鏑之中而未由自拔軍興以來克復城池  
雖多究未有賊渠獻城乞命之事一則刦於賊  
之積威隱忍不決一則自知罪孽太深終恐難  
逃顯戮也此次降賊李能通本係賊中著名頭  
目因袁城援盡食絕始幡然決計投誠與尋常  
自拔來歸者有間然密囑其黨開門延納官軍  
似其贖罪之誠亦尙可信現在江西踞城各股

多係老賊與廣東新附之賊相參知李能通投誠之事則彼此之猜端必起機或可乘未嘗非用奇之一助也臣當批示劉長佑該犯情罪重大本無可寬今因勢蹙來歸殺之不武迭奉

諭旨凡賊中自拔來歸者准其免死應卽欵遵辦理以普

皇仁而昭大信至此次官軍合攻袁城至五月之久內截城賊之出外防援賊之入在事文武員弁兵勇前後數十百戰殺賊萬餘力挫兇鋒異奮勉陣亡者至百數十名之多受鎗礮傷者至

千餘名之多卒能克復堅城盡殄羣醜洵屬著  
有成績合無仰懇

天恩立沛以獎微勞江西卽補道劉長佑忠謹醅厚  
洞曠戎機請

賞加按察使銜並懇

賞給該員父母三品封典卽選知府蕭啓江自合攻  
袁城每次防剿城賊截擊援賊皆身先士卒不  
避艱險請

賞加道銜並

賞給該員父母四品封典同知銜卽選知縣劉坤一

請以直隸州歸部卽選並

賞戴花翎湖南卽補遊擊田興恕請以參將仍留湖南補用卽補都司楊恒升每戰奮不顧身額受鎗傷壯懷彌厲請以遊擊留於湖南補用升用遊擊劉培元臨陣奮勇曉暢軍務請以參將留於湖南補用守備銜千總崔大光膽力俱壯請以守備留於湖南補用並請

賞戴花翎所有陣亡之江西補用府經歷陳鈞和請照府經歷例從優議卹千總李光祝請照守備銜從優議卹擬保藍翎千總余謀忠請照千總

例議卹擬保把總撫標右營兵丁任開元請照  
把總例議卹擬保外委撫標左營兵丁石大美  
請照外委例議卹以慰忠魂其餘尤爲出力之  
員弁兵勇可否容臣核明勞績彙入克復萍鄉  
萬載兩案開列名單從優

奏請

恩施以昭激勸伏候

皇上聖鑒訓示施行謹

奏

咸豐六年十一月十三日拜發奉



殊批另有旨欽此

籌撥兵餉援剿江西吉安片

再此次湖南援剿江西

臣

原擬由三路前進一

由北路出瑞州一由中路出袁州一由南路出

吉安方可漸期得手然出師外省較本省爲難

非謀勇兼資足當一面之將則僨事堪虞非餉

需粗足畧敷數月之供則飢潰可慮

臣

前於湖

北所撥援江楚軍追賊過長沙時卽飭其由萬

載新昌上高以搗瑞州并湊給銀萬兩而後援

江有北路之一軍蓋帶勇之劉騰鴻本

臣

上年

所委以援鄂者其人才可用而參將普承堯亦

隨前提臣塔齊布曾立戰功亦臣所素知也至南路吉安原應早出一軍以取建瓴之勢無如中路袁州兩軍人數已踰九千口糧欠至百日實不能再籌一軍之餉前此兩次欽奉

寄諭垂詢卽選道王鑫如該員病能痊愈飭令由茶陵州進剿蓮花廳一帶以資策應維時王鑫病實未痊亦未便促其前往比王鑫病愈來省謁見而石逆上竄武昌警報紛至臣以石逆狡悍非王鑫不能制之遂飭王鑫率勇赴岳州相機援剿而前羅定協副將周鳳山適自江西繞道福

建廣東來省稟請募勇復赴江西剿賊臣以其

久經行陣札飭募道州勇二千餘名兵部侍郎

臣

曾國藩之胞弟同知銜優貢生曾國荃亦收

輯前甯紹台道羅澤南部曲及湘勇之在大營

告假養傷歸籍者千餘名益以新募之勇共二

千名請赴江西討賊而降調湖北藩司夏廷樾

新授江西吉安知府黃冕日覩湖南餉項艱窘

至亟請勸各商竭力捐輸諭以募勇援剿吉安

共伸討賊之義陸續據報書捐至十數萬緡臣

卽先後札飭周鳳山曾國荃等由江西萬載萍

鄉前進合剿安福直搗吉安黃冕夏廷樾等會督繼進其所以不由茶陵州進剿者蓋竊以由茶陵出境須次第攻取蓮花廳永新永甯諸縣道路迂遠賊得益爲之備不若由萍鄉進攻安福即可徑抵吉安也如吉安速下則各廳縣之賊心膽已寒勢將自潰縱令不然湖南沿邊防兵亦可各由邊隘進攻共相牽制似與三路援江之局相符於江西大局不無小補所有夏廷樾黃冕籌勸兵餉會督楚軍援剿吉安原由理合附片陳明伏乞

皇上聖鑒訓示謹

奏

咸豐六年十一月十三日拜發奉

硃批知道了欽此



北路官軍越境剿賊獲勝現辦情形摺

奏爲北路官軍越境剿賊獲勝現在辦理情形恭摺

奏祈

聖鑒事竊臣前奉

寄諭官文奏漢陽近日攻剿情形並分兵赴武昌助剿一摺現在賊援麇至號稱數萬其中多裹脅游民未必盡如粵匪之兇悍惟旣欲攻城又禦援賊不免受其牽制而現在附近各省實無可添調之兵湖南省唇齒相依道路較近未知有無可調兵



勇前往湖北協剿著駱秉章酌量情形趕緊辦理  
如能抽撥兵勇速派得力之員統帶前赴湖北會  
剿得此一軍以禦賊援則官文等可專力攻剿克  
復城池不至兩面受敵爲賊牽制矣將此由六百  
里加緊各諭令知之欽此臣惟湖北武漢兩城尙  
未克復而前此石逆攻陷金陵大營後挾其屢  
勝之氣上援武昌逆黨揣度賊情原以武漢勢  
踞上游南岸官軍夙稱精銳欲乘勢夾擊肆其  
狂謀臣未奉

諭旨之先屢接署湖北撫臣胡林翼記名道李續賓

疊次械稟皆稱賊勢披猖請速派精兵預籌策  
應維時兩粵邊防孔亟而他軍又慮不足以制  
強寇而操必勝之權臣因飭卽選道王鑫速帶  
舊部湘勇並益以新募之軍共三千人馳赴北  
路如鄂軍必須策應則捲甲趨之比王鑫成軍  
將出則石逆大股已經胡林翼李續賓楊載福  
等擊敗鼠竄矣臣以武昌之賊久已窮蹙慮其  
鋌而走險或擾咸蒲以犯岳州而通城崇陽一  
帶介居江西湖北之間久爲賊藪自石逆上竄  
之時鼠輩更形得志糾黨肆出疊擾鄂岳之間

自平江北界至湖北咸甯之黑橋自臨湘芭蕉  
坳至蒲圻之羊樓司周三百餘里皆爲賊藪其  
意似欲牽制攻鄂之軍以延其餘喘非大軍駐  
岳控制相機雕剿不足以資震懾而速戎機比  
卽札飭王鑫仍須整軍北出節節搜剿以重鄂  
湘兩省之防王鑫平日征剿賊匪所至之處每  
兼辦團練輔之其能以寡勝衆亦每借助於此  
抵岳以後卽擇地駐紮督辦巴陵臨湘蒲圻通  
城崇陽各縣團練清鄉族以靖匪練壯丁以從  
征漸有成效十月初二日有賊三千餘竄擾臨

湘之賀家坂管帶長勝軍守備銜益陽千總洪定陞遇賊前隊擊敗之追至沙潭忽前面高山大股賊匪突出洪定陞督兵勇禦之斃賊數十賊下山分股抄圍適補用遊擊朱南桂所部湘勇飛奔前來賊始驚潰乘勢合隊追至詹家橋將賊巢焚燬淨盡斃賊多名敗匪從山上逸去朱南桂洪定陞躡蹤追之復殺賊百餘名王鑫派卽選同知張運蘭率湘勇由北路港前進剿通城之賊十二日卯刻襲賊營於石南橋破之十三日賊目金十二僞副將軍張庸忠率賊二

千餘協理僞官魯三元率賊千餘分兩路來撲營盤張運蘭訶知之爲三伏於營前而親率旗長彭聲發嚴裝以待賊果飛馳呼譟而來覺已入伏則併力死鬪彭聲發率壯士貫陣直入連斬賊目數十名賊大披靡各勇縱橫擊刺陣斬僞將軍張庸忠追至莊前遇賊之後隊衝殺數十餘賊棄械狂奔奪獲大黃旗三十面鎗礮刀矛無數生擒賊目魯三元中十一軍典糧吳立喜僞監軍及僞總管五名此股以渠目擒斬殆盡不能成軍亦不敢復踞城也十六日王鑫剿

分水坳之賊殺賊百餘陣斬僞經歷陳姓生擒賊十六名現查久駐崇陽賊目爲僞監軍曾添爵蒲圻賊目爲梁一舉而興國大冶老賊三千餘尙屯聚崇陽其崇蒲一帶近山各處之零股賊匪蜂屯蟻聚者約尙十餘起王鑫現正督各員弁練團搜剿並飭各鄉各族縛送真賊已獲斬三百餘名似不難漸次肅清鄂岳之間民氣漸固矣所有北路越境辦理情形理合據實陳奏伏乞

皇上聖鑒訓示施行謹

奏

咸豐六年十一月十三日拜發奉

硃批知道了欽此

援黔官軍攻克三元屯三角莊逆巢摺

奏爲援黔官軍疊獲大勝攻克銅仁縣屬三元屯  
銅仁府屬三角莊逆匪老巢境內漸次肅清恭  
摺具

奏仰祈

聖鑒事竊楚軍分路防剿貴州銅仁賊匪及固守銅  
仁府城連踏賊營二十一座立解城圍各情形  
均經

奏報在案查銅仁之亂因錢糧起釁而教匪會匪  
乘之府屬地方周數百里而統名五崗其倡亂



也以錢糧爲詞故其動衆也速一變而五崗團練靡不聞風響應從亂如歸逆賊於五崗極深險之處三角莊建立木柵石城爲老巢距銅仁府城尙二百餘里銅仁縣屬徵收較輕民情尙便故雖府屬之民盡變而縣屬三崗糧戶尙未附和爲逆其士民自相保聚之處爲三元屯銅屯內奸民有潛通逆賊者三元屯遂亦爲逆賊所踞迨攻銅仁窺鎮筓晃廳均爲楚軍擊敗於是盡移其資糧甲仗於三元屯三角莊而脅衆堅守各隘以抗官軍賊固料楚師乏糧不能久

與相持而兩巢高踞萬山之巔客兵亦斷不能  
爲犁巢搗穴之舉也同知銜知縣兆琛鎮尊都  
司吉隆阿補用都司田宗蕃知縣吳自烈等既  
連破清水塘文筆洞野雞坡毛溪等處賊巢卽  
議移軍先攻三元屯辰沅永靖道翟誥以其地  
險難攻密飭千總周洪印鄒明英帶同土守備  
吳永清龍子亮麻文貴等由大興落潮井拔營  
先攻牛欄場賊巢以襲其後路十月初四日周  
洪印等攻牛欄場斃賊數十賊奔回巢田宗蕃  
兆琛等密約初六日會攻三元屯五里有地名

溪口賊數千守之溪口對岸爲何家坡亦有伏賊吉隆阿田宗蕃兆琛等商派補用千總吳支升田慶品熊三喜知縣吳自烈士守備吳添富率兵勇由大路進爲前隊自率兵勇繼之把總李光良蔡友文帶健勇八百伏孟溪以防何家坡之賊吳支升等甫行二里許卽有賊截其後路李光良等伏兵從孟溪殺出吉隆阿等大隊繼至賊勢稍却李光良復追過何家坡蹙出溪口之前賊衆始亂吳支升與自烈陣擒僞將軍張友于士氣益奮刀矛並進斃賊數百官軍卽

進紮溪口逼之是夜有投賊之良民郭世仲來  
營稱三元屯四面石壁峭拔由山麓至山頂凡  
三層每層有堡賊復加剗削非力攻所能拔惟  
溪口有山徑須繞道十餘里由沱水坪進可達  
三元屯之上堡請官軍分道前進已密約良民  
於中堡舉火內應初六日辰刻宿霧未收田宗  
蕃等率漢土兵勇由大路吉隆阿兆琛率兵勇  
由小路前進賊踞堡施放鎗礮子如雨下官軍  
未能踰濠田宗蕃由東小路抄出賊前時已日  
高霧散中堡賊方指揮羣賊赴下堡助戰忽聞

山頂鎗礮聲震則周洪印吳永清已從後路襲破上堡矣中堡之內應者急舉火以示官軍賊倉卒莫知所爲田宗蕃吉隆阿兆琛等急督官軍越壕夾攻拋擲火彈立將下堡焚燬賊窟中堡官軍上下兜擊自己至申斃賊近千生擒僞都司何有明等及餘賊一百四十六名其墜巖落澗死者無數可紀也奪獲僞招討大元帥大旗及僞將軍都督校尉大旗并紅黃白旗四十餘面大礮三尊抬鎗九桿鳥鎗刀矛七百餘件餘賊遁回壩盤初七日吉隆阿田宗蕃吳自烈

等由大江進甫抵壩盤賊卽來撲官軍擊敗之  
賊復糾聚各團四面設卡環逼官軍斷我後路  
初十十一十二等日數路圍撲營盤雖經擊敗  
而裹糧已竭軍士無從覓食日掘山藷充飢且  
戰且守情形危急翟誥及鎮筸鎮總兵文安聞  
壩盤被圍急飭周洪印等星夜赴援十三日賊  
五路來撲營壘官軍相持四時不決忽後路呼  
聲震天賊之後隊稍動田宗蕃等知周洪印援  
軍已到督各路極力衝殺內外夾擊斬悍賊三  
百餘內有僞將軍二名生擒五十餘擊斃跌斃

前雖退爲黨牛右宗宜無

前署銅仁副將圖塔納亦帶勇踵至二十六日  
黎明大霧迷漫吳支升周洪印鄒明英吳自烈  
已革晃州廳通判楊泰來督漢士兵勇徑抵關  
卡賊猶恃險抗拒官軍僞退賊傾巢出追官軍  
回擊之賊敗回巢吳自烈等所部勇丁混入賊  
隊甫入關拋擲火彈焚燒賊棚賊衆大亂官軍  
斬關而入遇賊卽斫殲賊無數墜巖澗冒木石  
死者不可勝計立將三角莊木城焚燬勇自吳  
自發士兵吳有林救出兼護貴東道署銅仁府  
知府楊書魁時已憂病垂危矣隨負送兆琛營



盤調養官軍隨進攻逆賊所建石城僞殿吳自  
烈所帶幹勇吳添富所帶士兵先登縱火兵勇  
鼓譟而進斬馘數百餘匪已先由山後竄逸官  
軍躡蹤緊追生擒僞將軍董浩然一名僞校尉  
夏迎賓等一百四十五名割獲左耳三百餘奪  
獲僞印九顆大小旗幟鎗礮刀矛無數首逆是  
否被火焚燒抑或由山後逃逸思南石阡印江  
等府縣現飭查明一面窮搜巖穴以淨根株其  
關家場狗牙場纏溪苗旺岳家寨標杆河等寨  
間尚有匪徒屯集現在分途剿辦此楚軍追剿

銅仁賊匪攻克賊巢之實在情形也臣維銅仁賊匪起事之始得良有司勤恤民隱寬猛兼施原可無煩兵力自兩次決裂之後教匪會匪乘機勾引賊勢猖獗至府屬之民羣起從逆而尙苗及川黔無藉之民從而附之漸爲黔楚大患仰賴

皇上天威遠播得以迅速就緒已壞之局再獲安全此固非意料所及也黔境跬步皆山而三元屯三角莊尤爲天險三角莊距銅仁城尙二百六十餘里高五十里人跡罕到賊匪恃爲老巢於

峯迴路轉之處節節設卡抗拒自三元屯破賊  
膽已寒自潞溪鐵鑛坪兩捷而五崗門戶全失  
官軍因逆黨心離乘勝速剿晝夜疾進履險如  
夷猱騰隼集深入其阻當餉匱事棘之時征兵  
踰萬幸歲事迅速得以少糜巨帑文武之運籌  
決勝將弁兵勇之奮勉圖功其微勞似有不可  
沒者運司銜辰沅永靖兵備道翟誥久任苗疆  
熟諳地勢苗情洞中機宜無分畛域應請

賞加按察使銜鎮筸總兵文安老成諳練會督布置  
諸臻妥協請

賞戴花翎丁憂揀發知縣兆琛請以同知直隸州儘先補用並請

賞戴花翎卽選知縣吳自烈上次銅仁案內擬保升同知此次請以同知歸部遇缺卽選並請

賞戴花翎藍翎都司田宗蕃上次銅仁案內擬保游擊此次請以參將留於湖南補用並請

賞換花翎揀發都司吉隆阿請以遊擊留於湖南補用並請

賞戴花翎藍翎千總周洪印請以都司留於湖南補用補用千總吳支升請以守備留於湖南補用

並請

賞戴藍翎已革晃州廳通判楊泰來請開復原官仍  
留湖南補用免繳捐貲其餘在事出力員弁兵  
勇可否由臣核明彙入上次克復銅仁案內開  
單一併彙保之處臣自

恩施謹據實馳

奏伏乞

聖鑒訓示施行謹

奏

咸豐六年十一月十三日拜發奉

硃批另有旨欽此

馬之月之表南

丙辰下

三

銅仁漸次肅清請

勅黔撫遴員履任治理片

再銅仁府屬縣屬境內已漸次肅清楚軍斷難  
如前代爲防守且善後事宜及搜捕餘匪亟須  
黔員辦理呼應始靈請

勅下貴州撫臣加意遴擇廉明府縣尅期履任以資

治理謹附

奏請

旨

咸豐六年十一月十三日拜發奉



殊批另有旨欽此

賞戴花翎謝

恩摺

奏爲恭謝

天恩事竊

臣

准兵部火票遞到咸豐六年十一月二

十四日內閣奉

上諭湖南巡撫駱秉章自前年籌辦船礮接濟曾國  
藩等大軍嗣復派兵援剿貴州江西等省克復銅  
仁松桃萍鄉萬載並剿辦廣東連州廣西灌陽湖  
北通城等處賊匪均能不分畛域極力圖維茲又  
派兵越境克復江西袁州府分宜縣二城攻奪貴

馬之良乃其言 丙辰下  
州銅仁險隘二處實屬盡心調度蓋績堪嘉駱秉  
草著加恩賞戴花翎欽此跪讀之下感悚交縈謹  
卽恭設香案望

闕叩謝

天恩伏念臣嶺南下土才識迂疎蒙  
皇上特達之知

簡畀封疆重任熊湘再任莫報涓埃驚堦無驚咸遵  
軌轍境內甫銷兵氣鄰封未靖塵氛稟

宸謨而興援江援黔之師資羣力而收造船造礮之  
用執干戈則將士奮其武衛籌芻粟則僚佐共

其艱難自慙棧豆久糜馳驅絕少尤愧軍旅未  
學調度毫無時切憂思難言報稱茲廼仰承

溫諭渥被

隆施影翠羽之輝煌舉頭

恩重荷

丹綸之嘉獎捫臆慙深臣惟有竭盡愚誠益加勵翼

庶勉策夫駑鈍冀少答夫

鴻慈所有管感激榮幸下忱謹繕摺叩謝

天恩伏乞

皇上聖鑒謹

奏

咸豐六年十二月初七日拜發奉

硃批知道了欽此

北路官軍肅清湖北通崇蒲通回駐岳州摺

奏爲北路官軍越境剿賊迭獲全勝通城崇陽蒲圻通山一帶肅清仍回駐岳州以便控制恭摺  
奏祈

聖鑒事竊臣前調卽選道王鑫帶所部勁勇赴岳州相機剿督辦巴陵臨湘蒲圻通城崇陽團練所有通城蒲圻兩獲全勝擒斬賊目並團練搜剿情形已經

奏報在案是時王鑫已由臨湘龍窖源進駐通城其在龍窖源時計擒倡亂首匪鍾華玉周美玉

等近百名所派分駐通城之卽選同知張運蘭分駐通城水口舖之遊擊朱南桂分駐蒲圻羊樓崗之益陽千總洪定陞等所捕土匪隨時訊決者亦衆遂下令聯團殺賊勒捕匪而良民之氣漸壯始敢顯然與賊爲仇王鑫在通城窮治土匪嚴整四鄉團練漸有起色適探報崇陽之石屋洪橋雷駱等堡團民連日與賊搏戰先勝後敗王鑫率勇急援之十一月初五日抵崇陽之洪橋堡賊分三路前來王鑫設伏待之陣斬悍賊百餘賊大奔追至龍船港賊背水回拒

擊敗之追至官塘畝白泉橋崇陽縣城之賊出城援應與官軍遇又敗之沿途斃賊約數百生擒先鋒賊目九名奪獲鎗械旗幟無數賊亦不敢踞城相抗宵遁白霓橋王鑫欲誘其撲營盡殲之賊殊狡猾數日不至僅初十夜潛至對河見各營靜寂無聲遽引去十一日黎明王鑫出隊剿白霓橋之賊派遊擊朱南桂等由左路高同嶺進都司陳品南易普照由右路石子岸進王鑫自率湘勇由中路進右路官軍先到賊整隊抗拒易普照匹馬陷陣連斫數賊賊陣始亂



百長唐清揚馳馬蹴之朱南桂等由左路掩至  
陳品南劉榮華等復由右路斜擊之官軍縱橫  
盪抉連斬紅袍騎馬賊目十餘名斃賊三四百  
溺斃無數王鑫縱兵追截直至通山縣二都地  
方收隊沿途斬獲不計其數陣斬偽總制韋再  
玷先鋒胡老貴等奪獲偽印七顆生擒三十五  
名奪騾馬十五匹旗幟鎗械千餘件而崇陽遂  
無賊蹤王鑫派朱南桂洪定陞兩營進剿蒲圻  
踞城之賊賊目梁一舉誤疑王鑫大隊全進懼  
竄與國朱南桂等抵蒲則賊遁一日矣與國諸

賊均崇通蒲敗亡之餘適賊之竄江西武甯者  
經建昌縣官軍擊敗折回興國併屯州城聞王  
鑫方攻蒲圻意崇陽官軍無多也思合力潛犯  
崇陽以圖報復不知王鑫全軍六營尙駐崇陽  
西門七星嶺故未移也二十一日興國賊七八  
千至通山號稱數萬一由沙坪一由界頭而來  
王鑫密調張運蘭駐通城之軍來助張運蘭半  
日半夜馳一百二十里到崇則賊已抵白霓橋  
踞營僅十五里矣二十二日辰刻賊分五路撲  
營王鑫預伏以待未幾紅衣黃巾漫山而至其

氣甚囂官軍靜以待之賊由北門阪先撲第二營湘勇接戰示之以怯賊蜂擁而進伏軍從林中發劈山礮羣子如雨賊旗紛紛倒地適第六營亦誘賊近營王鑫發號振鼓各路齊進橫衝側擊頃刻屍橫遍野羣賊亂奔大溪山南門洲伏兵截之於前大隊從後猛追之陣斬騎馬賊目八名而奪其馬追至白霓橋約計斃賊八百餘名忽白霓橋股匪出而接應又擊敗之復追至路口賊翻山四竄日暮官軍收隊而還生擒賊目偽協理熊正良傅雲魁等五十四名奪獲

大黃旗二百九十餘面抬鳥鎗四十七桿刀矛  
千計馬十三匹僞印七顆雜械無數餘賊竄通  
山二十五日王鑫率全軍追至通山則賊又竄  
興國州矣武昌省城克復之後南岸大軍追剿  
迅速克復興國州城賊又敗竄王鑫卽駐通山  
搜匪練團據稟通城崇陽蒲圻通山實已無賊  
現擇委士民搜匪辦團已著成效此北路越境  
剿辦通城崇陽蒲圻通山收復四縣一律肅清  
之實在情形也十二月十一日奉

上諭前據駱秉章奏崇陽通城一帶久爲賊藪因飭

卽選道王鑫帶湘勇並新募兵三千馳赴北路駐紮岳州相機雕剿以重鄂湘兩省之防本日復據官文奏崇陽通城毗連江西瑞州義甯爲湖北省城後路攸關王鑫進剿崇通土匪極爲得力請留該員督率南勇駐紮崇通以清逆黨巢穴等語王鑫紮駐岳州督辦崇通蒲圻等縣團練已據奏稱漸有成效惟崇通一帶介居江西湖北之間爲逆賊往來孔道著該撫卽飭該員帶兵前進駐紮崇通遇有賊匪隨時剿捕以清巢穴而杜亂萌將此由六百里諭令知之欽此

臣

維湖北南岸下游陸

路之要在興國一州由此而西北通大治武昌  
江夏灕江之路出鄂城之下由此而西通通山  
崇陽通城咸甯蒲圻依山之路出鄂城之上其  
地緊接江西爲古昔用兵間道漢伍被告淮南  
王所言守下雉之城絕豫章之口卽指州境故  
城而言唐淮南將李神福擊武昌節度使杜洪  
得永興喜謂已得鄂之半永興卽今州城也宋  
建炎間金人由黃州渡江遂入興國大治界取  
山路入江西是興國一州爲湖北江西兵行間  
道關係兩省地所必爭興國有重兵駐守則江

西陸路之賊不能闌入鄂省此外鄂省應防者  
惟義甯由南樓嶺竄通城一路是處山路崎嶇  
有險可扼現在義甯無賊則通城之防尙緩至  
崇陽爲湖北積亂之區自道光二十年鍾人傑  
倡亂後匪徒漏網者多疊次搜捕未盡以故禍  
機一發莠民從亂如歸毒流三省臣之調王鑫  
駐岳並隸以朱南桂洪定陞兩軍者原以嚴岳  
鄂之防嚴岳鄂之防則必先清通崇之匪茲幸  
仰賴

天威自王鑫越境分道剿捕以來爲時已歷三月通

城崇陽蒲圻通山以次搜捕蕝事據王金鑫稟報  
四縣圍練之局已成縛斬積匪不少境內已清  
惟崇陽賊目曾添爵蒲圻賊目梁一舉竄逸江  
省此時湖北興國州有官軍分駐而通城崇陽  
又已設官若仍以重兵久駐崇通則岳陽要郡  
轉覺空虛近無以懾巴臨之心遠無以壯咸蒲  
嘉之勢洵不如仍駐岳州無督巴臨通崇蒲各  
處團務於兩省大局有裨聲勢尤爲聯絡王金  
於未奉到

寄諭之前已凱撤回岳臣比札飭該員暫駐岳州就



近偵察情形如鄂省上游江西邊界有警則當  
出其不意捲甲赴之此亦猛虎在山之勢也所  
有王鏊一軍剿賊屢獲全勝崇陽通城蒲圻通  
山搜捕事茲現已回駐岳州情形理合據實陳  
奏至此次官軍越境剿捕先後肅清四縣著有微

勞可否由臣核明酌保之處出自

天恩謹具摺陳

奏伏乞

皇上聖鑒訓示施行謹

奏

咸豐六年十二月二十九日拜發奉

硃批另有旨欽此

漢書卷之八

兩長下

三

貴州銅仁府境肅清首逆擒斬楚軍凱旋摺

奏爲貴州銅仁府境一律肅清逃逸首逆均經擒斬楚軍凱旋恭摺

奏祈

聖鑒事竊貴州銅仁首逆嚴占鰲趙子澂卽田瑞龍劉士龍陳福林等結黨倡亂黔省鼎沸擾及楚疆迭經楚軍剿辦獲勝所有攻克三元屯三角莊賊巢情形均經

奏報在案自賊巢旣破黔民震懾

天威被脅勉從之衆均卽時解散銅仁府縣各境已

無成股之匪十一月初一日楚軍偵知首逆陳福林伏匿苗旺寨都司吉隆阿守備田宗蕃率兵練圍捕初四日大霧漫山官軍從山後覓徑攀躋而上焚其寨柵斃賊百餘生擒僞校尉正述及陳福林之弟陳代林逆首陳福林率數十賊翻山竄逸千總周洪印督營兵黃應忠田慶治等生擒之並殲其餘黨官軍連日搜山於閔家塲獲僞將軍張二捧捧王誠於梵淨山獲僞將軍滿萬元賊日尤大潮僞元帥吳和尚卽吳朝棟僞元帥龍恩普僞大將軍張蜚江口團

民細送僞將軍范蜡狗前是州廳通判楊泰來  
生擒田小晚等十六名均經訊明軍前正法梟  
示其僞大元帥劉士美僞元帥楊宗保吳大刀  
僞軍師吳效祖高永年等竄至石阡府境均經  
軍功王士秀會石阡團練擒獲其首逆趙子澹  
嚴占鰲亦經餘慶縣團練擒獲就近解送黔省  
審辦湖南委員兆琛由石阡府凱撤回楚沿途  
復搜獲僞先鋒馬三保首逆徐廷杰之兄僞元  
帥徐杰山僞將軍陳狗四陳法萬劉先達僞先  
鋒田慶林等軍前正法其孥獲徐廷杰之妻徐

盧氏及逆子徐老年等遞解回黔照例辦理統  
計此次滋事首要各犯均已捕獲到案地方實  
已一律肅清已經臣迭次飛咨貴州撫臣速委  
廉能之員蒞任辦理善後楚師業已次第凱撤  
歸伍矣臣維銅仁之變實因錢糧起釁聞因前  
任知府浮勒太甚吏胥因緣爲奸以致釀成巨  
變上年楚軍克復銅仁後若地方官能恤民艱  
釐定徵收章程與民更始則良善固可相藉以  
安卽匪徒亦將無詞可藉乃自接署知府王敬  
烈抵任後辦理一切不協輿情且有縱勇擾民

之事以致小民仇視官吏積憤彌深而其地邪  
匪如燈花教聖諭堂等名目又實繁有徒從而  
搆之一呼而亂者四起前次銅仁既復之後臣  
即咨貴州撫臣遴委賢員猛將來銅蒞任辦理  
善後乃遲之又久始聞到任到任未久即復激  
成事端昨次續經戡定之後臣復飛咨貴州速  
委廉明之員前來并附

奏請

旨嗣貴州撫臣來咨仍令王圖二革員帶罪自效在  
貴州撫臣之意不過欲藉會同剿辦之名預爲



該革員開復處分地步外省陋習臣亦不復過  
於推求但王敬烈既係激變獲咎之員再令留  
銅辦理若復釀成事端咎將誰執楚軍自出境  
克復留兵代防及增兵援剿閱時一年之久用  
餉至二十餘萬之多無論此後萬難爲繼卽有  
可恃之兵練可用之餉需亦不值爲一二貪劣  
之員收拾此敗壞難支之局昔

仁宗睿皇帝於三省教匪首逆王三槐解

京審訊時有官迫民反之供

聖懷惻然

特諭褒擢廉吏劉清等以風勵天下當時民間聞者感泣至今誦之誠以吏治之貪廉民生之休戚所係舉措之當否民志之從違所分亦卽天下所視爲安危治亂者也隔省官員臣固無從辨其臧否但見聞所及不敢不爲

皇上陳之可否請

旨勅下貴州撫臣速提該革員王敬烈進省查辦另揀賢能之員星速赴任將錢糧章程詳爲釐定以杜亂萌之處伏候

聖鑒訓示施行謹

奏

咸豐六年十二月二十九日拜發奉

硃批另有旨欽此

覆陳籌畫援剿貴州黎平摺

奏爲調派官軍援剿黎平並陳現在籌辦情形恭摺覆

奏事竊臣於十一月二十八日欽奉

寄諭前因貴州匪徒未靖業經諭令駱秉章調鎮筸鎮精兵二千名前往銅仁援剿其由川赴黔協剿官兵未有鍾琦所帶一千名嗣改撥雲南其蔣玉龍等統帶之兵到黔之後多患瘴疫復諭樂斌挑選勁旅一千三四百名由瀘州赴黔聽調本日據御史宗稷辰奏黔楚道梗通政使嚴正基係嚴如

煜之子熟悉苗情請飭該員回湖南簡率鄉兵士  
勇出偏橋進剿並飭四川兵與湖南兵密約夾攻  
等語嚴正基雖熟悉苗疆形勢但年力漸衰未必  
即能得力所請令其管帶兵勇之處著無庸議至  
湖南大路宜扼偏橋其逕路如鴉喇關等處溪河  
直通麻哈八寨並三廳五砦皆有山路可通宜用  
前明朱燮元五道併進之法與今日情形是否相  
合貴州兵力單薄自應川楚合剿以期迅速蕩事  
著恒春蔣蔚遠駱秉章按照該御史所奏體察形  
勢相機剿辦如果川楚兩路各出奇兵分攻腹背

再以黔省主兵與客兵併力殲除則辦理當易得手總宜不分畛博悉心籌畫原摺片均著鈔給閱看將此由五百里各諭令知之欽此十二月初十日復奉

寄諭孝順蔣蔚遠奏克復都勻府城請飭催靖永官兵進剿一摺前曾諭令駱秉章酌撥湖南靖永一帶官兵練勇由靖州赴援黎平嗣據該撫覆奏已調瀏陽東界之丁際可所帶靖勇四百餘名赴靖防剿惟該州兵力單弱未能越境等語自係實在情形現在黔省都勻賊匪雖已退聚八寨而麻哈

匪黨尙在附近滋擾黎平僻處東南距貴州省城  
道路寫遠孝順等鞭長莫及駱秉章向來辦事不  
分畛域所派鎮守兵勇業在銅仁屢獲勝仗靖州  
與黎平接壤有無兵勇堪以調派赴援之處仍著  
酌量情形奏明辦理欽此跪誦之下仰見我

皇上眷念西南綏遠安民至意

臣

前於銅仁賊勢漸

衰晃州廳防剿稍緩之時卽札飭參將萬年新  
都司侯光裕管帶所部長勝軍千餘名由桃源  
馳赴靖州嗣因岳州一路兵力尙敷續調守備  
張萬書熊興柏帶所部軍健勇五百餘名由岳

州常德繼進銅仁肅清各首逆就擒後又增調  
補用直隸州知州兆琛募回所部龍勇三百名  
赴靖會剿合之前調丁際可所部靖勇共二千  
二百餘名萬年新侯光裕張萬書熊興柏均久  
經戰陣丁際可籍隸靖州兆琛新自銅仁凱旋  
於黔苗情形均尙熟悉所帶楚勇多係山谷之  
民用之於黔省或可期其得力惟靖州處楚省  
西南極邊距省城千數百里該將備等或自桃  
源取道沅州會同或自岳州取道常德辰沅一  
帶前往程途遠隔甫於十一月下旬先後抵靖



兆琛尙未接其起程之稟道路遼遠當窘迫之時不能設立糧台就近支應每省局挪湊二十日三十日餉需則委解一次師行而糧不能隨殊爲焦急然黔民望救甚殷况欽奉

慈諭諄諄敢不竭蹙圖維以求稍紓

宵旰憂勤之意已札催萬年新等相機進剿矣奉

諭湖南大路宜扼偏橋其徑路如鴉拉關等處溪河直通麻哈八寨並三廳五峇皆有山路可通宜用前明朱燮元五道併進之法與今日情形是否相合並蒙

頒示御史宗稷辰各摺片臣謹按山川形勢古今無殊而道路之通塞險夷則視其時建置因革爲斷故有昔爲要途今屬散地昔屬散地今爲要途者貴州全境民苗雜處古本要荒明代及國朝雍正以前地方多隸土司部落羣分疆以戎索由楚通黔之路昔重偏橋未改土歸流之時曾設偏沅巡撫於斯以資控制所謂偏沅者蓋合湖南沅州貴州偏橋衛而名也當時蠻部錯居漢土阻隔有事貴陽必問津鎮遠問津鎮遠必假道偏橋而偏橋一線縈紆要而兼險偏橋

通則楚黔之氣利而貴東一路文報糧餉始無  
梗阻之虞自分設流官以後土司故土已成內  
地環邊苗路如梳捫壁攀籐處處皆可驀越不  
僅鴉拉關等處溪河直通麻哈八寨爲沅水上  
源有徑可尋已也考明臣朱元燮自蜀征蠻黔  
師出永甯赤水畢節一帶是爲貴州北徑其時  
朱燮元以兵部尙書兼督貴州雲南廣西諸軍  
用前撫臣閔夢得之策五路出師尤得蜀師之  
力事平仍裂疆域衆建羣蠻不設郡縣與現在  
情形實有不同至川楚各出奇兵分攻腹背則

爲黔省計自無今昔之殊也抑臣竊有慮者川

楚會剿之策川兵或自酉陽取道銅仁思南或  
自重慶取道遵義或自叙州直趨永甯畢節其  
地皆在貴州北境楚兵自靖州馳援黎平則在  
貴州東南一隅聲息不能遙接貴州本省兵力  
雖不爲單然營務廢弛已久斷難望其得力川  
兵在北楚兵在南黔省之兵又不能從中聯絡  
是雖有會剿之名仍無其實也上年銅仁之役  
臣曾約川省會剿迄未吞覆黔省於川楚軍務  
情形亦無一字商及幸及時趨利速進得復郡

城若待輾轉咨商則機宜必致坐誤此事之難  
者一也黔省之賊有苗有匪兩者勢皆相聯銅  
仁之亂匪也而松桃之苗因之而起古州之亂  
匪也而黎平之苗因之而起苗之貧苦由漢民  
重利盤剝所致故其起事也每以逐客家爲辭  
匪則勾苗從逆其意不僅在修怨而已痛剿之  
後苗尙可撫而匪不可撫且亦不受撫客兵匆  
匆一過能剿匪不能安民非本地廉幹有司恩  
威兼施嚴匪徒而寬良愿其勢必不能久治黔  
省吏治軍政久在

聖明洞鑒之中恐禍作將無已時暫雖稍獲安謐亦未敢視爲幸事此事之難者二也以湖南本省而論湖北暫雖解嚴而江西全省賊勢尙張出境之師有增無減廣東遺寇尙擾英德清遠廣西之賊經道州零陵擊退後復竄陷興安本省門庭之守雖嚴而籬籬之憂未艾且防且剿月餉以十數萬計茲復分援黎平道遠餉艱時虞不逮且苗情反覆無常喜則人而怒則獸自古已然朱熹元之平黔蜀前後十有餘年傅蘂之靖楚苗亦經十數載逆苗每云不怕官府兵多

只怕官府糧多其不能尅期竣事可想有必辦之匪而無可裹之糧倘或曠日需時何堪設想此事之難者三也臣受

恩深重明知時局多艱斷不敢稍存畏難之見苟心力稍有可盡必勉竭駑鈍極力圖維亦惟相機籌辦以求無負

高厚鴻慈而已所有籌畫援剿貴州黎平情形並兩次奉到

寄諭覆陳一切謹據實陳

奏伏乞

皇上聖鑒訓示施行謹

奏

咸豐六年十二月二十九日拜發奉

硃批知道了欽此





駱文忠公奏議卷之九目錄 湘中稿

丁巳上

王道帶勇剿賊請暫緩

簡放實缺摺

覆陳皖省需米實難籌辦摺

楚邊防軍迭捷收復江西旁縣摺

附陳廣西賊勢披猖片

桂東苗令請卹片

援江官軍克復新喻進逼臨江挫後復勝摺

酌保堵剿湖北江西各股匪出力文武官紳摺

履陳查辦捐輸廣額並裕道被參各欵摺

援黔官軍攻克金山錦屏馳抵黎平府城摺

彙保剿辦黔匪三次出力員弁摺

接濟各省急需摺

匪徒謀逆先期撲滅在事官紳量請鼓勵摺

王道帶勇剿賊請暫緩

簡放實缺摺

奏爲道員帶勇剿賊請暫免

簡放實缺俟軍務告竣再行

奏請事竊卽選道王鑫自越剿廣東連陽之賊凱

撤回南因病告假上年秋間臣因逆渠石達開

率賊數萬復由金陵上援武昌特調該員管帶

所部壯勇並隸以游擊朱南桂守備銜千總洪

定陞兩軍急趨北路爲鄂省南岸官軍聲援比

聞石逆被剿竄回維時湖北之通城崇陽蒲圻

通山皆爲賊踞與武昌踞城之賊遙相勾結臣  
以鄂省南岸官軍方悉力攻城未遑兼顧仍飭  
該員率所部駐岳州相機進剿肅清旁邑俾鄂  
省南岸官軍不致爲賊牽制得以一意攻城幸  
仰仗

皇上天威四縣次第肅清兩省陸路官軍聲息相接  
而胡林翼楊載福李續賓水陸兵勇盡力環攻  
武昌省城迅就克復乘勝下剿連克各城邑逕  
抵潯陽湖北一律肅清王鑫旣剿除通城崇陽  
蒲圻通山之賊練團搜匪諸事就緒派朱南桂

帶所部仍守崇陽調洪定陞帶所部仍駐通城  
而自督所部回駐岳州臣復飭其督辦巴陵臨  
湘及湖北之通城崇陽蒲圻通山四縣團練搜  
捕漏逸匪徒遇有警報仍無分畛域捲甲星趨  
一切布置原由均經臣

奏明在案嗣准督臣官文抄摺移咨始知已會臣  
後銜具

奏請將王鑫加按察使銜留於湖北遇有道員缺  
出請

旨簡放旋准咨開奉

上諭官文等奏湖南官軍越境剿賊通城等縣肅清  
一摺候選道王鑫督兵越境剿賊通城崇陽蒲圻  
通山四縣已一律肅清實屬奮勉出力著賞加按  
察使銜留於湖北遇有道員缺出請旨簡放該部  
知道欽此頃閱邸鈔正月初十日內閣奉

上諭前據官文等奏湖南官軍越境剿賊通城崇陽  
蒲圻通山四縣一律肅清茲據駱秉章奏通城等  
縣搜捕蕨事現辦團練著有成效候選道王鑫已  
凱撤回駐岳州等語此次官軍越境剿捕通城等  
縣迅就肅清洵屬著有微勞除候選道王鑫業經

降旨加恩外所有在事出力文武員弁著該撫查明保奏欽此臣查王鑫係湘鄉縣文生以帶勇剿賊屢著戰功蒙

皇上天恩洵擢今職該員以書生而通韜畧素懷滅

賊之志忠勇義烈出於天性臣所深知該員從

前戰功以衡永郴桂一帶爲最其於湖南南路

毗連兩粵及東路毗連江西各處地勢民情及

兩粵賊蹤尤爲深悉所部兵勇亦多省南一帶

之人此時廣東清遠英德匪勢亦張廣西現有

大股賊匪竊踞興安靈川一帶刻思竄楚湖南



官軍之攻剿江西吉安瑞州臨江三府者正當  
吃緊之際近據探報湖北安徽之賊併竄江西  
人數不下數萬之多江西本省匪徒更難數計  
其勢全注該省西路臣所派援剿臨江吉安兵  
勇已一萬一千有奇援黔兵勇亦二千有奇然  
接各路稟報皆以兵單賊眾爲詞稟請增調王  
鑫一軍分駐岳州通城崇陽者計共四千二百  
人崇陽現尙無事兵機瞬息千變勢難坐待賊  
來若由臣相其緩急隨時調遣尙可周轉通融  
期於彼此兼顧卽如此次王鑫一軍越境北剿

並非由督臣之咨亦非由湖北撫臣之指名械  
調祇以事勢所迫不得不急起乘之倘彼時王  
鑫爲職守所羈亦何能迅速赴調據臣愚見王  
鑫本係剿賊得力之人自無庸羈以職守應請  
旨將卽選道王鑫交軍機記名於軍務告竣時請  
旨簡放庶於現在軍務均有裨益臣爲大局起見理  
合據實直陳伏乞

皇上聖鑒訓示施行謹

奏

咸豐七年二月十五日拜發奉

殊批另有旨欽此

覆陳皖省需米實難籌辦摺

奏爲遵

旨覆

奏事竊

臣

於正月二十四日承准軍機大臣字寄

正月十四日奉

上諭據福濟奏皖省上年荒旱僅恃無爲州一隅採  
買米石現在該州被賊竄陷販買無從兼之隆冬  
無雪麥苗難冀滋生未免兵民交困聞湖南秋收  
頗稔武漢旣復水路可達蘄州請飭趕緊籌辦米  
糧四萬石等語湖南省歲收雖豐稔而現在支應

各路防兵需餉不少原恐未能兼顧惟皖省兵民  
乏食情形亦關緊要駱秉章於隣省緩急不存畛  
域之心此次福濟所請該省能否籌辦米若干石  
卽著駱秉章酌量情形一面專摺具奏一面派員  
趕辦運至蘄州轉由羅田英山運至六安俾資接  
濟將此由六百里諭令知之欽此臣維皖省連年  
用兵軍旅之後加以饑饉無爲州被賊竄陷採  
買之路又梗缺米情形旣屬緊急

聖懷廑念良殷臣具有天良苟可藉展一籌豈忍稍

惜心力因與總局司道再四悉心商酌覺有無

可籌辦者敬爲

皇上陳之湖南素稱產米之鄉岳常澧三府州濱湖  
之處圩田最多長沙衡州地勢稍平稻米之收  
數處爲廣此外如辰沅永靖寶永郴桂各府州  
縣則山多田少本境產米僅敷民食上年岳常  
澧三府州以患潦之鄉轉遭旱歉秋收米價漸  
增武漢克復之後鄂省招商採米米價日益昂  
貴每米一石需大錢三千二百文至三千五百  
文不等爲本省數年來未有之事以本省現在  
錢價扣算每石約需銀二兩零市價尙有增無

減買米至四萬石則需銀八萬餘兩此項糴本  
將從何出皖省向產米之鄉索米似謂取其有  
餘不知買米必須用銀無八萬兩之銀何從得  
四萬石之米此湖南籌米本難而籌銀買米之  
更難也且不但此也米四萬石由湖南沿河各  
埠收買僱船裝至湖北蘄州由湘入湖由湖人  
江一水可通船運尙易至由蘄州陸運取道羅  
田英山運至六安山路崎嶇七百餘里向無車  
馱以湖南官斛計之每米一石約重一百二十  
觔以各處過山夫價計之每觔三文須腳價錢

三百六十文自蘄州至六安州計非十日不達  
則每米一石夫價卽須錢三千六百餘文合之  
船價又須銀八萬餘兩總計運米四萬石至安  
徽六安州交卸所有米價及水陸運腳共須銀  
十六七萬兩而轉搬委員弁丁差役夫馬辛工  
飯食以及應用之蓆片布袋等必需之項均尙  
未算湖南旣無此項糴本皖省亦無此項運腳  
此陸運之難也且亦不但此也自武漢以至蘄  
州自蘄州以至六安州所過均係兵燹之區又  
均旱歉之後市肆一空傷痍滿目蘄州以上陸



運僱夫每米一石需用兩夫米四萬石需用夫  
八萬名在平常無事之時尙且斷難招僱何況  
於今至途間之攬潮霉變可慮奸徒饑民之搶  
掠可慮猶未暇計及也福濟因兵餉至艱不得  
已而有籌辦米糧之請原亦迫於勢之無可如  
何前此貴州巡撫有

勅籌米運送鎮遠之請督

臣

官文有撥漕米運送荆

州之請湖北撫

臣

胡林翼有籌米解北之咨皆

以湖南產米爲言不知湖南上年秋收雖屬中  
稔然各省若攜銀來南採買則救災恤鄰古今

通誼何況大一統之世畛域本自無分如民間  
有閉糴阻禁之事臣自當嚴行禁止若以兵餉  
爲詞責湖南籌辦米石則名爲需米實則需銀  
斷非湖南力所能及湖南同一用兵省分現在  
積欠兵勇之餉已五十餘萬兩羅掘已空若民  
間之米可以指爲官欸之銀則本省欠餉早已  
彌補一清何以窘迫如此此中情形自邀  
聖明洞鑒所有皖省米糧實難籌辦情形謹據實覆  
奏伏乞

皇上聖鑒訓示謹

奏

咸豐七年二月十九日拜發奉

硃批另有旨欽此

楚邊防軍迭捷收復江西旁縣摺

奏爲官軍攻剿吉安沿邊防兵收復江西旁縣迭獲勝仗現在辦理情形恭摺

奏祈

聖鑒事竊臣上年十月內

奏派廣東羅定協副將周鳳山同知銜優貢生曾國荃募勇取道江西萍鄉進攻安福直搗吉安府城並聲明如吉安速下則各廳縣之賊心膽已寒勢將自潰縱令不然湖南沿邊防兵亦可各由邊隘進攻共相牽制欽奉

硃批知道了欽此自周鳳山曾國荃兩軍進克安福

縣城逕逼吉安府城後所有迭次接獲勝仗情

形均由曾國藩及江西撫

臣

奏報在案安福既克

臣

即札飭駐防茶陵州鄱縣

攸縣官軍各自防所進攻江西永新永寧蓮花

等廳縣並札飭委紳知縣劉拔元訓導胡兼善

吳齊源等帶桂勇一千二百名由桂東進攻江

西崇義上猶龍泉等縣上年十二月十一十二

十三等日趙煥聯督所部湘勇一千五百人剿

永寧縣賊共斃賊百餘內賊目二名生擒偽協

理王起盛等三十八名遂復縣城餘賊遁入龍泉十五日復有三堡之捷斃賊二百餘十九日有花木垵之捷斃賊數十名是日鄆縣官軍亦有橋嶺之捷斃賊亦近百名比都司佘星元于總胡國安會江西代理蓮花廳兼永新縣知縣俞昌會兵至永新蓮花廳則賊已聞風潛竄遂入城安撫難民搜山捕匪日有擒斬而三縣一律肅清署桂東縣知縣苗如璋既督團紳擊退下堡之賊兩次斬擒近千名聲威益壯臣飭劉拔元胡兼善吳齊源等分由崇義上猶速進掩

賊不備劉拔元於十一月初七日約桂陽官紳帶勇進剿崇義於上堡地方遇賊擒斬三百餘名適江西南安府官兵繼至同復縣城其潰匪之從營前竄出者桂東桃坪汎外委范繼貞督同紳勇迎擊之亦斃賊二百餘名十三日三都紳士李召棠等擊賊於淋洋殺賊數百而上猶賊已潛遁十五日胡兼善吳齊源進剿龍泉之陽湖賊巢斃賊百餘十七日分兩路擊左安之賊賊於山坳四路設伏突起遮截官軍分枝鏖戰士卒入險各懷鬪志斃賊甚多奈眾寡不敵

殊難收隊適桂東團紳李召棠何寅清郭宗翰  
李耀南張佐胡受存何本熾李玉華等各帶團  
勇數百飛馳而來賊見援軍大至旗幟遍滿山  
谷遽反旗而奔官軍團勇躡蹤追擊縱橫蹴踘  
陣斬長髮賊約近千名奪獲大礮三十餘座旗  
幟刀矛無數二十五日劉拔元由崇義拔營來  
會徑搗左安賊巢斬首二百餘名踏毀賊營四  
座奪獲偽檢點偽監軍旗幟刀矛無數遂移營  
進駐左安嗣分路搜剿黃坑樟木坑之賊擒斬  
亦多正月初六日偽龍泉監軍率賊數千至排



村官軍分三路冒雪擊之斃賊四五百生擒九  
名奪獲大礮二十餘尊大小黃旗八十餘面刀  
矛不計燒燬賊營三座初十日劉拔元等兩營  
移駐排村而留一營於左安督辦團練剿黃坑  
賊匪各斃賊數十奪獲鎗礮三十餘件籐牌四  
面遂移營進紮錫村十六日會剿新淦仙人井  
之賊十九日會剿鵝公寨之賊二十日搜剿河  
洞樊村錫杭之賊二十三日搜剿藻林之賊斃  
賊四五百生擒五十餘奪獲大小旗幟百餘馬  
五匹鎗礮刀矛不計遂進駐藻林二十六日分

剿仙坑高畚之賊二月初四初五等日搜擒山  
峒伏匪擒斬多名初九初十等日合攻駝背樹  
賊巢踏平三壘斬賊二百餘賊退駐龍泉縣城  
縣城近歲修築形勢完固萬安之賊及崇義上  
猶永新永甯漏逸各賊均屯聚於此比官軍於  
十五日逼城紮營十七日賊五千餘分兩路出  
城來撲劉拔元胡兼善吳齊源等預伏營前以  
待比賊至伏兵突起截賊陣爲兩段橫衝側擊  
斃賊甚多賊紛紛敗潰官軍及各團勇分途追  
剿至城邊始收隊而返是役共斃賊八九百名

陣斬僞將軍李姓及騎馬賊首三名奪獲大小旗幟五十餘面刀矛鎗礮無數二十一日劉拔元等出隊攻城賊背城拒戰更番接替鏖戰五時斃賊雖多而官軍之被鎗礮傷者亦復不少臣前以劉拔元等三營兵力尙單飭桂東各團選勁勇數百繼進務期迅克龍泉賊巢肅清吉安南路庶上游勢壯而建瓚之勢可成此次楚軍援剿吉安周鳳山曾國荃兩軍陸續增至六千餘由吉安府知府黃冕前湖北藩司夏廷樾在湖南勸捐支應抵吉安以後由黃冕在廬陵

安福勸捐接濟其趙煥聯一軍一千五百人參  
將劉培元一軍六百餘人口糧則現由湖南省  
局接濟頃據吉安各軍稟報三月十二日水師  
將吉安河面賊船焚奪淨盡賊勢益孤聞廣賊  
與長髮賊不睦分夥他竄已有賊數千由太和  
縣境至萬安者其歸粵與竄楚賊蹤尙在未定  
吉安賊勢現已衰減臣當相機派撥以期兼顧  
所有邊防各軍迭獲勝仗收復城池在事紳勇  
實屬著有微勞可否由臣擇尤保  
奏以示鼓勵之處出自

天恩理合據實陳

奏伏乞

皇上聖鑒訓示遵行謹

奏

咸豐七年四月初六日拜發奉

硃批知道了著准其擇尤保奏欽此

附陳廣西賊勢披猖片

再廣西叛弁黃金亮賊首馬廷科上年糾眾謀逆竄擾恭城灌陽後卽屢次竄撲湖南道州零陵邊界均經署游擊宋廣東游擊黃輔鼎千總蕭榮芳等及各團紳先後擊退上年十二月內黃逆馬逆竄陷興安靈川兩縣正月初一日分股潛襲全州蘇鳳文擊卻之初三日蘇鳳文復督兵勇追擊獲勝賊仍退回興安靈川等縣頃據署永州府知府黃文琛稟報馬廷科向與黃金亮結爲死黨自回竄興安靈川以來復添傳

中榮宋正元朱洪英三股入夥分作五營二月二十日傳中榮宋正元朱洪英等三逆攻陷廣西柳州府城殺戮甚慘粵西有名賊首孔亞福鄧興爵毛七林滿等均各糾聚逆黨互相勾結逼近廣西省城大溶江上下百里間皆賊也桂林商民先期紛紛逃徙情形緊急又據各路探稟廣西南路北路股匪蜂起勢成鼎沸而旬月以來未接廣西文報僅據全州知州蘇鳳文請援一稟則亦但知興安靈川股匪逼近省城而西路各處土匪情形未能深悉臣維廣西金田

大股逆賊下竄以後廣東遁逃之賊本省游惰  
之民軍營散遣無著之勇各處倚衆仇殺之團  
及廣肇惠潮嘉械鬪之黨不知凡幾攻城掠野  
戕官據城聚則紅布白梃以刦殺爲生涯散則  
易姓更名以投誠爲出路旋撫旋叛倏匪倏良  
官以撫愚賊賊亦以撫誤官馴至通省良匪不  
分情狀日變戡定之方不知從何著手此次各  
處股匪羣起勾結聞人數不止十數萬之多卽  
使粵省能將就支吾其勢亦必浸淫入楚湖南  
永州寶慶兩府及靖州綏甯一帶均與粵隣永



州一府僅有藍翎知縣段瑩器管帶祁勇九百  
名遊擊黃輔鼎管帶健勇三百名千總蕭榮芳  
管帶炳勇三百名都司蔣榮華守備左光藻千  
總彭玉貴共勇七百八十名合計二千二百餘  
名邊隘過遠兵力較單深恐顧此失彼臣現飭

花翎卽選知府蔣益澧趕緊選募湘勇一千二  
百名在省訓練聽候調遣然新練之勇得力與  
否尙未可知設使南路事急恐非調記名道王  
鑫全軍回南不可但盼江西南南路局勢早轉則  
事尙可圖臣惟有隨時相機斟酌妥辦以期稍

紆

宵旰憂勤所有廣西賊勢披猖情形謹據實附

奏伏乞

聖鑒訓示施行謹

奏

咸豐七年四月初六日拜發奉

硃批另有旨欽此



桂東苗令請卹片

再已故補用同知直隸州署桂東縣事甯鄉縣知縣苗如璋自咸豐四年七月到桂東署任連年練團防剿越境助剿桂陽鄱縣郴州賊匪聿著勞績自蒙

恩擢同知直隸州知州以來遇事益爲勤奮士民愛戴不忘上年三月內江西崇義上猶龍泉相繼失守桂東三面皆賊該故員督飭紳勇屢次剿賊於崇義之金坑上猶之營前鵝公寨龍泉之大汾左安高排陽湖七嶺坑口等處均獲勝仗

在三都剿賊時因墜馬跌傷左足時值賊氛甚惡並不乞假調理臣深知其誠疊加慰勞該故員忠義奮發不避險艱嗣臣委該縣紳士候選知縣劉拔元候選訓導胡兼善吳齊源練勇一千二百名越境進剿該故員力疾籌畫軍事纖細必周仍以傷疾舉發旋即身故任所除隨身一弟外並無親屬諸士民入署殯殮時發其柩篋僅公服數襲碎銀數兩而已相與痛哭致膊以歸其喪尤近今州縣所僅見者臣以該故員苗如璋廉介質實秉性醇篤深得民心本擬於

東路案內錄其勞績以知府列保茲竟因傷疾  
舉發遽爾殞命實堪悼惜合無仰懇

皇上逾格鴻慈念該故員苗如璋歿於

王事

加恩晉贈知府卽照知府例

賜卹以憫勞臣以叨廉吏出自

聖裁謹附片陳

奏伏乞

聖鑒訓示施行謹

奏

咸豐七年四月初六日拜發奉

硃批另有旨欽此

援江官軍克復新喻進逼臨江挫後復勝摺  
奏爲援江官軍克復新喻縣城屢獲大勝進逼臨  
江府城挫後又迭獲大勝現復增調勁勇繼進  
恭摺馳

奏仰祈

聖鑒事竊楚軍克復袁州府城分宜縣城後江西西  
路諸賊仍堅踞瑞州臨江吉安三府城池普承  
堯劉騰鴻等圍剿瑞州之賊屢挫兇鋒周鳳山  
曾國荃等時方從萍鄉進克安福縣城直搗吉  
安臣維江西西路大勢北則瑞州南則吉安而



臨江介居其中相距均不過百數十里東北距  
江西省城亦不過百數十里又東當撫建兩府  
之衝形勢最要克袁之後宜竟圖臨江庶北可  
絕瑞州逆賊之援南可孤吉安逆賊之勢東可  
控禦撫建西可翼蔽袁州卽飭按察使銜江西  
卽補道劉長佑率所部五千人由分宜進剿新  
喻以攻臨江之西南道銜卽選知府蕭啓江率  
所部三千五百人由萬載進復上高以攻臨江  
之西北惟時吉安諸軍兵力尙單前兵部侍郎  
臣曾國藩咨調蕭啓江所部參將劉培元之長

勇六百及守備黎德盛千總伍化蛟鳳勇六百  
赴吉助剿臣以蕭啓江一軍由上高前進須取  
道臨瑞兩郡之間伏賊尙多兵力不可過單復  
調駐萬載縣之參將田興恕新舊虎威軍一千  
二百餘益之仍與劉長佑分道前進劉長佑留  
遊擊黃三清守袁州自率所部四千五百人進  
駐分宜上年十一月二十三日擊賊於分宜城  
外五里之白田圩殺賊百餘生擒二名賊悉退  
踞新喻縣城築壘寶山以阻我師劉長佑於十  
二月初九日督勇進剿先攻寶山賊壘平之乘

勝尾追賊悉眾抗守大頭山義勇頭目何益發李長齡楊相等猛撲之劉長信膽勇由左右潛襲其後賊潰入城義勇人立復新喻縣城餘賊退踞羅坊劉長新喻探報僞逆目五十五檢點程姓由賊數千合臨江之賊及上高之賊共黃羅坊之賊由水西來襲官營正在羅坊卡劉長佑恐賊營壘既堅難以遽拔遂定擊之十九夜會諸營飽食銜枚馳奔十日黎明直搗賊巢斃賊四百餘名

賊目三名生擒十五名奪獲大小旗幟七十二面大礮一尊抬鎗十七桿鳥鎗二十桿刀子四百餘件籐牌八面偽印三顆黃傘黃巾等件無算遂進駐羅坊羅坊距臨江府城僅六十餘里其地當吉水峽江新淦之衝皆賊藪也臨江賊目潛邀吉安各屬之賊合力以撓官軍之後劉長佑調駐袁之遊擊黃三清帶所部五百人移駐新喻爲官軍後路聲援而自率四千五百人進駐黃岡二月初八日復移營進駐太坪墟之前五里臨江賊偵我營壘未固率賊撲營官軍

逆擊之賊不戰而退劉長佑知其有伏潛令守備崔大光義勇頭目李長齡何益發及都司鄧世堂守備黃承綱鄭金華等分途搜剿正與賊遇奮擊敗之斬賊二百餘生擒五百奪獲大小旗幟十四面鳥鎗藤牌刀矛百餘件十三日賊萬餘來撲營劉長佑令諸營堅壁勿出賊見官軍甚整不敢遽進乃列陣於左橫亘數里右路之賊伏於山後而以中路之賊誘我劉長佑俟至日中見賊旗幟稍亂開壁擊之楚勇李德昌戴盛寬楊立德等怒馬斫陣賊衆披靡大隊三

路擊鼓揚旗繼之賊遂大潰中右兩路騎馬賊數十殿後力拒追兵卽選同知直隸州知州劉坤一督鎗礮隊從後轟擊馬驚而逸其踐踏死者無數陷人水田者皆被官軍刺斃追至近城數里始收隊回營是役約殺賊四五百割取首級一百八十七顆生擒賊十五名奪獲黃馬褂一件黃風帽三頂大小旗幟三十九面拍鎗十九桿籐牌九面刀矛四百餘件十五日賊復來撲營劉長佑擊之斬其先鋒悍賊十餘十七日賊所遺之撫建賊匪及皖鄂竄來之賊紛至人

數約四五萬而臨江通吉安之河忽來賊船數十上駛至江口劉長佑悉力禦之令營後多撥鎗礮隊並多發火箭火彈循岸擊之兩路鏖戰自辰至未賊始敗退焚賊戰船八隻擒其水手七八人始收隊回營二十日賊復大舉來撲營盤列陣二十餘里五色旗幟遍布田野劉長佑令各營堅壁以待俟賊近則鎗礮輪擊賊數進數退相持未決右路之賊忽繞出營後袁河伏賊齊出是時南風暴作火箭飛入右營營中火起劉長佑率所部親兵往來督戰耳受矛傷劉

坤一鄴世堂黃承綱千總蔡呈祥百長虞德乾  
夏永寬龍玉堂向鵬飛等各督所部血戰賊死  
傷相繼仍四面如潮而進劉長佑知營壘且陷  
抽佩刀自刎親兵奪護擁之上馬突出重圍賊  
衆追及守備崔大光百長李盛魁楊立交鄭榮  
華徐上健戴盛寬曹光文李邇光義勇頭目李  
長齡何益發舒進堂任加貴等回馬衝擊斬先  
鋒數悍賊賊稍卻適分宜飛虎軍盧秀鋒率所  
部馳至留駐新喻之遊擊黃三清亦率所部祁  
勇五百列陣江岸迎之遂退保新喻是夜潰勇



突圍出者寥寥輜重全失劉長佑憤不欲生各營文武均誓滅賊雪恥以相慰藉而分宜宜章萍鄉各縣士民感念劉長佑舊恩相率齊團助堵不期而集者七八千人復助以錢米資以器械越二日潰卒復集而軍聲速振矣二十四日劉長佑調集部卒四千進屯新喻城外二十七二十八兩日賊之踞羅坊者連次來撲官營覘士氣復盛復自引退劉坤一以官軍新挫之後不可示弱遂整軍分兩路進行十里許遇賊順化舖遊擊李承立率楚勇黃三清率祁勇崔大

光率膽勇劉坤一自率楚勇義勇飛虎軍遠前搏戰祁勇唐三祚等躍馬斫陣各勇張兩翼繼進崔大光王高來等各手刃數賊攀其大旗祁勇吳興德楊方遵橫躍入陣立斬偽總制趙必得而奪其馬搜獲偽印一顆並斫傷偽將軍宵正魁右臂中路賊遂大潰鄢世堂漆盛年盧陵漢等亦將右路賊擊敗合隊掩殺追至羅坊始還計殺賊二百餘割首級一百零五顆生擒偽司馬李才興等六名奪獲黃衣黃緞馬褂黃號褂共十九件各色綢布大小旗幟七十二面抬

鎗鳥鎗十六桿籐牌七面刀矛二百餘件馬一匹賊退踞大坪墟十七日復糾集鶯哥嶺擊敗之賊及吉水賊萬餘撲營已至陽江橋劉長佑飭劉坤一李承立黃三清崔大光盧陵漢等分三路設伏待之而以正兵禦賊甫交鋒卽僞退誘之賊大隊來追伏兵四起截賊陣爲數段橫衝側擊斃賊甚多有騎馬二賊日率餘賊將由水西浮橋竄過適水西居民苦賊淫掠已將浮橋拆斷官軍三面薄之盡投水而死是役斃賊七八百割獲首級二百一十五顆生擒三十餘

名奪獲大小黃旗及雜色旗二百零八面黃風帽六頂黃馬褂二十八件抬鎗十九桿小鎗二十一桿籐牌九面火藥六桶刀矛鋼叉三百餘件馬四匹大轎四乘輜重五十車水西居民報賊屍之浮水者四百餘官軍亦陣亡百長一名散勇七名受傷二十七名仍進駐羅坊此劉長佑一軍克新喻後連獲勝仗進逼臨江府城敗後兩獲大勝現復進駐羅坊之實在情形也其蕭啓江一軍於上年二月十三日剿賊漢塘地方少有擒斬十三日進復上高縣城賊聞風而

逃搜剿餘匪數十名正月二十七日進擊高安  
鶯哥嶺之賊即補遊擊楊恒升由左路進斃賊  
百餘守備田興奇由右路進斃賊百餘蕭啓江  
擊中路亦斃賊百餘追至前溪賊被追急溺水  
死者無數陣斬偽監軍姜萬祥偽總制艾得勝  
等奪獲大小旗幟一百三十三面拍鎗十三桿  
烏鎗十一桿偽印一顆馬一匹賊退竄湖坊官  
軍即移駐鶯哥嶺二月初三日臨江賊邀皖鄂  
援賊一萬數千分由封神廟劉公廟天符廟來  
撲官營蕭啓江楊恒升及補用參將田興恕亦

分三路迎擊自辰至未鏖戰數時斃賊四百餘  
生擒十四名奪獲偽印四顆刀矛鎗礮無數初  
八日賊復分四路由封神廟劉公廟雌陂橋湛  
頭墟前來冀誘官軍出擊則分路抄襲之蕭啓  
江飭各營堅壁勿出潛分四哨伏於江家村以  
待四路賊旋進旋退官軍俟其稍懈奮起擊之  
田興恕由中路楊恒升由左路蕭啓江由右路  
至前面山下復各分三路旁抄而遠裏之田興  
恕躍馬陷陣射斃騎馬賊目一名中路賊稍卻  
各路奮威衝殺陣斬偽將軍一偽旅帥一賊始

大潰正合隊掩殺間忽湛頭墟之賊由右路抄出官軍之伏於江家村者突起截之此股賊亦敗退乘勝追至峽前蕪坊始收隊還計斃賊四百餘奪獲大小旗幟百餘件鎗礮刀矛雜械數百件賊以鶯哥嶺官軍已得地勢驟難攻襲遂糾撫建吉安之賊及臨江大股並攻太坪墟官軍營盤劉長佑敗後賊悉眾復撲蕭啓江鶯哥嶺官營臣以蕭啓江一軍尙單飭增勇一千以厚其勢補用同知直隸州知州劉騰鴻副將曹承堯以臨江瑞州兩府城相距僅二十里而鶯

哥嶺適介其中臨江賊急於援瑞旣撲陷太平  
墟營壘必力圖攻鶯哥嶺官營遂撥湘勇寶勇  
一千五百名馳往助之二十三日鶯哥嶺之  
日賊果悉眾來犯列陣兩重每重約十餘里旌  
幟森列氣殊驕甚蕭啓江田興恕楊恒升等會  
瑞州官軍分四路應之賊逼溪而陣箕踞謾罵  
一枝從簡家山下過橋冀抄官軍後路楊恒升  
揮勇直前鎗矛疊進斃先鋒賊十餘賊殊死鬪  
劉騰鴻所遣湘勇營官周福昆李寶賢等繼至  
更番迭戰賊漸不支楊恒升周福昆李寶賢合



隊掩殺追過簡家山中路賊見右路賊已敗無  
心戀戰官軍且戰且追甫及封神廟伏賊復起  
適寶勇營官普承忠接應軍到截擊之伏賊亦  
敗田興恕既敗左路之賊率隊窮追忽伏賊突  
出外委周原酬陣亡田興恕與守備彭定勝怒  
馬衝入重圍所乘之馬均被鎗礮轟斃田興恕  
左腕被鳥鎗子傷仍下馬步戰各手及數賊賊  
仍敗退適劉騰鴻率勇數百馳至遂分途收隊  
回營劉騰鴻蕭啓江田興恕楊恒升等會商賊  
已喪膽當乘勝挫之二十五日卯刻分三路進

一搗湛頭墟一搗封神廟一搗劉公廟賊巢賊  
仍列陣抗拒劉騰鴻普承忠等將至湛頭墟復  
分三路截賊陣爲兩鎗礮之後繼以刀矛殺大  
旗賊十餘及乘四轎賊目一士氣百倍適守備  
李大雄復帶所部繼進合隊掩殺斃賊近五百  
生擒賊十八名奪獲旗幟百餘抬鎗烏鎗數十  
件蕭啓江楊恒升至彭家村亦各分數路左右  
抄截賊不能支官軍縱擊四面蹴踏斃賊四五  
百生擒賊二十餘奪獲大小旗幟七十六面抬  
鎗烏鎗及雜械號衣不計其數合計二十四二

十五兩日蕭啓江一軍及劉騰鴻自瑞分援之  
軍擒斬以千數百計而兇鋒大挫矣劉騰鴻以  
驚哥嶺大營爲瑞州後路屏蔽仍留勇一千七  
百名助守而自率親兵馳回瑞州此蕭啓江一  
軍及瑞州分援之軍迭獲大勝實在情形也

臣

維臨江一府居江西西路之中瑞吉之賊恃其  
接濟資其援助瑞州之賊自兵部侍郎曾國藩  
由奉新移駐大營督掘壕塹三十餘里勢已窮  
蹙所以堅踞如故者惟盼臨江之援耳臨江賊  
數先不過萬餘自安徽湖北之賊由彭澤湖口

上竄江西饒廣一帶都司畢金科陣亡之後江西東路南路無兵阻截而牽制之故賊眾得悉由撫州建昌以分援臨江吉安兩郡之賊而其注意尤在臨江者實欲由此以通瑞賊之氣也通計江西一省七郡未復皖鄂之賊廣東後附之賊及本地奸民從逆者人數何止十餘萬之多而閩浙廣三省無援剿之師該省兵勇又成積弱之勢所恃以悉力支持者惟湖南一省援臨吉兩軍及湖北援瑞一軍而已劉長佑一軍由臨郡西南而進既須剿臨江之賊又須防吉

安之賊及撫建之賊從新淦峽江以繞襲其後

臣原擬蕭啓江一軍由臨郡北路而進漸逼漸

近則兩軍聲息可通氣勢稍壯不意賊援大至

兩軍兵力皆單蕭啓江一軍阻於鶯哥嶺未能

速進劉長佑率所部四千五百人獨進太坪墟

卒有二月二十日之挫臣得報後以本省北路

現尙無虞而臨江賊勢披猖若不力挫其鋒則

瑞吉兩郡官軍皆難自固而江西大局愈不可

言卽夜飛調駐岳州之記名道王鑫帶所部勁

勇三千馳往接應又慮劉長佑新挫之後未能

復振調臣上年新練楚勇一千交藍翎同知銜  
卽選知縣江忠義遊擊王一芝馳往歸劉長佑  
統帶以期得力一面飛飭蕭啓江等固守鸞哥  
嶺以遏臨賊援瑞之路幸仰仗

天威王鑫江忠義兩軍未到之先劉長佑一軍復振  
連獲勝仗又自新喻進駐羅坊而蕭啓江一軍  
又得劉騰鴻之助亦能痛掃狂氛屢獲全勝於  
援江大局尙無所損臣已密飭王鑫不必專注  
一隅惟確偵悍賊大股所在星馳雕剿庶吉臨  
瑞一帶有此一枝勁旅策應足以牽制逆賊而

不至爲賊所牽制三城有一先下則兵力足敷  
調遣自可尅期掃蕩統計湖南出境兵勇其由  
本省支發口糧者臨江吉安已一萬六千餘名  
每月需餉銀九萬兩有奇其吉安瑞州各軍不  
由省局支發人數已近二萬曠日持久歲事無  
期時深焦灼此次按察使銜江西卽補道劉長  
佑營壘被賊撲陷應請

旨將該員嚴加議處惟失利之由實因衆寡不敵劉  
長佑曾受重傷挫後四日整兵復進迭獲勝仗  
究屬忠奮雖據該員稟請嚴叅治罪可否免其

置議之處出自

天恩其陣亡員弁勇丁已飭劉長佑確查具稟以憑  
核奏分別請

卹以慰忠魂所有援江各戰情形理合據實陳

奏伏乞

皇上聖鑒訓示施行謹

奏

咸豐七年四月初六日拜發奉

硃批另有旨欽此



1094

1111

酌保堵勦湖北江西各股匪出力文武官紳摺  
奏爲遵

旨酌保截勦由鄂南竄股匪及東路各路堵勦江西  
股匪在事出力之文武兵勇團紳開列清單懇  
恩鼓勵事竊湖南上年出師援江之後因江西西路  
贛州以北逕抵瑞州千數百里均淪於賊該逆  
竄犯瀏陽攸縣茶陵州鄱縣桂東各州縣邊界  
均經臣派撥官軍團勇擊退獲勝業於上年五  
月十七日彙案

奏報旋於六月初六日奉到

殊批知道了著准其擇尤保奏欽此其時江西賊氛甚熾而湖北崇通股匪乘間狂竄入境妄圖牽制援江之師復經臣督飭官軍截擊疊獲勝仗餘賊奔逸出境於七月初九日具

奏七月二十七日奉到

殊批此次出力之將弁兵勇並准其彙保欽此臣維湖南與江西西路壤地毗連自北至南一千四百餘里賊之竄擾江西也先陷西路瑞州臨江袁州吉安四府而後陷撫州建昌兩府城池跡其由西而南轉而東趨其陰謀詭計必欲隔絕

楚援使豫章成坐困之勢迫援師克萍鄉萬載  
漸進袁州江西之賊恐援師深入遂嗾武昌之  
賊分由北路迅速南趨馳騁於江楚之交覬牽  
動援師而擾餉道而自吉安失守之後賊衆之  
分股犯我攸縣茶陵鄱縣桂東桂陽各州縣者  
警報紛來均經官軍團紳隨時擊退自上年十  
一月援軍復由萍鄉進克安福縣城逕搗吉安  
以扼其衝湖南邊防諸軍各收復接壤之江西  
永新永甯蓮花廳崇義上猶各縣城池以孤其  
勢而後江西之西南湖南之東南始漸就安謐

計自逆賊犯江西以來湖南東路遍設防兵輔以團勇視其緩急以爲調遣爲時一載有餘不獨各州縣城垣幸免賊蹤闖入卽村莊界隘亦少被其蹂躪者卽由北竄南一股風馳雨驟所過之處受害頗多猶幸官軍追及兩次痛勦甫越旬時卽行掃蕩於援江大局終無所損此皆仰賴

皇上天威遠被得免疎虞而亦諸文武員弁紳勇踊躍用命之效也臣謹擇其出力較多勞績稍著者繕列清單恭呈

御覽伏懇

皇上天恩加以甄錄庶敘前勞而期後效臣亦得稍  
收指臂之助矣謹恭摺附

奏伏乞

皇上聖鑒訓示施行謹

奏

咸豐七年四月初六日拜發奉

硃批另有旨欽此

三才圖會

卷之四

四

覆陳查辦捐輸廣額並裕道被參各欸摺

奏爲遵

旨查明據實覆

奏仰祈

聖鑒事竊臣於四月二十四日承准軍機大臣字寄

咸豐七年四月十一日奉

上諭有人奏湖南省各廳州縣捐助軍餉自數萬至數十萬不等未經按照定章奏請加廣學額中額民間幾疑獎敘之典爲虛文請飭核實彙奏各等語各省捐助軍餉其按照定章經督撫請加中額



學額者無不立沛恩施湖南以一省防勦數省並  
籌應兵餉五載以來民間捐輸不少自應及早查  
明彙奏請獎著駱秉章卽將該省各廳州縣捐銀  
並合省共捐銀數目已未收銀若干查明核奏另  
片奏湖南候補道裕麟由捐納通判夤緣保升知  
府因岳州府缺出規避朦捐保升道員該員署零  
陵縣時有至差役家賀喜索謝千金之事署鹽道  
任內有加增鹽引價值病民之事現委總理捐輸  
局五年之久未經覈數請獎恐飽私橐各等語著  
駱秉章按照所指各款詳細查明據實嚴叅毋稍

狗隱原摺片均著抄給閱看將此由四百里諭令知之欽此臣當飭省局司道各員欽遵查辦加催各屬造報捐輸實數應加學額中額若干名尅日詳請彙

奏竊湖南自咸豐二年開籌餉捐局截至本年二月

奏請獎敘者共九次一十八案

奏報捐監四案又將防堵礮船等局捐數及在外省報捐請敘數目彙案查核約及加廣學額之數者四十餘州縣其所以未能及早彙

奏者約有數端從前接准部咨廣額以應加銀數  
四分之一爲定彼時湖南捐輸之繳加一銀數  
者甚屬寥寥無從查辦迨至五年十月續准部  
咨無論捐輸援例俱准歸併核算不必定限四  
分之一銀數一體准其補請加廣中額學額等  
因旋卽通飭造報而各州縣或以防勦正急竭  
蹶未遑或以奉文撥發勇糧撥兌營餉尙須移  
取鈐領印收賫司始可據爲收欸或商民捐輸  
未註籍貫尙須輾轉行查文札往返動稽時日  
此未能及早彙辦之一端也湖南本省捐務以

捐輸局爲總滙捐輸局之外又有船礮局所勸之捐然近在一城固屬無難查核至此外兵部侍郎臣曾國藩給札委勸之捐湖北撫臣胡林翼指地委勸之捐則由曾國藩胡林翼隨時發給部照實收未及行知湖南總局此外更有廣西所勸之捐及江西所勸之捐各捐生挾貲而來領照而去並未呈請註冊此次奏請廣額若不彙歸各州縣捐數辦理則同一捐輸助餉同一領獲執照實收而有歸入廣額不歸入廣額之殊既無以釋羣疑而昭畫一若彙歸各州縣

辦理則文案無從稽核又何以重

曠典而杜混淆原奏疑湖南彙奏請獎之需時不知  
湖南捐輸頭緒紛繁視他省爲尤甚查辦較難  
求一一周詳彙核自需時日此又未能及早彙  
辦之一端也計捐需之多寡而酬以實職虛銜  
復綜捐輸之多寡而廣其學額中額此誠曠世  
難逢之

盛典湖南應試生童向苦人多額少一聞學額中額  
可以按照捐數增廣無不各懷望澤之心臣於  
前此札催各屬彙報捐數之時並諄飭核捐印

委各員如各屬有希圖多增廣額者卽迅速多捐以邀

恩獎節據各屬稟報有已捐未繳急欲催齊者有正在廣爲搜羅冀可多增名數者其毋庸補足者固惟恐出奏之遲其尙須補足者且轉慮出奏之速一省之大六十餘州縣之多情形安能一律要之廣額之催飭頻仍有目共睹羣情鼓舞方殷並未聞有疑捐輸獎敘之典爲虛文者此又未能及早彙奏之一端也長沙善化兩縣前奉

旨增廣學額原以示異數而勵人心臣先後

奏蒙

皇上天恩准加新甯湘鄉平江三縣學額蓋湖南鄉  
勇越省從征以新甯之楚勇湘鄉之湘勇爲最  
著其士民以殺賊立功著績者多至數百而死  
緩赴義帶傷成廢者亦各不下數千之多平江  
當江楚間道之衝守禦五年賊不敢犯復能以  
餘力出境勦賊斯皆義烈奮發炳耀鄉邦不獨  
其納粟輸財足膺保敘臣之首先陳  
奏原冀此邦人士聞風興起益鼓其忠愛之良實

非於各屬捐輸稍存歧視之見至原奏湖南勸捐各官屢見保奏升階不一其人獨於學額中額未聞核數彙奏湖南各屬勸捐各官至今尙未

奏請

獎敘正以經手捐項造報未竣之故言者稱屢見保奏不一其人未知何據現據總局司道詳稱清查各屬捐項及捐生名數業已漸有頭緒即可詳請彙

奏此查辦廣額之實在情形也至另片所奏候補



道裕麟各款臣密飭藩司文格卸署臬司謝煌  
逐款詳查已據查實詳覆如原奏湖南捐輸局  
係委裕麟總理一切報銷均出其手所有各州  
縣保舉人員經總局查核然後達於司院一任  
私意上下其手一欵查湖南自咸豐二年以來  
於藩司署內設立捐輸局軍需局皆藩司總其  
成軍需局則臬司糧道鹽道會同辦理名爲總  
局五年六月臣因捐輸局務欵目繁冗案牘積  
壓已多急需經理裕麟時署鹽道事務尙簡札  
委會同新任藩司文格辦理所有銀錢向歸藩

庫兌收如撥軍餉亦係由藩庫開支由軍需局  
領發裕麟在捐輸局祇會同藩司辦理勸捐催  
繳事宜不經管銀錢不經管支應將來報銷概  
由軍需局核辦並無一切報銷均出其手之事  
尋常州縣保舉向由兩司會詳不關總局至各  
路軍需保舉由各路軍營將領開報地方官紳  
由道府州縣開報逕達臣衙門統由臣核實保  
奏並不由總局會詳間有應行查核者由臣發交  
總局司道核擬亦係司道公同商酌會核詳覆  
由藩司主稿裕麟一人何從任意上下其手總

局既司道會辦之局更何有由總局達司之說此固不辨而自明者也原奏該員由捐納通判到楚未曾任正印官不知如何鑽管越級保升知府前此岳州府缺出值賊匪蹂躪之餘辦理棘手輪資應補伊正到班乃在捐輸局內指萬金爲助捐之項朦混保奏以道員升用試思彼在湖南候補十餘年未經實授既不能攜帶家財在官報效亦未必有廉俸所蓄以之倡捐只以擇缺私心遂藉冒捐之便以佐規避之巧僚屬共知其譎上官偏受其欺一欵查裕麟由捐

納通判分發湖南於道光二十四年到省歷署  
知縣八次至咸豐二年防守省城出力經前督  
臣徐廣縉等保

奏奉

旨免補本班以同知直隸州補用三年因勦辦瀏陽  
徵義堂土匪出力保

奏奉

旨俟補缺後以知府升用先換頂戴四年因勦辦太  
和土匪出力保

奏奉

旨免補同知直隸州以知府留於湖南卽補是年克

復岳州案內經禮部侍郎臣曾國藩保

奏奉

旨以道員升用嗣捐輸船礮錢一萬串經臣保

奏奉

旨遇有湖南道員缺出請旨簡放六年湖南酌保團

防案內出力人員湖北撫臣胡林翼籌辦軍需

各員兩案內均奉

旨賞戴花翎七年湖北撫臣胡林翼查保籌運糧餉

軍火各員案內奉

旨著賞加按察使銜並交部議敘歷次按階保升並非越級至前岳州府知府賈亨晉於四年二月失守開缺

奏請

簡放奉

旨著魁聯補授其時裕麟以知府卽補之

諭旨尙未奉有部文不獨非實缺知府亦並非卽補知府嗣魁聯升授福建汀漳龍道岳州府開缺時裕麟已奉

旨以道員升用原奏所稱輪資應補伊正到班不知

何據且岳州府本衝繁疲難四字要缺歷係請  
旨簡放例不由外請補卽奉

旨於通省知府內揀調亦祇能揀實任人員具

奏岳州非外題之缺裕麟無可到之班無所庸其

規避又查該員捐輸船礮局錢一萬串保

奏奉

旨之時在岳州府兩次

簡放有員之後其無擇缺私心尤可概見至各員竭  
誠捐餉分所應爲原不宜一一問其由來致傷  
政體裕麟雖在湖南候補十餘年未經實授然

其父曾任粵西府道數十年亦安知無積存廉俸豈可因其捐貲助餉遂啓猜疑至云在捐輸局指萬金爲助餉之項朦混保奏等語查捐輸銀錢向係逕繳司庫不由捐輸局彈收何從供其挪用裕麟捐錢一萬串經船礮局彈收然後出奏何能任其朦混總局司道及船礮局紳臣無數日不接見之人如果裕麟實有冒捐之事道路皆知誰肯代爲掩飾現據詳覆實無其事且所捐實止制錢一萬串亦與原奏萬金不符不知原奏僚屬共知其謫上官偏受其欺果何



所據也原奏裕麟曾署零陵縣事其本任官爲  
胡廷槐因鄉試調入內簾伊得委署不過數月  
肆其貪索民不堪命有聯云胡宰再來天有眼  
裕官不去地無皮又有聯云裕貴足民剝民自  
足安用裕麟宜仁物接物不仁何爲麟又云時  
有差役娶妻裕麟賀喜索謝千金之事一款  
裕麟署零陵縣知縣係道光二十六年七月因  
本任知縣胡廷槐卓異引

見進京裕麟以審結奏咨京控及提省委審各案五  
十餘起由前任藩司詳准酌委署理斯缺至二

十八年二月卸事並非胡廷槐調簾之缺裕麟  
在署任一年有餘亦不止數月之久計距今已  
十餘年均臣與藩臬兩司未到任以前之事原  
奏係得之傳聞既無案卷可查亦無實證可指  
適卸署糧道前永州府知府徐家瑞候補知府  
前零陵縣知縣胡廷槐皆在省城臣比卽密飭  
據實稟覆加以面詢據徐家瑞稟稱職道於道  
光二十七年四月赴永州府知府在時裕升道  
正署零陵縣事官聲甚好頗愜輿情查零陵差  
役俱極窮苦從無千金之人如果差役娶妻官

爲賀喜必致傳報紛紛盡人知曉何以職道在  
永六年之久從無提及以爲笑談者至對聯語  
旬職道近在同城並無聞見胡廷槐稟稱卑府  
於道光二十六年七月初一日卸事二十八年  
二月初三日回任接見紳耆詢以近事俱稱裕  
官辦事精明聲名甚好未聞有至差役家賀喜  
索謝千金並編有聯句之事所有飭查各款毫  
無聞見臣復密札現署零陵縣知縣楊鼎勳詳  
查稟覆亦大畧相同又據藩司文格署臬司謝  
煌等會詳檢查舊卷該道從前歷署各缺均無

赴司控告之案對聯更無所聞言者所指該員貪鄙無恥大率類此卽如此欸已無實證原奏湖南鹽價川鹽粵鹽每斤不過三十餘文裕麟於署鹽道時增至六十餘文又因湘潭鹽商較多敦請涂姓入署誘之以利許之以官商派數家爲官行合議增價把持涂姓恐衆不服未允於是湘潭鹽價三十餘文而省城鹽價六十餘文至今漸次長至百五六十文一欸查湖南例食淮鹽州縣居十之八道光二十九年至咸豐二年春夏前兩江督臣陸建瀛改行票運時鹽

價最減每斤三十餘文自咸豐二年冬間長江道梗淮鹽片引不至民間所食惟川粵之鹽市價長跌不同長則每斤七八十文跌則每斤六十餘文五十餘文不等從無原奏所云賤至每斤三十餘文之事本年春間湖北宜昌府城被陷商販阻絕鹽價增至八九十文百文旬日之間宜昌收復鹽價旋平亦無如原奏所云長至百五六十文之事湘潭距省城九十里順風下水半日可到如省城鹽價多一二文則湘潭之鹽爭赴省城頃刻即到商人趨利若鶩自然之



局試辦適江西路梗浙鹽不來因遵照戶部奏定設卡抽稅章程於郴州宜章設卡分抽粵鹽楚茶釐稅該道遵札於署外設立專局督同官紳辦理以杜丁書差役需索之端並無請涂姓商人入署之事且查湘潭各商亦並無涂姓其人原奏不知何指鹽爲民生日用所必需城市口岸處處售銷從何設立官行鹽少則價長多則價跌從何把持所稱派數家爲官行合議增價把持遍查實無其事原奏裕麟曾愆愆臣請行淮引或奏請以茶易鹽於時勢萬不能行者

希冀其行無非藉爲增價之計一歛查淮鹽自江運中梗行銷無路於是淮之丁商楚之民人均受其困而

國課因之每歲坐失數百萬金之利臣前此請行淮鹽原以淮鹽產多價賤自改行票鹽之後成本更輕較之川鹽所產既饒較之粵東官鹽價值又賤至兩倍以外最利行銷原摺所陳本爲詳盡嗣浙江撫臣恐其侵占浙引執奏不可請以浙鹽運楚而後有浙鹽楚茶互易之議戶部議



奏欽奉

寄諭令臣與浙江撫臣悉心酌議是行銷淮鹽之請  
自臣言之以茶易鹽之請戶部奏之言者乃指  
爲裕麟愆愆臣奏請藉爲增價之計亦不可解  
且卽以行銷淮鹽而論亦正爲平鹽價起見何  
謂增價乎無論鹽價增減非官所能主持卽令  
鹽價頓增民受其累官亦何從取其利此又不  
辨自明者也原奏裕麟現在捐輸局董事恐貪  
汚素習必俟布置開銷然後能核定捐數奏報  
查捐輸局既不經理銀錢分文皆歸藩庫彈收

註冊是銀錢之入與之無干軍餉支應係軍需局由藩庫領發是銀錢之出亦與之無干既不開銷何須布置所慮私飽囊橐斷無其事原奏人才進退之間所關匪細彼以好利得官其所得必好利之輩彼以夤緣升秩其所進必夤緣之人又稱省垣有幕友當權捐班用命之謠是因叅劾裕麟並連及湖南官紳幕友臣查裕麟奉札會辦捐輸局之外其專管爲鹽茶釐金局爲東征水師後路糧臺鹽茶釐金設局之始臣以事屬創行商情民隱均當體驗會飭該員應

仿唐臣劉晏用士流不用吏胥之意於署外設局擇官承辦招致廉樸紳士助之一洗向來官署陋習俾書役不得因緣爲奸所派委各卡局官紳均與總局司道隨時商酌由臣核定給札辦理其承辦官紳有經理未能妥協者卽隨時查撤試行至今頗著成效湖南籌餉捐輸而外以鹽茶釐金爲大宗年來勉強支持深賴其力其辦理茶稅及百貨釐金事宜所以尙未具奏者實因規模甫定仍須隨時察看損益以期周妥一經奏定則後此難於更解轉多窒碍也所

委官紳既多求其一一妥協固難然必謂所得皆好利之輩所進必夤緣之人實無此理無論裕麟一候補道員無進退人才之柄且或委或撤皆須諮商司道由臣核定固非裕麟所能專主也至所稱省垣有幕友當權捐班用命之謠言者自謂留心察訪似非無因臣維官之有幕天下皆然幕友所辦之事皆官之事然必本官裁決定奪而後施行是官之權非幕友所得干也如有不肖之幕本官縱爲其欺朦事跡豈能免敗露何以省垣有此謠言而臣等一無所聞

乎至人才量能器使本無科甲捐班之分則又  
不足言也總之裕麟管理各局既久皆籌餉要  
務任事之人無不任怨之理局外者不能詳悉  
局中曲折輒生意外譏評或因請託未遂其意  
或因嫌怨專求其疵勢所難免該員於上年今  
春三次稟請給假回旗葬親臣以籌餉大局緊  
要囑令暫緩該員亦曾稟及局外疑忌太多恐  
招物議不意蜚語流傳竟至上達

天聽也據藩司及卸署臬司按欵查明均屬子虛會

詳請

奏前來臣覆加密核無異查該道裕麟所管局務  
皆籌餉要需未便以浮言致悞軍需所有各局  
事務仍飭照常辦理謹一併據實覆

奏伏乞

皇上聖鑒訓示謹

奏

咸豐七年五月二十八日拜發奉

硃批知道了欽此

STATE OF INDIANA

PLAT

111

援黔官軍攻克金山錦屏馳抵黎平府城摺  
奏爲援黔官軍攻克金山收復錦屏迭獲勝仗馳  
抵黎平府城現在辦理情形恭摺由驛

奏報仰祈

聖鑒事竊臣前奉

寄諭調撥官軍馳抵黎平當將籌辦情形陳明在案  
維時臣所調甘肅參將萬年新等已帶兵勇馳  
赴靖州駐州西之藕園通判銜儘先訓導丁際  
可所部靖勇駐州西南之沙堆守備熊興栢張  
萬書帶所部勇駐州西之大由鄉一帶萬年新



抵防後傷

氣告病者

琛募所部

錦屏鄉失

靖州西路

州西北境

月二十五

九坡扼之

夾丁際可

陷陣立斬

儲開香文童戈鑑會熊興柏等分隊衝殺斃苗百數十生擒三名二十九日逆苗復來撲營丁際可督勇奮擊陣斬百餘割獲首級五十餘顆其被劈山礮轟斃及帶傷逃走墜落巖澗者不知其數兩戰斬殺雖不甚多而奪獲旗幟器械共數百件逆苗岷強山谷未睹兵威素聞楚軍能戰至是果被兩挫而兇鋒已收斂矣臣以萬年新連稟病勢加增斷難速愈擬易人統帶又恐兵將兩不相習卒難收功而黎平實有可乘之機時不可失比卽飛催兆琛增募龍勇五百

合成八百之數加調花翎同知吳自烈募帶舊部幹勇六百名自鎮筸迅速會剿俟兆琛等齊抵靖州則撤萬年新等一軍以節虛糜而收實效本年二月二十日兆琛等始抵靖州會同署靖州知州鄂峰上言黎平府屬兩廳二縣三縣丞所轄之地均被蹂躪殆盡逆賊分匪苗二種匪首余老科逆苗頭目龍大汝卽龍才貴起事雖不同時而古州鎮城之陷則兩逆互相勾結所致賊自則有龍啓英楊宗保吳正修潘大旺大金花小金花等均狡猾流匪更有古州高坡

苗狝仲苗及下江廳屬之生苗永從縣屬之祠  
苗多被煽惑焚殺奸淫肆無忌畏黎郡客民經  
該匪苗等驅逐房屋均成焦土轉徙湖南邊界  
州縣者以十數萬計楚軍深入餉饋維艱一入  
黔境人烟斷絕有銀無從易錢有錢無從易米  
非分兵四路節節搜勦步步爲營不可擬一由  
馬路口一由官園一由金山一由培坡前進每  
路兵數至少亦須一千五百人方敷調撥而靖  
州本境分防兵勇不預焉臣以分籌四路進兵  
情形固爲明晰湖南除邊界設防外援師出省

者已一

奉

寄諭諳諳必

立寨而

屏鄉賊

及各賊

辦理亦

戎機二

坳踞險

械投誠

赴營繳械投首兆琛分別安撫一面進攻金山  
寨賊巢二十九日逆苗七八百自蝦蟆塘來撲  
官軍營壘兆琛派隊迎擊鎗斃執大旗賊目一  
名餘賊駭走屯外委熊三喜從九馬象乾等督  
衆掩殺賊大奔潰斬首五十餘生擒二十七犯  
奪獲大白旗六面抬鎗三桿烏鎗六桿刀矛七  
十餘件賊竄回金山寨官軍以寨險路仄仰攻  
殊難收隊而退四月初一日兆琛派熊三喜馬  
象乾軍功袁壽松帶勇仍出蝦蟆塘攻其前派  
從九鄭胡楨呂鳳藻攻其後先飭趨捷善走之

屯弁羅應瓊練勇楊在源田宗榮吳勝明朱定國等攜帶火礮噴筒在寨左右無路逕處攀躋而上熊三喜等甫近寨前逆苗拋擲木石抵死抗拒忽寨後鎗礮聲急逆苗復分股拒守霎時寨中火起喊殺之聲震天則羅應瓊等已蹶騰而上乘間縱火矣熊三喜與鄭胡楨等督勇乘勢搶上山梁前後夾擊刀斫矛刺賊屍遍滿巖谷間生擒僞元帥吳任堂訊知首逆吳成顯業已燒斃割獲首級一百三十八顆耳記二百八十餘副拾鳥鎗三十五桿餘賊向四灣奔竄四

灣苗逆聞官軍攻克金山震懼鼠竄金山餘賊  
意楚軍方攻金山靖州邊防必虛遂邀四灣逆  
苗繞由元楨竄撲靖州排洞六寨署靖州知州  
鄂峰得報立派候選訓導范孟哲藍翎軍功滿  
邦鼎靖州學正劉杜督同各團紳陳師舜吳文  
煥等率團勇會同大梁坡汛外委劉永勝禦之  
賊撲排洞各勇出其不意突起擊之殲斃甚眾  
忽另股賊數百由小路逕撲六寨該寨苗生潘  
光潘如相等率眾抵禦連斃執大旗賊目二名  
餘賊十餘名該逆奪路奔走適官軍從排洞轉



回截其歸路悉數擒斬生擒逆首僞盤古大王  
龍宏勝僞將軍李學林僞軍師李光明等及餘  
賊八名奪獲賊馬二匹旗幟鎗礮刀矛各數十  
件而金山苗寨遂全股蕩平兆琛於初九日由  
杉木坳拔營進駐岔路口卽選同知吳自烈帶  
幹勇六百馳至兵力益厚署黎平府知府多文  
參將慶瑞聞楚師旣克金山將攻錦屏派代理  
錦屏鄉縣丞陳槐錦屏汛千總何龍章外委劉  
克勳及武生姚廷楨帶勇八百名將繞道來會  
十三日兆琛飭吳自烈馬象乾等分三路勦鳳

沖元楨之苗斃賊四百餘生擒苟闔王吳滅匹  
奪獲拍鎗鳥鎗刀矛旗幟不計其數錦屏之賊  
以官軍方勦鳳沖元楨之苗意岔路口大營守  
禦必虛遂潛來撲營兆琛督守備張萬書熊興  
柏外委熊三喜等分三路迎擊之斃賊數百生  
擒僞元帥楊再培僞將軍潘啓作等三十七名  
餘賊回竄錦屏兆琛等督勇急追適陳槐何龍  
章劉克楨姚廷楨等從黎平帶勇至錦屏截其  
歸路前後夾擊殲斃又數百名生擒首逆僞侯  
王吳泚一僞丞相楊再純僞校尉楊泚泗並前

此攻破錦屏城池要犯吳啓和石繼祥石五元  
歐陽洵楊老槩吳光作任雙隆楊洪恩楊效生  
等九犯斬之立復錦屏城池兆琛卽由岔路口  
拔營駐之其附近數十里苗寨震懾兵威繳械  
投誠有細送勾賊之犯求免勦辦者兆琛均一  
一分別安撫適署黎平府知府多文以清江逆  
苗由古州竄擾九潮地方肆行燒殺距黎平百  
餘里飛請赴援兆琛卽於五月初三日拔營移  
赴黎平駐營城外以壯聲勢此官軍攻克金山  
寨收復錦屏鄉逕抵黎平府城之實在情形也

臣維黎平之亂寨苗全變匪徒以驅逐客家爲  
詞互相勾煽劫殺焚燒環黎境數百里間無得  
免者苗寨星散迫近楚疆畏楚軍進勦則相戒  
勿犯楚境冀緩援師惟金山寨逆苗膽敢糾眾  
犯楚與錦屏各匪互爲犄角在諸苗中尤爲桀  
驁難馴若不先拔金山錦屏無以寒羣苗之膽  
使之漸就羈勒且官軍從馬路口官團培坡三  
路前進必須節節搜勦曠日需時加之巖壑幽  
險兵力難以遍及跋前疐後餉道堪虞設稍有  
違阻則頓兵賊巢不戰自屈此所以計議取道

金山徑趨黎平也幸賴

皇上天威金山旣拔錦屏旋復得以偏師徑赴黎平之援殊非意外所及惟黎平客民被羣苗燒殺劫掠受害最慘此時援軍得手客民相率歸黔復業而羣苗慮其報復往往聚眾毆殺難免復滋事端現據鄂峯稟報五月初三日匪苗追逐難民將近楚界當派軍功滿邦鼎會同該州團紳黃炳燮陳師舜吳宗渭吳文煥盧昌言戈立安唐建煌易應道等率勇分三路堵擊共斃苗匪二百餘內有匪首梁宗有生擒匪目江老季

餘匪始奔竄回巢現飭兆琛分別辦理查明兇  
惡苗寨嚴與勦辦一面嚴禁游匪冒充官軍入  
苗寨滋擾肇釁仍飭鄂峯督率團紳加意嚴防  
毋令匪苗乘虛竄越以固邊防冀稍副我

皇上綏疆靖寇至意再臣前於四月十四日欽奉  
寄諭飭催兵勇迅速起程維時兆琛等已攻克金山  
臣擬俟克復錦屏後一併陳

奏仰慰

聖懷是以覆

奏稍遲理合聲明所有援軍迭勝馳抵黎平府城

情形謹據實陳

奏伏乞

皇上聖鑒訓示施行謹

奏

咸豐七年五月二十六日拜發奉

硃批覽奏獲勝情形均悉欽此

彙保勦辦黔匪三次出力員弁摺

奏爲遵

旨保奏懇

恩鼓勵事竊臣於上年正月

奏報黔匪攻撲鎮筵綏靖兩鎮官軍獲勝解圍並

克復麻陽縣晃州廳大獲勝仗情形奉

旨所有在事文武兵勇著駱秉章擇其尤爲出力者酌量保奏欽此二月內

奏報官軍越境攻勦迭獲勝仗克復貴州松桃廳銅仁府兩城情形奉



丁巳上  
三  
旨此次湖南官軍越境勦辦銅仁匪徒收復兩城甚  
爲出力在事出力武弁及營屯漢土兵勇紳民著  
該撫查明併案保奏候朕施恩欽此十一月十三  
日

奏報援黔官軍迭獲大勝攻克銅仁縣屬三元屯  
銅仁府屬三角莊逆匪老巢情形奉

旨此次湖南援軍越境勦賊連克險要賊壘殲擒殆  
盡銅仁府屬各境漸次肅清辦理甚屬妥速在事  
出力員弁兵勇著該撫彙入上次克復銅仁案內  
一併酌量保奏候朕施恩欽此比卽宣示各路文

武官紳營屯漢士兵勇無不歡欣鼓舞感戴

皇仁項據鎮筸鎮

臣

文安辰沅永靖兵備道翟誥及

前署提

臣

樊燮開列官紳營屯漢士兵勇迭次

勞績事實清冊前來

臣

率同總局司道一一覆

核謹將三次奉

旨保奏各員弁兵勇彙爲一案恭繕清單伏懇

皇上天恩賞加鼓勵庶文武協恭共濟漢土敵愾同

仇邊圉可期又安防勦均能策效矣伏乞

皇上聖鑒施行謹

奏

咸豐七年五月二十八日拜發奉

硃批另有旨欽此

接濟各省急需摺

奏爲設法接濟各省急需仰祈

聖鑒事竊臣前於四月初七日附

奏廣西賊匪情形一片其時僅據廣西全州及湖

南永州各屬探稟未接廣西撫臣咨函但知該

省賊勢之披猖尙未悉軍儲之匱絕嗣於四月

十八日准廣西撫臣勞崇光來函備言司庫一

空如洗民間十室九空請代爲籌措當經臣與

總局司道商議廣西情形緊急餉無來源值茲

賊勢鴟張亟應代爲設措以全大局祇得於應

發各路勇糧中均勻劃提銀二萬兩委解全州  
由州設法解省並咨廣西撫臣派勇迎護以濟  
急需又據湖北鄖陽鎮總兵楊載福函稱湖北  
餉項支絀水師噉噉待哺現值攻勦喫緊請量  
爲接濟亦經臣飭局籌發制錢一萬緡銀五千  
兩委員解往又准湖北撫臣胡林翼咨稱軍餉  
欠缺已多請飭籌發倉穀四萬石接濟兵食又  
據江西瑞州軍營補用直隸州知州劉騰鴻稟  
稱勇糧匱竭請代籌接濟當卽飭局籌撥倉穀  
四萬石分起解赴湖北籌銀五千兩委解瑞州

軍營共籌撥銀三萬兩錢一萬緡穀四萬石分  
解廣西湖北江西聊資接濟所有設法接濟各  
省急需緣由理合恭摺具

奏伏乞

皇上聖鑒訓示謹

奏

咸豐七年五月二十八日拜發奉

硃批知道下欽此

1156

1156

1156

匪徒謀逆先期撲滅在事官紳量請鼓勵摺  
奏爲匪徒謀逆先期撲滅首要各犯悉數擒斬地  
方一律安謐請將在事官紳量爲鼓勵以昭激  
勸事竊湖南自廣西逆匪竄過之後各屬奸民  
乘機勾煽實繁有徒類年次第殲除間閭漸臻  
靜謐除臨陣擒斬不計外其人會習教潛謀不  
軌及稔惡最著之犯先後訪獲訊明正法者實  
亦不止數千之多以故巨寇鴟張鄰疆鼎沸而  
兵燹之後境內尙覺肅然誠以治寇於方張之  
時用力難而所傷已大除惡於未事之始致力



易而所全較多也上年七月內臣訪明  
境內羅仙寨一帶有齋匪何漢春卽何  
魏三篋匠等傳習邪教以符水治病勸  
爲名煽惑鄉愚茹齋誦經結爲死黨洩  
情事密飭署甯鄉縣知縣耿維中親往  
札委甯鄉縣文生丁應台劉典楊鵬翬  
世等赴各鄉督團掩捕隨據耿維中直  
胡劭菴余正亭及何漢春之兄何雲佳  
出僞詔逆圖兵書等件該匪等揚言劫  
四起臣當飭守備銜千總彭定太帶勇

馳赴該縣以資鎮壓續據耿維中稟獲黃喜庭  
易林望易春元盛九疇湯煥南易輔朝僧成秀  
曾滿推匠李一雜貨黃雨倉余八姑李方直鄒  
昌林喻志年左十一等犯湘鄉縣知縣唐逢辰  
亦稟獲劉十二李譜光李如知等犯臣以此案  
獲犯雖多而首惡何漢春尙未弋獲委記名道  
候補知府朱孫貽馳往甯鄉湘鄉一面督飭嚴  
拿一面將已獲各犯審明就地正法以昭炯戒  
旋據管帶湘勇駐防茶陵知府銜卽選同知趙  
煥聯將首犯何漢春誘獲解首臣當飭司提訊

據供起意糾眾謀逆約俟江西湖北股匪竄至  
卽隨時起事不諱當將該犯綁赴市曹盡法懲  
處本年四月二十一日復據儘先都司喻吉三  
在湖北小池口行營拏獲首犯魏三篋匠押解  
來南當卽發司收審供詞與何漢春大略相同  
比卽正法傳首犯事地方懸竿示眾除首犯何  
漢春之妻子另案照例辦理外通計此案獲辦  
首要各犯及積匪共一百一十餘名除同謀之  
僧一清一犯尙在逃未獲此外首要各犯及著  
名匪目全數獲案懲處此甯鄉縣匪徒謀逆先

期撲滅之實在情形也衡州府地當兩粵之衝  
旁通江右向爲奸徒出沒之所署衡州府知府  
記名道陸傳應於上年九月內訪聞有外來奸  
細潛勾本地匪徒謀爲不軌之事稟商衡永郴  
桂道李維醇密飭署衡陽縣知縣周玉衡署清  
水縣知縣揀發知州長惠會營督飭團紳嚴密  
查緝先後拏獲賀見敖楊華順周時成楊將賓  
楊仲性賀昌遠賀昌達陳桂超等四十九犯並  
獲紅布包巾腰刀烏鎗矛頭火藥等件據供均  
衡州府屬人安吉賊目一廣東林姓一廣西羅

姓密囑來衡探聽消息即便勾結黨夥相機起  
事隨赴茶陵鄱縣邊界接應吉安大股賊匪等  
情當經稟請就地正法續在各鄉搜獲匪黨賀  
缺子龍五明許昌時李定崑李定藻等一十八  
犯並起獲大小黃布旗一大網子藥十四桶鳥  
鎗二十桿腰刀五百把刀矛火彈等件不計續  
獲陽孔卓朱有恒文玉堂黃有文彭承漢王斯  
族高在玉羅均坦劉大沅等三十六犯先後審  
明正法共計凌遲斬梟一百零三犯而此案首  
犯賀見敖周時成楊華順楊孔卓羅均坦高在

玉彭承漢賀缺子楊將賓楊仲性卽楊棕心等  
十名無一漏網此衡州府匪徒謀逆先期撲滅  
之實在情形也臣維齋匪之起其始愚夫愚婦  
惑於禍福禳祥之說誤信妖言並非有犯上作  
亂之心自干顯戮迨至陷溺旣久回惑滋深竟  
爾如醉如癡一任妖人指使實有出於常情之  
外者臣於甯鄉案破之後復刊發告示詳爲曉  
諭以覺愚蒙並札飭各屬嚴密查拏習教傳徒  
之人解省究辦冀可稍挽頽風至衡州奸民謀  
逆之案用心叵測蓄意至深若搗發稍遲實有

不堪設想者兩案既破之後各犯遠颺在事官紳密速函緝數月內首要均各拏獲不致漏網其中並有遠自隔屬隔省各軍營輾轉尋蹤購獲者實屬著有微勞合無仰懇

皇上天恩酌加鼓勵以昭激勸記名道補用知府朱孫詒督辦勤敏請交部從優議敘署甯鄉縣知縣耿維中查緝迅速獲犯頗多請

賞加同知銜甯鄉縣廩生楊鵬附生劉典均請以訓導歸部儘先補用職員陶鴻勳請

賞給六品銜記名道署衡州府知府升用知府陸傳

應破獲巨案辦事勤敏請免補同知直隸州知州先換頂戴署衡陽縣知縣周玉衡署清泉縣知縣長惠署衡州協都司棟發都司慶昆均請交部議敘衡陽縣六品銜卽選訓導劉端凝請賞加五品銜庶人才奮而緝捕嚴奸匪無從匿跡於吏治地方不無小補謹據實陳

奏伏乞

皇上訓示施行謹

奏

咸豐七年五月二十八日拜發奉



殊批另有旨欽此

駱文忠公奏稿卷之十目錄 湘中稿

丁巳中

援江官軍馳剿援賊大捷擒斬逆目摺

援粵官軍克復興安縣城摺

援江王道迭獲大捷摺

王道續獲大捷片

援軍克復江西龍泉周副將虛報要功請

勅江撫查明更正參辦摺

遵保北路官軍越境肅清鄂邊出力員弁摺

王道剿賊迭捷疾歿軍中摺

馬公志公奏請卷之十一 目錄  
張丞王令戰功最著請先行獎勵片

援江官軍迭獲全勝摺

援江官軍進剿阜田回竄逆匪兩獲大勝片

請催黔省古州鎮道並各縣文武迅赴新任片

援江官軍馳剿援賊大捷擒斬逆目摺

奏爲援江官軍馳剿大股援賊連獲大勝擒斬逆目多名恭摺由驛馳

奏仰祈

聖鑒事竊逆賊自竄擾江西以來分踞各城肆其荼毒袁郡旣克之後該省西路之瑞臨吉三郡北路之九江一郡皆有重兵攻圍而由東路饒廣達南路之撫建無重兵控扼以故金陵安慶各股援賊得以來往自如援江西各郡兼犯福建各郡絡繹颺忽裹脅日多官軍之圍瑞臨吉者

逼城而營防城賊之出復虞援賊之來合則分途策應爲難分則老營單薄可慮勢非別簡一軍作爲游兵相機雕勦不能制賊援而斷勾結臣前以臨江太坪墟之控調記名道王鑫率所部勁勇三千馳往援剿密飭其不必專注一隅惟確偵悍賊大股所在卷甲趨之曾經

奏明在案王鑫自赴江以來會同江西補用道劉長佑卽選知府蕭啓江江西帶勇之安肅道劉于瀆等進逼臨江府城疊次攻剿均小有擒斬殊賊固匿不出官軍仰攻爲難詢知城中糗糧

充裕守具悉備急切難下乘隙於臨河城外環掘壕塹莫可憑壕圍攻少省兵力設使各處大股悍賊突至分兵卽可赴之五月二十日王鑫接吉安各營函稱援賊大至在吉安對河水東地方堅築五壘礮船爲所阻截吉水派軍勢亦難支請急往救援王鑫卽率所部冒雨兼程前赴二十七日行抵周家嶺距賊營四里許甫度地安營逆目七十五檢點靈三友僞將軍沈元悅土匪頭目僞東平王何勝權等率悍賊六千餘分三路來撲王鑫卽選同知張運蘭率勇

伏於左卽選知縣王開化率勇伏於右復令千  
總朱惟堂由山左繞出賊營之後伏之親督  
營五成隊掘壕築壘如故右路之賊狂呼飛奔  
而來直繞營盤之後王鑫徐發號迎擊湘勇李  
繩武江發榮曾聚賢黃恒和等以大刀陷陣立  
斬僞將軍沈元悅連斫悍賊數名各勇奮威衝  
殺賊陣大亂紛紛退走左右伏兵齊發橫衝側  
擊斬首六七百賊之沿河岸逃奔者皆逼溺水  
中如萍浮波面城賊撐船撈救均被鎗礮擊退  
吉安師船截之中流無一得免者中左兩路之

急竄入壘官軍乘勝撲之張運蘭圍攻第一壘盡殺之其餘各壘猶堅踞如故王開化攻第二壘偽目七十五檢點靈三友立營前督羣賊死拒遊擊銜補用都司易普照憤甚率百長劉光明賀能起文桓久劉爲政冒險衝入斬盧三友於馬下易普照復連刃十餘賊忽爲飛礮所中陣亡各勇併力齊撲遂破其壘賊之從牆躍出者爲地籤所刺各勇以矛戳之屍滿坑塹王鑫麾勇縱火連燒第三壘第四壘第五壘及小塘莊塘兩賊巢次第破之偽東平王何勝權冒



火衝出爲湘勇楊義倫所斬其逸出之賊爲朱  
維堂伏兵遮截擒斬畧盡是役斬賊二千有餘  
燒斃溺斃者亦二千餘生擒賊二百餘據活賊  
供此起賊目共十八名官軍已斬其十五矣奪  
獲大礮一尊劈山礮二尊馬二十餘匹抬鳥鎗  
百二十餘桿旂幟軍械不計其數此五月二十  
七日剿吉安水東援賊連破五壘二巢大獲勝  
仗之情形也維時竄踞萬安縣賊衆數萬以援  
賊方踞水東議前來會合與城賊夾攻吉安官  
軍行至水南遇水東敗賊知勢不可敵遂由永

豐之籐田回竄樂安王鑫留部勇千名於水東親督勇二千拔營追之初七日戌刻至籐田訶知賊衆已過流沖距樂安僅四十里矣王鑫令軍中蓐食疾進潛師襲之忽探報僞禱天候胡壽階率賊數萬自甯都州來將由沙溪援吉安土鑫以沙溪距吉安僅有五十里且當我軍後路亟應出其不意剿之遂令所部暫輟樂安之行先遣王開化王文瑞率勇赴沙溪進剿初九日黎明行過瑤嶺至破塘村前隊之賊猶熟眠未起官軍先擊至斬首四百餘級守備張南桂

乘勝復進適賊大隊齊至層層圍裏陣亡弁勇  
四十七名官軍分途馳至殺透重圍卽選訓導  
劉飛亦督團助戰賊始敗奔官軍追過沙溪至  
幕藪地方斃賊千數百名生擒四十七名奪獲  
軍械七八百件至申刻收隊而歸僞禱天候胡  
壽階憤其黨不力戰初十辰刻親率賊二萬餘  
齊來撲營各色旂幟漫山遍野層伏村莊樹林  
時隱時現王鑫預分所部爲三路飭代理永豐  
縣知縣章徵率潮勇及團勇分兩隊接應左右  
兩路皆俟賊近視旂鼓號令而行違者治以軍

法賊漸逼漸近仍堅忍待之未刻各村林伏賊齊出王鑫知賊已飢困而官軍之氣方盛麾朱惟堂率所部由深林蛇行近硬脊嶺下伏之繼麾五六旂出營前列陣再麾一二旂出左路田洞先進賊之從中路來者橫走拒之正鏖戰間王鑫發號搗鼓中路右路官軍飛馳齊進章徵督潮勇團勇繼之賊大敗奔左路官軍由花門前橫截而出衝賊爲兩股圍其一股殲之王開化王文瑞朱惟堂分途窮追斃賊不可勝計朱惟堂部勇陣斬賊僞禱天候胡壽階奪其所戴

花冠龍袍並黃緞繡龍風帽追至瑤嶺路峻而  
仄羣賊徠附而上自相蹂踐官軍鎗擊矛戳紛  
紛下墜人馬層層覆壓其先墜者刀矛倒卓後  
墜者攫之而死比追過嶺餘賊多伏地待刃亦  
有自刎叢莽者復窮追至馬鞍石地方共四十  
餘里始收隊歸是役約斃賊近五千陣斬騎馬  
乘轎大小各賊目指揮先鋒等六七十名生擒  
賊二百餘圍練搜山復獲送五六十名石菴團  
丁李廷祿等圍殺偽總制陳姓於嚴坊村廟內  
斬其首以獻共奪獲大小旂幟四千餘件長矛

八千餘支刀鉞鳥鎗千餘件十一日僞將軍譚  
姓率眾二三千來昨戰處屯瑤嶺少時卽去十  
二日又有賊五六千至瑤嶺徘徊不進王鑫令  
其所部出隊佯卻以誘之午後賊始下山官軍  
三路分途疾馳而進賊不戰自潰追至五星石  
地方賊盡棄幼孩而走復追至嚴坊併婦女亦  
棄之王鑫麾各勇緊追至勒門始收隊沿途斃  
賊八九百生擒五十餘婦女幼孩兵六百餘名  
口悉令團練收養獲馬十三匹軍械千餘而旂  
幟則少矣連日各路團練搜殺逸賊亦二千有

奇訊活賊口供始知十一日賊至瑤嶺者爲尋  
胡逆之屍十二日賊至瑤嶺者逆目何指揮約  
流沖之賊夾擊官軍脅其黨偕來因不見流沖  
賊至故望見官軍卽走也此閏五月初九初十  
十二連日剿甯都州竄援吉安城賊大股三獲  
大勝之情形也王鑫搜獲賊中文冊僞札知僞  
禱天候胡壽階係廣西金田起事老賊二月間  
率黨萬餘由安徽宿松竄入江西糾合撫建廣  
昌甯都一帶股匪號稱八九萬人注意援吉安  
臨江瑞州諸郡沿途所貼僞示亦同不料中道

突遇王鑫援吉之師得以痛加剿洗王鑫既剿  
盡水東援賊原擬進剿萬安繞竄樂安之匪忽  
於意外與此賊相值得以寡擊衆迅就驅除巨  
憖就殲兇威自挫不獨撫建之賊聞之膽寒卽  
吉臨瑞三郡窮蹙待援之賊亦聞之絕望洵於  
江西全局不為無補仰賴

皇上天威事機順利故得獲此奇捷亦可見攻城之  
難爲功野戰之易爲力也王鑫一軍僅三千人  
由臨江馳剿水東之賊殺賊四千有奇抵藤田  
後三次接仗殺賊約六千有奇陣斬大小賊目



共計七八十名以寡勝衆頗爲罕見該員忠勇  
性生洞曉軍務其步伐整齊軍令明肅有古名  
將風可否

賞加勇號以示優異之處出自

天恩陣亡之擬保遊擊補用都司易普照樸實勇敢  
屢立戰功請

勅部照遊擊例從優給予卹典陣亡六品翎頂把總  
湯見美李德厚外委文迎勝擬保把總彭大喜  
擬保外委余先彭各亮均請

勅部照例給予卹典以慰忠魂此次在事出力之員

弁勇丁可否由臣核明保

奏之處伏乞

皇上聖鑒訓示施行謹

奏

咸豐七年閏五月二十七日拜發奉

硃批另有旨欽此

1184

援粵官軍克復興安縣城摺

奏爲援粵官軍疊獲全勝克復興安縣城恭摺馳  
奏仰祈

聖鑒事竊

臣

前以廣西賊勢披猖情形緊急札令花

翎卽選知府蔣益澧練勇一千二百名備調附  
片具

奏在案嗣接廣西撫

臣

勞崇光函開請急調記名

道王鑫一軍赴粵援勦

臣

因王鑫一軍已調往

江西江西賊勢方張勢難撤回赴粵而廣西賊  
衆近逼省城廣東援軍遲遲未到隣省別無可

調之兵湖南雖援江援黔師徒四出餉饋不支  
然際此時艱不得不竭力圖維以期共濟隨飭  
蔣益澧增募老勇三百八十名合原募共一千  
五百八十名逐日訓練帶赴廣西全州相機進  
勦並札飭原駐黃沙河之藍翎知縣段瑩器帶  
所部祁勇一千零二十名歸蔣益澧統帶署永  
州府知府黃文琛亦派都司蔣榮華千總彭玉  
貴等帶永勇四百四十名隨同援剿臣以廣西  
羣賊蜂起永明江華道州爲永州南路要衝恐  
賊知軍由全州進剿而另股由平樂灌陽恭

城 部 百 遊 馮 家 五 境 力 將

庶無後顧之虞六月初一日師次賣珠嶺賊乘我營壘未成遽以大股來撲蔣益澧擊却之初五日賊攻漢川團勇於犁頭墟蔣益澧令段瑩器急督所部由唐家市進以相牽制蔣榮華彭玉貴等繼之蘇鳳文帶全州練勇由右路進賊二千餘出隊迎戰段瑩器率勇陷陣蔣榮華彭玉貴等分路衝殺立斃大旂悍賊數名乘勝追至城邊殺賊百餘奪獲大小黃旗十餘面生擒二名漢川練勇陳時瀚張啓勳等亦獲勝仗賊遂縮退入城初七日蔣益澧率各營趨唐家市

賊已出隊前來一列五里坪一列江邊漫山寨  
谷行列甚整而瓦子舖一帶密林中伏賊數千  
伺官軍進攻而抄其尾蔣益澧令都司彭玉貴  
守備銜千總謝年豐兩營陣於市之右都司胡  
顯高率後營陣於市之左段瑩器陣於市之前  
親率中營居中策應令蔣榮華彭玉貴等由瓦  
子舖先勦伏賊賊衆正捲旂傍山而行蔣榮華  
遣卒飛報蔣益澧傳令先擊伏賊彭玉山躍馬  
陷陣立斬騎馬賊目一名謝年豐亦手及大旂  
悍賊數名蔣益澧麾軍繼進蔣榮華彭玉貴則



已抄出賊後矣蘇鳳文督勇亦從此路抄出有  
路之賊大敗狂奔段瑩器率勇擊中路之賊斃  
賊百餘中路之賊亦敗左路之賊見勢不支遂  
紛紛潰退胡顯高追之斃賊數十五路齊追直  
逼興安城下收隊而還興安團練陳時瀚陳受  
典侯治盛季紹坤亦各有擒斬是役共斃賊千  
餘生擒三十二名奪獲大小黃旗百餘面抬鎗  
二十餘桿鳥鎗五十餘桿刀矛無數馬二匹而  
官軍無一受傷者賊自此次挫敗之後固匿不  
出並將城外所築兩大營自行燒燬劫眾入城

固守爲持久待援之計而與安城外北門一帶  
鋪屋隣比賊匿其中穴牆開礮以禦官軍初九  
日蔣益澧派段瑩器由五里坪進攻北門蔣榮  
華彭玉貴繼之蔣益澧率彭玉山謝年豐胡顯  
高由點鐘山攻城西北蘇鳳文率各勇攻西門  
陳澍南陳時瀚率勇攻東門段瑩器躍馬衝入  
北門街前祁勇繼之斃賊數十奪隘而入彭玉  
山彭顯高謝年豐帶隊由西北城角前來會合  
鎗礮連環施放斃賊二百餘陣斬僞軍師唐姓  
僞監軍蔣姓縱火焚各鋪屋適大雨驟至延燒

未半火燄卽熄其攻東門西門者皆爲城上礮石所阻收隊而回初十日復出隊攻城把總何超舉都司銜段高翔等仍縱火燒北門房屋陳時瀚亦率團勇至城下助之斃賊百餘彭玉山謝年豐攻西門忽悍賊數千衝出官軍稍卻蔣益禮令胡顯高帶勇援之謝年豐拍馬衝殺陣斬騎馬賊目及大旂悍賊十餘彭玉山從旁抄出賊後賊始大敗縮退入城適大雨復至收隊而還奪獲大黃旂二十餘面器械無數計兩次斃賊共七百餘而官軍之帶礮石傷者合計亦

八十餘人陣亡勇丁四名蔣益澧以城外早穀將熟恐以資賊遂議近城而營十二日進駐唐家市外三里許賊眾來撲擊攻敗之殺賊二十餘賊邀靈川悍賊數千來興安助戰十四日蔣益澧分路進攻預伏點燈山左右以待令謝年豐嚴防葉家村伏賊城賊固匿不出官軍僞退誘之將近點燈山賊果率大隊七八千分三路來追漸逼漸近蔣益澧段瑩器勒馬回擊號礮一響伏兵齊出橫衝側擊立斃大旂賊數十騎馬賊二名賊大敗奔官軍合隊追之忽伏賊二

千餘從葉家村林間衝出敗賊亦回旂返撲謝年豐率勇擊之蔣益澧麾中營助戰彭玉貴何超舉繼之七退七進賊猶死拒乃飭守備銜陳友勝把總劉清亮率勇由蕭家橋橫抄之賊始大敗同時北門出賊千餘亦經胡顯高彭玉山段高翔等擊敗收隊回營是役共斃賊八九百奪獲大小旂幟六十餘面烏鎗四十餘桿刀矛雜械無數十九日賊二千餘由北門出段瑩器何超舉段高翔分途截殺斃賊數十賊遽縮退仍固匿不出蔣益澧令各營收隊誘之賊果由

西北門蜂擁而出彭玉山胡顯高蔣榮華謝年  
豐彭玉貴等忽勒馬衝擊斃賊二百餘仍追至  
城下而還二十二日官軍仍出隊攻城段瑩器  
率勇三伏三起立破城外賊卡斃賊二百餘奪  
獲大黃旗十餘面胡顯高亦斃賊百餘各勇正  
思乘機進城仍爲城上礮石所阻蔣益澧令移  
營駐點鐙山偏之點鐙山距興安城僅里許山  
勢高峻可以俯瞰城中段瑩器率祁勇蔣榮華  
彭玉貴等率永勇駐五里坪蘇鳳文帶全州兵  
勇駐華江二十四日官軍方修築營壘辰刻賊

分三路來撲蔣益漴俟其逼近擊之陣斬先鋒悍賊數十賊遽狂奔而回段瑩器率祁勇由大路截之前後夾攻斃賊三百餘奪獲大黃旗十餘面大紅旂二面拍鳥鎗各十餘桿甫收隊回探報首逆陳永秀卽馬廷科潛由靈川邀悍賊四千餘首逆宋惲遇帶悍賊三千餘回援興安之賊甫由西門入城未刻賊萬餘三路擁出每進數十步則卓旂整隊大呼復進蔣益漴令各營堅忍待之俟賊逼近開壁縱擊立斬大旂賊目數名賊勢稍卻官軍鼓角齊鳴分路衝殺鎗

礮之後繼以刀矛賊屍紛倒追至城邊賊猶負  
城拒戰段瑩器以劈山礮轟之遂併潰敗入城  
其伏葉家村賊一股亦經蘇鳳文督各勇擊敗  
是役共斃賊八百餘奪獲大小黃旗五十餘面  
馬二匹鎗礮各械不計其數二十九日出隊護  
近城農民收割稻穀未刻大雨收隊忽城中出  
賊五千餘分三路來撲蔣益澧等擊卻之殺賊  
八十餘奪獲大旗三面馬一匹抬鳥鎗八桿刀  
矛無數七月初四日五鼓蔣益澧密令謝年豐  
彭玉山胡顯高等帶勇伏於西門外而自率中



營列陣西北待之賊果由西門出偷割稻穀謝年豐等俟其割畢截之何超舉等帶祁勇亦至殺賊二百餘生擒八犯是夜又派團紳陳時瀚帶勇伏於南城外密林中伺賊出割禾截之祁勇爲之策應斃賊數十蔣益澧料賊將以大股設伏而以餘賊割禾誘我初六夜令各營均派大隊分赴西北兩路攻之賊果伏於近城密林及田溝中衆約數千彭玉山從西門大路殺出蔣益澧麾前左兩哨從田隴抄出斬賊二百餘追至南門忽西門出賊千餘將截官軍之尾謝

年豐執大旂率勇衝擊立斃大旂賊目六名適  
蔣榮華彭玉貴羅開榜等率勇踵至前後夾擊  
斃賊數百賊敗潰入城謝年豐躡蹤緊追忽被  
城上礮子擊斷左脚羅開榜同受礮傷始收隊  
回營其由北門突出之賊亦經段瑩器殺敗是  
役共計斃賊七八百衝散者以千計生擒長髮  
賊十二名奪獲抬鳥鎗三十桿旂幟無數臣於  
前此接蔣益漴稟報陳逆邀靈川賊來興安助  
逆時念廣西旣未能牽制靈川之賊該逆得以  
往來策應楚軍三千餘人已越全州直逼興安

縣城攻剿不遺餘  
餘名然因攻城受  
冒暑過征不服水  
軍以傷病而少賊  
難以藏事當飭在

擊李篤勝等帶

臣

甯取道西延一帶

機攻剿蔣益澧聞

河邊距城僅三十

營帳蔣益澧始縱

退適段瑩器蔣榮華帶勇繼至共殺賊二百餘名賊悉遁入城中固匿不出初九日李篤勝率楚勇前隊至賊聞官軍續至星夜於南門外修築大營一座層開礮眼外釘竹籤及十一日黎明而壕壘已具蔣益澧急飭彭玉山攻壘之左胡顯高攻壘之右同知銜候選知縣潘家馥攻壘之後段瑩攻壘之前三伏三起直逼壘前賊穩駐不亂鎗礮如雨外委蕭祥發登時陣亡湘勇同時受傷者八十餘名段瑩器率郝勇繼進受傷者數十湘勇哨長陳友勝蔣益恭胡俊義

等復鼓勇而前均受重傷隊長陳得勝彭國佐  
中礮陣亡勇丁受傷者復數十名正相持間忽  
悍賊千餘自西門前來助戰李篤勝率楚勇橫  
截之陣斬二百餘賊仍敗退入城蔣益澧見賊  
援已隔督弁勇悉力急攻適蘇鳳文遣丁勇運  
送茅柴五六百名並攜牌十餘面至江忠濟率  
楚勇亦到蔣益澧令縱火環燒壘外竹籤立燼  
湘勇營官彭玉山胡顯高哨長王月亮鮑得揚  
譚厚載劉清亮等冒險衝殺各營弁勇一擁而  
入立將賊營踏毀刀斫矛刺賊屍紛倒其越壘

竄出者又經官軍圍殺殆盡是役破賊附城大營一座斃賊一千七百餘內有賊目蔣姓唐姓及各僞目三十餘名奪獲抬鎗五十餘桿鳥鎗七十餘桿刀矛千數百件大小黃旗二十餘面籐牌十餘面生擒長髮賊七十餘名而官軍陣亡者多至數十名受鎗礮傷者亦二百餘名矣十三日城賊分由西南北三門出撲官軍營盤蔣益禮江忠睿分途出擊陣斬百餘鎗礮傷者無數訥知賊於十一日大挫後潛遣人赴靈川求援靈川之賊知興安城破則靈川斷不能守

亦議傾巢來援蔣益禮江忠濬會商俟靈川賊至併力痛勦則興安復而靈川亦復免致重煩兵力遂嚴軍待之十七日派隊分攻各門午後靈川援賊由南鄉至城賊大出迎之蔣益禮江忠濬分隊拒城賊而親率李篤勝段瑩器彭王山胡顯高蔣榮華等會同蘇鳳文奮擊援賊鎗礮之後繼以刀矛斃賊五百餘賊卽大敗狂奔奪獲大小黃旗百餘面馬五匹鎗礮刀矛無數城賊仍退入城是夜四更西北城燈火漸稀更鼓時作時止知賊將逃遂率勇由西北奪門而

入見賊卽斫斃賊千餘奪獲賊馬百餘匹立復  
興安縣城餘賊由南門逸出蔣益澧飭段瑩器  
率祁勇永勇出漠川賢洞截其竄灌陽之路蘇  
鳳文飭蔣俊鷹等出大溶江截其竄靈川之路  
蔣益澧江忠濬親率湘勇楚勇躡蹤緊追臣已  
飭其盡力搜勦務將興安靈川兩城竄匿餘匪  
悉數殲除以求仰紓我

皇上宵旰憂勤之意至此大楚軍越境援勦人數多  
至四千數百大小數十戰殺賊近萬冒暑遠征  
不遺餘力卒能疏通楚粵大路克復城池在事



官紳弁勇實著微勞可否籲懇  
天恩俯准由臣核實保獎之處出自  
鴻慈謹彙案馳

奏伏乞

皇上聖鑒訓示施行謹

奏

咸豐七年八月初四日拜發奉

硃批另有旨欽此

援江王道迭獲大捷摺

奏爲援江官軍疊次大獲全勝恭摺馳

奏仰祈

聖鑒事竊按察使銜記名道王鑫馳剿吉安水東援  
賊五月二十七日連破五壘二巢閏五月初九  
初十二等日剿由甯都州來援吉安股賊四  
獲大勝擒斬逆目多名業經

臣

奏明在案維時諸賊連次敗挫陸續竄往樂安崇  
仁宜黃等縣其竄往撫州者踞城之賊堅拒不  
納令其竄攻永豐自效王鑫正擬先剿樂安縣

賊屯軍簾田地方忽探報賊目僞將軍潘姓楊  
姓及僞炎三十六正將軍蕭復勝率賊數萬續  
由甯都竄來將援吉安之賊距沙溪不遠沙溪  
距吉安府城百數十里在簾田之後相距七十  
里王僉以賊衆已近沙溪則吉安可危而簾田  
後路亦梗遂輟樂安之行改道沙溪剿之探聞  
此股賊衆其歸潘楊兩逆所轄者多南康縣潭  
口人上年從僞國宗洪逆攻贛州未下旋竄陷  
甯都州城其歸蕭逆所轄者多湖南人賊中所  
稱功勛者也該逆等不願合撫建之賊欲從沙

溪援吉安如不得逞則由萬安仍襲贛州人數  
多至數萬王鑫所部因盛暑造征病者十居其  
五衆寡懸殊而勢宜速剿不暇他顧遂於十九  
日率四成隊一千二百人由簾田馳赴沙溪聞  
賊紮營數十里前隊已至韶源距沙溪尤近王  
鑫以其地山徑叢雜未可深入擬待賊來擊之  
二十一日午刻有賊萬餘前來搦戰其氣殊驕  
王鑫靜以待之少頃賊近營前搖旗吶喊山谷  
俱震王鑫堅持如故潛令王文瑞張運蘭朱惟  
堂督各旂勇從營後分繞左右山脊包之令王

開化率兩旂勇迎擊中路親督一旂從後接應  
令劉飛及永豐縣知縣章激樂安縣知縣靳丹  
書分督練勇團勇布山上爲疑兵右路王文瑞  
先與賊遇斬首二百餘賊遂紛紛敗走張運蘭  
朱惟堂擊左路伏賊斃賊數十賊亦敗退中路  
賊不戰而走王開化從右路王鑫從左路追之  
圍賊山坡殲斃六七百名追賊至拱岡背兩山  
壁立中容一騎賊於隘口排鎗矛反拒官軍擬  
保守備衙千總胡文應等奪隘而入死之百長  
丁長勝等憤甚冒險衝入各勇繼之立斬悍賊

百餘賊又敗走擠墜巖下死者無數官軍齊隊  
猛追至韶源見平疇曠野一水紆縈連村數百  
戶賊旂皆滿臨水一帶十餘里左右亦皆賊營  
賊不虞官軍之驟至也至是駭而走王鑫令縱  
火遍燒村壘一面分五路急追之至上固隘口  
賊衆自相擁擠度不得脫則盡推婦女老幼填  
塞路徑架鎗蔽於上以相抗拒其險毒如此比  
官軍直前衝突則又敗走鳧水而逃官軍復追  
過河至猫公嶺始收隊而返計是日且戰且追  
往返八十餘里斃賊約二千餘生擒賊數百焚

死跌死擠壓死者無數破賊壘三十餘處旂幟  
軍械輜重山積恣居民拾取官軍無敢俯拾一  
物者此閏五月二十一日永豐縣屬韶源上固  
大捷情形也探報敗賊鼠至甯都州屬之釣峯  
收合餘黨尙不下數萬自上固敗後羣思解散  
賊目蕭復勝者能以兇威脅其衆衆莫敢貳遂  
忍死相從而州屬王爾地方會匪頭目謝芸標  
卽謝馥蘭又率黨千餘由璜溪來與之會合王  
鑫念此股不急剿則殘喘復蘇終爲後患遂連  
日拔營追之二十五夜行抵州屬之羅坑賊猶

未覺二十六日傳令三路進剿王開化率兩族  
勇由山左小路進劉飛章激斬丹書督團勇練  
勇從之王文瑞率兩族勇朱惟堂率吉字營由  
右路進王鑫自率兩族勇由中路進行近釣峯  
見該逆蜂屯蟻集各村墟皆滿墟前近水兩岸  
江洲十餘里遍紮賊營王鑫令先攻墟內之賊  
王文瑞朱惟堂由墟後包抄王鑫親率弁勇由  
街口殺入旂長蕭名聲陳盛世等冒險直衝立  
斬悍賊數十自相踐踏死者數百各勇從賊屍  
上躍過直前亂斫斃賊復無數陣斬僞士四十



一軍總制廖逆追出街口餘賊將向西洲逃竄適王文瑞從街後抄來圍而殲之王開化剿左路之賊以團勇練勇前誘之自伏山坡以待分一旂勇潛襲賊營之後賊見團勇練勇至悉衆迎拒中途遇伏駭而奔王開化猛撲之而官軍之潛襲賊營者已縱火焚其巢矣賊折奔江洲官軍緊追斃賊二三百江洲各營之賊見村中山上賊已大潰亦遂望風而逃王鑫令王文瑞分剿右路山上之賊立踏賊營乘勝齊撲江洲之賊同時縱火賊被逼溺斃者無數賊目蕭復

勝策馬而渡湘勇李文翊曳其馬尾舉刀斬之而奪其馬賊屍壅積水爲不留王鑫合取木板架賊屍爲橋頃刻立就各勇渡畢賊已分三路鼠竄而去官軍亦分三路追之一至坪田一至洛口一至東潮各殺數百始收隊回營是役斬僞炎三十六正將軍蕭復勝僞士四十一軍總制廖姓士四十七總制曾姓等僞金三十六正將軍毛福富於官軍架橋追賊時自縊樹林中約共殺賊二千六七百名焚死溺死縊死者不計賊之破械旗幟輜重行李拋棄滿途居民拾

取不盡方官軍追急時敗賊倉皇失措有以頭  
撞地求死有以頭倒插田泥求死未得者王鏊  
令各勇大呼老幼婦女概免其死棄軍械跪道  
旁者免斬頃刻拔出婦孺難民約共萬人而官  
軍一千二百人無一傷亡者此二十六日甯都  
州屬鈞峯大捷情形也賊目蕭逆既已伏誅解  
散者衆王鏊耀兵於甯都廣昌宜黃樂安各州  
縣交界地方藉固民心而寒賊膽軍至小源道  
探報會匪頭目謝芸標股匪竄至廣昌縣屬頭  
陂地方賊目僞國宗洪逆之黨木三十五正將

軍伍福勝率衆數千由廣昌竄來與之會合二十九日抵古夏仍圖竄擾甯都州王鑫遠率官軍襲之六月初一日辰刻抵古夏賊衆負山面溪而營官軍難以徑渡王鑫令張運蘭劉飛帶數旂勇伏於山後俟賊大隊入伏聞鼓乃起自率親兵十餘騎至溪邊誘之賊未知官軍已至見王鑫按轡徐行護從人少急分數路踣淺而渡直奔王鑫王鑫退至山坡鼓聲大震山後伏兵突出賊知中計反旂而奔張運蘭之勇已衝渡水南抄出賊後官軍前後夾擊斃賊數百賊

之溺死壓死者無數餘賊潰竄王鑫縱勇窮追至謝坊地方村內屯賊千餘忽出抗拒各勇擊斬二百餘復躡蹤追之沿途復斬殺五六百直至爐畚始收隊而回是役共斃賊一千三四百名生擒偽統制楊光裕小賊目數名餘賊六十餘名奪獲軍械無數而謝逆伍逆竟乘間脫出王鑫擬駐軍追之初二日忽探報賊目楊國宗由福建回竄江西新城將取道援吉安前隊已抵東山壩王鑫以逆賊遠來未知諸賊屢經大挫其氣必驕當出不意擊之是夜五鼓出隊合

王文瑞張運蘭由右路沿河而進其行主速王  
鑫親督王開化劉飛斬丹書等過河由左路進  
其行主緩初三日辰刻右路之勇已抵坪田張  
運蘭復分各勇爲三路賊覘官軍人少排列以  
待官軍奮威衝殺斃賊百餘賊始敗潰而逆目  
僞殿右一百五十二檢點張宗相僞殿左一百  
零三指揮曹信照不知前隊已敗尚擁賊千餘  
深居村內官軍一面圍住該村賊黨零星衝出  
者盡爲官軍所殲最後張曹兩賊目率數百賊  
併力衝出官軍奮力截殺斃賊無算陣斬賊目

張宗相曹信照於馬上餘賊敗潰王鑫督官軍  
由左路進離東山壩里許賊見官軍至嚴陣以  
待正相持間忽賊陣後呼譟甚急一時鼎沸則  
王文瑞張運蘭已擊敗右路之賊殲其渠魁乘  
勝追賊過河已出賊後矣王鑫令王開化劉飛  
等急擊之賊大敗走官軍夾擊斃賊四五百王  
鑫令各營分路窮追自率親兵數十追山上之  
賊忽僞殿右一百零四指揮陳耀南率賊二千  
從左路村內突出見王鑫輕騎追賊分起上山  
圍之王鑫以賊已大創其膽已寒破其一面餘

必囚散遂麾親兵百長王華國王桂林等直前  
衝殺立斬賊目陳耀南於馬上餘賊辟易適三  
旂勇聞信折回與敗賊遇而張運蘭王開化等  
已收隊遂與併力追剿此股殲斃大半共計是  
役斃賊三千餘生擒二百餘斬賊目偽檢點張  
宗相偽指揮曹信照陳耀南等多名奪獲偽印  
二十四顆偽官執照二十四張大紅呢轎一乘  
繡龍袍及繡龍風帽及各綢紗大旗二百餘面  
騾馬百五十餘匹各勇受傷者八人此六月初  
一初三等日勦賊廣昌縣屬古夏東山壩等處



兩次大獲全勝情形也據王鏊稟稱偽國宗楊  
逆後隊賊衆二萬餘已抵廣昌屬之頭破地方  
相距僅三十里偽國宗洪逆亦來會合恐尚有  
數次大戰而撫建兩郡之賊聞尚有數十萬之  
多樂安新淦亦均有大股屯踞擬相機酌辦以  
期次第剪除臣維江西地方自前年首逆石達  
開竄擾以來八郡淪陷其地富饒產米爲羣賊  
所垂涎各郡縣踞守之賊不計外皖鄂之賊粵  
東惠潮嘉之賊及該省紅錢千刀等會匪約計  
不止十萬之多該省兵勇旣不足用閩浙廣又

無越境援剿之師僅恃湖南各軍爲之支格西路瑞州臨安吉安三府城尚稽克復圍攻喫緊不能分軍遊剿力遏賊援臣之調王鑫赴江以遊剿爲主者蓋以賊援不絕則城賊有恃無恐圍攻之師亦時有意外之虞而游剿專用奇兵利在威忽速戰非精勁百戰之兵與智勇深沈才堪應變之將則措之危地難以萬全尤未可輕爲嘗試王鑫自馳剿吉安水東援賊以來月餘之久轉戰數百里前後八獲大捷共殺賊二萬三四千擒斬逆目多名實軍興以來僅見之

事而所部湘勇僅止三千酷暑遘征勞頓殊甚  
現在病瘥病痢留吉水簾田調養者千餘名其  
隨同征勦者僅只千餘名雖皆百戰勇士視賊  
蔑如然屢割之餘銛鋒亦鈍况賊衆多至百倍  
衆寡相懸近更添由閩回竄巨股誠未可視之  
太輕致有他慮臣現飭在籍都司王開信千總  
張廣勝等速募湘勇千名陸續遣赴王鑫行營  
聽其挑補更換以資生力並札飭管帶桂東勇  
之藍翎訓導胡兼善於龍泉營挑精勇五百馳  
往助剿謹一併據實附

奏伏乞

皇上聖鑒訓示謹

奏

咸豐七年八月初四日拜發奉

硃批覽奏均悉欽此



王道續獲大捷片

再續據王鑫稟報自官軍剿敗廣昌縣屬古夏  
東山壩巨股後敗賊之竄踞頭陂者旋竄廣昌  
縣六月十七日王鑫拔營追之賊列陣以待分  
五路拒敵王鑫亦分五路擊之都司黃萬友大  
呼陷陣立斬騎馬賊目數名官軍五路齊撲賊  
大敗走躡蹤緊追忽逆首僞國宗楊姓率賊萬  
餘自甘竹來援敗賊回拒江西署都司張騰霄  
躍馬衝鋒相勇一齊猛撲賊復大敗追至南豐  
縣界甘竹地方始行收隊是戰斃賊約近三千

生擒悍賊一百一十三名拔出婦女幼孩二千餘回軍廣昌縣城而前派赴樂安之千總朱惟堂亦與張騰霄及知縣孫效曾於十九日收復樂安縣城王鑫方擬由南豐宜黃直搗撫州建昌兩郡忽吉安城賊於十九日踏陷副將周鳳山營盤軍裝全失帶勇之候選知府趙煥聯參將劉培元兩營亦因而被陷僅吉字營全軍無損退保安福縣城王鑫聞警遂輟撫建之行還軍永豐縣屬籐田令各屬團勇改用湘勇旂幟號衣揚言攻撫建吉安以亂賊謀實則按兵而

觀釁適朱惟堂及署樂安縣知縣靳丹書於二  
十六日會剿樂安公陂武家墟之賊陣斬五百  
餘訊據生賊口供此股乃偽監軍彭逆邀集撫  
州悍賊圖攻樂安不意爲官軍所敗仍將邀賊  
報復王鑫料大股逆賊均經擊敗不得逞於廣  
昌南豐甯都州一帶必將取道樂安永豐令朱  
惟堂嚴爲戒備七月初八日朱惟堂飛稟偽國  
宗洪楊諸逆率撫建賊數萬竄宜黃崇仁兩縣  
將趨樂安王鑫得報捲甲星馳次日己刻抵樂  
安縣城掩旂息鼓令賊勿覺一面暗催團練聽



候調遣初十日賊之由崇仁來者已行近小陂賊之由宜黃來者右路抵太平市中路屯浯漳距樂安城均三十里浯漳之賊因前途險仄復改趨太平市王鏊令靳丹書設計先誘小陂之賊預伏以待十一日未刻賊衆八九千已誘至南門外距城僅半里王鏊發暗號伏兵四面齊出大呼猛撲賊駭而奔團衆四山橫出或遮其或截其後或攻其左或擊其右適雨霽泥滑行走殊艱賊益困躓沿途屍橫遍野遇險灰處則人馬旂幟堆積如山窮追四十餘里至甘泉

墟官軍團勇共計斃賊五六千始收隊仍駐樂安縣城十二日王鑫派斬丹書朱惟堂率勇分兩路出浯漳親率所部出太平市甫行十餘里賊前隊六七千已到王鑫分所部四路擊之賊大敗追至崇仁縣屬太平市賊大隊二萬餘盡出接應湘勇劉學九沈玉亭首先陷陣死之各勇憤怒大呼衝殺十盪十挾賊如山頽河決亡命鼠竄各勇盡力掩殺十五里至汪坊賊屍遍布田隴間又追三十里至客馬塘斬丹書朱惟堂亦已由浯漳趕到始行收隊是戰斃賊四千

二三百名而竄伏山林爲團丁搜殺者亦二三千收得騾馬五十七匹旂幟刀矛之屬狼籍數十里間無暇拾取也時僞國宗楊輔清有衆三萬尚屯林頭地方賊之敗回者往與會合王鑫息軍一日賊不敢來旋探賊聞官軍追至盡夜併力修築營壘爲自固計十四日王鑫出隊擊之賊列大隊於草岡左右張兩翼來迎王鑫爲長蛇陣逼之賊以鎗礮亂轟官軍初若不聞按步徐行愈逼愈近見楊逆於黃蓋下舉扇一揮騎馬悍賊數百出陣衝突王鑫縱勇奮擊噴筒

火罐鎗礮齊發復合簾牌手數十從後滾出揮  
刀亂斫陣首各勇擊其左陣尾各勇擊其右賊  
大奔潰人衆路仄自相蹂躪填坑塞塹覆壓而  
死者不計其數窮追三四十里始回軍至崇仁  
屬之鳳岡墟宿焉是戰殺賊一萬二三千生擒  
四百餘十四日派隊搜山除殺斃外復生擒逸  
賊一百數十各楊逆之洋表手扇千里鏡等均  
於山間拾得其死否則尚不知也王鑫擬乘破  
竹之勢進規撫建然吉安敗後未能圍攻城賊  
設令逸出肆擾則王鑫一軍孤懸四面受敵餉

道堪虞該員一軍援勦江西自擊滅水東援賊  
以來至太平市之戰共獲大捷十二斃賊四萬  
數千殺賊之多實軍興以來所僅見江西大局  
賴有轉機正宜加意保護俾獲殄寇成功以  
聖慮此軍月餉軍械子藥臣每與總局司道籌商按  
時措解濟用俾得一意圖功無憂匱乏惟是道  
路相距愈遠近自吉安官軍潰挫且時有梗阻  
之虞現在餉項早經起解兩批尚未知能否徑  
達合無仰懇

皇上勅下江西撫

臣

倘遇湖南委解未到該軍有應

需急用之項卽速由江西省局籌解以資接濟  
似更周妥至此軍爲湖南援剿之軍自當照常  
籌措妥解並非有意推諉合併陳明所有援軍  
續獲大捷情形理合附片馳

奏伏乞

皇上訓示施行謹

奏

咸豐七年八月初四日拜發奉

硃批另有旨欽此

學之風公考錄

丁巳年

三

援軍克復江西龍泉周副將虛報要功請

勅江撫查明更正叅辦摺

奏爲官軍克復江西龍泉縣城副將周鳳山虛報

要功請

勅江西撫臣查明更正以重軍務而勵軍心仰祈

聖鑒事竊臣上年十一月內

奏派副將周鳳山同知銜優貢生曾國荃募勇由萍鄉進攻安福直搗吉安府城並聲明湖南沿邊防兵亦可由各邊隘進攻其相牽制安福克復之後臣飭茶陵州鄱縣攸縣官軍各自防所



前進先後收復江西吉安府屬永新縣永甯縣  
蓮花廳並飭委紳知縣劉拔元藍翎訓導胡兼  
善訓導吳齊源等募桂勇一千二百名進復江  
西南安府屬之崇義縣上猶縣進攻龍泉縣城  
經臣於四月初六日

奏報請獎在案欽奉

硃批知道了著准其擇尤保奏欽此臣比抄錄摺稿  
移知江西撫臣亦在案維時劉拔元胡兼善吳  
齊源等方進剿龍泉所有前後各戰情形未及  
復行陳

奏因江西於吉安各屬軍務已經彙報毋庸再瀆  
宸聰頃准江西撫臣抄送克復龍泉縣城摺稿專據  
副將周鳳山稟報於桂東一軍疊次攻剿及用  
間誘降收復城池實在情形未經聲敘明白蓋  
因周鳳山到龍泉以後戰事兼稟湖南故臣得  
知其詐而桂東一軍及臣陸續調赴龍泉助剿  
之千總蕭紹鈴一軍及赴援之桂東團勇於龍  
泉戰事並未兼稟江西故江西不及知其詳也  
江西撫臣業據周鳳山稟入

奏臣既確知其詳不敢不爲

皇上一一陳之桂東一軍二月二十一日以前疊獲  
勝仗情形業經臣於前次彙報劉拔元胡兼善  
吳齊源等二月二十五三月初五初七初八等  
日剿賊於龍泉城之來烏嶺千子地等處斃賊  
四百餘適前龍泉縣知縣田博厚之勇在西北  
鄉石圍失利土匪蜂起賊勢愈張胡兼善於十  
四日帶所部勇四百馳赴堆子前扼之甫至賊  
已三路蜂擁來犯胡兼善擊却之斃賊百餘賊  
退下七地方胡兼善追之十六日大破賊於君  
子垵燒賊營三座斃賊四百餘二十八日追賊

石圍四月初四日剿賊五斗江共斃賊五六百  
而北鄉賊氛漸熄是夜胡兼善接劉拔元吳齊  
源自龍泉城南老營械稱吉安府來援之賊甚  
多自胡兼善分營北鄉後連日圍撲老營而西  
北鄉敗回之賊復合併爲一情形萬緊囑卽拔  
營回援胡兼善聞警於初五日帶勇行百餘里  
是夜二鼓抵藻林距老營尙二十餘里聞帶勇  
之選用知縣劉拔元及署龍泉把總李元發等  
已於是日午刻出隊擊賊被賊圍攻衆寡不敵  
血戰捐軀矣胡兼善憤甚率勇星馳次日辰刻

抵龍泉城南老營飛稟求援臣以龍泉事急而吉安股匪方由萬安源源而來其勢日熾當卽札飭管帶彪勇千總蕭紹鈴由湖南宜章邊界率所部勇六百急赴龍泉又慮蕭紹鈴自宜章來援尙需時日飛調桂東團練黃由謙胡錫鈺率團勇五百名先往援應一面札飭吉安各軍就近分軍助剿而以劉拔元所帶中營之勇併歸胡兼善統帶初十日賊衆七千來撲營盤胡兼善與齊源龍泉千總藍大椿等擊却之斃賊五百餘兇鋒始挫二十三二十四五月初一等

日賊萬餘來撲胡兼善等營盤均經胡兼善等  
擊敗初一日之戰斃悍賊數百名賊尤奪氣初  
六日桂東團紳胡保南等已帶勇剿除溪口街  
前各處賊匪進駐龍泉城北十五里之白樟地  
方胡兼善等派勇護築營壘遇賊來撲分途奮  
擊斃賊甚多初七初八等日胡兼善吳齊源藍  
大椿等及龍泉團勇分途擊賊於高坪地方復  
斃賊數百餘初十日周鳳山始由萬安率鳳勇  
抵龍泉城東北一帶安營是日蕭紹鈴及桂東  
團紳黃由謙胡錫鈺等各率勇抵龍泉城西南

一帶安營自是各營連日派隊環攻雖均小有斬擒然城賊固匿不出亦旋退不能痛剿周鳳山胡兼善等議各掘地道轟城或阻於石或阻於水功用不成旋議堅築礮台用大礮俯擊亦復無效臣屢次批飭該員弁等攻堅本無長策當於斷接濟絕外援覓內間三事極力圖之周鳳山胡兼善等又各大舉逼城梯攻數次均未得手弁勇之精銳者損傷頗多二十七日萬安縣賊八百餘從良碧洲取道來援龍泉周鳳山胡兼善吳齊源蕭紹鈴藍大椿等各派隊迎

勦於五峯書院及水南瑤夏地方擒斬殆盡漏  
逸者僅數十賊閏五月初四日各營復大舉攻  
城首先登城立刻陣亡者數十人仍廢然而返  
十四夜胡兼善營中幫辦武生胡達善巡哨至  
西門壕邊獲逃賊林裕信至營訊以城中虛實  
據稱城內男婦大小約七八千米糧暫尙不乏  
賊首爲武舉鍾起鳳廩生鍾毓靈等而尤以監  
生陳邦烈舉人張謙爲最胡兼善恐渠魁漏逸  
擬設計誘致之見林裕信與諸逆熟習又詳知  
賊中虛實遂授以密計縱令入城十七日林裕



信賁降稟縋城而下言城中諸賊現尙疑信相  
半胡兼善仍縱之去並預令須借賊首數人來  
營計議次日賊首鍾起鳳鍾毓靈等來營胡兼  
善仍好言撫之令鍾起鳳鍾毓靈薙髮留營令  
鍾辰學仍留髮與林裕信復入城呼陳邦烈張  
謙與之偕來二十一日陳邦烈張謙亦至並有  
賊目劉相桂隨之胡兼善佯爲慰喻將七犯分  
羈各營許以二十四日棄械出營就撫二十二  
日胡兼善等同詣周鳳山營密告該首逆等均  
經誘出預擬傳單其傳諭各營一律遵照某

起賊由某門出歸某營看守防護聽候分別查辦賊出之後不准兵勇入城強取財物市肆房屋均委官弁眼同封識以杜爭端而免貽悞違者治以軍法周鳳山始知誘致之詳胡兼善歸營後令張謙等告知城中各賊准於二十四日卯刻出城屆期城內之賊疑懼未化負嵎不出胡兼善等佯怒令將七犯一併斬首賊張謙等願再致信城賊勸其速出是夜賊首劉金輝羅齋公劉名典等希圖夤夜偷竄適幫辦吳齊乙等巡哨至拿獲到營胡兼善仍釋勿誅復遣入

城五鼓林裕信又引出賊首鍾有漢溫日新陳  
邦英而劉金輝羅齋公劉名典三犯亦隨之出  
二十五日吳齊源會同桂東團紳列隊西門胡  
兼善會同藍大椿蕭紹鈴列隊南門周鳳山及  
各營列隊東北兩門城內賊衆按門棄械而出  
各營憤其抗拒日久除婦女老弱分別省釋外  
概與駢誅夜間有賊百餘自胡兼善營盤排牆  
突出周鳳山蕭紹鈴派隊助截未任漏逸二十  
六日胡兼善始提首逆鍾友漢羅齋公溫日新  
陳邦英劉名典劉金輝正法二十七日胡兼善

於五峯書院會集各員弁提首逆張謙陳邦烈  
鍾起鳳鍾毓靈鍾相桂五犯磔死梟首四門惟  
林裕信卽林崧生鍾辰學兩犯胡兼善等許以  
戴罪立功稟請批示辦理臣以張謙等以劣矜  
爲逆首毒害地方年餘抗拒官軍數月萬死不  
足蔽辜業經盡法懲治林裕信鍾辰學投誠効  
力業經該員等許以不死尚可寬其一線飭胡  
兼善等妥爲安插以示法外之仁此收復龍泉  
縣城之確實情形也周鳳山於收復龍泉城後  
先後稟報任意欺飾當城賊二十五日出城之

時各營祇列隊城外並無攻城之事乃捏稱派隊環攻緣梯登城奮力巷戰在城中分路截殺等情賊首羅齋公本萬安著名齋匪劉金輝本龍泉起事首逆經胡兼善於復城後次日提出正法乃捏稱羅齋公於入城時殺斃劉金輝改過自新請免其死罪留營効力至首逆張謙陳邦烈鍾起鳳鍾毓靈等原係胡兼善遣降賊林裕信誘致到營胡兼善此次婉轉用機將城賊悉數殲斃已著成效乃該副將稟稱胡兼善之勇其中常有兄弟在城爲賊者又有哨官陳姓

與城逆張謙有紅  
要功臣前於該副  
其不中情事大如  
彼此互勘是非自  
西該副將得以任  
管帶湘勇記名道  
來所稱該副將欺  
相同仰懇

勅下江西撫臣查明更

軍心其於剿賊機

調赴龍泉各營紳勇在事既久頗著微勞可否  
卽由臣核明彙同前案保獎之處出自

聖裁伏候

訓示施行謹

奏

咸豐七年八月初四日拜發奉

硃批另有旨欽此

遵保北路官軍越境肅清鄂邊出力員弁摺  
奏爲遵

旨保奏事竊上年北路官軍越境剿辦通城崇陽蒲  
圻通山等縣一律肅清欽奉

上諭前據官文等奏湖南官軍越境剿賊通城崇陽  
蒲圻通山四縣一律肅清茲據駱秉章奏通城等  
縣搜捕蕨事現辦團練著有成效候選道王鑫已  
凱撤回駐岳州等語此次官軍越境剿捕通城等  
縣迅就肅清洵屬著有微勞除候補道王鑫業經  
降旨加恩外所有在事之出力文武員弁著該撫



查明保奏以示鼓勵欽此竊鄂岳自昔併爲一道襟江帶湖爲東南上游重地而岳州一郡尤爲南北津要湘鄂樞紐自賊氛不靖以來常置兵於此以資控制上年臣因武漢未復江右多虞鄂之崇通蒲咸湘之巴平臨湘等縣烽火屢驚賊蹤出沒調卽選道王鑫蒞湘勇全軍益以駐岳之游擊朱南桂益陽千總洪定陞等兩軍共五千人並令王鑫督辦各屬團練清鄉族以靖匪練丁壯以從征節節搜除屢獲勝仗於時縛斬積匪團務整與鄂岳之間民氣漸固自武漢

克復後相庇以安生民稍獲蘇息斯皆

天威震疊所致而亦將士用命之效也欽奉

恩綸查明保獎謹就王鑫呈開員弁兵勇戰功勞績  
各册核繕清單仰懇

皇上天恩加之甄敘庶人力益奮而士氣倍揚矣謹  
繕單具

奏伏候

皇上訓示施行謹

奏

咸豐七年八月初四日拜發奉

殊批另有旨欽此

王道剿賊迭捷疾歿軍中摺

奏爲道員帶勇援剿迭獲大勝勞瘁致疾歿於軍  
中請懇從優

賜卹以獎賢勞而勵軍心事竊按察使銜愛什蘭巴

圖魯記名道王鑫經臣調赴江西剿賊所有七

月十四日以前迭次大獲全勝情形經臣

奏報在案王鑫駐軍崇仁縣屬之鳳岡墟以溽暑  
遘征陡患瘧痢而軍士數月苦戰並爲積屍之  
氣薰蒸致疾者每多不起其留駐永豐縣城者  
卽選同知張運蘭督之十四日探報吉安府城

偽檢點傅忠信率賊萬餘至吉水縣城遣先鋒  
賊偽將軍何姓率賊二三千將乘虛窺撲永豐  
縣城張運蘭會同代理永豐縣知縣章澂等督  
勇迎剿行至羅湖舖卽與賊遇斬賊二百餘生  
擒四名奪獲器械百餘件十六日傅逆由烏江  
率黨六七千來撲張運蘭會同都司張萬有章  
澂等督勇迎剿於城外野甕橋擇地而伏俟賊  
近前湘勇由中路奮擊潮勇福勇由左右包圍  
賊大敗奔官軍乘勝掩殺至泰坪山陣斬賊一  
千二百餘生擒十七名奪獲鎗礮刀矛千餘件

潮勇斬僞指揮徐子以福勇生擒僞水五十二  
正將軍羅深仁始收隊而返王鑫以賊勢尚張  
調都司銜守備朱惟堂赴永豐助剿適臣所調  
花翎同知王勛藍翎訓導胡兼善帶勇繼至二  
十五日探報傳逆一股仍伏泰坪山王勛卽督  
勇進剿令黃萬友朱惟堂由左右小路先抄賊  
後而自率新勇嚴陣待之賊衆排隊出抗鎗礮  
亂轟官軍屹立不動正相持間奇兵左右衝出  
斬賊六七百追至雙源舖有屯賊二千忽出抗  
拒適朱惟堂帶勇馳至大呼陷陣手刺二賊墜

馬各勇併力齊衝分道追殺將至烏江始收隊  
回營計往返九十里斃賊千餘生擒二十餘奪  
獲旂幟五百餘件鎗械刀矛無算陣亡把總會  
金榜及勇丁六名是日王鑫在鳳岡墟接署樂  
安縣知縣靳丹書稟報二十四日有賊數百竄  
近公陂墟靳丹書督勇擊之斃賊數十王鑫料  
逆賊將竄樂安而靳丹書所部勇力太單時已  
病不能興力疾星馳援之二十六日至浯漳探  
報二十五日賊復大至靳丹書已擊賊陣亡賊  
聞王鑫大隊掩至仍由公陂墟退竄崇仁縣境

王鑫以斬令旣亡樂安無主移師入樂安縣城而瘞痢未減肝氣復動自小腹衝犯胸脅坐卧俱艱念前次廣昌大捷之後擬卽直搗撫州建昌兩府城旋聞吉安軍敗後路堪虞不得已還軍永豐之藤田自永豐樂安大捷之後進軍鳳岡陂吉安城賊圖襲官軍後路比經分軍兩次擊敗兇鋒大挫復擬大舉而窺撫建乃一病旬日漸臻危篤聞斬丹書以循吏擊賊捐軀倍深悲憤遣人間道持稟彙報戰狀語意煩懣迫切惟以事機不順爲憂而於病劇情形祇畧述一



二囑臣無容過慮乃十六夜臣於闡中續接該

道之兄卽選同知王勛急報則該道已於八月

初四日亥刻樂安城中病故矣臣比以該道一

軍素稱精勁威名丕著爲賊所憚此時主將新

逝接帶寔難其人當札飭卽選同知張運蘭同

知銜卽選知縣王開化將其全軍分配管帶以

該兩員久隨該道辦理營務於軍中最爲諳練

謀勇兼資堪以分帶并札飭該道之兄王勛暫

攝理全軍事務俟道路稍通卽護喪歸楚以妥

忠魂此七月十四日以後八月初四日以前王

鑫一軍迭獲勝仗該道勞瘁致疾在營病故及  
現在布置情形也臣維已故按察使銜愛什蘭  
巴圖魯記名道王鑫本湘鄉縣文生自咸豐二  
年賊犯長沙卽在籍辦理團練與其師已故布  
政使銜浙江甯紹台道羅澤南以忠義激其鄉  
人講求東伍選士之法湘勇軍律之精寔基於  
此自札委帶勇以來剿除衡永郴桂各屬土匪  
捍禦兩粵會匪搜勦江鄂賊匪身經數百戰前  
後殺賊不下十餘萬克復城池二十有餘處而  
所將之勇丁少僅數百多亦不過三數千所向

有功威名甚震兩粵江西湖北官民無不爭思  
倚重賊衆聞風駭懼至有出隊莫逢王老虎之  
謠其紀律嚴肅機神敏妙求之古名將中亦少  
概見自幼以英毅著稱甫冠折節讀書敦尚名  
檢刻以淬厲學問爲事治軍以訓練爲急所部  
壯丁操習刀矛火器之餘以孝經四書轉相傳  
誦入夜營門扃閉刁斗之聲與書聲相聞也所  
著練勇芻言陣法新編練勇臆說尺一偶存各  
書皆本其心得而言實可見諸行事每軍所至  
輒以忠義風動其民頑懦聞之亦多感悟故凡

所歷各處團衆皆能負戈殺賊裹糧景從近如  
江西撫建各屬士民稱爲恩人呼爲青天每戰  
則自相糾集聽候指揮無不喜其來而恨其晚  
也該道自蒙

天恩由諸生游擢今職刻思勉圖報稱忠愛之忱矢  
諸寤寐其父王宗麓常加訓勉囑無以親老分  
其誅賊之心以故自咸豐三年以來奉委帶勇  
勦賊未嘗乞假歸省上年因越境進剿廣東連  
州陽山之賊感受瘴癘患病正重始稟請歸省  
病愈其父卽促其銷假計自三年至今除假期

外無日不在行間大小數百戰身冒礮石屢次  
受傷亦未嘗因傷乞假該道戰績在湖南南路  
一帶爲多次則越境剿吉安撫州建昌之賊及  
上年越境剿湖北之賊若按勞績保獎尚可從  
優臣以該道年甫三十有三受

恩之日方長而兵事未艾効力之處尚多故每次保  
奏於其戰功不敢偶略至於乞

恩之舉亦未敢過優方擬加意成就爲

國家儲一大用之才不料以勞瘁悲憤遽殞其生  
也合無仰懇

皇上天恩俯念該道生前蓋績

鴻施逾格將該道晉贈布政使銜照二品例從優

賜卹並特予以謚典以獎賢勞湖南江西請

勅建專祠以彰戰績并請

給予該道父母二品封典以爲教忠者勸庶該道忠義剛烈之概得以益彰而効力行間之人亦有所觀感興起矣謹一併陳明伏乞

皇上聖鑒訓示施行謹

奏

咸豐七年八月二十一日拜發奉

殊批另有旨欽此

張丞王令戰功最著請先行獎勵片

再王鑫一軍屢次大捷業經江西撫臣耆齡

奏請保獎自應聽候核明彙案辦理惟現值王鑫

在軍病故接帶之員最爲緊要此軍由臣調赴

江西於營中文武才具短長嘗留心察訪卽選

同知張運蘭同知銜卽選知縣王開化兩員在

王鑫軍中共事最久臣嘗面詢王鑫據稱該營

人才以兩員爲最張運蘭王開化均經臣於援

鄂案內列保懇請

賞換花翎而該兩員自隨王鑫援勦江西以來共獲



馬三六八  
丁巳年  
三  
大勝十餘次每次奮勇當先厥功甚偉本係應  
行優保之員茲既札委分帶該道舊部職分較  
小難期鎮壓應請

旨先將該兩員戰功從優

獎敘以彰勞績而重事權卽選同知張運蘭可否以  
知府歸部卽選并

賞加道銜同知銜卽選知縣王開化可否以知府歸  
部卽選出自

天恩其餘在事出力文武員弁勇丁卽由江西撫  
核明彙報伏候  
臣

訓示施行謹附片請

旨

咸豐七年八月二十一日拜發奉

硃批另有旨欽此

卷之三

目錄

三

援江官軍迭獲全勝摺

奏爲援江官軍迭次大獲全勝現在辦理情形恭摺

奏仰祈

聖鑒事竊按察使銜江西卽補道劉長佑道銜卽選知府蕭啓江克復袁州府分宜新喻等縣城池進逼臨江二月以前攻剿情形均經

臣

奏報厥後

臣

所謂記各道王鑫一軍藍翎同知銜

卽選知縣江忠義一軍先後馳抵臨江江西亦派甘肅安肅道劉于涓率水陸各營會攻郡城

自三月以後攻城情形及劉長佑等截擊瑞城  
竄出逆賊堵剿峽江新淦援賊陸續獲勝均經  
江西撫臣耆齡彙案陳

奏自王鑫一軍馳剿吉安水東援賊繼由永豐樂  
安剿由閩回竄及撫建大股援賊屢獲大勝維  
時瑞城業經克復臨江賊勢已孤所盼者撫建  
之賊自新淦來援又經劉長佑劉于涓等嚴密  
堵截計不得逞復求援於撫州賊目偽國宗石  
逆賊其由吉安繞竄臨郡之後分犯袁瑞兩郡  
夾攻臨江官軍以撓援江大局劉長佑獲賊謀

備知其詳會王鑫病卒樂安撫建賊勢復張將  
由吉水西竄臣械咨江西撫臣速移瑞州官軍  
助剿吉安而瑞州官軍苦戰日久須稍休息並  
餉項尚需清理始能拔營未克速進探報撫州  
賊首僞國宗石逆糾吉水新淦諸賊從吉安下  
游三十里之三曲灘渡贛河先後竄聚阜田按  
阜田屬吉水縣境地當衝要可北竄峽江南竄  
安福西竄分宜新喻爲臨江吉安瑞州袁州四  
郡必爭之地臣當飛飭都司楊虎臣帶所部湘  
勇進扼新喻縣城適卽選同知王勛護已故道

員王鑫之喪由永豐迂道太和將抵安福臣當  
飭其會同委帶湘勇卽選同知張運蘭同知銜  
知縣王開化等分軍留防安福而自率所部趨  
分宜與駐新喻之楊虎臣及劉長佑蕭啓江續  
派之知縣劉嶽昭守備崔大光等相爲犄角以  
固袁州門戶而壯臨江大營聲援八月十七日  
賊竄峽江瑞軍所派之寶長兩營先勝後挫退  
駐羅坊二十日副將普承堯自瑞州先遣前隊  
馬步三千馳至劉長佑亦抽撥清勇果勇恒勇  
助之二十日賊悉數方架三浮橋來攻爲普承

堯部勇擊敗二十二日普承堯親率後隊繼至  
正相地築壘賊自羅坊對岸首尾十餘里分由  
浮橋蜂擁而進普承堯率所部與清勇果勇恒  
勇縱橫血戰當將各路之賊擊退追至田隴忽  
賊馬數百一齊回撲步賊亦回旂轉戰各軍力  
不能支營壘盡陷輜重俱失普承堯全軍敗退  
鶯哥嶺果勇恒勇退回臨江大營羅坊下距臨  
江大營七十里上距新喻縣城三十餘里一望  
平原毫無障隔賊既竄踞此間大肆屠掠袁州  
瑞州臨江民情震懼殊甚援軍腹背受敵萬難



支持劉長佑念賊勢甚逼餉道將梗城賊自長  
濠成後接濟路斷本已窮蹙待盡茲聞援賊大  
至兇餒忽張時以大隊猛撲長壕希圖出迎援  
賊牽制官軍而官軍之圍臨江者除分撥各處  
外在營者實不過數千內防城賊之出外拒援  
賊之來衆寡懸殊不敷分布惟有分軍先剿援  
賊掩其不備盡力一戰或可轉危爲安二十三  
二十四二十五等日留三成隊固守長壕並城  
請劉于瀆派勇助堵親率七成隊嚴陣於離營  
二十里之秧田中亭一帶截賊來路而又虞城

賊突撲老營刻須回顧二十五日曉間捕獲賊  
謀稱大股援賊數萬悉竄太坪墟連營十餘里  
卽來撲營其時臨城賊衆亦於福壽門填壕拔  
椿以待劉長佑以事機愈急不能復待援軍卽  
傳令是夜五鼓出隊重申軍令誓決死戰江忠  
義李明惠何益發等率勇由中路鄧在富陳周  
典翟國彥等率勇由右路漆盛年鄭金華盧秀  
峰等率勇由左路王高來石有周伍乾英等率  
勇沿河岸進黃開亮率水師戰船護之劉長佑  
自率親兵後隊接應天明行抵距太坪墟五里

地方適蕭啓江及參將田興恕游擊楊恒升等  
各率所部由秧田右路前來劉長佑親赴其軍  
督同進剿賊聞官軍驟至傳餐未畢卽出布陣  
蜂屯蟻集戈矛如林是時風塵飛起天色慘黯  
人馬皆驚劉長佑令各軍嚴陣勿動逆賊排開  
鎗礮子如雨驟官軍仍屹立如故少頃鼓角齊  
鳴火箭仰射官軍張兩翼一呼而進衝入賊陣  
無不以一當十賊衆披靡官軍乘勢蹙之立踏  
賊營六座賊旋以馬隊來衝劉長佑急令鎗礮  
隊分左右排列斜轟之馬多擊斃餘皆返奔賊

遂大潰官軍追至大坪市口賊復卓旂轉戰鄭  
金華盧秀峰繞由街後擊之賊仍敗走李明惠  
江忠義劉光實何益發等並馬齊衝各部勇從  
之將賊營一律踏平賊拋棄軍械山積人馬擁  
擠陷沒溪港者不計其數其散匿鄉村與泗水  
過河者又爲團紳朱孫祿等及管帶戰船之黃  
開亮管帶奇勝軍之石有周伍乾英等所擒追  
至黃岡地方始收隊回營是役破賊營四十七  
座約斃賊三四千生擒三百餘奪獲大銅礮四  
尊劈山礮一尊抬鎗二百六十桿鳥鎗五百七

十二桿大小旂幟二千五百一十餘面營帳八百九十架其餘刀矛雜械不計其數賊卽夜遁歸羅坊權攝湘營軍務卽選同知王勛分帶湘勇同知張運蘭同知銜知縣王開化等於二十五六等日先後率勇馳抵新喻縣城聞賊竄太平墟卽於二十七日會同楊虎臣崔大光劉嶽昭各率所部追剿行距羅坊五里之壕洲地方賊蜂擁而出王勛張運蘭王開化等率勇直前搏戰陣斬六百餘追至羅坊連踏沿河賊營十餘座賊涸水過河官軍乘之鎗擊矛截斃賊無

數湘勇奮不顧身復鼻水追殺中流溺斃四十  
餘名王勛等乃麾令各軍悉回駐河岸以劈山  
礮遙轟之賊紛紛倒斃餘賊由陂上一帶回竄  
阜田是役斃賊千餘生擒三十餘奪獲劈山礮  
二尊旂械刀矛不計其數此八月二十六日二  
十七日劉長佑勒太坪墟大股援賊王勛等勦  
羅坊援賊兩獲大勝之實在情形也臣維臨江  
城賊被官軍攻圍窮蹙潛約撫建新淦之賊竄  
擾臨江大營後路冀解城圍兼思乘虛伺隙復  
陷袁瑞兩郡其計甚狡臨江大營旣須分堵新

淦新喻兩處要隘兵以分而遂單當峽江被擾  
羅坊軍潰之時賊氛迫近人情洶洶臨江大營  
稍一動搖則臨城之賊與羅坊太坪墟之賊內  
外合勢賊益披猖不但臨江一簣功虧極爲可  
惜且袁州瑞州兩城亦形岌岌其有關江西大  
局者良非淺鮮劉長佑於奇險之中出以鎮定  
勉以三成隊堅守長壕躬率七成隊痛勦大股  
援賊卒能掃除劇寇轉危爲安其志慮忠純實  
爲可取現據稟報城賊自經官軍屢次擊敗之  
後所盼者撫建新淦之援茲復經官軍兩次痛

剿鼠竄歸巢賊之外援已絕臨城油鹽漸缺勢  
難久支逆目僞指揮聶姓受傷身死賊黨更無  
固志如無另股悍賊來援此城當可速下臣已  
札飭張運蘭王開化等率所部湘勇全軍由新  
喻速進並札飭接帶湘後營之劉騰鶴由羅坊  
速進相機會剿阜田冀節節肅清俾臨江大營  
可無他慮至此次援江兩軍速獲大勝在事文  
武員弁兵勇實屬出力可否仰懇

皇上天恩俯准臣保奏之處出自

鴻施謹據實具



奏伏乞

聖鑒訓示施行謹

奏

咸豐七年九月十七日拜發奉

硃批另有旨欽此

援江官軍進剿阜田回竄逆匪兩獲大勝片  
再正拜摺間據分帶湘勇道銜卽選知府張運  
蘭卽選知府王開化管帶陽字營都司楊虎臣  
等飛稟九月初七日軍進白沙探報石逆敗竄  
阜田復分股回竄劉田上坳各處張運蘭等以  
峽江縣屬橋步灘當阜田之衝遂於初八日拔  
營前進扼之行至獅子山甫安營畢遙見營南  
廟前一帶賊衆蟻集約八九千人營西有賊一  
股已至橋邊約六七千人張運蘭等分軍禦之  
西路賊先至官軍連開劈山礮轟斃先鋒悍賊

十餘人奪賊五色大旗六桿賊卽敗走官軍從  
後掩擊陽字營湘勇與四旗湘勇橫出截之各  
追十餘里至白坑收隊斃賊七百餘生擒五十  
六名奪獲旂械鎗矛千餘件官軍擊敗西路賊  
後南路賊猶未至收隊後卽伏獅子山伺之申  
刻南路賊趨張村距營僅二三里官軍誘之不  
前覘知西路賊已敗遁遂捲旂逸去初九日巳  
刻南路賊復傾巢而來分數枝橫列五六里張  
運蘭王開化潛分所部爲六隊一伏左路雷劈  
山中一伏雷劈山下一伏宋村張運蘭出張村

之右王開化出張村之左而以一隊仍伏獅子山後以防西路之賊皆飽食嚴陣以待賊倏進倏退官軍屹立不動未刻中營鳴鼓發號分馳疾進截賊爲數段賊衆狂竄奔至廟前合衆返拒官軍奮威衝殺燒其沿途棚廠追至桐下賊復踞所築四大壘開礮抗拒張運蘭王開化卽選從九楊安臣各督所部四面蹙之賊向南而潰官軍乘勢破其四壘斃賊數百賊委棄輜重米糧山積張運蘭等下令焚之又追賊至田心地方始收隊歸是役共斃賊一千三百餘生擒

一百三十二名奪獲抬鎗十五桿鳥鎗三十餘  
桿各色大小旂幟三百餘面火藥鉛子兩石騾  
馬十五匹刀矛雜械千五百件而官軍無一傷  
者此九月初八初九兩日張運蘭王開化及楊  
虎臣部勇進剿阜田回竄之賊兩獲全勝之情  
形也據生賊口供僞國宗石遙現踞阜田嶺僞  
指揮胡洪順僞指揮陳姓僞將軍周姓岑姓率  
黨竄分宜新喻兩縣以圖袁州府城而解臨江  
之圍不料官軍先到復爲所敗也臣維臨江一  
郡居江西西路之中地當水陸衝途最爲緊要

逆首石達開之竄江西先陷此郡布置已定始陷吉安而趨撫建逆賊既以此爲老巢各渠目多其黨羽其悉力援救自在意中頃接探報逆首石達開率逆黨數萬自安慶渡江竄踞建德尚未知賊蹤所向從前援江各軍捕獲賊諜均有向石逆求援之說若該逆自建德竄浮梁趨饒州則與撫建之賊合勢而吉安臨江賊燄必張應請

勅下辦理江西軍務西安將軍福興嚴扼該省東路勿令竄越庶西路得以次第整理臨江一下兵

力更厚自可收節節肅清之效所有此次兩獲  
全勝情形理合附片陳明伏乞

聖鑒訓示謹

奏

咸豐七年九月十七日拜發奉

硃批另有旨欽此

請催黔省古州鎮道並各縣文武迅赴新任片  
再湖南援黔之軍自克復黎平府屬金山寨錦  
屏鄉永從縣後迭獲勝仗均經

奏明在案現據統領援軍花翎補用知府兆琛稟  
報黎平府屬南路東南路各匪苗屢經懲創頗  
形震懾特洞空洞地平獨茂等寨均經陸續繳  
械投誠前署靖州知府鄂峯親赴沿邊各卡揚  
兵界上其張魯地方一帶苗寨亦已投誠情詞  
均極懇切其抗不受撫者現在另籌會勦事機  
尚順惟錦屏永從收復以後久無官守古州鎮



道大員亦尚無到任之耗湖南越境勦賊勢難  
越境駐守無論客軍不服水土久役疲乏寔非  
所宜且隔省文武呼喚不靈苗民之心無所繫  
屬亦非黔省久遠之計應請

旨勅下貴州撫

臣

速催古州鎮道及錦屏鄉永從縣

各文武迅赴新任以資鎮壓庶黎平善後事宜  
得以從容就理而援軍始有凱撤之期矣理合  
附片請

旨

咸豐七年九月十七日拜發奉

硃批另有旨欽此

東京大学

十三年

天正

駱文忠公奏議卷之十一目錄 湘中稿

丁巳下

請撥七年漕折濟餉摺

援粵官軍大捷進圍平樂府城摺

保舉援軍克復廣西興安出力員弁摺

援粵官軍克復平樂府城首逆就擒摺

援軍將領濫收游勇債事請

旨革訊摺

會鄂撫胡雙銜

援江官軍大捷擊退石逆大股摺

援江官軍克復臨江府城摺

支放楚勇口糧章程片

保舉防軍越境克復江西龍泉崇義上猶各縣  
城出力員弁摺

請撥七年漕折濟餉摺

奏爲軍餉浩繁無款供支援案再懇

天恩俯准動撥漕折等銀以資挹注仰祈

聖鑒事竊照湖南省自軍興以來於茲六載籌防籌

援師徒四出前因軍用浩繁庫款支絀節經

臣

先後

奏准借動咸豐四五六等年糧道庫徵存漕折等

款銀兩以供支發在案現在湖南轄境雖已肅

清而東援江西吉臨各郡西剿貴州黎平一路

南攻廣西平樂諸賊綜計各路兵勇二萬數千

名月需餉銀十四五萬兩此外又復籌辦軍火  
器械並協濟湖北水師需費較前愈繁前借漕  
折等銀早已支發無存本年各屬應解錢糧或  
因被災蠲緩或經撥解兵餉其批解司庫者寥  
寥無幾卽捐輸釐金亦屬入不敷出刻下各路  
軍務一時不能告竣兵勇應撥口糧有積欠至  
數月者實屬無款發給枕戈待哺飢潰堪虞臣  
與司道再四籌商實無良策惟查本年漕折業  
已開徵陸續批解可資挹注值此軍需孔急自  
應權衡緩急合無仰懇

天恩俯念征剿喫緊准照成案在於咸豐七年糧道  
庫徵存漕折等項銀兩隨時撥借歸軍需項下  
樽節支用事竣作正開銷實於軍務有裨據藩  
司文格懋道謝鎰會詳前來理合恭摺具

奏伏乞

皇上聖鑒訓示謹

奏

咸豐七年十月二十四日拜發奉

硃批戶部議奏欽此





援粵官軍大捷進圍平樂府城摺

奏爲援粵官軍疊次大獲勝仗進圍平樂府城恭

摺馳

奏仰祈

聖鑒事竊

臣

前以廣西賊勢日張粵楚道梗調湘楚

祁永各勇越境進剿由全州攻克興安縣城擊  
敗靈川援賊於是永州至廣西省城道路始通  
疊次獲勝情形均經

奏報在案惟廣西盜賊縱橫大局鼎沸方楚軍進  
勦興安時廣西平樂府城續被另股賊匪陷踞

及興安克復餘賊及靈川賊紛紛南竄平樂

臣

以此股首逆尙未就誅併入平樂大夥終成不了之局密札卽選道蔣益澧江忠濬等卽由興安追勦直搗平樂並飭駐紮永明之花翎游擊黃輔鼎帶所部健勇五百名守備銜藍翎千總蕭榮芳帶所部煉勇三百名由龍虎關一帶前往會合統歸蔣益澧節制調遣七月十八日蔣益澧江忠濬等追興安靈川賊至太平舖高上田斃賊數百踏毀賊壘一座連燒賊巢三十餘處奪賊馬四匹旗幟礮械輜重無算二十三日

與安賊竄至恭城縣之栗木寨距龍虎關僅四十餘里黃輔鼎蕭榮芳偵知之潛師截擊比至栗木則賊又轉竄西嶺寨僅斬首數級而還二十五日探報靈川賊六七千甫由陽朔鉄坑竄至而平樂之賊屯沙子街者亦前來會合冀憑險抗拒以阻援師是夜初更黃輔鼎蕭榮芳帶勇疾馳偃旗息鼓天明行抵西嶺於樹林中遍張旗幟作疑兵正兵分三路進擊賊忽聞楚軍大至不辨多少黃輔鼎蕭榮芳持刀督陣把總林茂山羅玉喜伍榮貴外委李三喜劉玉成等

率各勇衝入左右縱擊火毬火箭疊放烟燄四起賊陣大亂官軍乘之遇賊卽斫立將賊寨踏毀復分追十餘里始收隊而還計是役斃賊千餘燒死者不下數百奪獲抬鎗二十六桿烏鎗六十五桿大小旗幟九十三面馬十七匹刀矛雜械不計餘賊仍奔回沙子街蔣益澧江忠濬等因溽暑遘征士卒患病受傷者多至數百暫回興安各遣人赴原籍召募挑補八月杪始料理就緒九月初四日由興安拔營十一月師進栗木橋黃輔鼎蕭榮芳各以所部由龍虎關來

會探報賊分兩股一踞平樂府城外二十里之二塘墟等處其地羣峯削劣一徑縈紆下臨絕澗爲平樂最要關隘蔣益澧江忠濬諮訪土人備知進兵道路十四日師進恭城日覩各縣頻年兵燹之餘良民多避匿山峒自粟木以下距楚邊稍遠則民賊不分竟同化外官軍無處採買米鹽不得不暫留恭城稍爲購辦二十六日始拔營進駐校椅塘賊方悉力扼沙子街阻半邊渡之險以自固謂官軍不能飛越也蔣益澧江忠濬等會商以一軍攻其前牽制賊衆而奇

兵潛由閒道襲其後庶可力破此關是夜蔣益  
澧密令各營三更蓐食四更拔營親率湘勇及  
黃輔鼎蕭榮芳等潛由門樓寨出蓮塘越古子  
嶺楓林石峽等處重險繞道九十里而進攻沙  
子街之後段瑩器蔣榮華等屯石牆口堵二塘  
墟之賊江忠濬率李篤勝左光藻等攻沙子街  
之前賊見官軍至卽由半邊渡冒死來撲江忠  
濬擊敗之斃賊數十二十九日黎明江忠濬拔  
營前進逼之賊仍傾巢來撲江忠濬督諸軍力  
戰自辰至申斃賊百餘猶未撤隊忽賊中人聲

鼎沸紛紛却走江忠濟等陣擒長髮賊五名訊  
知蔣益澧一軍已繞道攻破沙子街賊巢故賊  
之拒守半邊渡者喪膽紛竄也蔣益澧一軍於  
二十八日行抵楓林石峽二十九日已刻行抵  
十里坪距沙子街僅數里賊始驚覺先以賊黨  
千餘來撲蔣益澧令各營速修營壘堅勿與戰  
賊旋却去蔣益澧隨率蕭榮芳王月亮等及勇  
士五千餘人由山路潛赴沙子街左近密覘賊  
勢回營卽傳令出隊賊欺官軍勢單營壘未就  
正傾巢來撲一大股向十里坪而來黃旗遍野



喊聲大震一股賊眾約三千伏金山脚一股二千餘沿江岸而上蔣益澧由中路進王月亮繼之彭玉山由金山脚進胡顯高繼之蕭榮芳黃輔鼎由江岸進各陣斬黃衣大旗賊目數名乘勝掩殺賊敗歸壘亂開鎗礮街內之賊亦悉出助勢蔣益澧督各營急攻彭玉山黃輔鼎蕭榮芳胡顯高奮勇當先立將賊之三壘踏毀賊復縮退橋卡閉柵自固施放橋頭巨礮以相抗拒蔣益澧率王月亮等奮躍直前三伏三起直逼橋頭守礮之賊亦皆驚散彭玉山黃輔鼎蕭榮

芳等時已抄出街後蔣益澧等大呼一擁而入立將賊卡攻破賊急登舟駛避蕭榮芳王月亮等沿江截擊並拋擲火器延燒賊船數十隻於時江波沸起烟燄蔽空號泣之聲呼譟之聲至不可辨賊屍頃刻蔽野橫江統計是役殺死焚死溺死之賊約五千餘生擒長髮悍賊三百餘拔出小兒百餘奪獲馬二百餘匹大小黃旗千數百面抬鎗鳥鎗五百餘桿大礮四座刀矛叉鈚籐牌不計其數餘賊之得脫者竄遁二塘墟二塘之賊聞沙子已破驚懼無措遂於是夜逃

同平樂府城段瑩器等急起追殺斃賊百餘生擒十餘十月初一日江忠濬與蔣益澧會兵沙子街初二日分軍前進蔣益澧率段瑩器蕭榮芳等由二塘取道攻平樂之南江忠濬率黃輔鼎左光藻等由沙子街取道沿江而進攻平樂之北初三日蔣益澧兵進馬蹄井府城之賊旗幟鮮明隊伍亦整蔣益澧令各營嚴陣以待親登山頭瞭視賊蹤示各營進攻之畧約以聞中營鼓聲則急進部署甫定賊已漸逼陣前胡顯高等以劈山礮抬礮鳥鎗更番轟擊斃先鋒悍

賊數十賊陣稍却中營號鼓齊鳴各營分三路  
齊進胡顯高衝入賊陣連及黃馬褂賊目及大  
旗賊十餘名王月亮蕭榮芳亦各斬賊目二名  
賊卽敗走各營乘勢蹙之蔣益澧自山脊分兩  
枝親率兩哨由鳳凰山直下同知潘家馥率兩  
哨攻剿城背嶺賊勢益感胡顯高拍馬衝人半  
邊街因大隊未齊身受刀子十二傷猶裹創力  
戰適蔣益澧潘家馥蕭榮芳等整隊繼進賊復  
大敗擁擠落水者不計其數隨收隊駐城外之  
大較場急築營壘賊復兩次來撲皆經擊退共

斃賊千餘奪獲大小黃旗百餘面馬五匹軍器甚多江忠濬軍進密山渡是日賊三路設伏要截官軍江忠濬督黃輔鼎李德寬等奮威衝殺斃賊三百餘燒賊扒船數隻奪獲旗幟刀礮無數初四日兩軍約攻城外賊卡江忠濬令李篤勝攻兩山峽口黃輔鼎攻城背嶺左光藻沿江岸轟燒賊船三路齊進直逼城外小較場適蔣益澧所派彭玉山蕭榮芳彭玉貴蔣榮華從鳳凰山脚抄來賊勢大潰江忠濬督李篤勝黃輔鼎左光藻等直逼北門攻破賊卡二層縱火焚

賊所踞城外民屋共殺賊千餘生擒二十餘奪  
獲旗幟軍器無數半邊街賊萬餘見蔣益澧方  
分軍入北路助勦遂齊來撲營賊之扒船用大  
礮對營施放子落如雨蔣益澧飭王月亮由街  
後進胡顯高裹創出隊由卡門進段瑩器何超  
舉由半邊街沿江而進親率中營爲三路接應  
令各軍有前無却違者斬胡顯高王月亮何超  
舉督勇進攻連踏賊牆至第三卡賊仍回旗死  
拒火礮橫衝各勇受重傷者數十陣亡一名蔣  
益澧令潘家馥左右兩哨由街左橫截而入王

月亮繞由街右截入段瑩器繼之斃賊二千餘  
立將半邊街賊巢燒燬湘勇百長賀常林蔣益  
恭張維德等梟水奪賊大扒船二隻小扒船四  
隻何超舉率初勇奪大扒船一隻小划船數隻  
蔣益禮段瑩器令各營勇熟悉水性者百五十  
餘卽坐所奪賊船手執火彈橫排而進縱火焚  
賊船百餘隻湘勇初勇躍登賊船生擒賊目偽  
監軍王亞林劉亞頭及水賊八十餘奪獲大扒  
船四隻小划船八隻并焚大扒船十餘隻始收  
隊回營計是役約共斃賊四千餘內有先鋒悍

賊數百斃賊目僞監軍師帥旅帥四五十名除  
焚燒外奪賊大小戰船二十餘隻馬十四匹其  
餘旗幟礮械不計其數此克復興安縣城後進  
剿平樂迭次大勝仗逼攻府城實在情形也

臣維廣西一省自金田大股逆賊竄出後餘孽  
未清本地無著之勇丁就撫之賊黨廣東逋逃  
之匪盜糾聚醜類以淫掠爲生涯以叛逆爲兒  
戲頻年以來屢犯邊境湖南永寶兩郡遭其擾  
害適以湖北江西貴州各省急需助勦餉匱兵  
勞未遑遠畧又以屢次入寇均經湖南官軍追



勦出境斬馘最多不敢肆逞故自上年由永明  
縣龍虎關敗竄之後未嘗妄萌窺伺此次興安  
靈川賊匪敗竄平樂與廣碼會合意謂距楚邊  
較遠湖南援師四出或未能躡蹤窮追鼠輩得  
以假息一隅稍稽

天討不料楚軍克復興安之後進勦平樂攻關奪隘  
直逼府城也計疊次共斃廣東廣西賊一萬數  
千賊勢已窮軍威大振臣已密飭蔣益澧江忠  
濬一面竭力攻勦一面整理鄉團仍嚴防梧州  
援賊以圖尅期蒞事所有援勦平樂疊次大獲

勝仗在事出力文武紳勇可否由臣核明保  
奏獎勵之處出自

天恩謹據實由驛馳

奏伏乞

皇上聖鑒訓示施行謹

奏

咸豐七年十月二十七日拜發奉

硃批另有旨欽此



保舉援軍克復廣西興安出力員弁摺

奏爲遵

旨保奏懇

恩獎勵事竊湖南援粵官軍自廣西全州進攻興安  
迭獲全勝克復城池疏通楚粵大路湖南員弁

紳勇蒙

皇上天恩俯准由臣保奏當卽恭錄

諭旨宣示援粵各軍在事文武感荷

皇仁歡聲雷動隨據卽選道蔣益澧江忠濟開呈各  
員弁紳勇戰績清冊前來臣詳加披閱除蔣益

禮等十三員業經廣西撫

臣勞崇光懇

恩優獎外其餘奮勉出力各員弁紳勇人數尙多謹  
卽一一查明恭繕名單敬呈

御覽其永州府屬之永明道州零陵三縣上年因逆  
匪竄擾邊界屢經文武團紳兵勇且防且勦前  
後斃賊數百賊不敢復犯楚境此次或截勦敗  
匪或協撥援師亦屬著有微勞謹酌擇尤爲出  
力者一併彙入此案伏乞

皇上天恩加以甄錄庶人才競奮士氣倍揚以策後  
効而勵將來不無小補至湘勇營陣亡之外委

蕭祥發祁勇營陣亡之外委蕭榮升額外唐廷  
治赫勇營陣亡之外委李三喜可否照把總例  
賜卹湘勇營陣亡之六品軍功謝心田宋祥二陳得  
勝彭國佐可否照外委例

賜卹伏懇

聖鑒訓示施行謹

奏

咸豐七年十月二十七日拜發奉

硃批另有旨欽此

海峽殖民地總督府

三

援粵官軍克復平樂府城首逆就擒摺

奏爲援粵官軍克復平樂府城首逆就擒恭摺馳  
奏仰祈

聖鑒事竊援粵一軍自克復興安縣城肅清楚粵大  
路逼攻平樂府城疊獲大勝情形均經

臣

奏報在案十月初五日卽選道蔣益澧勦城外大  
街之賊斃賊數十卽選同知段瑩器守備何超  
舉等奪賊大小戰船十二隻洋礮七尊五子礮  
八桿抬鎗十二桿礮子六石火藥石餘初七日  
賊衆由北門突出蔣益澧卽選道江忠濬等率



各營分途截擊斃賊三百餘初八日蔣益澧令  
段瑩器何超舉移所部祁勇駐對河蔣村防城  
賊竄陽朔之路初八日蔣益澧江忠濬段瑩器  
等三面環攻破城外賊卡一座焚賊巢數處初  
十日賊乘大霧三路來撲江忠濬合游擊黃輔  
鼎參將李篤勝都司銜守備左光藻分路截擊  
把總李德寬於鳳凰山開礮以擊城上之賊共  
斃賊二百餘賊旋縮退入城黃輔鼎躡蹤追之  
欲乘勝奪門而入比至卡門則賊穴牆施放鎗  
礮子飛如雨士卒多帶傷而退十二十三等日

蔣益澧江忠濬等連用所奪洋礮四面環攻轟  
坍南門城樓並堞口十餘處斃城中賊約數百  
時廣西平樂府知府張鵬萬署平樂協參將陳  
玉發率廣西兵勇四千餘駐紮對河署全州知  
州蘇鳳文令守備銜慶遠協千總蔣俊敷把總  
唐應瑞等管帶全勇亦由富川馳至而江忠濬  
等所紮北路鳳凰山獅子嶺等處營壘最當賊  
衝十七日北門突出悍賊四千餘撲黃輔鼎左  
光藻等營黃輔鼎親執大旗率所部從五顯廟  
出擊左光藻從河岸出擊江忠濬飛飭千總鄭

學德李德寬率勇由鳳凰山脚抄出李篤勝於鳳凰山礮臺開放大礮蔣益澧亦飭各營相機策應黃輔鼎左光藻鄭學德李德寬等三伏三起短兵相接斃賊七十餘各營用連環鎗礮轟擊斃賊約二三百賊猶死拒不退鄭學德橫躍入陣砍斃執紅旗賊目而奪其旗忽胸右爲礮子所傷把總鄭昇信外委賈占應大呼繼進均爲礮子洞胸殞命各勇憤甚捨命衝擊賊始却退而受傷者已五十餘名蔣益澧等恐多傷精銳乃令徐徐收隊歸營賊以官軍四面迫近外

援既絕接濟亦斷屢次乞哀求降蔣益澧以賊  
雖窮感然黨羽尙多難以安插且粵賊反覆無  
常每以投誠爲出路非痛加懲創不足示威嚴  
飭各營毋得擅准招撫適賊目彭正貴賁正修  
柏老三王世玉携鍾山通判及平樂縣印潛赴  
卽選知州段瑩器營乞降蔣益澧親督蕭榮芳  
等率勇掩捕將彭正貴等四犯拏獲回營賊知  
乞降不允則冒死出撲二十三日賊乘大霧大  
雨由南北兩門突出其由北門出者約六千餘  
人江忠濟飭黃輔鼎左光藻李篤勝李德寬鄭

學德固守外壕用礮石轟擊蔣益澧飭蕭榮芳  
彭玉貴蔣榮華於鳳凰山脚策應彭玉貴蔣俊  
敷唐應瑞等由河岸追擊段榮器何超舉於對  
岸開礮轟之雨霧冥濛之中鎗礮之聲震驚山  
谷江忠濬因各軍火繩多被雨濕不燃飭鎗礮  
隊易繩張蓋繼進未刻霧收雨止黃輔鼎彭玉  
山左光藻蕭榮芳李篤勝等各縱勇痛擊賊始  
敗退計殺賊三百餘名礮斃不計其數生擒長  
髮賊九名官軍受傷者亦數十名其由南門河  
岸出者四千餘蔣益澧率王月亮胡顯高分途

截擊斃賊約百餘賊卽敗潰入城訊據生擒名  
賊知首逆楊秀全卽楊西安等以援絕糧盡無  
處逃生希乘雨霧拚命殺出重圍不料又爲官  
軍所敗蔣益澧以困獸猶鬪恐多損精銳而逆  
賊求降益急不如先誘賊首出城較爲省力是  
夜令廣西都司銜守備陶昌培諭知逆首楊秀  
全出城當面稟懇二十四日辰刻逆首楊秀全  
果攜僞監軍蔣先佐僞軍師陳晚總僞司馬劉  
心鏡至陶昌培船上蔣益澧率親兵四名及黃  
輔鼎蕭榮芳左光藻李篤勝等至令將楊秀全

等四犯帶回本營嗣又續獲僞軍師蕭得生伍雲二名隨射示入城果係脅從難民方准薙髮免死資遣回籍自後每日出城者約二三百名蔣益澧驗明蓄髮至六寸以上形狀桀驁者仍予正法其餘令薙髮歸籍據難民供城賊乏糧殺馬爲食每日餓死病斃者約三百餘實已窮蹙十一月初一日賊黨數千仍冒雨來撲北路黃輔鼎等營壘江忠濬督各營轟擊蔣益澧飭彭玉山彭玉貴助勦約共斃賊數百名初三夜賊復撲營均經擊退蔣益澧令各營每夜派勇

執火擊鼓密爲巡邏賊不敢出初五夜賊架筏由靈官廟渡水潛逃段瑩器何超舉率勇同平樂恭城陽朔三縣團練憑岸轟擊斃賊約二三百溺斃者無數賊仍敗退回城初六日蔣益澧以西路兵力頗單飭蕭榮芳蔣俊敷移駐靈官廟以厚其勢飭黃清陶昌培率師船巡河口一帶轟斃賊匪數十將賊所紮木筏盡數奪獲斷賊西竄之路是夜城賊偵知官軍分往西路遂傾巢齊向南門下關衝出自城根至蔣益澧壘脚絡繹不絕蔣益澧令各營嚴守營壘一面飭



彭玉山蔣榮華等率勇排列營後高山列炬作  
疑兵以助聲勢逆賊冒死前撲越壕上壘者已  
十餘人蔣益澧持刀督令砍亂列者數人把總  
蔣益恭王載興賀常林譚厚載劉清亮蔣益慈  
等殺悍賊六名生擒五名賊始稍却旋復大呼  
齊進官軍以礮石禦之相持至半夜蔣益澧率  
蔣益恭及親兵衝出營外砍殺悍賊百餘賊之  
在沙洲者亦震懼失措多墮溺水中蔣益澧乘  
勝猛撲鎗礮齊發斃賊千計賊始敗退入城其  
撲王月亮胡顯高營盤者亦經王月亮胡顯高

擊退斃賊無數一股約三千餘乘閒竄入王月  
亮營後山谷彭玉山率勇堵截蔣益澧飭各營  
列炬鳴鼓分隊助之賊不得出遂折回齊撲蔣  
益澧營盤蔣澤春率守營之勇以礮石抵禦賊  
仍退山下是時天已明矣蔣益澧飭彭玉山蔣  
榮華由山上殺下王月亮胡顯高由山下殺上  
蔣益澧親由山左殺入彭玉貴由北路收隊回  
營亦從山右殺入遂將此股全數殲除生擒賊  
目唐振南及僞號軍師帥旅帥者二十餘人  
餘賊四百餘奪獲旗幟礮械輜重不計其數共

計轟斃溺斃燒斃殺斃之賊五六千餘自此大  
痛勦之後賊尤膽裂蔣益澧江忠濬等遂會議  
大舉攻城初八日蔣益澧黃輔鼎左光藻等及  
廣西帶勇之唐應瑞余當驊唐毓銓攻北門江  
忠濬自率李篤勝鄭學德李德寬攻城之東北  
都司蔣榮華彭玉貴攻城之東南彭玉山蔣益  
恭王月亮胡顯高攻東門段瑩器何超舉蕭榮  
芳及廣西帶勇之蔣俊敷等攻西門廣西知府  
王鎬及帶勇之陶昌培等率師船由南門河下  
開礮轟擊廣西帶勇之黃清陶茂鳳孔憲隆廖

國安曾連秀何元鳳洪日高攻正南門署平樂  
府知府張鵬萬代理平樂縣知縣賀聯奎已革  
署興安縣知縣嚴正圻等各率團練助戰蔣益  
澧飭湘中營策應諸路躬率親兵往來督戰部  
署甫定各路齊進連撲數次均爲城上礮石所  
阻各營受傷者百餘名陣亡數名黃輔鼎彭玉  
山憤甚誓以死殉遂執大旗從礮石中分路乘  
梯搶上忽均爲飛礮所中登時陣亡各路弁勇  
忿甚遂同時一湧而上殺賊四五千立將城池  
克復逆賊見官軍入城倉皇亂竄蔣益澧復率

勇衝殺江忠濬飭李篤勝王月亮由下路兜擊  
縱橫亂砍斃賊三千餘時已昏黑官軍忍饑一  
日始收隊回營初九日黎明又飭各營四山搜  
勦復殺賊二千餘附近四十里間屍橫遍野亦  
不辨其誰爲賊目也探報餘賊仍有從二塘墟  
竄逸者初十日江忠濬率各營跟蹤緊追務期  
悉數殲除以伸

天討而快人心各營生擒賊數百皆一一問明立予  
正法被裹之老弱婦女分別釋歸安插所獲旗  
幟器械山積實亦無數可紀此迫攻平樂初八

日克復府城初九日追勦餘賊之實在情形也  
臣維兩廣亂民最多廣東亡命無賴之徒素以  
廣西爲淵藪廣西滋事之賊分廣碼土碼兩種  
土碼爲廣西本籍亂民尙易芟蕪廣碼則堅忍  
悍鷙嗜亂輕生有出尋常意計之外者現在金  
陵巨股逆賊雖起自廣西而頭目多係廣東流  
匪故爲禍最烈近年廣碼多逸入江西勾通巨  
賊而江西之事遂棘其明徵也此次平樂踞城  
賊首楊秀全卽楊西安本廣東人流入平樂勾  
煽奸黨遂陷府城與梧州賊匪潛通聲息

臣於

與安藏事楚粵道通之後密飭蔣益澧江忠濬  
等移師討之並飭黃輔鼎蕭榮芳防邊之軍併  
歸蔣益澧統帶屢飭其相機痛加懲創勿輕易  
安撫致啓戎心蔣益澧等自由恭城進兵以來  
熟審地勢賊情申明紀律攻奪關隘履險如夷  
卒能掃穴擒渠聿揚

聖武實屬著有微勞儘先選用道額哲爾巴圖魯蔣  
益澧可否

賞加按察使銜並

賞給該員父母三品封典江忠濬可否

賞加鹽運使銜以示鼓勵之處出自

天恩其餘實在奮勉出力之員弁勇丁甚多其由湖

南派往者擬請由臣核明保請

恩獎其由廣西派往者擬請由廣西撫臣勞崇光辦

理以歸畫一而勉歧出至陣亡之已保花翎補

用參將黃輔鼎原係前安徽撫臣江忠源部卒

頻年積功保擢今職打仗衝鋒傷痕遍體忠實

勇敢實武員中不可多得之才已保花翎游擊

彭玉山原係前浙江甯紹台道羅澤南部卒頻

年積功保擢今職屢次冒險搏戰銳不可當此



馬子長  
次奮勇登城

皇上天恩均照副

郵典黃輔鼎卽附

南祠以妥忠

附

奏所有克復平

奏伏乞

皇上聖鑒訓示施行

奏

咸豐七年十

硃批另有旨欽此

THE UNIVERSITY OF CHICAGO

1911

援軍將領濫收游勇債事請

旨革訊摺

奏爲援軍將領濫收游勇不能約束以至債事據  
實會參請

旨革職交江西查辦以肅軍務事竊用兵之道紀律  
爲先馭將之方賞罰爲要軍興以來東南各省  
因制兵不盡足恃不得不召募勇丁資其攻勦  
以戰事而論勇之得力每勝於兵以紀律而言  
兵之易馴差勝於勇究之兵與勇之可用與否  
則專視乎將領何如近時湖南勇夫出境從征

者水陸不下十數萬之多皆先擇將而後募勇  
有將領而後有營官有營官而後有百長有百  
長而後有什長有什長而後有散勇其長夫又  
由各散勇自募而後營官點驗歸棚蓋均取其  
相習有素能知其性情才力之短長相距匪遙  
能知其住址親屬之確實故在營則恪守營規  
臨陣則凜遵號令較之隨營召募游手無賴之  
徒以充勇夫者稍爲可恃至於管帶之多寡則  
必視其人之才器以爲等差以數百人之才將  
至千人已虞僨事若以數百人之才將至數千

人其敗績固可立待也上年湖南湖北先後出師援勦江西臣駱秉章因吉安一郡被匪攻陷之後江西無官軍援勦適副將周鳳山在江西戰敗前侍郎曾國藩札令間道回籍募勇臣以該副將曾隨塔齊布立功准募永州勇一千五百名前赴吉安會同同知銜曾國荃一軍進勦嗣該副將稟請增募勇丁臣以其材器實難統帶多人批飭不准并以餉需無從籌畫增募必致饑潰令其停止詎該副將不復稟承在該營收游勇三千餘名合之本軍已五千名以致良

匪雜糅漫無紀律六月十七日城賊出撲周鳳山一軍不戰而潰退至安福潰勇四散有由萍鄉醴陵回湖南省者有由永新茶陵回湖南省者約共三千餘人沿途騷擾不堪臣札飭各州縣嚴拏重辦始據該副將稟請查拏外委黃天蓋等嗣提黃天蓋發長沙府收審據供各勇沿途奪取舖戶錢文分給該弁食物是實又據茶陵州知州李光第稟獲賊探朱永志供原充周鳳山營勇丁被賊擄去隨賊抗拒官軍六月十七日之敗目見周鳳山營勇不戰而潰是實此周

鳳山濫招游勇不能約束以致僨事之實在情

形也

臣

胡林翼上年派勇援勦江西共四營一

副將普承堯寶營一知縣劉騰鴻湘後營一同

知曾國華湘中營一同知吳坤修彪營共四千

餘人而吳坤修所帶彪勇一營僅止六百人

臣

胡林翼聞吳坤修於途次增募游勇入營時卽

嚴札申飭令其迅速裁汰以符原帶之數吳坤

修置若罔聞隻字不復該彪勇赴江路過湖南

善化東鄉瀏陽西鄉一帶姦淫騷擾種種不法

臣

駱秉章隨札飭吳坤修查拿懲辦吳坤修以



游勇冒充彪勇名目稟覆

臣

駱秉章當經批飭

游勇非勇乃痞匪也此等奸頑橫暴之徒不特

爲官軍聲名之累且恐激變良民暗勾賊匪將

有防不勝防之禍四營同行而游勇獨假彪勇

名目則彪營之未諳紀律可知吳坤修自此亦

並不稟覆後聞赴江西後已陸續增招游勇至

三千數百名之多其會圍瑞州時曾國藩飭各

營開挖長壕官軍憑壕而守城南屬劉騰鴻城

西屬普承堯城北屬吳坤修賊糧將盡矣六月

十九夜逆目賴裕新周春嚴守和率大股三千

餘由西北越壕竄去普承堯劉騰鴻均派隊追擊普承堯西路距賊較近斬獲最多劉騰鴻南路距賊最遠斬獲爲少獨吳坤修一軍距賊最近竟未殺賊亦無一勇受傷劉騰鴻未陣亡之前曾上稟言吳坤修縱賊並云吳坤修於合圍時所部勇丁有接濟城中洋烟雞肉等事臣等於隔省之事固無從訪求實據而吳坤修上臣胡林翼稟亦自以該勇山僻蠻類野性難馴不改其驕悍之性爲言則吳坤修廣招游勇不能約束以致僨事亦可概見夫用勇之多流弊人

人知之矣湖南勇丁所以稍稍可用者原於未募之初先擇管帶令其各就原籍■莫■具保結而後成軍成軍以後嚴加訓練層層節制該勇丁均係土著生長之人有家室妻子之戀故在營則什長百長營官將領得而治之散遣歸籍則知縣團總戶長得而察之遇有私逃則營官將領稟知本省得按籍捕之此明臣戚繼光所以有募勇必由知縣之說也近日軍興日久游手亡命之徒皆以從軍爲樂官軍勝則尾後而拾取賊贓官軍挫則乘危而擄掠民物殺人

放火視爲故常從前四川嘔匪之起論者謂由  
於木果木之潰軍三省教匪之事戡定後又煩  
官軍者兩載近如江西前都司吳錫光之精勇  
在義甯州多投入逆首石達開營大營潰敗之  
潮勇多投入吉安賊營皆其明驗逆賊所以屢  
經挫敗其焰猶張者未始不由游勇之爲害

臣

駱秉章上年春閒曾通札湖北江西各帶勇員  
弁並咨各督撫臣遇有派員委弁來湘募勇者  
必詣臣衙門稟請加札各原籍會同州縣召募  
一以防奸匪之詭託一以防游勇之混跡並迭

次嚴飭各營毋得廣收游勇乃周鳳山經臣駱

秉章派往援江竟不俟批准擅收游勇三千餘

名之多吳坤修經臣胡林翼派往援江竟不遵

奉札飭擅收游勇三千餘名之多又不能嚴加

約■以致債事在江西方盼援軍之助宜於援

軍將領不能無恕詞臣等若不據實參

奏設各將領紛紛效尤不但貽誤江西靡所底

且流弊無窮異日之患方長並恐上煩

聖慮臣等往返咨商意見相同不得不據實參

奏請

旨將卽選副將周鳳山廣東南韶連道吳坤修先行  
革職交江西撫臣耆齡查辦以示懲儆是否有  
當伏乞

皇上聖鑒訓示施行謹

奏

咸豐七年十一月二十二日拜發奉

硃批另有旨欽此



援江官軍大捷擊退石逆大股摺

奏爲援勦江西官軍迭獲大勝將石逆大股擊退  
恭摺馳

奏仰祈

聖鑒事竊分帶湘勇道銜卽選知府張運蘭卽選知  
府王開化一軍自羅坊擊敗僞國宗石逆援賊  
後九月初八初九兩日進勦阜田回竄之賊兩  
獲全勝業經臣於九月十七日由驛附報其時  
迭據探報逆首石達開自安慶渡江竄踞建德  
臣卽慮石逆將由建德竄浮梁趨饒州與撫建



之賊合勢以援臨吉之賊即於原片聲明請

勅辦理江西軍務西安將軍福興嚴扼江省東路勿

令竄越庶西路得以次第料理旋據張運蘭王

開化等稟報該營於九月十八日進紮阜田偽

國宗石逆一股已退竄吉安府城及水東各處

應否會合迫攻請批示遵辦臣以吉安一軍自

副將周鳳山潰後其由湖南支應口糧之即選

知府趙煥聯所帶和營及參將劉培元之長營

均仍駐安福原擬俟江西瑞州官軍副將普承

堯同知銜知縣劉騰鶴等兩軍進指吉安即會

合逼攻府城現據各營稟報先後取齊前進較前此聲威更壯惟吉水縣屬三曲灘一帶地方當臨吉之衝應遴派得力陸軍防勦以水師護之方爲勝算嗣張運蘭王開化軍進螺子江距三曲灘最近卽嚴飭妥爲籌辦務令援賊不致偷越贛江繞道西竄並飛咨江西撫臣知照去後復接江西撫臣移咨知福興一軍敗於饒州屬之樂平九江總兵李定太副將周鳳山兩軍敗於東鄉進賢之間深爲駭嘆知江西東路毫無阻遏逆首石達開必將由撫州以援臨吉矣

查臨江吉安兩郡及稍遠之袁州瑞州兩郡均在贛江之西亟應畫贛而守以遏兇鋒臨江樟樹嶺一帶有江西統帶水陸之安肅道劉于涪分布礮船控禦新淦之長排仁和墟一帶及峽江縣城有湖南援江之補用道劉長佑分撥陸軍控禦尙可無虞惟峽江而上吉水而下之三曲灘冬令水涸地勢散漫賊若由此偷渡而至阜田則東北出峽江北出新喻西出安福西北出分宜取道臨吉之中路逕紛歧勢難堵截正恐臨吉之圍不能不撤而袁瑞兩郡亦危

臣比

催調吉安原立之吉營長營兩水師速回吉安  
吉水嚴密防護並札飭到三曲灘後卽由湖南  
給餉以速其行十月初六初七初八等日張運  
蘭王開化會同趙煥聯劉培元管帶吉字營湘  
勇之同知銜曾國荃及江西調來之普承堯劉  
騰鶴參將遮克敦布等各督所部環攻吉安府  
城之賊均獲勝仗而初八日之戰張運蘭等所  
部都司銜守備朱惟堂藍翎訓導胡兼善分三  
路圍勦水東撲營之賊於瓦窰焚賊壘十餘座  
斃賊千餘生擒僞檢點羅姓僞指揮李姓僞將

軍甘姓及悍賊數十斬之並奪賊馬八十餘匹  
抬鎗鳥鎗刀矛不計其數陣斬僞丞相鄭姓僞  
指揮鄧姓而奪其僞印一顆賊首衣繡龍袍戴  
紅緞繡龍風帽著紅繡龍靴者正乘黃呢大轎  
在後督戰經湘勇攢矛刺斃並碎其轎據朱惟  
堂等稟稱生賊供指係僞國宗石逆之衣物解  
臣衙門呈驗比締視賊帽前沿有白緞長條緞  
綻甚密折看中有繡字乃太平天朝提督軍務  
翼貴丈僞銜也或所斬爲逆目黃錫崑亦未可  
定自此大痛勦之後水東之賊爲之奪氣十二

日曾國荃趙煥聯劉培元及參將朱南桂訓導  
胡兼善等各率所部進紮吉安城外之十里亭  
賊來撲營擊卻之斃賊百餘十八日曾國荃所  
部管帶吉營水師之廩生高彥驥劉培元所部  
管帶長營水師之都司黃開亮遵札駛回三曲  
灘十九日江軍副將普承堯遣所部知縣黃秉  
珍已革都司劉光明等帶寶勇一千三百名即  
乘師船渡贛而東襲攻吉水縣城克之斃賊千  
餘高彥驥以師船助攻轟擊亦眾是日及二十  
一日吉安城賊出撲天華山真君山螺子山各

官軍新營經曾國荃趙煥聯劉培元張運蘭王  
開化及江軍之普承堯劉騰鶴等擊敗城賊以  
西南北三面官軍漸逼漸近思架浮橋以通水  
東賊營之氣二十六日劉培元令黃開亮率所  
部師船進勦奪賊小船七隻焚賊船十餘隻乘  
賊上岸焚賊營五座斃賊甚多二十七日劉培  
元親督黃開亮高彥驥等率吉長兩營師船會  
同江軍參將遮克敦布知府周炎所部水陸兵  
勇勦水東之賊上下夾擊將浮橋衝斷江楚各  
軍奮勇爭先焚奪賊船數十斃賊不計其數立

將水東賊壘賊巢一律掃除餘賊一竄永豐縣境之丁江烏江一竄大和縣屬之鴨村及泊下墟等處自此水東與吉水皆無賊蹤吉安三面長壕已成而城東一面亦臻嚴密矣城賊知勢漸孤頗有洶洶潰遁之意二十八日張運蘭王開化曾國荃趙煥聯劉培元及江軍普承堯劉騰鶴遮克敦布周炎等大舉四面攻城斃賊數百而城堅不可驟拔正西一石壘尤小而固高與城齊礮眼層疊外環深濠密釘竹籤官軍迄不能近也時永豐縣城被另股賊圍攻已久江



西代理永豐縣知縣章澂等嬰城固守屢將賊  
匪擊敗張運蘭王開化與普承堯熟商不速飭  
援軍分勦無以慰忠義之心初四日張運蘭率  
湘勇千人並統朱南桂胡兼善等兩營千人將  
由吉水往援永豐江軍普承堯復續派游擊章  
奪錦率馬步隊七百同往忽接探報逆首石達  
開率大股悍賊十數萬號稱三十萬沿贛江而  
上已由豐城至新淦爲江軍劉于涓水師及楚  
軍劉長佑陸軍所扼不能偷渡其峽江縣在贛  
江之西劉長佑已飛調駐防新喻縣城之都司

楊虎臣帶所部湘勇憑江而守逆賊無船可渡  
劉培元聞警復率所部陸勇及長營水師礮船  
馳往助堵然賊鋒甚銳其來甚速恐將越峽江  
縣境迅趨吉水三曲灘對岸一帶來撲縣城張  
運蘭等是日午刻甫渡贛抵吉水縣城復接探  
報石逆達開已由峽江縣對岸之八都墟抵三  
曲灘對岸古洲遙望旗幟蔽野戈矛林立似不  
下二萬餘眾張運蘭下令飽餐嚴裝以待賊見  
官軍整暇不敢逼徐收隊而還張運蘭率朱南  
桂胡兼善高彥驥及江軍黃秉珍章奪錦劉光

明等周視戰地預定設伏之所初五日五鼓令朱南桂率所部伏城東七里高岡胡兼善伏城東七里半岡令江軍黃秉珍劉光明章奪錦以所部之卒守城以其半分爲二隊一伏七里灣一爲朱南桂胡兼善後應令高彥驥督長營師船沿贛而下助戰幫辦張長勝劉生濤同都司黃萬友守備銜千總文恆久由左路江邊繞出伏之張運蘭督親軍爲中路誘賊黎明前隊賊至見官軍人少易之張運蘭故示以怯賊飛奔而來直過義家橋張運蘭令發號礮各路伏兵

徐出朱南桂胡兼善俟賊盡過又麾各百長率  
勇分三枝斜截之一迎其頭一截其尾而自率  
親軍橫躍入陣黃萬友文恆久等亦由左路馳  
至賊眾慌亂官軍奮威盪抉賊目並馬均陷淖  
中隨砍隨斃無得脫者賊中隊繼至尙未列陣  
爲前隊敗賊所衝官軍乘勝追勦迫之朱山橋  
橋狹水深賊眾自相擠溺死者無數追及高橋  
沿途殲斃甚眾忽賊後隊齊至排列山岡遙爲  
策應張運蘭令黃萬友文恆久與朱南桂分路  
猛進胡兼善章奪錦劉光明等繼之窮追至西

坑賊遂兩路潰走官軍收隊回城是役斃賊二千數百溺死者不知其數生擒百餘奪賊馬百數十匹陣斬逆渠僞忠貞報國敦天燕張姓僞春官又副丞相元勛張姓僞翼殿右十承宣譚姓僞指揮吳姓僞承宣承尉李太有楊兩萬僞將軍羅再田皆剝取繡龍袍繡龍風帽馬褂僞印執照等件呈驗據生賊供稱逆渠敦天燕是金田起事巨目名號僅下石逆一等不知其名比提驗所獲僞印比石逆僞文所蓋之印僅短小數分則其爲巨目無疑蓋賊職之大小以僞

印爲等差也是夜迭據探報逆首石達開已率  
大股抵朱山橋延紮營壘三十餘座憤前隊賊  
夥爲官軍所敗傷斃最多誓攻陷吉水縣城再  
援臨江之賊初六日賊萬餘前來撲城排列義  
家橋北張運蘭令靜以覘之賊旋却退是夜登  
陣嚴守並會商次日布陣正伏之要初七日五  
鼓令朱南桂黃萬友胡兼善伏於城東五里山  
沖及王周塘一帶令章奪錦劉光明等率所部  
馬隊進勦河邊大路張運蘭自率親兵並文恆  
久湘勇一旗爲接應分撥甫定辰刻賊蜂擁而

來已過義家橋黃萬友突起擊之斃騎馬賊目  
數名賊稍却適後隊賊萬餘繼至黃萬友率所  
部衝突苦戰擬保把總向義靈黃順太死之勇  
丁陣亡五名正相持閒張運蘭令文恆久帶勇  
飛馳接應朱南桂胡兼善章奪錦各麾所部弁  
勇助戰合力縱擊賊始却退追至朱山橋後隊  
賊大至敗賊復卓旗回拒石遊親自督之朱南  
桂等率弁勇縱橫衝擊復斃賊數百乘勝踏毀  
賊壘三座高彥驥黃開亮各率師船連開大礮  
轟擊羣子如雨斃賊甚多遂徐徐收隊回城是

戰斃賊數千生擒百餘名奪賊馬十餘匹陣斬  
僞翼殿左二十一指揮陳姓僞殿右三十八軍  
承宣謝姓僞後二旗刑審職司檢點張春珊僞  
指揮李而值等八名奪獲旗幟僞印鎗械多件  
而張運蘭所部弁勇陣亡七名朱南桂所部勇  
丁陣亡二十三名胡兼善所部勇丁陣亡三名  
章奪錦等寶勇陣亡二十三名受傷者不下百  
餘名蓋亦血戰矣十四日逆賊萬餘分兩路來  
攻張運蘭令堅壁勿出亦不施放鎗礮俟其近  
城則痛創之申刻賊至近城半里其先鋒悍賊



數百距城尤近張運蘭飭高彥驥率師船下駛  
開礮橫衝城頭鎗礮齊施斃賊百餘賊知仰攻  
爲難旋即引退張運蘭始麾所部一旗及朱南  
桂部勇列陣城外誘之賊終不敢前進遂收隊  
回城十五日辰刻遊賊傾巢來攻張運蘭在城  
頭瞭望賊分三路一由大路一由江邊均迫近  
北門其由右路來者迫近東門伏匿山林中而  
七里沖一帶峯頭旗幟林立呼聲震天張運蘭  
令朱南桂胡兼善及江軍黃秉珍迎擊右路江  
軍劉光明章奪錦迎擊左路自率黃萬友文恆

久等迎擊中路官軍出城列陣賊蜂擁來撲張  
運蘭嚴陣以待如不欲戰逆賊連撲十餘次官  
軍迄立不動惟用鎗礮層疊轟擊斃賊無數賊  
更番而前死拒不退張運蘭令黃萬友等率隊  
併力猛撲賊陣始動官軍愈撲愈猛銳不可當  
賊始敗退左右兩路之賊見中路賊敗拚命齊  
撲劉光明躍馬而前手執黃旗賊二名額受  
子傷張運蘭令張廣勝劉生璫率親軍助戰高  
彥驥率師船開礮轟擊賊遂敗走朱南桂胡兼  
善等既將右路之賊擊敗復各撥所部百人捲

旗赴江邊策應適東北山脚之賊經章奪錦擊  
退而右路山邊伏賊齊出官軍併力衝挾賊亦  
敗走是戰共計殺斃轟斃各賊一千五六百奪  
賊梯百餘架鈎繩六十餘根及木板數十塊皆  
賊所備以渡壕登城者據生賊供稱石逆誓陷  
此城令其衆以大路之賊麤敵官軍俾伏兵得  
以伺閒登城不虞復爲官軍所敗也十八日辰  
刻逆賊復來義家橋其排列右邊山脚者爲賊  
之正兵其在橋之左右村莊者爲賊之伏兵其  
排列山脚者復分爲兩大枝一出大路一出七

里山前後山岡翼誘官軍過橋得施其抄截之計張運蘭令黃秉珍章奪錦及游擊羅近秋朱南桂黃萬友文恆久等由西城繞出北門半伏城脚文昌閣等處半向前迎擊令胡兼善等出東門防勦伏賊自己至午相持未決朱南桂率所部由大路猛進手及黃袍騎馬賊目一名而奪其馬羅近秋等由右路繼進斃黃衣賊目一名黃萬友文恆久等齊隊衝出斃賊甚多逆賊正伏齊出包圍官軍江軍守備吳開泰派隊由對岸龍王廟飛渡而來與黃萬友文恆久分隊

橫衝湘勇黃秋元陣斬黃馬褂賊目湘勇何映  
文鎗斃黃衣騎馬賊目官軍正奮威衝殺開高  
彥驥又率師船沿江轟擊黃秉珍亦派馬隊助  
勦賊遂大潰胡兼善率所部分搜七里山前後  
伏賊適伏賊數千見大路賊敗將馳往策應百  
長擬保藍翎外委黃由開橫躍入陣截殺悍賊  
數名忽爲亂矛所刺登時陣亡各勇憤甚併力  
衝殺賊復大潰官軍合隊掩殺至義家橋始收  
隊還是戰派六成出隊鏖戰六時之久斃悍賊  
千餘內有大小賊目二十餘名而官軍陣亡一

名受傷十餘名而已逆首石達開知官軍水陸  
堅扼吉水三曲灘斷難偷渡以援臨吉之賊而  
兇渠悍目死傷已多遂決意回竄二十夜及二  
十二夜悉數由永豐峽江新淦地界分途潛遁  
現據探報已陸續向撫州竄去張運蘭時以永  
豐縣城之圍未解距吉水縣城不遠擬速往援  
之故未及窮追旋據代理永豐縣知縣章澂稟  
報圍城之賊亦於二十三夜全遁城圍亦解矣  
臣維逆首石達開在諸賊中最爲狡悍自咸豐  
五年冬由湖北通城竄入江西境先後攻陷臨

江瑞州吉安撫州建昌五府及各屬城池遍設  
偽官分駐賊黨江省東西大局盡爲該逆破壞  
士民被其荼毒而又畏其兇狂該逆能僞收人  
心善結死黨故亦爲諸逆所忌上年夏間自江  
西饒州浮梁回窰金陵攻陷前提臣向榮大營  
復上援武昌之賊經水陸官軍擊敗後復回金  
陵助逆首洪秀全驅除各營該逆雖爲洪賊盡  
力然亦頗自危懼憂閒復獨身逃赴皖城號召  
黨羽脅洪逆送其眷屬至皖大有自立一幟之  
意昨次所獲僞官執照均叙金陵東門及金陵

誅賊之功其均爲石逆死黨可知臣前接探報知該逆已由皖渡江自建德至浮梁之景德鎮意其必趨撫州以援吉臨而復窺袁瑞兩郡卽密札援江各軍勤探嚴防守定後戰然猶冀福興李定太等稍能扼要堅守以挫其鋒也不料福興等相繼敗潰賊竟得直趨撫州比接劉長佑等探報該逆於十月二十七八等日率大股抵豐城逼張僞示驕恃異常其時該逆則已經抵峽江前隊已近吉水之三曲灘矣其剽速如此幸吉長兩營水師先到三曲灘一帶江軍普



承堯等派隊先復吉水縣城自是吉水水東之  
賊畏官軍東西水陸夾擊敗竄太和縣境而張  
運蘭等十一月初四日甫渡贛而抵吉水恰值  
石逆前隊到三曲灘對岸於初五日奮力鏖戰  
陣斬逆渠敦天燕張姓及悍日多名賊鋒大挫  
自是以千餘陸勇守而兼戰以兩營三十號之  
師船勦而兼防卒能勦此劇寇痛挫兇鋒嚴扼  
臨吉兩郡通津使官軍得一意攻圍免虞他變  
實非人謀能及也

皇上憂勤之意感召甚神而在事文武弁勇微勞亦

實有不可掩抑者道銜卽選知府張運蘭安詳  
穩練整暇有謀可否以道員歸部卽選參將朱  
南桂樸實果敢每戰奮勇當先戰功卓著可否  
賞加勇號克復龍泉案內擬保同知銜知縣藍翎訓  
導胡兼善可否以同知歸部卽選管帶長營水  
師都司黃開亮可否以游擊留於湖南補用管  
帶吉營水師廩生高彥驥可否以訓導歸部遇  
缺卽選此外實在出力文武弁勇及陣亡各弁  
可否由 臣 核實彙案保獎請  
卹之處出自

天恩至此次記名總兵副將普承堯派委各營先克  
吉水縣城嗣復隨同張運蘭屢次打仗實著微  
績該營由江西調遣應由江西撫臣核保合併  
聲明謹據實陳

奏伏乞

皇上聖鑒訓示施行謹  
奏

咸豐七年十二月二十日拜發奉

硃批另有旨欽此

援江官軍克復臨江府城摺

奏爲援江官軍克復臨江府城恭摺馳

奏仰祈

聖鑒事竊按察使銜卽補道劉長佑等先後擊敗太  
坪墟羅坊大股援賊疊獲大勝業經臣

奏報在案厥後道銜卽選知府張運蘭等追勦餘  
賊會攻吉安府城賴江以東賊援已絕臨江城  
賊所盼者惟新淦縣城及峽江縣對岸八都墟  
之賊遙爲聲援然終爲賴江所阻不能牽制官  
軍臨江城賊首知楚軍三面長壕已成東面

濱江又有江西所派之安肅道劉于涓水陸分  
布僞五十五檢點程瀛意圖出降而僞檢點張  
發紀僞指揮聶才堅易自能等仍思堅守以待  
外援九月十一十二等日聞隔江新淦礮聲賊  
意外援復至十三日黎明傾巢而出劉長佑令  
固匿誘之比近長壕則出隊猛擊賊卽却退藍  
翎同知銜卽選知縣江忠義率所部追至西門  
斬其先鋒悍賊數十游擊李明惠守備漆盛年  
率所部追至南門斃賊甚衆賊敗入城比官軍  
收隊賊復出搦戰江忠義李明惠痛擊之復大

敗而去次日仍出撲長壕復爲江忠義及花翎  
同知直隸州知州劉坤一等所敗共傷斃賊二  
百餘十七日劉長佑令於營後二十里積草舉  
火僞爲援賊復至之狀誘之賊果復傾巢而出  
劉長佑蕭啓江劉于濇等踰壕截擊共斃悍賊  
二三百自是賊益奪氣劉長佑令管帶義勇五  
品軍功李能通設計誘其出城適逆首石達開  
率賊上竄城賊正盼其來援劉長佑與蕭啓江  
商各挑勁卒越壕築壘逼之距城僅二十餘丈  
十月初七日新營告竣賊眾悉出城昇大礮置

外城根對新營轟擊爲官軍擊退斃賊二百餘  
自是官軍於新營內晝夜開放大礮西南一帶  
竟無完堞賊不知其數賊復移城上更棚於  
城壕中晝夜居守以避鎗礮棚上掩蓋泥土以  
避火攻仍無隙可乘十二夜四更劉長佑潛令  
敢死士八百餘各負柴草填塞城壕縱火焚賊  
卡門更棚預約蕭啓江同時攻東北門牽制賊  
勢其時風起火熾延燒更棚官軍鼓譟乘之賊  
傷悉眾排開鎗礮官軍冒險猛撲正欲越過城  
壕忽大雨如注火焰頓息而填壕之柴草亦均

浮起官軍之陷於淖中者受傷甚  
還江忠義李能通以仰攻無策請  
道爲轟城之舉劉長佑許之旋據  
中糧食漸乏已無固志惟官軍四  
可逃擬仍恐死以待外援而是時  
副將周鳳山所部已敗於東鄉進  
驍驍上竄城賊雖尙未知其詳劉  
股援賊倏至城賊之氣益張官軍  
知逆首程瀛久有乞降之意仍令  
計誘之僞檢點程瀛等果於十八



總制陳保泰詣營乞降十九日遣僞元帥陳本  
支僞總制許見機獻僞印三百餘顆劉長佑故  
慰諭之令先放老弱婦女其餘各賊分三路出  
城聽候安插蓋將聚而殲之也一面密令各營  
嚴陣以待候至二十日午間賊仍未出惟聞城  
內喧譟聲急忽僞元帥甯正魁率其黨二百餘  
來營泣訴程瀛陳保泰等已爲聶才堅易自能  
所殺事已中變矣劉長佑卽下令急攻並令降  
人甯正魁陳本支許見機汪永清等率其黨遙  
呼程瀛所部速爲內應殊賊堅守甚密計不得

行劉坤一江忠義等令各勇稍退誘之小南門  
出賊一股追來管帶長勝軍都司彭定太及李  
明惠陳周典等猛擊之破附城賊壘一座守備  
崔大光義勇頭目何益發大呼繼進賊復縮退  
始收隊而還二十一夜劉長佑復約蕭啓江劉  
于瀆等各分布環攻兩日夜約殺賊三四百名  
奪獲大礮三座抬鎗四十三桿大小旗幟三十  
面而官軍之陣亡者已十四名受鎗礮石子傷  
者已四百五十名二十五六等日邏獲賊謀擄  
出逆首石達開及僞國宗韋逆僞文均稱有眾

數十萬卽日分道援臨而城賊以黃綾細字求  
援於石逆者亦爲官軍所得具言城中饑困危  
迫情形及計殺程瀛之事甚悉於時石逆已至  
豐城前隊已抵樟樹鎮嗣覘知樟鎮師船均扼  
要而守則轉趨峽江城賊遙聞東路礮聲大震  
每夜火光燭天守志益固十一月初四日五更  
城賊出東北門突撲蕭啓江田興恕楊恆升等  
各營均經力擊縮退初五日五鼓一股出西南  
門突撲劉長佑江忠義各營一股仍撲蕭啓江  
楊恆升田興恕等各營亦均經擊退兩日共斃

賊六百餘初十夜四鼓賊船數隻駛撲楚營浮橋經守橋官軍擊退守壕各勇及江軍平江勇兩岸夾擊斃賊甚多劉長佑知賊急盼外援會商劉于涪蕭啓江等於十八日僞爲分兵東出迎剿援賊之狀並密令各勇張所奪賊旗於沙湖地方漸次而進爲援賊撲營之狀城賊果信爲真一面出東門迎接援賊一面出西門及北門猛撲蕭啓江楊恒升田興恕營壕官軍堅壁弗出俟其稍近突起擊之賊大敗而還是日斃賊約二百餘二十一日賊撲西門營盤楊恒升

等力戰却之斃賊數十城中糧食將盡每賊日發米二兩以草根攪和煮食人情洶洶皆怨聶逆易逆殺程瀛之撓降局也連日出城乞降者頗多二十九日賊出西城掘草義勇頭目何益發楊松柏等率義勇渡壕逐之賊忽大出列陣相持降人甯正魁陳本支率新安勇往助橫矛躍馬殺傷過當賊仍敗退入城次日由西門出撲均經各營擊退共殺傷賊二百餘而逆賊以饑感至極出城求降者絡繹不絕劉長佑等以該逆至垂斃之時始乞哀免死萬無可赦均押

至後營斬之合計二百餘剖視其腹皆草根糠屑雜米少許也然逆首張發紀聶才堅易自能等尙僞爲石逆械札慰諭賊黨言不日來援以安其心仍晝夜憑城固拒江忠義李能通所掘地道兩處甫至城根均被城逆迎掘所破事迄不就十二月初五初六初七等日劉長佑劉于涓蕭啓江等派隊更番攻城誘賊出擊共斃賊七八百楊恒升所部擒斬賊目黎富等數名官軍立將城外賊卡一律燬盡奪獲大鐵礮大銅礮及抬鎗鳥鎗旗幟雜械無數自是賊益窘急

不知所爲初八日未刻有賊跳城出投言城賊殺馬爲食者數日馬已食盡擬於今夜在東城齊隊出衝俟官軍齊赴東路則仍折向西北各路逃竄是夜三更劉長佑與蕭啓江等督各勇預將所辦登城沙袋雲梯各具一一安置以五成隊環守長壕以五成隊啣枚疾進比近城壕則守壕賊已急裝紛竄官軍乘勢由西南北三門湧入先將城壕及城上餘賊殺盡繼分由西北南各街市節節排搜而前生擒僞將軍總制監軍及僞元勛功勛經歷通侍等賊目百數十

人賊敗竄出城由東岸河灘分途亂竄官軍追至豐城對河之乾江橋擒斬數百一股由經樓一帶竄向瑞州劉長佑折由鶯哥嶺橫出截之名營繼至初十日追賊至瑞州城外二十餘里之士嶺及之斬首二百餘級生擒僞指揮聶才堅奪獲器械無數餘賊之竄伏山谷者悉搜殺之又斬首百餘級探報賊另股折竄下游蕭啓江田興恕楊恒升等帶勇追剿劉長佑嚴督所部窮追務將逃竄之賊悉數擒斬不令流毒他方計初八夜克復城池殺賊一千數百生擒八



百餘內有僞指揮聶才堅及各僞目數十人技  
回被擄老幼婦女一千五百餘奪獲大礮百餘  
座抬鳥鎗四百桿僞印僞官憑二百數十件龍  
袍龍帽各數十件騾馬十餘匹其餘旗幟軍裝  
刀矛雜械甚多尙分路窮追未及收隊此官軍  
逼攻臨江府城疊次獲勝及十二月初八日克  
復城池初九初十等日追勦之實在情形也臣  
惟逆賊每遇精兵痛勦數次則竊踞堅城爲負  
隅穩抗之計非糧盡援絕窘感萬分斷難得手  
此次楚軍進攻臨江府城先後十閱月晝夜環

攻無閒寒暑原冀速拔堅城分軍他向無如仰  
攻爲難徒損精銳卽覓內閒掘地道兩策亦嘗  
殫力經營數數舉辦然事至垂成輒復中阻每  
思及此焦灼難名幸賴

皇上天威將士併力一心自長壕開掘鎖圍之勢已  
成而賊之接濟斷太平壚羅坊兩次大敗巨股  
援賊而賊之聲勢孤卒能克復堅城稍紓積憤  
在事文武且防且勦勞苦倍臻似應仰懇

天恩加以甄叙按察使銜江西補用道劉長佑忠謹  
醕篤調度深協機宜可否

賞加布政使銜卽選道蕭啓江紀律嚴明謀勇兼資  
可否

賞加按察使銜參將田興恕遊擊楊恒升驍勇出羣  
田興恕可否開缺以副將升用先換頂戴楊恒  
升可否開缺以參將補用花翎同知直隸州知  
州劉坤一襄辦軍務最爲得力可否以知府歸  
部選用藍翎同知銜知縣江忠義每戰奮勇當  
先太平墟痛勦援賊最爲出力可否以知府歸  
部卽選並

賞換花翎都司彭定太膽力均優請開把總缺以游

擊留於湖南補用其安肅道劉于瀆所部水陸  
兩營在事最久力扼水路要衝勞績最著該營  
由江西調派應由江西核保至前次太平羅坊  
兩擊援賊大獲勝仗經

臣

奏明奉

旨准保各員弁勇丁是否卽由

臣

歸併克復臨江府  
城一案彙保之處伏候

聖裁此次逼攻臨江府城先後陣亡各弁甚多其未  
經江西附

奏者擬查明並案附

奏請

勅部議卹以慰忠魂所有援江官軍克復臨江府城  
情形謹由驛馳

奏伏乞

聖鑒訓示施行謹

奏

咸豐七年十二月二十日拜發奉

硃批另有旨欽此

支放楚勇口糧章程片

再湖南省自粵逆滋事以來土匪四處竊發鄰  
封警報頻仍籌勦籌防日無暇晷各營額兵多  
已調征江南等省存營兵丁爲數無幾萬難再  
行征調勢不得不募鄉勇以資調遣查湖南之  
鄉勇打仗出力者先以前安徽撫臣江忠源所  
募楚勇爲最各該勇果敢用命屢著戰功江忠  
源亟欲激勵行閒勇糧較爲優厚計每勇自支  
銀五兩及四兩八錢不等嗣前兵部侍郎臣曾  
國藩奉

旨幫辦團練募勇防堵當卽酌減四年率師東征所  
給勇糧較團勇章程稍加增而視江忠源原定  
章程業已核減計每勇日支銀一錢五分長夫  
日支銀八分連年以來南省召募各勇援勦湖  
北江西越境進勦廣東廣西貴州等省及防堵  
各處均係仿照酌減章程分別防勦每名日支  
銀一錢五分及一錢三分不等長夫均支銀八  
分此節年募勇支發之章也緣鄉勇均臨時僱  
募事竣卽須裁撤旣與營兵之久食糧餉者不  
同而其奮勇用命實已屢著成效且各勇出征

之處均係被賊之區廛市蕭條物價昂貴若不  
稍從優厚實屬不敷支用無以激勵戎行越境  
援勦各省雖頻奏大捷克復城池而節節跟追  
凱旋之期未能遽定各處邊界需防勦策應之  
處尙多亦未便稍形鬆懈所有各勇口糧照章  
支發已久勢難遽行議減致懈軍心相應

奏懇

皇上天恩俯念湖南各勇尙爲得力所有招募各勇  
口糧仍准照會國藩核減章程支給俾各勇等  
益知感奮於援勦大局實有裨益理合附片具



奏伏乞

聖鑒訓示再查定例鄉勇隨同官兵打仗殺賊立功  
續行打仗陣亡傷死者照步兵例議卹如並未  
殺賊立功及因公差使遇賊戕害者照步兵例  
減半議卹仍應照例辦理毋庸再議優卹合併

陳明謹

奏

咸豐七年十二月二十日拜發奉

硃批該部查議具奏欽此

保舉防軍越境克復江西龍泉崇義上猶各縣  
城出力員弁摺

奏爲遵

旨核保懇

恩鼓勵事竊江西吉安府所屬之龍泉南安府所屬  
之崇義上猶兩縣均與湖南郴州之桂東桂陽  
兩縣連界上年江西吉安府陷後各屬均淪於  
賊而崇義上猶古本蠻鄉自明臣王守仁平定  
涖頭桶岡後始立縣治民風夙稱犷悍近年時  
出侵擾邊境湖南之桂東桂陽屢受其害上年

十一月內臣籌集援軍規復吉安卽派委桂東  
縣團紳候選知縣劉拔元藍翎訓導胡兼善訓  
導吳齊源等帶練勇一千二百名分爲中左右  
三營越境進勦先清崇義上猶會克城池本年  
四月初六日

奏報欽奉

硃批知道了著准其擇尤保奏欽此嗣劉拔元等三  
營並進龍泉會勦先後數十仗大挫兇鋒追劉  
拔元於四月初五日血戰捐軀臣復飭胡兼善  
兼統中右兩營會同吳齊源左營進勦復調于

總蕭紹鈴帶所部彪勇六百名及桂東團紳黃  
由謙胡錫鈺帶所部團勇赴之所有迭次獲勝  
及克復縣城實在情形經臣於八月初四日彙  
報欽奉

諭旨湖南派赴龍泉之官紳兵勇從征日久著有微  
勞卽著駱秉章查明保奏欽此臣比宣示各營莫  
不感激

皇仁歡呼踴躍旋據該員弁等稟開清冊前來臣逐  
加覆核擇其實著勞績者謹遵兩次

諭旨彙爲一案其邊界各州縣官軍團紳防勦半年

馬... 丁巳下  
之久屢次越境助勦亦著微勞謹擇其尤爲出力者一併酌量附入恭繕名單伏懇

天恩加以甄叙庶賞罰明而士氣愈奮矣至陣亡之六品軍功郭勝凱胡古元本係擬保把總可否均照把總例

賜卹桂陽縣團紳教諭銜文生何卓羣可否照訓導例

賜卹八品軍功陳光國龔桂蘭可否照外委例

賜卹右營幫辦桂東縣武生胡達善打仗奮勇最爲出力龍泉克復案內擬保藍翎千總現在吉安

營中病故可否照把總例

賜卹伏乞

聖鑒訓示施行謹

奏

咸豐七年十二月二十日拜發奉

硃批另有旨欽此



駱文忠公奏議卷之十二目錄 湘中稿

戊午上

賞加頭品頂戴謝

恩摺

查明已革都司實無潛逃懇請開復摺

劉道假歸所部委員接帶片

協濟廣西軍餉軍火摺

朱道遵調前赴廣西起程日期片

保舉鹽茶釐金兩局出力官紳摺

瀝陳湖南籌餉情形摺



援江官軍克復崇樂宜南及撫建兩府城摺

兼保援軍克復江西臨江出力員弁摺

劉道長子請獎主簿藍翎片

籌議分軍援浙摺

覆陳曾侍郎起程赴浙日期摺

蕭道假歸所部聽曾侍郎汰選片

覆陳胡藩司未曾經歷戰陣片

保舉援軍克復廣西平樂出力員弁摺

賞加頭品頂戴謝

恩摺

奏爲恭謝

天恩事竊

臣

接准部咨咸豐八年正月二十五日內

閣奉

上諭湖南巡撫駱秉章等畫軍務能任賢才克臻安  
謐著賞加頭品頂戴欽此跪讀之下感悚交增謹  
卽恭設香案望

闕叩謝

天恩伏念

臣

質本凡庸才尤駑鈍蒙

皇上特達之知

簡界封疆重任星沙再莅冰凜常懷前茲  
寵賁

丹綸已荷

榮頒翠羽方愧備員衡嶽莫報

殊恩豈期考績

虞廷更邀

異數祥迎首祚倍增鶴頂之光輝感切心銘永戴  
鴻慈之優渥竊思賢才爲

國家之用皆由

聖教甄陶安謐豈臣下之功悉本

皇仁丕冒臣惟有勤加奮勉益竭愚誠殫寸念之圖

維稍酬

高厚冀羣材之勵翼其答

昇平所有管感激下忱謹繕摺叩謝

天恩伏乞

皇上聖鑒謹

奏

咸豐八年二月初二日拜發奉

硃批知道了欽此



查明已革都司實無潛逃懇請開復摺  
奏爲查明已革都司實無潛逃情事仰懇

天恩開復原官免其究辦事竊上年六月十七日江西吉安軍營敗潰時接據管帶吉字營候選從九品文翼稟稱藍翎都司蕭孚泗於鳳和長三營被賊攻陷後潛帶親兵數人不告而去以致號令親兵練勇散去四十四名稟請叅辦當經江西撫臣耆齡附片叅

奏旋復據文翼稟稱發稟後數日各親兵人等共昇都司蕭孚泗到營比卽向問因何出營據稱

是日鳳和長三營起火之時各親兵等以該都司先於十二日苦戰足受礮傷子猶未出痛楚昏迷昇出營盤寄住鄉村嗣見潰勇訛言吉字營已由小路退往茶陵該親兵等卽輪流昇往茶陵比聞吉營退保安福是以仍行折回文翼當驗該都司傷痕益加潰爛而查點所稟散去親兵練勇號令四十四名惟號令郭文輝及前哨一隊散勇陳有勝二名未回當卽准令蕭孚泗回籍養傷一面派勇緝拿郭文輝陳有勝一面發稟請將該都司蕭孚泗免其叅辦其餘各

勇免其緝拿文翼於七月十二日續發此稟而  
江西已先於七月初十日具

奏請

旨查拿究辦旋准兵部咨開咸豐七年七月二十五  
日奉

上諭耆齡奏請將私行離營之都司革拏究辦等語  
江西吉安軍營藍翎都司蕭孚泗於營盤被賊攻  
陷後輒敢潛帶親兵數人私行散去實屬藐玩蕭  
孚泗著卽革職交駱秉章派員嚴拿究辦欽此適  
原帶吉字營之同知銜優貢生曾國荃赴吉安



軍營

臣

當札飭令其查明稟覆旋

覆蕭孚泗並無私行離營情事與

異且據稱蕭孚泗係前浙江甯紹

舊部隨羅澤南征剿數年以功游

三人陣亡其二該都司經曾國荃

征半載克復安福攻圍吉安截剿

戰衝鋒最爲出力此處委係受傷

出營盤實非潰逃可比文翼前次

因該都司未卽歸營疑其潛回嗣

仍昇蕭孚泗歸營驗明創痕潰裂

稟請免查辦並准假回籍調養實無徇飾而江西撫臣於文翼續稟後咨覆到臣亦以蕭孚泗平日打仗尙稱勇敢如傷痊後仍能回營奮勉圖功自當再爲酌量

奏請

恩施請由臣就近確查辦理臣查上年六月十七日吉安之敗實由副將周鳳山所部先潰而後和營長營相繼失陷吉營是日上午尙接獲勝仗嗣因各營俱陷獨力難支始於是夜全師退保安福營盤並未被賊攻陷輜重器械一無損失

雖功無可言亦過無可議蕭孚泗幫帶吉營先  
三日已受重傷是時痛楚昏迷各親兵昇出營  
盤非其本意嗣聞本營退保安福旋即回營現  
接會國荃稟報該都司傷愈來營仍屢次冒險  
衝鋒實爲出力合無仰懇

皇上天恩可否將藍翎都司蕭孚泗開復原官免其  
究辦之處出自

聖裁謹據實覆

奏伏乞

皇上聖鑒訓示施行謹

奏

咸豐八年二月二十二日拜發奉

硃批另有旨欽此

馬ノノノノ

ノノ

ノ

劉道假歸所部委員接帶片

再臣前據布政使銜江西補用道劉長佑稟稱職道體氣素弱自從戎以來積受寒濕近患好厥之症遇冬春之交舉發尤勤每一舉發輒昏迷不省人事往往臨陣墜馬現在臨江克復應卽進規撫建誠恐病軀有悞戎機懇請給假調理等情臣當批飭該員奉委統領援江各軍責任綦重如稍可勉強支持無庸給假嗣復據該員稟稱實因頻年馳驅戎馬住宿營帳寒濕侵入臟腑致成肝厥之症醫言不早調養則元氣

銷耗更難施治現在面色青黑且帶微腫飲食  
少進補劑既未可妄投剋伐之品又非所宜竊  
思職道渥被

皇恩肝腦塗地未足云報何敢稍圖安逸自外

生成惟是病軀從事設一旦攻勦吃緊舊病暴發恐

駭軍心仍請給假調養前來

臣

維布政使銜江

西補用道劉長佑自咸豐元年隨同江忠源赴  
粵討賊以後常在行間由湖北而江西自江西  
而安徽嗣因護送江忠源靈柩歸里復經委勦  
本省東安新甯及郴州賊匪事平旋復委帶楚

勇赴援江西身經百戰時歷七年不施勞不言  
功不畏難在各將領中最稱醇謹茲因積勞成  
疾若不准其暫息仔肩俾資調養無以示體恤  
而期後效當准假三月回籍養病而以所部楚  
勇膽勇精捷勇義勇新安勇各營札委花翎知  
府劉坤一暫行統帶其果營湘勇陽營湘勇虎  
威軍長勝軍等營暨歸按察使銜卽選道蕭啓  
江統帶相機進剿諺兩員曉暢戎機或堪勝任  
一俟劉長佑假滿仍卽催令速赴江西軍營理  
合附片陳明伏乞



皇上聖鑒謹

奏

咸豐八年二月二十一日拜發奉

硃批知道了欽此

協濟廣西軍餉軍火摺

奏爲協濟廣西軍餉及製造戰船委解軍火以資  
接濟仰祈

聖鑒事竊湖南援粵之軍克復平樂後廣西撫臣勞

崇光咨留援軍統領按察使銜卽選道蔣益澧  
在粵督辦柳慶潯梧等郡之賊除蔣益澧全軍  
還駐桂林外其千總林茂山接帶陣亡副將黃  
輔燾所部健銳楚勇五百名及擬保都司蕭榮  
芳所部赫勇五百名仍留粵助勦蔣益澧以粵  
西賊勢蔓延稟請增募湘勇赴粵並回南面稟

盤踞柳州梧州兩處之賊勢尤兇悍賊艇亦多  
水陸勇丁不敷征勦且自廣東援梧師船屢次  
敗潰洋礮戰船舉以資寇以故勢更鴟張粵西  
戰船不如湖南製造之精請飭船局修造船板  
戰船由斗河赴粵以期利用並稱廣西久遭兵  
燹彫殘日甚餉需萬難供支粵省財力已殫隣  
餉頻催罔應除湖南陸續遵照部撥協濟銀五  
萬兩業經支銷罄盡此外絕少來源將來水陸  
兩軍之餉請由湖南每月籌發二萬兩以資協  
濟接准勞崇光函咨亦大畧相同

臣

維東南大

局之患起自嶺嶠而廣西自金田逆賊竄出之  
後羣盜仍復縱橫頻年屢犯楚境聲言接應金  
陵大股黃旗紅巾所在蜂屯蟻聚雖屢經楚軍  
擊敗不敢窺邊而粵境內訌日甚郡縣淪胥馴  
至逼近省垣大肆猖獗湖南援師若不相機速  
進禍不可知茲幸仰仗

天威連拔興安平樂城池軍威已振可冀稍有轉機  
若卽將援軍撤回則鼠輩仍無忌憚轉瞬餘燄  
復張更難爲力臣於接准勞崇光函咨之時與  
司道悉心商議以湖南目前情形而言四境雖

一律肅清而東援江西西援貴州南援廣西悉  
索以從迄無息肩之日一省物力幾何何以堪  
此如再按月籌發廣西軍餉二萬兩以一年計  
之則爲銀二十四萬兩深恐綆短汲長勢難爲  
繼而勞崇光迭次函咨及蔣益澧面稟一切又  
均屬實在情形廣西雖屬偏隅而爲患動關大  
局未可愒然中止因於萬難設措之中勉爲籌  
畫除克復平樂後蕭榮芳赫勇五百名經勞崇  
光咨留總帶粵勇歸廣西給餉外所有援軍上  
年月餉仍由湖南發足作爲湖南援勦之欸自

咸豐八年正月起到至年底止再按月撥銀二萬兩解交廣西發給蔣益澧水陸各營口糧作爲湖南協濟廣西之款歸廣西報銷以一年爲度其戰船一項已飭紳局製造三十四號發交蔣益澧領取尙有舢板二十六號長龍一號現正趕緊製造其火藥一項現飭局陸續委解者計已七萬七千餘觔矣所有蔣益澧水陸各營已於三月初旬陸續赴粵嗣後進止機宜應歸廣西撫臣調遣所有接仗情形卽由廣西奏報一併聲明伏乞

皇上聖鑒訓示謹

奏

咸豐八年四月二十三日拜發奉

硃批知道了欽此

朱道遵調前赴廣西起程日期片

再臣前准吏部咨開咸豐八年二月初八日奉  
上諭勞崇光奏請調員差委等語湖南記名道員朱  
孫詒著駱秉章飭令該員速赴廣西聽候差委仍  
著交軍機處記名遇有廣西道員缺出請旨簡放  
欽此臣比卽恭錄行知朱孫詒因臣前委赴岳州  
釐金局督辦局務隨將經手事件清理完竣到  
省業於四月初八日由長沙起程前赴廣西聽  
候差委理合附片陳明伏乞

皇上聖鑒謹



奏

咸豐八年四月二十三日拜發奉

硃批知道了欽此

保舉鹽茶釐金兩局出力官紳摺

奏爲籌設釐金鹽茶兩局接濟軍餉著有成效在  
事出力官紳懇

恩獎勵事竊湖南因連年軍務方殷餉需繁劇經  
臣

先後籌設釐金鹽茶兩局試抽釐稅比准部  
臣

議覆

欽差勝保奏請普律抽釐一案內開倘或激成事端  
及查有侵漁等弊卽將承辦之員核實奏叅加  
等治罪辦有成效給予優獎

奏奉

俞允行知臣當卽宣示各卡局委辦官紳一律欽遵  
知照伏思抽釐助餉事屬創行積少成多諸務  
繁雜非若錢糧多寡科則一定官有冊籍可稽  
民有舊章可守事本因而非創也非若捐輸事  
例資算有程下以銀錢呈繳上以庫收執照發  
給事尙簡而不煩也將欲薄取商賈之贏餘以  
佐軍食則必力蠲商賈之畏累以順人情試行  
之初臣卽紮飭前署鹽法道現補鹽法道裕麟  
立局署外妥爲經理飭藩司文格會選官紳由  
臣核定委赴各卡局籌辦抽收紳士現任江西

吉安府知府黃冕時尙在籍臣飭其隨同裕麟體察各處商情酌議章程隨時稟辦務洗向來衙署關務一切陋習仿唐臣劉晏委用士流之意屏退吏胥市僧訪擇廉幹士紳資以薪水令其隨同委員赴局辦理所獲釐稅銀錢按月榜示通衢以昭清白隨時解交省城總局彈收由省局撥解藩庫軍需局支應軍餉所有江楚廣南各色貨物總以每錢一千抽收二三十文上下爲率均倣照

欽差勝保奏准仙女廟章程辦理如買賣零雜不能

指定貨色難以計算者卽酌量按月抽捐其柳  
宜等處鹽稅每包抽釐七百文茶稅每箱抽銀  
四錢五分因茶商在各口岸裝箱時曾抽過釐  
金銀一錢五分到卡又復繳納釐金銀四錢五  
分爲數較各貨爲多准每字號繳稅之後酌給  
從九職銜議叙一名以昭平允章程有不便  
商民者隨時更正承辦官紳有不甚妥者隨  
時撤換大致在於嚴杜中飽以裕

國計禁絕擾累以郵商情歸局而不歸署以防胥  
吏需索之源用官而兼用紳以通商民難達之

隱計自咸豐五年四月設立釐金局咸豐六年三月設立鹽茶局試辦以來至上年十二月底止總計撥解藩庫軍需局省平銀一百零七萬九千五百八十九兩七錢九分零二絲足典錢一百四十七萬一千零三十五串零八十六文均經陸續支發軍餉臣時加體察市廛如故商賈生計較前稍豐而百貨價值長跌隨時民間亦未稍形苦累方兩局初設之始吏胥牙儈及未得入局之人未免造作謠言多方詆排鄉曲迂陋之輩亦或隨聲附和希冀阻撓近見各口

岸卡局每月榜示各數與報省局總數畧無參  
差省局隨撥藩庫軍需局支應軍餉畧無停待  
羣疑盡釋心已帖然各處城鄉市價長落與從  
前未抽釐金之時並無歧異民情亦覺相忘當  
茲餉需匱絕之時合官紳之力頻年經營籌畫  
獲此巨款於商民無損而於軍餉有益在事出  
力官紳實屬著有成效謹開列清單伏懇

皇上天恩加以鼓勵庶可策後效而勵將來至按察  
使銜鹽法長寶道裕麟督辦兩局事務才具明  
敏籌慮精詳可否請

旨交軍機處記名俟湖南軍務告竣遇有鹽運使缺  
出請

旨簡放江西吉安府知府黃冕熟悉本省情形兩局  
創始所有章程多其酌議該員現有革職留在  
處分可否俟開復後開缺以道員卽選出自

天恩 臣因軍餉緊要鼓勵人材起見是否有當伏乞  
皇上聖鑒訓示施行謹

奏

咸豐八年四月二十三日拜發奉

硃批另有旨欽此



皇清

戊午上

二

瀝陳湖南籌餉情形摺

奏爲瀝陳湖南籌餉情形仰祈

聖鑒事竊湖南地方山澤多而平原少地多磽薄素非財富之區民務耕農并鮮經商之利合通省錢漕計之僅抵江浙一大郡貧瘠可知尋常無事之年除漕米十五萬餘石起解外儘本省入數敷本省開銷絕少存留待撥之款軍興以來湖南首辦防剿除二年逆賊竄擾湖南重兵鉅餉隨同協濟外此後內勦本省之賊外禦五省之賊復越境而興援鄂援江援黔援粵之師頻

年裏糧從征迄無虛日且時須協濟江鄂黔粵  
餉需統計每歲須銀二百萬兩內外而本省額  
兵之餉不與焉入項如此其少出項如此其多  
念時局之艱難既未敢以苦累情形上廛

聖慮亦未曾以協撥鉅欸望之鄰封所資以接濟者  
勸諭捐輸固其一端矣然湖南富戶無多捐輸  
至再至三勢難爲繼且鄰省如湖北江西廣西  
均間有在湖南收捐之事臣以時艱所值彼此  
同之亦未嘗遵照部文概爲禁絕是湖南軍餉  
繁鉅并非全恃捐輸也臣與僚屬於籌餉一事

頻年竭蹶圖維所畧收實效者蓋有兩端一在釐剔錢糧宿弊以卹農而輸將較前踴躍也一在杜絕釐金擾累以通商而抽收較有實濟也請爲我

皇上敬陳之湖南各屬錢漕科則原爲輕減近時民間艱於完納不但難期年清年款並有逋欠數年未能完納者臣訪察各屬情形雖受弊之輕重不同而究其致弊之原不外官吏之浮收與銀價之翔貴而已州縣廉俸無多辦公之需全賴錢漕陋規稍資津貼缺分之優瘠卽視陋規

之多寡爲衡此東南各省所同不獨湖南一省爲然湖南亦不獨近日爲然也沿習旣久逐漸增加地丁正銀一兩民間有費至數兩者漕米一石民間有費至數石者款目繁多民間難以析算州縣亦難逐一清釐一聽戶糧書吏科算征收包征包解不廢不止每遇完納銀米整數之外尙有奇零則一併收作整數如一分一釐則收作二分一升一合則收作二升之類名曰收尾小戶窮民尤受其累未完納之先有由單由單有費旣完納之後有串票串票有費其完

納稍遲者糧書先時借墊計息取償多至數倍  
官爲出差催追名曰揭差每一揭差下鄉則一  
鄉爲之震聳此弊之原於官吏害及於民而小  
戶爲尤甚者也官吏旣視錢漕爲利藪刁矜劣  
監卽從而挾持之每人索費數十兩百兩人數  
多者一縣或至數十人名曰漕口少不遂意則  
阻撓鄉戶完納或赴上司衙門砌詞控告甚至  
糾聚多人闖署毆吏釀成事端州縣於開征之  
時必先將此輩籠絡安置而後可期無事此弊  
之原於刁矜劣監官吏受之其害仍及於民者

也從前銀價乾隆嘉慶年閒每銀一兩易錢一千文道光初年每銀一兩尙止易錢一千三四百文自後漸次增長至二千文近更增至二千三四百文農民以錢易銀完納錢漕暗增一倍有餘之費咸豐元二三四等年錢糧之多民欠實由於此迨五年秋後收成稍稔每穀一石僅值錢四百餘文尙苦無從銷售農民以穀變錢以錢變銀須糶穀五石始得銀一兩計有田百畝可收租穀百石者非糶穀二十石不能完納錢漕農末俱困羣情洶洶臣與司道熟商嚴飭

各州縣將錢漕宿弊大加釐剔論以事理曉以利害嚴禁吏胥衿棍擾索把持許地方公正曉事士紳條陳積弊設局稽查民情翕然稱便惟各州縣缺分不同錢漕章程向來不一如必盡革州縣陋規絲毫不許多取則辦公無資廉謹者無所措其手足其不肖者反將以此藉口別開巧取之端更爲

國計民生之害如必明定章程許其每銀一兩每漕一石收銀若干又恐官吏視爲定章久之或於定章之外復有增加弊與今等且民可使由



不可使知設刁劣士民本其挾持官吏之心執  
釐弊之新章指爲滋弊之創舉則告訐日繁其  
勢不至脅官吏以取償於農民不止如不釐定  
征收之額又恐鄉民無所適從征收未能畫一  
弱者必仍爲胥吏所欺强者或且藉此以遂其  
刁抗之計是欲除弊而反以滋弊也臣反覆圖  
維不難於立法以救一時之弊實慮於救弊之  
法復增一作弊之端正躊躇閒適各縣士民紛  
紛赴省具呈自擬款目以爲征收之準臣察其  
官民相安者准之未協者駁之俟其適中而復

准之數月之間大致畧定復察州縣之不能切實遵行者撤之不法吏胥及刁劣士紳之阻撓者責革而痛懲之其不安本分士紳欲藉釐剔宿弊之舉爲臣建祠泐石希圖歛費者亦嚴斥而痛絕之自五年以來湖南錢漕始稍有起色而元二三四等年民間積欠率皆踴躍輸將國課不至虛懸軍儲不至束手州縣辦公亦不至十分拮据而農民則歡欣鼓舞舉數十年之積累一旦蠲之稍獲蘇息矣現在各屬田價漸增農安畝畝無復盼盼之意向之藉錢漕聚眾動

輒闖署毆吏者自釐定新章以來絕無其事此釐剔錢漕宿弊以濟軍餉之實在情形也抽釐之舉臣於試辦伊始亦深懷疑慮恐其奉行不善適以擾民惟念重農經商載諸往訓今四民之中惟農最苦獲利最薄而錢漕一切均於農田取之商賈挾貲營運懋遷有無獲利爲饒無力作之苦而又免征收之稅當茲多事之秋稍取其贏以佐

國計其亦何辭况釐金之爲數至微百貨長落隨時本無一定之價以至微之數附諸無定之價

官取諸商商取諸貨貨價取諸時如果經理得宜亦復何虞擾累所難者水陸卡局之建設各有其地以水路論有水漲宜設此處水落又宜設彼處者有水落暫宜裁撤水漲始復增添者以陸路論有已設卡局之處並無總隘可扼不能不分設子卡者有未設卡局之處商販繞越爭趨不能不另議移設者兼之賊蹤飄忽道途通塞靡常或因客商繞避賊氛幽僻之區反成達道或因鄰封道途偶梗通行之路反類遐荒苟非因地以制宜豈能推行而盡利百貨銷數

之衰旺會有其時各處市埠情形彼此互異有  
旺在春夏而秋冬漸形衰減者有旺在秋冬而  
春夏忽形冷寂者上月收數較之下月每有參  
差此處暢行推之彼處又難一律苟非隨時以  
通變豈能斟酌而咸宜臣惟釐金一事本屬創  
行收支款目既無定額之可循贏絀情形實難  
一概以相例卡局既多事目又雜各執一成之  
法嚴爲稽覈罅漏必多更增一切之法預爲防  
維虛僞轉甚古云任法不如任人洵爲破的之  
論但使所委官紳各以實心任事上念

國計之艱難下體商情之畏累將平常衙署關務  
習氣概與刪除事必躬親數歸核實庶不以絲  
豪飽奸橐亦不以苛細失人心而商情自然帖  
服所有卡局需用之費及在事官紳薪水之需  
臣飭總辦局務裕麟悉心斟酌稍令寬餘俾得  
潔已奉公無虞拮据亦以養其廉恥杜絕侵欺  
仍不時訪察商旅公評時申儆惕其客貨經由  
之地水次分泊師船陸路派撥練勇令其就近  
往來巡護其商賈輻輳之區專駐水陸練勇以  
資鎮壓俾知出釐金以少佐軍儲即可藉釐金

而保全資本自設卡局以來商賈安心貿易屢肆如常軍餉得資接濟此嚴防釐金擾累以濟軍餉之實在情形也伏思古今利國之道要在利民以恤民爲心者除弊卽以興利民以爲利乃國之利也百姓足孰與不足所以爲治平之遠猷以罔民爲事者立法徒以滋弊民不以爲利終非國之利也利未見而害已隨或且誤安全之本計就湖南現在情形而言雖局勢狹小僅勉爲目前敷衍之資而訪察農商情形尙無不便所有辦理情形謹據實陳

奏伏乞

皇上聖鑒謹

奏

咸豐八年四月二十三日拜發奉

硃批覽奏均悉汝久任封疆所陳皆歷練有據之論  
洵非以耳爲目者比欽此





援江官軍克復崇樂宜南及撫建兩府城摺  
奏爲援江官軍先後克復崇仁樂安宜黃南豐四  
縣城撫州建昌兩府城恭摺

奏祈

聖鑒事竊湖南援江官軍自克復臨江府城後臣以  
江西各股逆賊久踞撫建爲老巢而逆首石達  
開自上年秋閒率大股由皖赴江亦先踞撫州  
然後悉衆西援臨江吉安之賊經楚軍卽選道  
張運蘭等扼之吉水水陸痛剿疊獲大捷石逆  
始喪膽退竄撫州當石逆之退竄也遣其黨分

布撫建所屬各縣城鄉人數甚衆湖南援江各軍均阻贛江以西勢非節節搜勦先將城鄉屯集股匪一一掃除不能進搗撫建巢穴隨飭按察使銜卽選道蕭啓江督帶所部各軍道銜卽選知府劉坤一代領劉長佑所部各軍分由新淦進取崇仁以圖撫州卽選道張運蘭知府王開化率所部湘勇江軍記名總兵普承堯分所部寶勇由吉安趨永豐進取樂安宜黃以圖建昌維時撫州大股逆賊覘知臨江大軍將渡贛而東則率衆五六萬潛屯距樟樹鎮十餘里之

何家村及下溪香溪黃竹港等處將俟援軍渡  
贛仍襲取臨江府城正月初九日蕭啓江田興  
恕簡銳卒出不意擊之破賊營十一座斃賊二  
千餘生擒五十九名奪獲旗幟槍礮無數而官  
軍之陣亡者亦一百七十八名受傷者二百餘  
賊懼官軍大隊復至旋即悉眾遁回撫城二十  
九日江軍收復新淦縣城蕭啓江劉坤一隨率  
所部渡贛分路搜伏而進均有斬馘二月二十  
九日蕭啓江擊賊於崇仁縣屬之白陂墟斬執  
大旗賊目二斃餘賊約數百賊奔回崇仁三月

初六日蕭啓江劉坤一等進逼崇仁縣城知府  
王開化亦自宜黃率所部來會賊由西南北三  
門出拒官軍蕭啓江等分隊迎擊斃賊數百賊  
敗入城是夜三更城中火起賊由東門竄出蕭  
啓江劉坤一派所部躡蹤追之五鼓抵六家渡  
僅及其尾隊斃賊數十而還遂復崇仁縣城崇  
仁之東秋溪地方有廩生汪波者集團丁守鄉  
里間官軍至請隨同殺賊撫州賊恨之甚十一  
日伺其出迎官軍遂襲破其團焚掠甚慘蕭啓  
江劉坤一等急督勇前進屯於秋溪西岸護之

十七日辰刻撫城賊分三路一由羅坊渡一由永安渡一由萬年渡來撲官軍營壘每路賊數千各有騎馬賊數十當先揚旗而進河中礮船數隻翼之劉坤一列隊河岸俟其逼近排礮轟之斃賊無數逾時仍相持如故劉坤一令各部姑退誘之比至未初度賊已疲中軍鼓角齊鳴各部爭先亂流而渡李明惠鄧在富楊虎臣翟國彥黃仁遺躍馬陷陣賊眾披靡官軍乘勝逐北斃賊數百奪獲大小旗幟一百二十餘面抬鎗二十六桿小鎗十五桿籐牌雜械無數十八

日蕭啓江進軍上頓渡距撫州府城十五里築營甫畢十九日黎明城賊二萬餘來撲新營蕭啓江已於先夕布置周妥諸軍正嚴裝待發劉坤一復派隊助之見賊至遂分途呼躍而進立刃騎馬賊數十賊勢大潰官軍追之斃賊五六百溺斃者不知其數奪獲戰船四號銅礮七尊馬五匹旗幟鎗械二百餘件偽印三顆建昌之賊見官軍漸逼撫郡遂率其黨數千將由龍骨渡以陷崇仁劉坤一偵知之遽率五成隊銜枚疾進二十二日黎明抵龍骨渡西岸賊倉卒出

禦尙未成列李明惠開劈山礮隔岸轟之斃賊  
數名劉坤一急麾各部躡淺而過大呼斫陣斬  
先鋒賊十餘賊卽潰走崔大光盧凌漢等率所  
部由下游渡河要其歸路賊復繞旗奔回楚勇  
義勇精捷勇新安勇分途截殺擬保藍翎把總  
舒進堂首先陷陣死之崔大光吳定高身受重  
傷猶手刃數賊各勇奮躍衝殺立踏賊營七座  
其屯聚鄉村之賊聞敗俱隻身狂走委棄旗械  
填塞道路官軍窮追二十餘里收隊而還是役  
殺賊約四五百割獲首級二百七十五具生擒



十七名奪獲旗幟四百二十四面抬烏鎗八十  
九件籐牌三十一面刀矛雜械軍火不計廩生  
汪波李玉如等率團丁進屯嘉祿村劉坤一撥  
所部勇五百助其守禦連日大雨溪水暴漲官  
軍所紮浮橋成而復壞故按兵未進而撫建交  
界之青泥及撫州城外嵩湖潞灣流坊油墩等  
處仍有賊屯駐不敢復入城也四月十三十四  
等日蕭啓江等出隊攻城共斬賊二百餘撫州  
賊黨鑿於瑞州臨江均以長圍被殲見官軍漸  
逼府城建昌援賊又屢爲官軍所敗益無固志

廣東福建賊欲仍死守待援長髮賊欲棄城而遁彼此相怨相尤日相私鬪江軍劉于瀆等復設閒構之僞監軍王維朋請爲內應蕭啓江許之十七日蕭啓江等率所部攻城圍紳陳學淵亦率團丁相助賊由東門出城列隊抗拒蕭啓江率所部奮擊斬賊數十賊仍退縮入城十九日蕭啓江移營高橋迫之是夜環城攻擊鎗礮之聲不絕城內洶洶人聲鼎沸二十日辰刻賊開東門竄出蕭啓江麾所部緣梯蟻附而上開南門納官軍劉于瀆所部亦由北門梯城而入

賊之竄出者前隊甫過文昌橋聞城中喊殺甚急知官軍已入城遽斷橋而奔後隊甫自東門竄出者無橋可渡自相踐踏死屍枕藉官軍巷  
逾時計共殺賊一千七百餘生擒六十七名其前竄之賊復爲千金坡河所阻蕭啓江令以巨礮遙轟之賊之驚亂溺斃者無數官軍方收隊傳餐忽報竄賊由流坊西渡官軍急起截之陳學淵等團丁亦集斃賊三百餘二十一日劉坤一所部勇追至澣灣斬賊數十溺斃者不計其數二十二日由小路追至琅居集斬首一百

二十一級生擒九十七名內有僞正將軍一名  
計自復城至追勦竄賊共斃賊二千餘溺斃者  
不計奪獲大小鎗三百一十二桿賊馬四十四匹  
大小旗幟千餘面僞印二十餘顆輜重無數此  
蕭啓江劉坤一等一路疊獲勝仗先後收復崇  
仁縣城撫州府城之實在情形也其張運蘭王  
開化之由永豐進者二月初八日進紮大湖坪  
盤安州樂安賊悉退踞縣城官軍復移營前進  
十二十四等日賊數千分撲營壘均經擊敗回  
城普承堯適自吉安帶親兵馳至會商叅將朱

南桂藍翎同知胡兼善等各派八成隊逼攻城垣破城外賊營六座斃賊六百餘朱南桂督所部戰最力張運蘭王開化普承堯等會商是役斃悍賊已多城外各營均經踏毀賊膽已寒宜併力急攻十五日各營四路齊逼城下半伏山谷誘之賊數千出撲甫入伏中官軍縱擊斬首數百餘仍退縮入城官軍四面緊逼仰攻數時守壕賊多斃者都司銜千總彭家斌藍翎外委何啓耀外委羅逢春勇丁何紹發奮勇登城被刺殞命各勇奮躍繼登城上礮石雨下張運蘭

等恐多傷壯士急令收隊是夜暗伏壯士於城外舊壘中三更城賊悉由東北門竄出伏兵鼓噪乘之賊自相踐踏死者百餘追至小陂沿途俱各有斬獲遂復樂安縣城張運蘭王開化令紳民練團搜匪事甫就緒旋由樂安拔營分兩道前進一攻宜黃一扼宜黃崇仁交界地方相機攻剿三月初四日辰刻張運蘭所部行抵官倉距宜黃縣城數里探報城賊已於初三夜由仙八都竄遁僅後隊賊散布山岡張運蘭以居民久未薙髮駮難分辨督隊半伏城外伺之殊

賊不敢近前仍由山谷紛竄乃令分途追剿僅獲賊船十一號斬餘賊數十遂復宜黃王開化由桃陽前進亦於初六日會同蕭啓江劉坤一克復崇仁於是各縣敗竄之賊均聚撫建而宜黃崇仁既復撫建藩籬盡撤建昌賊首復令其死黨屯踞磁圭墟以相犄角十一日江軍寶勇營都司劉光明出隊君山適與賊遇斃賊數十嗣楚軍三路繼進賊望旗而靡官軍逐北十餘里均少有斬擒遇雨收隊而還張運蘭王開化會商建賊之踞磁圭墟者日聚日衆將伺隙復

犯崇仁宜黃以斷撫州大軍後路而牽制建昌  
大軍不可不併力剿之二十一日張運蘭率師  
由永興橋溫坊進王開化率師由余家山石榴  
尖進約午刻齊至磁圭比近磁圭二三里許皆  
捲旗潛行而以團勇數十人誘賊賊見兩路官  
軍甚少而前行者均係團勇易之遽出賊五六  
十分途拒戰張運蘭王開化俟其近前各分三  
路抄之皆吹號揚旗而進賊驚而走官軍三面  
包抄已到鎗礮之後繼以刀矛斃賊無算餘賊  
奔回磁圭墟張運蘭王開化麾所部躡蹤追殺



立將賊巢攻破賊由街後紛竄官軍緊追前路  
山嶺劈立賊眾擁擠顛墜積屍纍纍黃衣騎馬  
賊目勒馬回拒勇丁陳隆升擒而斬之餘匪棄  
械竄回建昌官軍復追殺十餘里日暮收隊而  
還蓋往返已一百四十里矣是役計斃賊一千  
六七百墜巖死者無算陣斬僞指揮蘇祝增僞  
將軍麥姓僞監軍胡姓等賊目十數名奪獲賊  
馬十餘匹旗幟器械山積據生賊供稱此股賊  
匪多石達開所屬故旗幟多用翼府等字將由  
磁圭潛攻宜黃不料官軍忽至遂爲所敗而是

日另股賊之潛竄龍骨渡圖犯崇仁者次晨復爲劉坤一所敗斬獲亦多始知建昌賊目詭謀以一股襲宜黃一股襲崇仁約期併進將爲援撫固建之計張運蘭等與劉坤一兩軍相距百數十里彼此相機速剿先後不過數時竟不約而同亦非意料所及也張運蘭王開化既破磁圭之後本擬拔營進攻建昌探報南豐屯賊甚多而雩都竄出之賊亦潛來會合人數約近二萬將乘官軍攻建仍取宜黃崇仁以斷官軍餉道蔓延厚坪水南裏塔墟魚梁陳家下白沙丁

坊厚源新興堡一帶巢穴甚多非速與剿除則官軍攻建後顧堪虞在在棘手二十六日江軍寶營知州黃秉珍都司劉光明游擊羅近秋等進剿榮山之賊陣斬九百餘生擒賊二十七名奪獲旗械無數四月初六日張運蘭王開化師次箬嶺遙望水南裏塔墟下白沙地勢寬濶路逕叢錯遂議分兩路剿之張運蘭率所部由箬嶺左路進行近厚坪賊從墟上出拒敗之張運蘭復分勇爲兩路令王文瑞率勇直搗水南賊巢自督張廣勝等由水南之左勦南源豬山俞

家堡之賊皆大敗之各股賊併竄裏塔墟張運  
蘭令兩路合力進攻立破其巢復乘勝追之而  
魚梁陳家劉家坑之賊已不戰自潰倉卒拉民  
船渡河賊衆船少官軍鼓譟乘之逼溺水中者  
蓋二千數百計王開化率所部由箬嶺右路進  
行抵上莊復分爲兩路令王開佶率勇直搗下  
白沙賊巢追至厚源皆大敗之王開化自率所  
部勇勦下莊源頭之賊賊敗走追及謝坊適王  
開佶追賊亦至併力擊破謝坊賊巢殲斃最多  
是役往返百餘里將南豐以北建昌以南賊巢

十餘處一律掃除斬賊二千有餘燒斃溺斃者約三千解散者以數千計陣斬偽殿左三前隊雄猛元戎職同丞相廖雄高偽殿右三百一十二指揮廖亞清等十餘名而獲其印照生擒賊目蕭牛古等一百三十餘名馬匹軍械旗幟無算收隊後擬卽乘勝攻南豐縣城適大雨晝夜不息未能拔營初九日探報南豐縣賊聞初六日各股賊大敗後卽於初七初八兩日冒雨架筏棄城東渡行至中流筏忽自散溺斃者數百張運蘭王開化令幫辦王文瑞張廣勝王開信

等率湘勇八百收復縣城安撫居民暫爲駐守  
初九十一兩日叅將朱南桂藍翎同知胡兼善  
分剿雲密雙油之賊陣斬八九百名逼溺者千  
餘生擒五十餘名奪獲旗幟一百一十餘面十  
二日南豐逃竄之賊偵官軍之駐守縣城者人  
數不及一千意其可欺也僞檢點盧逆僞將軍  
劉逆遂勾結僞指揮王德益僞將軍林姓等及  
建昌縣屬甘竹苦竹白水巖各處土匪人數一  
萬三四千由南豐縣白舍地方來城西瑤浦村  
三江口一帶擱戰其白旗賊一股隔江搖旗助

勢王文瑞張廣勝等靜以待之至未初度賊饑  
疲令百長督勇守城令旗長黃萬友朱紹輝等  
分由西門北門整隊齊出而自率親兵繼之復  
令楊桂武等以團丁號衣與湘勇更著前行誘  
賊瑤浦之賊果蜂擁而出三江口之賊亦分三  
路而來張廣勝先擊瑤浦之賊整隊齊衝賊猶  
死拒適黃萬友自村後抄出賊陣大亂官軍前  
後縱擊立斬黃衣賊自三名餘賊三四百名三  
江口之賊見瑤浦賊已敗潰陣勢稍卻花旗騎  
馬賊目連斬數賊擲首陣前以禁之比官軍近

前遽以馬隊來衝王文瑞督合齊施鎗礮斃騎  
馬賊三十餘刀矛繼進立斃賊二百餘張廣勝  
復從左路殺入斬賊數百其花旗賊目二十餘  
均經官軍擒斬餘賊由河邊紛潰官軍乘勝躡  
之逼溺水中者無數比收隊還城而對岸白旗  
賊已查無蹤跡矣是役計殺賊一千三四百名  
內有賊目二十餘生擒僞典旗官劉紹孚等四  
十四名奪獲旗幟軍械無數馬三十餘匹僞印  
十顆是日建昌賊竄近磁圭墟朱南桂胡兼善  
與江軍知州黃秉珍叅將章奪錦四營各出八



成隊擊之亦大獲勝仗燬賊營二十餘座斃賊  
近千溺斃尤多陣斬僞指揮劉姓及各賊目十  
餘名生擒僞先鋒沈廷英及餘賊二十餘名奪  
獲旗幟鎗礮器械無數十八日建昌賊復會新  
豐股匪來雲窰雙油築四大壘附近結草營數  
十座將堅阻官軍攻建之路朱南桂胡兼善黃  
秉珍章奪錦等會商當及其未定擊之遂各率  
所部分路並進復大破之朱南桂所部勇丁彭  
惠武等挺矛陷陣斬繡袍龍帽騎馬賊目一名  
卽僞耿忠先鋒劉夢熊也各勇奮躍爭先立踏

賊大壘二座章奪錦黃秉珍胡兼善各督所部  
分路縱擊將賊所築營壘概行踏盡餘賊沿河  
而奔官軍合隊追殺是役約共斃賊六七百迫  
而溺斃者無數奪獲賊馬二十餘匹旗幟百數  
十面偽印十餘顆鎗礮刀矛不計件二十二日  
建昌賊傾巢而出屯於新豐張運蘭王開化於  
是夜三更率全軍趨之二十三日黎明行抵雙  
油甫經安營賊隊已遍布對岸張運蘭等登山  
遙望賊衆蜂屯蟻聚來者仍絡繹不絕卽派張  
廣勝王開化率勇往河邊誘之令朱南桂胡兼

善各率所部分從上下游躡淺過河而自率各  
勇繼之對岸之賊甫過河而來各勇鎗礮齊施  
紛紛墮水張廣勝等卽麾衆乘勢衝渡賊望風  
潰走奔入新豐墟官軍躡蹤追之殺入街口斃  
悍賊百餘黃衣賊十餘張運蘭率勇從右抄至  
王開化率勇從左抄至斃賊數百朱南桂胡兼  
善率勇衝過墟前連破數營各部乘勢銳進連  
燬賊營三十餘座斃賊無數餘賊一由尙塘墟  
奔新城一由大路奔建昌張運蘭等乘勝追逐  
至距建昌府城八里之陳家山始收隊回營是

夜賊卽棄城而遁張運蘭等遂於二十四日收復建昌府城隨派隊追剿擒僞師帥旅帥等八名餘賊向新城一路紛竄探報撫州逸出餘匪有糾聚會合思與此股敗賊併竄閩界之說張運蘭等擬俟賊有定蹤卽會合兜剿務期聚而殲旃現在分捕餘匪已獲僞丞相胡玉堂僞指揮胡雙海等逆目多名及餘賊一千有奇軍前正法此張運蘭王開化及江軍寶勇一路疊獲大勝先後克復樂安宜黃南豐三縣及建昌府城之實在情形也臣維江西撫建兩郡久淪於

賊逆賊堅踞兩城爲老巢藉通東西兩路股匪消息以時分援逆黨牽制官軍復勾煽江西閩粵土匪人數日增江西全省局勢爲之糜沸上年已故道員王鑫率所部援軍屢次雕剿迭獲奇捷賊氛已斂矣會王鑫病故而逆首石達開旋率大股賊匪自安徽竄江西由東路趨撫州將逆眷寄頓於此親率死黨速援臨吉而其氛復熾幸王鑫舊部張運蘭等力扼吉水大挫兇鋒於是臨江速拔而吉安長圍益密石逆知楚軍難犯乃改圖竄浙而仍留撫建之賊以綴楚

軍復派其親信逆黨監之妄思留撫城以備狡  
窟之一前此官軍搜獲僞文悉其曲折如此自  
蕭啓江劉坤一等率師渡朝而東張運蘭王開  
化及普承堯所部寶勇四營由永豐進剿軍威  
甚壯撫建之賊鑒於瑞臨逆黨以長圍坐困爲  
官軍所殲也不復以踞城死守爲得計於是分  
其黨羽散屯城外鄉村將俟官軍深入而層疊  
分抄要其歸路以困之幸援軍節節搜剿先鄉  
而後城先縣而後郡卒能剪其枝榭以撥其本  
根三月之間郡縣城池前後收復進止機宜尤

爲允協卽選道張運蘭請

賞加按察使銜卽選知府王開化請以道員歸部選  
用花翎卽選同知王文瑞請免選同知以知府  
選用花翎升用叅將陳品南請以叅將留於湖  
南卽補並請

賞加副將銜花翎補用游擊彭聲發請以叅將留於  
湖南卽補藍翎補用都司劉松山請以游擊留  
於湖南補用並請

賞換花翎叅將朱南桂請以副將留於湖南補用藍  
翎卽選同知胡兼善請

賞換花翎藍翎補用都司王開信請以遊擊留於湖南  
南卽補並請

賞換花翎藍翎千總張廣勝請以都司留於湖南補  
用並請

賞換花翎藍翎都司銜守備彭家斌藍翎外委何啓  
耀外委羅逢春擬  
翎把總舒進堂奮勇捐  
軀實堪憫惜均請

勅部照例從優給予卹典以慰忠魂其餘在事實  
出力之員弁勇丁可否由  
臣核明保  
奏以示激勵之處伏乞



聖鑒訓示施行謹

奏

咸豐八年五月二十五日拜發奉

硃批另有旨欽此

彙保援軍克復江西臨江出力員弁摺

奏爲謹將克復臨江府城及羅坊太坪兩次大捷出力員弁兵勇邊

旨保奏仰懇

天恩獎叙以昭激勸事竊江西臨江府城地居該省西路之中切近省垣形勢最要自逆賊竄踞以來北與瑞州南與吉安兩府之賊互爲犄角而撫建兩府逆黨往來援應大肆披猖經臣札飭布政使銜劉長佑按察使銜蕭啓江於克復袁州之後督率各軍兩路進剿先後克復各縣城

池逼圍府城其時由皖鄂竄江之賊及撫建屯聚之賊疊次來援均經官軍擊退疊獲大勝最後首逆石達開由皖竄江颯忽突至亦經江楚各軍晝贛嚴防扼其西渡卒能鎖圍困賊力克堅城餘賊潰圍竄出者又經劉長佑蕭啓江躡蹤緊追斬獲數千賊首張發紀易自能僅以數百人逸出旋經九江大軍擊敗易自能爲鄉團殲斃張發紀隨經江西擒獲解省伏法是此起賊匪一律殲除並無漏網在事文武晝夜環攻時逾十月大小百戰歷著勤勞臣於上年九月

奏報羅坊太平墟兩大捷欽奉

上諭此次出力文武員弁兵勇著駱秉章查明擇尤

保奏欽此嗣克復臨江府城經

臣馳

奏欽奉

上諭剿辦甚屬奮勇其太平墟羅坊兩次獲勝出力

員弁著駱秉章歸併克復臨江案內彙保欽此

臣

當恭錄宣示各營將士感荷

皇仁無不歡呼奮躍謹據各將領開報勞績清冊逐

核明恭繕清單敬呈

御覽其英岡嶺之捷關係臨瑞兩府大局卽陸勇兩

次克復峽江及楚軍水師扼守贛江諸戰均於  
臨江軍務有裨謹一併酌量附保伏乞

皇上天恩加以鼓勵庶兵氣揚而愈奮所有陣亡之  
擬保都司藍翎千總田興科向玉堂擬保花翎  
都司藍翎守備黃鵬飛均請照都司例

賜卹擬保花翎守備藍翎外委陳大運擬保守備藍  
翎千總彭高益擬保花翎守備守備銜藍翎千  
總戴文嵐均請照守備例

賜卹藍翎把總楚玉林擬保藍翎千總田慶彩吳金  
保向志元楊正品均請照千總例

賜卹藍翎把總夏得勝騰代坤毛克佳劉其珍彭尙  
三把總莫成祖鄒造發賀昌信向明貴江西峽  
江汎把總周吉祥擬保藍翎把總舒習峯擬保  
把總龍必勝向先坤龍天才龍福林楊華奇胡  
長茂王依峻均請照把總例

賜卹藍翎外委卹祥發陳希廷蕭堯述王安和周原  
壽黃得貴王光明袁春谷譚星華外委周上明  
鄭詩林王得勝朱有方彭基學李楚傑朱光照  
劉仕久李華道楊榮貴石茂蘭羅洪彪擬保藍  
翎外委彭華富周功德楊高望舒興貴胡仁義

毛高才黃由開擬保外委丁恒盛拔補外委張  
銓林藍翎軍功李顯仁郭秉昆郭承來劉占魁  
藍翎軍功武生劉耀南武生王煥榮李輔光均  
請照外委例

賜卹從九品趙敦屢成範升王鳳凌監生陳經明江  
西增生周守愚謝恩誥蕭泰安附生鄧從愈傅  
廷瑞監生龔景梅高協中均請照從九品例  
賜卹因傷陣亡之廣東候補縣丞賈啓琪藍翎把總  
劉先實均請各照陣亡例

賜卹伏懇

勅部施行以慰忠魂而作士氣於剿賊機宜不無小  
補所有彙案核保緣由謹據實開單陳

奏伏乞

皇上聖鑒訓示施行謹

奏

咸豐八年五月二十五日拜發奉

硃批另有旨欽此





劉道長子請獎主簿藍翎片

再布政使銜江西補用道劉長佑之長子監生  
劉思詢上年二月在新寧本籍讀書年甫十九  
聞其父劉長佑在臨江太坪墟剿賊失利星夜  
告貸湊貲募勇五百親自督帶馳赴劉長佑大  
營助剿自楚赴江沿途約束嚴明抵江後屢次  
督勇殺賊臣憐其志飭省局給予所部口糧劉  
思詢以其父久歷戎行積勞致疾時患風暈之  
證疾發輒墜馬不省人事每當臨陣之時輒策  
馬前行以身翼蔽其父軍中士卒見之無不感

奮太坪墟之戰劉思詢衝鋒急進實屬著有微勞劉長佑屢次稟牘中從未叙及蓋恐錄其子之功則迹鄰於私也臣維劉思詢年未弱冠聞其父從戎失利措貲募勇千里赴援實屬至性過人在軍勞績本著未便聽其掩抑可否將監生劉思詢

賞戴藍翎以主簿歸部卽選之處出自

皇上天恩謹附

奏請

旨

咸豐八年五月二十五日拜發奉

硃批另有旨欽此

海國圖志

卷之五

五

籌議分軍援浙摺

奏爲籌擬分軍援浙請

旨勅遵仰祈

聖鑒事竊臣自奉

旨派撥兵勇馳援江西先後克復各郡縣城池均經  
隨時

奏報在案現在江西漸次肅清惟吉安一城合圍  
數月尙未遽下然江楚各軍分堵西南北三面  
環以長壕飛走絕跡東面濱臨贛江有楚軍吉  
長兩營師船及布政使銜廣東惠潮嘉道彭玉

麟所撥定湘一營師船足資截剿現據各營探稟城賊米糧將盡硝磺無多油鹽亦缺蔬菜肉食洋煙早斷賊匪屢次猛撲長壕覓路逃竄均經官軍擊退斬獲甚多料此援盡食絕之孤城無難尅期蕨事吉安一克則江西全境肅清援江各軍自應分起撤回以節糜費臣維逆賊竊踞金陵蔓延數省仰賴

聖謨密運次第削平以目今局勢言之大軍四集金陵賊勢已孤檻獸金魚難稽

天討惟安徽殘氛未殄浙江兇醜倏張若不及早圖

維不獨江左克復需時更恐殘孽鴟張或致釀成別患賊中著名頭目如馮雲山韋正蕭朝貴楊秀清羅大綱曾添養李來芳林啓榮等皆已膺顯戮伏冥誅現存之洪秀全無甚伎倆其能爲患者無過石達開陳玉成兩逆頻年擾攘皖豫竄犯鄂境者爲賊目陳玉成其援廬州援九江攻陷金陵東門外大營兩援武漢兩竄江西現復竄擾浙江者爲逆首石達開兩賊不除無論官軍爲其牽制不能以全力盡注金陵且皖豫地屬中原路徑四通八達一方有急數省震



搖兼之江淮之間民氣難馴古爲盜賊淵藪假使薙獮不速或致蔓延日廣爲害滋深浙江爲東南財賦之區海運所自出地與金陵相爲表裏於現在局勢殊爲緊要自石逆東竄以來南省援軍相距更遠一切防剿情形無由深悉然竊慮以聲名文物之邦當此獷悍百戰之寇勢將不支也是地勢所宜急剿者無如安徽浙江兩省而渠魁所宜急剿者無如石達開陳玉成兩兇浙江布政使李續賓忠勇善戰責其剿辦鄂皖之賊必能以次殲除尅期蕝事逆賊陳玉

成一股尙可無虞惟石達開率大股竄浙而現  
在援浙諸軍多係零星雜湊氣勢未完將領無  
久練之兵統帥無素習之將望其指揮如意固  
已爲難况石逆狡猾兇頑十倍他賊無論慣於  
避賊如福興者斷難遏其兇鋒樸勇如鄧紹良  
周天受恐亦非石逆之敵臣嘗詢諸自軍中來  
者知石逆在諸賊中能以狡黠收拾人心又能  
以兇威鈐制其衆每戰輒選各部悍賊厚其供  
給錄爲死黨多至數千其臨陣也以他部前驅  
而以死黨監督其後層層設伏待之遇敗則靡

之赴援類能轉敗爲勝勝則盡銳衝壓官軍每  
爲所乘其止也乍東乍西倏隱倏現冀亂吾之  
謀其行也忽馳忽驟或合或分冀伺吾之隙駭  
之所竄地方厯厯不爽前年石逆竄擾武漢時  
臣曾陳

奏石逆兇狡非王鑫一軍不足制之急調赴援甫  
成行而石逆已爲李續賓楊載福胡林翼等所  
敗會金陵賊黨內訌石逆遽舍鄂而遁上年臣  
調王鑫赴江剿撫建之賊其時亦因石逆從金  
陵跳出慮其由皖入江未幾王鑫病殞樂安越

兩月餘而石逆始至撫州臣急飭王鑫部將張  
運蘭等率勇丁三千嚴扼吉水三曲灘待之倖  
獲四捷斬悍賊數千賊始奪氣其不敢復犯江  
西西路而遽謀竄浙者一因金陵賊勢漸孤一  
因楚軍力戰可畏也此時江南大軍正在合圍  
金陵勢難以良將精兵兼謀固浙欲爲援浙之  
計似非於援江楚軍挑選精銳不可顧援江各  
軍現距本省已一千三四百里今復調其赴浙  
則日去日遠轉餉維艱且各將領勢本等夷既  
難自爲調遣人浙以後或浙省隨宜調遣更多

牽制之虞體察各軍情形每多以此爲慮臣反  
覆圖維現在援江各軍將領均前兵部侍郎臣

曾國藩所深知之人非其同鄉卽其舊部若令

其統帶楚軍赴援浙江則將士一心於大局必

有所濟且江浙本屬澤國利用舟師楊載福彭

玉麟水師兩軍皆係曾國藩舊部如曾國藩統

陸軍赴浙或從常山更造戰船順流而下或函

商楊載福分派師船由長江入常州泛太湖抵

湖杭湖流而上彼此聲息易通江南大軍旣免

後顧之虞援浙陸軍亦得戈船之助似尤勝算

獨操曾國藩前此奏請終制一疏曾奉

諭旨准其暫行在籍守制倘江西軍務緊急或他省有需人之處仍著候旨前往欽此仰見我

皇上于矜全臣子之中已寓斟酌權衡之意彼時楚軍援江者均獲勝仗九江重圍早合局勢稍有轉機曾國藩緩赴軍營尙無不可現在浙事方殷楚軍赴援急謀統帥應請

旨勅下前兵部侍郎

臣

曾國藩迅速起程就道精選

援江勁旅統率東行其勇餉一項江西既暫不能籌浙江石卽能供應亦難預揣當此事機

喫緊之時自應預爲籌畫謹擬由湖南每月籌解餉銀二萬兩再請

旨勅下湖北撫

臣

胡林翼每月籌解餉銀二萬兩專

供曾國藩一軍之用湖南距浙路途隔遠或由江西轉解或由水路運至九江由湖北轉運俟再咨商酌奪

臣

因浙江大局急需援應起見謹具

奏請

旨是否有當伏候

皇上聖鑒訓示施行謹

奏

咸豐八年五月二十五日拜發奉

硃批另有旨欽此



庚子年

戊午上

三

覆陳曾侍郎起程赴浙日期摺

奏爲遵

旨覆

奏仰祈

聖鑒事竊臣於五月三十日承准軍機大臣字寄咸

豐八年五月二十一日內閣奉

上諭前任兵部侍郎曾國藩著馳驛前往浙江辦理  
軍務欽此並欽奉

寄諭本日已明降諭旨令曾國藩馳驛前往浙江辦  
理軍務著駱秉章卽傳旨令該侍郎迅赴江西督

率蕭啓江等星馳赴援浙境與周天受等各軍力  
圖掃蕩該侍郎前此墨經從戎不辭勞瘁朕所深  
悉現當浙省軍務喫緊之時諒能仰體朕意毋負  
委任何日起程並著迅速奏聞以慰廑念將此由  
六百里各諭令知之欽此敬仰我

皇上聖智如神無微弗喻覺

臣

前所陳籌擬分軍援

浙一摺管蠡之見未能仰測

高深跪誦之餘曷勝欽服當卽派員恭賚

諭旨馳遞會國藩祇領並傳

旨催令迅速起程會國藩旋於十七日由湘鄉本籍

起程十二日抵省與臣會商一切拜摺後卽由

水路遄行趨程前進臣於奉到

寄諭之後一面恭錄行知蕭啓江張運蘭等令其速將各部傷病勇丁分別挑補聽候曾國藩調遣並飭省局將應發軍裝欠餉及子藥棚帳等項料理速辦以濟急需至進兵一切機宜應由曾國藩抵營後察酌情形詳晰陳

奏所有曾國藩起程日期謹據實覆陳伏乞

皇上聖鑒訓示謹

奏

咸豐八年六月十六日拜發奉

硃批知道了欽此

蕭道假歸所部聽曾侍郎汰選片

再援江各軍自咸豐六年正月出境至今已兩載有餘大小百數十戰備歷艱辛其因傷病請假者皆隨時體察更換候痊復後仍卽遣令歸營以資休養而均勞逸故士氣常新而不竭軍務亦日起而有功按察使銜卽選道蕭啓江久歷行陣謀勇兼資本年春間卽據稟陳從事行間歷有年所近因勞瘁積久元氣虧損兩耳重聽飲食銳減且親喪未葬應請給假三月回籍料理臣比以布政使銜江西補用道劉長佑甫

經准假撫建尙未克復軍務方殷未允所請頃  
復據蕭啓江稟稱撫建已復江西漸次肅清病  
勢日增肌肉消脫仍請給假三月調理情詞迫  
切適曾國藩來省臣與面商一切擬卽允假兩  
月以示體恤惟所部勇丁雖各有營官管帶  
須專員總統始可期其得力蕭啓江旣暫時  
歸應卽遴員攝理現飭蕭啓江將該營應如何  
料理勇丁應如何裁汰挑補之處詳悉馳稟聽  
候曾國藩酌奪務期精益求精以收實效又臣  
於上年五月札飭候選主簿吳國佑練勇一千

三百名該員軍務久臻嫻熟此軍多王鑫舊部  
若與張運蘭等赴浙彼此相知有素更可得力  
現亦飭歸曾國藩統率調遣總之此次援勦浙  
江道遠餉艱用兵實不能多非逐一精加挑選  
難期指揮如意臣等彼此熟商意見相同謹會  
同前兵部侍郎臣曾國藩合詞附片陳

奏伏祈

皇上聖鑒訓示謹

奏

咸豐八年六月十六日拜發奉



硃批知道了欽此

覆陳胡藩司未曾經歷戰陣片

再臣於六月十二日承准軍機大臣字寄六月

初二日奉

上諭昨命甘肅布政使司胡興仁馳驛前往浙江會同曾國藩辦理軍務本日據胡興仁奏伊堂弟候選守備胡景陶曾在廣西隨同該藩司訓練鄉勇屢經打仗請飭前往浙江藉資差委等語著駱秉章卽飭該守備胡景陶酌帶數十人隨曾國藩赴浙如曾國藩業已起程卽著飭令徑赴浙江交胡興仁差遣將此由五百里諭令知之欽此惟思胡

興仁於咸豐四年赴廣西藩司新任時由湖南  
省城經過臣始得見其人上年廣西羣賊圍逼  
桂林省城時道路梗塞文報不通胡興仁竟攜  
眷由山僻小路繞道前來楚省據稱係遵

旨陛見其時眾論譁然而胡興仁反自以得離危地  
爲得計復藉催餉爲詞繞由四川赴

京冀展入

覲之期免于

嚴詰其實藩司有地方之責四郊多壘豈急於赴  
闕之時催餉惟員弁爲宜方面大僚何須借此爲

越境之舉如此居心難逃

洞鑒且據胡興仁奏稱曾在廣西訓練鄉勇查胡興仁任內廣西軍務並無起色縱有其事亦實無其功至該守備胡景陶屢經打仗之說曾憶六年冬間閱永州探報有保勇失利一事此外打仗與否則未可知保勇卽胡興仁所招本籍保靖之勇旣係胡景陶管帶如果得力何以聽其遣撤臣聞胡興仁未曾經歷戰陣茲與曾國藩會同辦理軍務恐啓將士輕視統帥之漸現在浙江需兵勦辦之處甚多可否指定一處令其

勦辦以專責成或令其專司籌餉之事以資接濟出自

聖裁至胡景陶實非軍營中出色之員可否免其募勇並候

訓示施行臣因浙江軍務緊要起見既有所知不敢緘默謹據實附片覆陳伏乞

皇上聖鑒謹

奏

咸豐八年六月十六日拜發奉

硃批另有旨欽此

保舉援軍克復廣西平樂出力員弁摺

奏爲遵

旨查明保奏懇

恩鼓勵事竊湖南援粵一軍自克復興安縣城後移  
攻平樂府城先後疊獲大捷擒斬首逆克復府  
城經臣於上年十一月內馳

奏十二月初四日內閣奉

上諭駱秉章勞崇光奏報楚粵各軍會克平樂府城  
首逆就擒各一摺卽選道蔣益澧謀勇兼優戰功  
卓著卽選道江忠濬同心協力共克堅城均著賞

加按察使銜其餘在事出力湖南將弁著駱秉章  
查明保奏候朕施恩欽此

臣

比飭蔣益澧江忠濬

等查明勞績最著之將弁勇丁開造清冊申賚  
除守備蕭榮芳一營克復平樂後勞崇光咨歸  
廣西給餉由廣西核保外謹再三覆核繕列名  
單伏懇

皇上天恩加以甄錄庶行間文武感沐

鴻施共思奮勵其於粵西時局不無小補再藍翎把  
總擬保花翎守備蔣益慈於上年克復平樂府  
城後追賊至源塘墟奮勇殺賊身受重傷旋即

殞命臣查該弁屢次裹創血戰勞績最著嗣復  
因傷殞命殊堪痛惜可否卽照守備例

賜卹出自

皇上天恩謹一併附

奏伏乞

皇上聖鑒訓示施行謹

奏

咸豐八年六月十六日拜發奉

硃批另有旨欽此



ANNA VINCE

24-11

11

駱文忠公奏稿卷之十三目錄 湘中稿

戊午下

安鄉縣抽釐助餉請復學額摺

外委卹典重給請

旨勅部註銷片

援江官軍會克吉安府城摺

生擒吉安首逆李雅鳳片

接濟援江軍餉數目大端片

保舉剿捕澧州石門土匪出力員紳摺

遵

旨調兵援皖摺

暫留丁憂知府帶勇剿賊片

安徽李藩司所部濫招游勇據實陳明片

皖軍失利聞賊遠竄敬陳管見摺

加增曾侍郎援閩軍餉片

借動八年漕折濟餉摺

調兵援剿黔匪獲勝進攻鎮遠摺

援黔官軍加增長夫片

接濟貴州韓道軍餉緣由片

保舉援軍克復江西撫建各城出力員弁摺

參劾永州樊鎮違例乘輿私役弁兵摺  
參劾栗署鎮規避取巧片



安鄉縣抽釐助餉請復學額摺

奏爲安鄉縣紳民襄辦設局抽釐出力

奏懇

天恩俯准復還原裁學額以示鼓勵而宏作育仰祈  
聖鑒事竊臣前據安鄉縣知縣蔡式銓具詳該縣設  
局抽釐紳士商辦出力人文較前亦盛請復還  
原裁學額等情當經批司核議詳辦去後茲據  
藩司文格議詳請

奏前來臣查安鄉縣地濱洞庭人文素盛原設學  
額十五名嗣因頻年水患居民流徙失業應試

者少咸豐二年因議增瀏陽縣學額裁去三名撥給瀏陽迄今未據撥還該縣士紳自奉裁額後輒時深愧厲不甘以荒陋自居年來湖鄉稍稔應試生童漸復其舊聞各屬有捐輸廣額之事急欲仿照辦理無如積款之區報効有心輸將無力以致捐輸廣額無由仰被

恩施六年經臣委員前往籌設局卡抽取客貨釐稅該縣外江內湖港汊歧出爲全省西北商賈往來通衢兼之湖水長落無常卡座遷移靡定與他處辦理卡務難易迥殊正籌度間該士民等

自以捐餉無資既未效其涓埃之助而急公有志猶思抒其草芥之忱遂稟商委員協同經理計自開局以來歷經三載共收獲釐稅錢二十餘萬申撥濟軍餉在事各士民奉派襄辦各務昕夕不遑著有成效雖釐稅取之於商與本地捐輸有間第其急公募義之心均爲籌餉剿賊起見似與捐貲圖報者事異情同矧請復原額亦與從新議加者有別現經學臣胡瑞瀾移覆今歲按試該縣人文較勝復額似屬可行合無仰懇



天恩俯准將安鄉縣原裁學額三名仍行復還以示  
激勸而勵文風實與學校軍需均有裨益至此  
外辦卡抽釐各州縣業於捐輸案內

奏請廣額及無原額可復者俱不得援以爲例合  
併陳明所有安鄉縣紳民襄辦抽收釐稅出力  
請復原額緣由理合會同湖廣督臣官文湖南  
學臣胡瑞瀾恭摺具

奏伏乞

皇上聖鑒訓示謹

奏

咸豐八年七月二十三日拜發奉

硃批該部查議具奏欽此



外委卹典重給請

旨飭部註銷片

再臣於本年五月二十五日

奏保湖南援江官軍克復臨江府城及羅坊太坪

兩次大捷出力員弁兵勇請獎一摺附請

賜卹陣亡各員內陣亡藍翎外委陳運彬摺內悞書

擬保花翎守備藍翎外委陳大運已蒙

恩准照守備例賜卹續查陳運彬上年十月在臨江

攻城陣亡業經江西撫臣附請

賜卹欽奉

硃批在案理合附片

奏明伏乞

皇上聖鑒飭部將陳大運

賜卹之案註銷施行謹

奏

咸豐八年七月二十三日拜發奉

硃批依議該部知道欽此

援江官軍會克吉安府城摺

奏爲援師會克吉安府城恭摺馳

奏仰祈

聖鑒事竊官軍復圍吉安府城水陸布置嚴密逆賊  
窘蹙冀可尅期蕪事情形業經臣於籌擬分軍  
援浙摺內據實聲明逆賊始恃撫建之援冀以  
堅城困我繼以撫建克復援絕勢孤迫思偷竄  
則水陸重圍密合無路可逃屢次由西南北三  
面猛撲長壕冀由陸路衝逸均經官軍痛創而  
退計不得逞官軍於長壕上修築土塚編列更

棚晝夜瞭守賊至則鎗礮矢石噴筒火箭次第  
齊施一仿守城禦賊之法而鎗礮平放較之仰  
攻俯擊尤易有准故悍賊之向前抗拒者靡不  
傷亡踵接賊勢益衰臣前於三月內加調駐醴  
陵之叅將奈星元守備陶藻帶所部長勝軍一  
千七百餘名迫紮府城西路西南路又以水東  
一面副將劉培元陸軍稍單續調駐阜田之遊  
擊彭定太所部長勝軍八百餘移營水東益厚  
其勢總理軍務卽選同知曾國荃復於城邊贛  
江下游橫架浮橋旁施鐵鍊竹纜以防賊船漏

逸布置更周廣賊與長髮賊見勢愈窘迫不知所爲會國荃趙煥聯等復設計間之而猜怨益甚所有七月十一日以前水陸疊次堵剿獲勝情形均經江西撫臣隨時彙報在案七月二十一日卯刻會國荃與江楚水陸各軍大舉攻城城賊與西門城壘之賊均固匿不出但以鎗礮抗拒卽選同知直隸州知州劉騰鶴偵賊方與南門水師相持遂潛派勇二三百餘越壕蛇行而進逕薄北城從堞口微罅處取道蹂附而上斫守堞數賊拋擲火彈焚燒更棚城中廣賊見



而大譟均挺刃登陴城外石壘之賊見城頭火起知官兵登城遽傍城根橫抄之官軍後隊爲所限截不能繼上其已登城者前後受敵乃接引而下仍將城外之賊夾擊卻之收隊還營各營均卽收隊是役劉騰鶴所派勇丁陣亡者三十餘受重傷者百餘皆勇士也二十四夜四更逆賊銜枚而出徑撲西路長壕曾國荃所部擊之賊遁黎明壕外拾取梯絮糠袋等具八百餘件自八月初一夜至初四夜賊連次猛撲西南路長壕曾國荃督所部陸勇與水師營官藍翎

守備周惠堂及陶藻余星元江西知府銜委用  
同知直隸州俞昌會等各率所部擊卻之夜間  
昏黑不知幾賊若干但聞號泣之聲漸去漸遠  
比黎明渡壕諦視則泥草間血跡涔涔殆遍也  
維時風雨大作贛江驟漲初七夜賊駕大木筏  
乘漲衝突遊擊成章鑑以礮船圍迫劉騰鶴飭  
所部陸勇助擊之奪其筏而殲其人賊未得脫  
初八日曾國荃飭所部弁勇越壕探視中途遇  
賊殺賊四十餘生擒二十一名還營訊據供稱  
城內糧食已盡多食粥及煮草根充饑者是夜

決計猛撲天華山長壕莫圖乘間突出  
隨筋所部嚴陣以待亥刻先鋒悍賊阜  
長壕對岸山上一股進迫壕邊執木牌  
前餘賊持竹梯絮被糠包繼進拔壕外  
抵內壕官軍寂靜以待比賊填壕樹梯  
眾一齊吶喊聲震山谷官軍揮大刀斫  
七賊而奪其梯火彈噴筒石子齊發壕  
連環鎗礮繼之陶藻聞賊撲壕亦筋所  
鎗礮賊復大敗而退黎明出壕巡視血  
其被礮轟斃賊屍未及擡出者尙有十

視其腹則皆草根也拾獲竹木梯三十餘架糠包草包門片極多大礮一座旂幟刀矛腰刀多件初九夜五更賊由南路河街衝突周惠堂督礮船拒之施放排礮斃賊甚多黎明賊轉向西南分數路直撲天華山麓一帶長壕曾國荃督所部施放連環鎗礮拒之天曉霧收出境閱視賊屍枕藉者百餘拾獲草包門片無數方賊之撲天華山麓也趙煥聯劉騰鶴普承堯余星元等慮城賊以全力注吉營長壕遂各出隊越壕進剿北門賊見官軍渡壕遂傾巢而出直趨西

北接戰曾國荃派遊擊蕭孚泗張勝祿陶茂林  
等各帶隊分路進剿以牽制西門石壘及西南  
一帶之賊賊分股抗拒而以大隊與趙煥聯劉  
騰鶴普承堯奈星元鏖戰日午賊勢漸靡各路  
官軍奮威衝殺斃賊甚眾有兇悍賊目屢次回  
旂抗拒爲趙煥聯劈山礮隊所殲賊眾二百餘  
蜂擁昇之而去官軍徐徐收隊回營連日賊犯  
陸路長壕均大敗而退賊膽益寒不敢復行窺  
伺而是時贛江暴漲水長七尺有餘逆賊決計  
由水路衝竄是夜先以小舟前導後以小筏無

數隨之最後大筏六架筏上周以木欄遍懸棉絮四面密開礮眼尾繫小舟數十乘溜衝出管帶水師遊擊成章鑑副將劉培元各率礮船截之於下周惠堂率所部礮船與江西副將遮克敦布兵船擊之於上萬礮雷轟未逾一時賊之小舟小筏均於浮橋上游掃除淨盡舟上筏上之賊均轟斃溺斃無餘並擊散大木筏一架賊皆落水溺死其五大筏並尾繫之小舟四五十乘急溜衝至浮橋邊悍賊用大斧斫斷鐵鍊竹纜猛竄而出成章鑑劉培元卽率礮船追之於

浮橋下寶塔邊圍燒大筏一座追至麥潭灣又  
焚其一座筏上之賊盡斃時劉騰鶴彭定太各  
飭所部陸軍夾岸追擊防其舍舟登陸筏上之  
賊仍乘溜下駛成章鑑劉培元追至吉水之三  
面灘圍其一筏焚之賊之鳧水登岸者經劉騰  
鶴所部營官譚汝楫追殺一二百名劉培元追  
殺至三曲灘身受礮傷仍裹創繼進與成章鑑  
師船追至富口始將賊筏賊舟一概圍焚淨盡  
賊之鳧水由西岸登陸者普承堯及劉騰鶴各  
飭所部追斬之而賊之得脫者鮮矣是役江中

焚斃溺斃及東西兩岸擒斬之賊約二三千奪  
獲僞印旂幟銅鐵大礮抬鎗鳥鎗刀矛共四百  
餘件而周惠堂乘賊出竄時率所部礮船會同  
劉培元成章鑑留防師船將白鷺洲賊營攻毀  
淨盡守營之賊除焚斃溺斃外多鳧水入城曾  
國荃趙煥聯共商以城賊之由水路竄出者業  
經官軍殲斃賊膽更寒當遂大舉環攻冀可速  
克十一日寅刻各軍分隊進擊將附城低壘賊  
棚燒毀傷賊頗多城賊仍固匿不出但憑城施  
放鎗礮午後收隊回營傳餐甫畢各軍仍出隊



復攻擬先拔西門外城壘而後逕薄城垣無如壘堅而高礮眼密布官軍並力齊攻壘中悍賊層開鎗礮弁勇受傷者多忽大雨如注火繩盡濕遂各傳令收隊擬保千總甯鄉縣把總王友元擬保把總王榮香殿後忽壘中悍賊突出王友元王榮香力戰陣亡城中廣賊知水路難以竄逸而陸路長圍尤難逾越糧食已盡勢難再延仍冒死爲乘漲衝突之計連日趕築大筏并舁小舟入河十五夜初更賊駕大小木筏數十座大小划船數十號由河下衝竄周惠堂預率

礮船伏白鷺洲之外賊之船筏甫從洲內突出成章鑑劉培元各率所部礮船截之周惠堂及遮克敦布兵船從上游下擊萬礮齊轟轟斃溺斃無數船筏均爲官軍所奪惟一大筏順溜迅駛壓斷浮橋而出成章鑑劉培元急督所部師船追之劉騰鶴又飭所部礮隊扼之江岸水師奪其船筏賊皆落水死後隊未上船筏之賊反身入城城中長髮賊復急起截之互相鬪鬪蓋長髮賊與廣賊積恨已深又因官軍用間誘之故欲乘危而洩其忿也賊衆正相持間周惠堂

率勇丁急攻南門遮克敦布部勇及俞昌會所部蓮新軍繼進曾國荃陸軍圍攻石壘分隊攻西門趙煥聯所部由校場坪進陶藻余星元各督所部繼進普承堯劉騰鶴所部直追北門三面環攻城賊向東門竄逸吉營水勇用長杉木豎城邊附之而登縱火繞屋一面開南門延納官軍官軍三面湧入分道搜殺賊之迫出東門者官軍追之江岸紛紛落水而斃其由南門繫白布出城乞降者官軍憤其久抗仍盡斃之而西門外石壘之賊亦爲遊擊蕭孚泗等所破餘

賊盡殲統計水陸共斃賊數千奪獲偽指揮先鋒等偽印九顆大小鎗礮刀矛旗幟七百餘件生擒逆賊三百九十六名立將吉安府城克復各賊目多改裝由水路竄出轟斃溺斃無從確指間有鳧水登岸竄逸者各營現仍派隊窮追沿途搜殺莫可不留餘孽此江楚各軍會克吉安府城之實在情形也臣維吉安府爲江西鉅郡城池堅固儲積充盈自首逆石達開攻陷以來時逾三載楚師兩次合圍前後百數十戰再歷寒暑始獲克此堅城在事文武水陸弁勇實

屬殫誠竭力不避艱險花翎卽選同知曾國荃  
自援吉以來勤慎勇往深得軍心嗣奉江西撫  
臣派其統理軍務遇事和衷共濟將士一心故  
能卒克堅城盡殲羣醜應請

旨以知府歸部遇缺卽選並

賞加道銜卽選道趙煥聯久於行陣識畧最優遇事  
奮勉此次攻城喫緊之際適丁父憂經臣慰勉  
再三茹哀殺賊勞績卓著請

賞加按察使銜並

賞給該員父母三品封典花翎游擊成章鑑膽畧出

眾屢次截勦水路竄出之賊悉協機宜厥功最偉請以叅將歸部儘先選用並

賞加副將銜補用副將劉培元謀勇兼優知顧大局此次追賊受傷請

賞加總兵銜補用游擊彭定太樸實勇敢前次會克撫州擬保叅將此次復會克吉安府城請以叅將留於湖南補用並

賞換花翎花翎守備陶藻勤奮樸誠不避艱險請以都司留於湖南遇缺卽補藍翎守備周惠堂衝鋒陷陣奮銳無前請以都司歸部選用並

賞換花翎至援軍各營員弁勇丁在事最久勞績卓著者實不乏人仰懇

皇上天恩准臣核明保獎以示激勸而勵戎行江西

九江鎮總兵普承堯卽選同知直隸州劉騰鶴

江西補用副將遮克敦布江西知府銜委用直

隸州知州俞昌會等所部四軍均由江西調遣

支應應由江西撫臣核明保獎未及隨摺聲叙

合併聲明所有援軍會克吉安府城情形謹據

實馳

奏伏候

皇上聖鑒訓示施行謹

奏

咸豐八年八月二十四日拜發奉

硃批另有旨欽此



皇朝通志

庚午下

下

生擒吉安首逆李雅鳳片

再正拜摺開復接吉安大營飛稟首逆李雅鳳  
已經江西副將遮克敦布所部擒斬其餘著名  
各逆目據生擒賊供廣賊從水路竄出者業經  
轟斃溺斃長髮賊之在後者均爲亂刃所殺因  
賊屍落水者現未暇撈獲而長髮賊之在後者  
經官軍入城搜殺後卽追迫東門江岸溺死及  
亂矛攢刺而死各軍急於窮追逸賊一時未及  
細認餘賊之由船筏衝出浮橋鳧水登岸竄逸  
者約尙有二三百之多經各營沿途搜殺外復

緊追至吉水縣境黃巖嶺四路圍剿當可不留  
一孽合計七月初九夜八月初十十五兩夜三  
次大戰水路斃賊數將近萬而陸路擒斬之賊  
不下數千此股悍賊全就殲滅惟近地被擄婦  
女幼孩則隨時釋放給親屬領回辦理尙爲允  
協堪慰

慈厘合併附片聲敘伏乞

聖鑒謹

奏

咸豐八年八月二十四日拜發奉

殊批知道了欽此



接濟援江軍餉數目大端片

再湖南援江之局自咸豐五年十月始其時江西之袁州臨江瑞州吉安撫州建昌六府及所屬各縣均先後淪陷不但驛路梗阻文報不通卽山僻小徑均經逆賊迫脅鄉村設立團卡盤詰商旅絕跡音耗俱杳

臣奉

諭旨籌撥兵勇兩千赴江援勦竊慮賊勢披猖未能制勝而援師之出旣須分道而行節節搜勦又必彼此互相援應始可策及萬全自瀏陽醴陵兩路出師以後陸續增加水陸勇丁至一萬九

千有奇克復袁州之後續圖臨江吉安克復臨  
江之後續圖撫州建昌克復撫建之後江西大  
局肅清祇餘吉安孤城未下而臨江撫建之軍  
猶未敢遽撤者一則逆賊轉竄浙閩兇燄猶熾  
方議簡援江之師以援浙不得不暫留聽調一  
則吉安未下恐楚軍一撤處處皆虛設窮賊潰  
圍四竄或致流毒他方又成不了之局也今幸  
仰仗

皇威吉安一城旋即克復江西境內一律肅清該省  
兵力足敷調遣地方既復錢糧釐金漸次整理

餉源自可充裕江西之患已紓湖南援江之師  
除隨同會國藩援勦浙閩外自應凱撤回南以  
節糜費溯自援江以來湖南之帶餉隨征者至  
今已滿三載除募勇經費訓練坐糧及操防援  
勦用過軍裝子藥并江南隨營勸捐撥作勇糧  
應俟造冊到局彙算又積欠各營口糧應俟續  
籌補發外計自咸豐五年十月拔營出境援江  
之日起至今共已支發餉銀二百六十八萬一  
千七百二十四兩五錢九分五釐而本省沿邊  
一帶州縣防堵勇糧不與焉此外尙有協濟江



西軍餉應由江西彙冊報銷湖南作正開除者如支發曾國荃陸勇半餉自七年九月十五日起至八年八月底止共銀六萬六千兩支發該營積欠陸勇口糧銀四萬兩又支發該營水師口糧自七年九月十四日起至八年八月底止共銀一萬五千八百六十九兩五錢五分四釐支發劉培元水師口糧自七年八月二十三日起至八年八月底止共銀一萬三千八百十兩零二分九釐支發吳坤脩劉騰鴻普承堯劉騰鶴等營勇糧共銀二萬八千兩支發黃冕周鳳

山劉拔元胡兼善吳齊源等營勇糧共銀六萬  
七千二百七十兩零一錢一分八釐共計協濟  
江西軍餉銀二十三萬三千九百四十九兩七  
錢零一釐合而計之三載以來湖南援江之餉  
及協濟江西之餉蓋已二百九十一萬五千六  
百餘兩矣布政使銜江西補用道劉長佑假滿  
赴江時臣囑俟吉安克復卽將所部撤回前准  
江西撫臣咨留自八月以後由江西支給勇糧  
自應准其留江聽調至按察使銜卽選道張運  
蘭蕭啓江兩軍則統歸曾國藩援閩仍由湖南

湖北前奏援浙月餉內支給茲值援江大局已

竣理合將援江軍餉大端據實聲明伏乞

皇上聖鑒謹

奏

咸豐八年八月二十四日拜發奉

硃批覽奏均悉欽此

保舉勦捕澧州石門土匪出力員紳摺

奏爲遵

旨核保懇

恩獎勵以昭激勸事竊臣於六年七月

奏報澧州石門奸民藉團滋事勦捕完竣首要各

犯均已拏獲正法地方一律肅清一摺欽奉

上諭辦理尙爲妥速所有出力員弁紳民著該撫核

實保奏候朕施恩欽此臣當卽恭錄行知岳常澧

道桂亮等飭其據實開摺稟覆毋稍遺濫致失

人心蓋以該州一帶地居南北兩省之中近年

民風日趨於強莠民動輒倚團玩法欺壓良懦  
此案奸匪陳正卯陳緒餘等藉辦團爲名誘聚  
窮民肆行劫掠志在突襲荆澧遙爲逆賊聲援  
兩省人情洶洶幸官軍速集聲威頓張正士良  
民得有所恃以無恐遂各糾集團衆共事驅除  
而匪黨及無知愚民震懾

國威旋即解散匪首陳正卯等及著名匪目次第  
就擒幸無一名漏網得以銷茲異變雖官兵弁  
勇實著微勞而地方紳民之功尤未可在其掩  
抑此次核實保獎則地方正氣常伸團練始爲

有益而地方囂凌之風亦可稍戢矣謹繕具清  
單仰懇

皇上天恩加之甄敘以作士氣而靖地方不無小補

伏乞

聖鑒訓示施行謹

奏

咸豐八年九月 日拜發奉

硃批另有旨欽此

通志卷之八

戊午下

三

遵

旨調兵援皖摺

奏爲遵

旨調派官兵馳赴安徽恭摺由驛

奏報仰祈

聖鑒事竊臣於八月二十三日欽奉

寄諭勝保奏皖省軍興緊要請飭撥四川湖南官兵  
等語安徽自廬州再失後店埠梁園等處相繼告  
陷定遠危急該處勇多兵少亟應裁勇添兵以資  
得力四川湖南兩省兵力素健著王慶雲駱秉章



悉心籌畫如存營兵力尙敷調遣卽著各挑選精銳一千五百名配帶軍裝糧餉撥赴鳳陽一帶文勝保翁同書調遣卽使該省兵力不敷亦應酌量調撥勿得稍存膜視欽此跪誦之餘敬悉我

皇上屢念皖疆至意竊惟湖南官兵隨營東征者轉戰數載尙未凱旋近時隣省地方復多不靖貴州思南鎮遠兩郡失守思州黎平兩郡遍地皆賊西路援勦之師宜增廣東連州陽山盜賊紛起廣西賀縣城垣復陷南路征調之事復急存營官兵原難多調致啓戎心惟恭繹

諭旨廬州失後定遠復急似賊匪勢愈蔓延皖省北境情形較緊李續賓克復太湖潛山後師指舒桐其能分軍赴廬與否尙未可知勝保翁同書力遏北趨此時正議添兵裁勇方期得手則皖北之軍必須急爲增益比卽選調提標鎮筭鎮標綏靖鎮標及永綏乾州兩協保靖九溪鎮溪三營精兵一千五百名交署提標左營遊擊補用叅將升補永州鎮中營遊擊滕遇春統帶各營均配帶軍裝於常德取齊分起前進飭省局籌發行裝口糧銀兩委員解赴常德發給所有

官兵沿途應支口糧除湖南湖北境內  
途州縣照例應付外其自入安徽以至  
帶大營恐道途中梗師行不能迅速由  
發庫平銀一萬兩作為湖南協濟皖省  
臺之款由該省糧臺核銷解交滕遇春  
備途間支放而利師行茲據各營稟報  
馳抵常德於九月二十八日起程前進  
滕遇春及各帶兵官弁沿途兼程行走  
律毋許稍涉擾累並飭各州縣迅速催  
留滯所有遵

旨調派官兵一千五  
起程日期理合

奏報伏乞

皇上聖鑒謹

奏

咸豐八年十日

硃批知道了欽此



暫留丁憂知府帶勇勦賊片

再臣前准吏部咨開奉

上諭勝保袁甲三奏差委需員請旨飭調等語湖南  
候補知府張由庚著賂秉章飭令前赴勝保袁甲  
三軍營聽候差遣欽此維時貴州黎平府報粵西  
賊首李文茂黃金亮竄入黎平與古州賊首余  
世科合股勢甚猖獗准補寶慶府知府張由庚  
先已經臣札委前赴鎮筸募勇七百名訓練成  
軍預備援黔之用是以未卽飭赴安徽近因貴  
州鎮遠府失守改調張由庚帶所部馳赴晃州

邊界一帶相機防勦張由庚未奉札之先已馳赴晃州嗣思州賊起府城危急又分督所部由青谿徑援思州頃接該營稟報在營接得家信該員生母王氏在四川本籍病故該員係屬親子例應丁憂請准假由黔省間道回籍奔喪臣查黔省局勢鼎沸該省東境幾於無處無賊提臣蔣玉龍所帶川兵潰歸思南軍營後鎮遠墮陷臣現加調兵勇赴黔援勦寶慶府知府張由庚人尙勇往所部鎮守勇七百名甫經訓練成軍未便驟易生手合無仰懇

皇上天恩俯念黔邊緊要帶勇乏員准將寶慶府知府張由庚暫留軍營帶勇勦賊俟軍務告竣再行給咨回籍守制庶於黔省軍務有裨所遺寶慶府知府一缺湖南現有應補人員咨卽揀員請補合併聲明伏乞

訓示施行謹

奏

咸豐八年十月初十日拜發奉  
硃批著准其暫留湖南欽此





安徽李藩司所部濫招游勇據實陳明片

再勝保請調蜀楚官兵一片頃准照抄咨會前來臣細繹原片據云皖省兵勇數幾兩萬有餘勇居十分之七招勇之初本多烏合潰敗之餘更難整頓此時要務莫先於裁勇尤不能不亟議添兵具見皖事之壞雖由餉缺兵疲而實則多招烏合之勇所致臣維軍興已久用兵用勇各有其得力之處而亦各有其致弊之處卽以皖省言之勝保則裁勇添兵而李續賓一軍則舍兵用勇皆能誅斬盜賊歷著戰功揆厥所由

有勝保李續賓爲之將帥則兵勇皆得其用而制勝有權否則以無能之將馭冗雜之軍不但糜費餉需徒以資賊抑且一蹙不振收拾爲難古云兵隨將轉又云用兵以選將爲先乃一定不易之道近年湖南從征兵勇均能出力兵勇丁夫之散布各省者奚啻十餘萬人而勇數較之兵數竟不止十分之九湖北江西廣西各軍之得力著名者均係湖南鄉勇卽前安徽藩司李孟羣所部亦湖南鄉勇爲多何以湖北江西廣西用湖南鄉勇頗收其功安徽亦用湖南鄉

勇而莫觀其效則原募之時所委募勇者不得  
其所募皆市井伶俐狡猾之輩及游手無賴  
之徒故不得其益且受其害也前安徽藩司李  
孟羣由廣西調赴曾國藩軍營時所帶原係廣  
勇及武漢再陷李孟羣所部廣勇漸次散盡於  
是改募川貴及湖南之勇所委帶勇員弁多係  
軍營屏棄不用及曾被各省參革之人惟知虛  
冒勇數開銷餉銀捏報勝仗鑽營保舉而軍事  
已不可問李孟羣前在廣西及曾國藩軍營曾  
著勞績初節原有可稱後聞其沾染軍營惡習

嗜好日多日午猶不能起銳氣已銷磨殆  
事多委員弁經理功牌藍翎隨意濫賞臣  
有聞未敢遽信嗣辰州盤獲五品頂戴擬  
丞張侍廷稱係李孟羣所部副將張得勝  
湖南募勇又長沙盤獲擬保從九楊濱稱  
孟羣所部候補知府袁懷忠遣來募勇皆  
孟羣文札且訪聞張侍廷楊濱等頗有駐  
財捐派幫辦百長情事比經臣查拏懲辦  
申不奉本省札飭不准募勇之禁游民始  
戢解散卽此二事觀之則李孟羣之濫招

債事已可想見而勝保原奏所稱倉卒招勇既無紀律又易潰譁廬州之失尤其顯者數語實屬可據應請

旨勅下勝保將李孟羣所部各勇嚴加裁汰並將該員歷次所保各文武員弁留心察看分別叅革於皖省大局不無小補臣因勝保原片有用勇不如用兵之意故一併據實陳明伏乞

聖鑒訓示謹

奏

咸豐八年十月初七日拜發奉

皇朝通志卷之四

戊午下

三

殊批另有旨欽此

皖軍失利聞賊遠竄敬陳管見摺

奏爲援皖官軍失利聞賊愈竄愈遠似宜相其緩急變通辦理敬陳管見伏候

聖裁事竊逆賊巨股前此分擾皖浙節奉

諭旨曾國藩率援江楚軍援浙嗣因浙賊竄聞復命移軍攻閩李續賓奉

命率楚軍援皖嗣廬州復陷復

命分軍攻廬誠以兵機因賊勢而生苟事會在所宜乘卽機宜未容稍滯非量其緩急應之固難期其有濟臣請以目前局勢言之李續賓率師援



皖一月連克太湖潛山桐城舒城四縣軍聲甚  
振嗣因進規廬郡李續賓分軍留防已復各城  
親率所部先攻三河偽城亦已迭獲勝仗頃推  
湖廣督臣咨會十月初十日三河軍潰李續賓  
尙無下落臣聞各處稟械均云三河偽城甚堅  
李續賓督攻甚急已將城外賊壘攻破忽逆首  
陳玉成率大股援賊捻賊倏至李續賓縱橫血  
戰竟日力竭而敗全軍盡覆臣維李續賓忠勇  
沉毅用軍最精頻年轉戰湖北江西安徽大小  
數百戰未嘗少挫臨陣身先士卒衝鋒陷陣所

向無前聲威素著茲以兵分力單爲賊所乘實堪痛惜之至該員素懷剛烈必不肯突出重圍皖賊自復陷廬城後與捻賊合勢兇燄日張今楚軍忽有此失誠恐廬城未能速復而現圍安慶之水陸馬步各軍尙未知能否支持江南山東河南湖北江西各省皆有防不勝防之慮李續賓素爲陳逆所憚又鄂皖諸軍繫望之人一旦蹉跌人心震搖是皖省事勢最急而勦之不可以緩也逆首石達開由浙竄閩以後氣勢頓衰其回竄江西者曾國藩遣張運蘭擊之安仁

一鼓殲之斃賊近八千道員劉長佑扼之新城  
大小十一捷斬馘幾及兩萬入閩之賊因地方  
瘠薄掠食爲艱解散漸衆得各營械稟知福建  
延建邵三郡一律肅清賊勢愈趨愈南聞已竄  
至泉郡所屬之漳平縣及龍巖州一帶觀近時  
賊蹤紛紜離亂迥異從前足知黨羽披離勢難  
久稽

天討外間有傳石逆已伏冥誅者道路之言原不足  
據然以目前賊勢言之似石逆不死卽逃理有  
可信且閩賊既已南趨地連漳泉及廣東潮州

一帶此數郡者民風素勁地勢有險可憑如能  
鼓勵士民共相聯絡而官軍數路蹙之似實無  
難蕨事是閩省事勢稍緩而勦之尙可不急也  
曾國藩先擬從雲際關入閩繼偵賊已南趨恐  
其回竄江西改由建昌截勦乃狡賊知官軍將  
至復轉而東趨曾國藩現分遣張運蘭蕭啓江  
率所部兩道入閩將窮賊所向殲之然閩中米  
糧不敷必須從江西邊境採買山高路險陸運  
維艱古云千里饋糧士有饑色深恐軍行難期  
迅速而賊蹤則愈竄愈遠需時曠日所得不償

其勞當此賊勢衰微之時閩督臣任勦之事江西撫臣任防之事似亦力尙有餘復何須客軍遠涉爲哉且以大局言之皖居江淮之中毗連數省南北東西橫決四出皆足爲腹心之患非閩廣僻在一隅者可比李續賓未敗尙可期次第剪除肅清全境今則軍威已挫賊勢更張勝保袁甲三翁同書皆有賊衆兵單之慮其急宜增軍速勦固已無疑曾國藩所部均是百戰之餘而由鄂援皖之軍又多其舊部若調之赴皖收召李續賓所部各軍並聽其選調鄂省各軍

厚集其勢則勝保袁甲三逼其北曾國藩扼其南自可力挫兇鋒而預操勝算如慮江西空虛閩賊或圖回竄漸有蔓及腹地之虞則留道員蕭啓江所部四千人任江省擇要防守亦可藉資鎮壓是曾國藩一軍援閩固期有益於閩而援皖則不僅大有益於皖也但援江各營楚軍自七八月以來疾疫繁興勇丁長夫死亡相繼迭據各營稟請添募更換無如病者未歸而新者復病莫可如何若令其移師赴皖則先須移駐撫州復行料理而後可整隊遄行且江西景

德鎮尙有大股逆賊屯聚曾國藩若督師由江  
援皖應與使道勦除免爲皖南江西後患是亦  
未能尅期至皖然非預爲調度誠恐皖省賊蹤  
颺忽又有緩不及急之虞合無仰懇

皇上天恩迅速勅下前兵部侍郎臣曾國藩令其察  
酌緩急情形妥爲籌辦庶於東南上游大局有  
裨臣因軍務緊要不敢不畢竭其愚以備採取  
可否伏候

聖裁所有皖閩兩省緩急情形謹據實馳

奏伏乞

皇上聖鑒訓示施行謹

奏

咸豐八年十一月初一日拜發奉

硃批另有旨欽此



馬文忠公奏請

戊午年

三

加增曾侍郎援閩軍餉片

再會國藩率援江楚師援浙湖南原議每月籌銀二萬兩協濟該侍郎軍餉嗣因浙賊竄閩會國藩奉

旨援閩湖南仍按月委解前項銀兩取道江西以期徑捷昨復接會國藩函開閩境米糧極貴銀價極低勇丁長夫日食不足且軍中疾疫流行醫藥之資募補之費均較尋常爲多而所募勇丁又漸有增減原議湘鄂兩省按月各解餉銀二萬兩實屬不敷請每月各增銀萬兩以資接濟

臣以該侍郎函稱一切委屬實在情形比與省局司道公商嗣後卽按月加解銀一萬兩合共三萬兩俾無掣肘之虞至鄂省如何籌畫情形應由湖廣督臣定奪所有籌議按月加增曾國藩援閩軍餉原由謹附片陳

奏伏乞

聖鑒謹

奏

咸豐八年十一月初一日拜發奉

硃批知道了欽此

借動八年漕折濟餉摺

奏爲軍餉浩繁援案奏懇

天恩俯准借動漕折等銀以資接濟仰祈

聖鑒事竊照湖南自軍興以來於茲七載徵兵募勇  
籌防籌援迄無虛日前因軍用浩繁庫欸支絀

經臣節次

奏准借動咸豐四五六七等年糧道庫征存漕折  
等銀供支在案現在湖南轄境雖已一律肅清  
而黔中苗教披猖逼近靖州晃州兩粵賊匪又  
復竄擾連州賀縣等處與南省壤地緊連派援

派防兵勇增添每月又需協濟粵西銀二萬兩  
侍郎臣曾國藩軍營銀三萬兩協濟貴州委辦  
軍務記名道韓超每月餉銀四千兩卽此三款  
以一年計之卽須六十餘萬兩而越境援勦兵  
勇餉需尙不在內用款較前愈繁庫款較前愈  
絀前借漕折等銀久已用罄無存本年各屬錢  
糧除因災蠲免及撥解營餉外解司者寥寥無  
幾卽捐輸釐金亦屬入不敷出目前各路軍務  
均難尅期蒞事兵勇口糧積欠已數月之久饑  
潰堪虞倍深焦灼臣與省局司道籌商再四惟

查有本年漕折銀兩現已陸續呈解可資挹注  
值此軍務方殷餉需孔亟之時勢不得不權衡  
緩急以濟時艱據省局司道會詳前來合無仰  
懇

天恩俯念防勦吃緊准照成案將咸豐八年糧道庫  
征存漕折等項銀兩隨時提借歸入軍需項下  
撥節支用事竣作正開銷俾濟急需而免貽悞  
所有議請借用漕折銀兩緣由理合恭摺具  
奏伏乞

皇上聖鑒訓示謹

奏

咸豐八年十一月十二日拜發奉

硃批戶部速議具奏欽此

調兵援剿黔匪獲勝進攻鎮遠摺

奏為黔省鎮遠思州兩府賊匪披猖湖南先後調撥官軍援剿疊獲大捷現擬進攻鎮遠恭摺馳

奏仰祈

聖鑒事竊貴州鎮遠府屬各縣與湖南晃州廳界及  
沅州府屬之黔陽緊連思州銅仁兩府與湖南  
鎮遠鎮及沅州府屬之麻陽緊連頻年黔省苗  
匪會匪教匪大肆披猖湖南隨時出師援剿均  
經

奏報在案晃州一廳三面插入黔江勢成孤立邊



防尤爲吃緊而涼傘一汛首當賊衝經臣調派

辰沅道標守備補用都司熊興栢等帶勇駐此

與貴州駐軍卬永委辦軍務之記名道韓超互

相犄角疊獲勝仗自上年十二月貴州思南府

失陷後貴州銅仁思州兩府松桃一廳時有警

報辰沅靖水道翟誥每就近察酌情形迅發漢

土兵勇援剿以故黔省近楚各府縣稍獲安全

賊匪讐於楚威亦未敢肆逞當思南初陷之時

賊氛擾及銅仁府境署銅仁府知府周夔飛稟

乞援翟誥立派千總梁友芳把總楊昌松候選

經歷吳宗德土守備吳添富吳永清等帶漢英  
兵勇一千三百名隨周夔進剿由銅仁而至思  
南三百餘里屢戰皆捷計可漸次蕪役矣忽另  
股苗匪教匪擾及貴定貴州省城戒嚴黔撫臣  
蔣蔚遠調周夔帶勇赴援而思南賊勢復熾是  
時韓超帶所部赴思南剿賊鎮遠印水苗復披  
猖翟誥調屯弁張仁傑率募勇三百馳赴見邊  
以資鎮壓偵知銅仁大小江一帶匪徒遙應思  
南教匪復調都司銜土守備吳永清吳正邦帶  
苗兵三百前赴銅仁府城代爲防剿二月二十

五日賊撲銅仁府城具永清吳正邦等擊卻之  
斬首十八級生擒紅衣賊日二名翟誥復調屯  
千總王占整意外委劉玉慶吳支剛毛順鴻及  
苗守備吳成先候選從九品吳成鳳等帶漢土  
兵勇九百五十名由鎮筸兩路並進以壯聲威  
會貴州提督蔣玉龍帶鎮遠川兵赴思南而思  
州一帶教匪復謀乘虛襲犯是邊三月二十一  
日賊數千三路來撲涼傘駐營涼傘之都司熊  
興栢督所部三百人奮擊鏖戰三時轟斃賊眾  
無算斬首六十三級生擒悍賊五名奪獲旗幟

器械百餘賊之散逸者韓超及黔邊文武擒斬甚衆翟誥以黔中教匪三股在思南者爲白號在銅仁者爲紅號在思州一帶者爲黃號皆由貴州城外之天主堂傳布遍及黔疆亟宜早爲剿除免其滋蔓卽於四月十五日親率練勇二百名赴晃州督剿黃號賊首吳龍保自涼傘敗後知楚軍猛銳難犯則盡欽其衆踞岷嶺山爲老巢岷嶺山勢險峻三面懸崖僅東南一路可通人行賊衆已早爲搗斷翟誥抵晃後所謂之屯弁梁友芳蘇朝選劉玉慶常科元等均先後

帶勇踵至冕州涼傘及黔邊各團均集眾來會  
十九日卯刻各率所部隨熊興栢進攻賊巢無  
如地勢過險賊居高俯擊砲石雨下難以施展  
道標藍翎外委田應廷冒險奪隘中石陣亡勇  
丁蕭化池等繼進復被砲殞命自卯至酉勇士  
更番迭進受重傷者百餘名陣亡者十餘名仍  
相持如故晡後始收隊山腰傳餐暫息熊興栢  
等議賊雖踞險爲巢竟日仰攻我勞而賊亦乏  
不如乘其倦怠圖之是夜四更挑集各勇之趨  
捷者田樹林等數百銜枚前進多攜火礮火筒

乘星月微光猱附而上賊恃其險未之防也忽  
山頭火光四起賊衆驚謀自相擾亂官軍乘勢  
奪隘而入將賊巢攻破斬首二百四十餘級生  
擒首逆吳龍保之妻楊氏及賊目楊勝魁等四  
十二名燒死跌死者約數倍過之其奪路逃走  
經官軍鎗礮轟死者不計其數內有首逆吳龍  
保及其弟吳三保吳四保屍首均經逆屬認明  
劉梟嗣因楚黔文武官紳按團搜捕正法者復  
二百餘翟誥正督辦間忽准貴州松桃協鄂清  
移咨思南教匪入該廳也江一帶圖乘虛撲城

請兵援剿翟誥遂回鎮軍調都司銜士守備吳永清帶苗兵五百馳赴康金卡於山谷多張疑兵揚言楚兵數千卽日出境賊仍遁回思南忽鎮遠所駐川兵以餉乏而潰八月二十九日府城失守於是思州玉屏青屏印水之事益棘臣接報後卽飭前委赴鎮募勇之寶慶府知府張由庚帶所部新勇七百名馳赴貴州玉屏縣駐守復調署綏靖鎮中營遊擊補用參將田宗蕃速募鎮勇五百赴黔翟誥已調屯于總梁友芳士守備吳正邦吳正富等各帶所部馳往黔

邊人心稍定鎮遠逆苗踞板灘蕉溪一帶時擾  
青溪縣境并勾結土匪教匪橫出思州府境思  
郡危急張由庚分所部駐青溪助韓超扼守分  
所部會田宗蕃士守備吳正邦馳援思州梁友  
芳與韓超所派守備潘忠友駐防印水九月二  
十九三十等日匪苗數萬攻撲印水城垣梁友  
芳會同潘思友迎頭截剿以寡敵衆斬馘頗多  
翟誥復添調駐涼傘之屯弁劉玉慶帶所部鎮  
勇三百名馳赴印水助之田宗蕃進駐思州羅  
家山十月十三剿貴長溪之賊斬首百餘級生



擒黃建昌等十名十八日卯刻乘霧進攻岑鴨  
壘賊恃地險人眾蜂擁抗拒田宗蕃分所部爲  
四路署把總田慶祿等帶勇徑抵壘下接戰別  
簡勁卒取道壘後襲之令思州屬鄉團於壘左  
林內張旗幟爲疑兵賊欺官軍勢單傾巢而出  
分兩路抄截後路田宗蕃親督士守備吳正邦  
哨長張映軒田興科等率後隊策應鏖戰逾時  
賊勢不支奔潰回巢忽署千總趙列峯哨長田  
祖玉士弁吳老恪吳永安等從山後殺入官軍  
見壘中火起各奮威衝殺乘勢搶上山梁立將

賊壘平燬復分隊窮追酉刻始收隊回營計獲  
賊千餘割獲首級四百二十餘顆生擒賊目楊  
正富吳興發郭學升譚加兆劉邦勝五犯奪獲  
大礮三尊旗幟刀矛二百餘件二十六日辰刻  
駐營卽水之梁友芳潘忠友等進攻橋頭賊營  
大獲勝仗斃賊千餘立將賊營十餘座一律踏  
平方收隊暫息忽高寨股匪蜂擁來撲梁友芳  
等屢勝之餘勇氣百倍簾牌居前鎗礮刀矛並  
進鼓聲甫起一齊奮威衝殺賊皆不戰自潰官  
軍分隊窮追直抵高寨將所有賊營概行焚燬

仍跟追十餘里始收隊回營斃賊無數但見屍  
橫遍野而已逆賊四散勢已窮迫此楚軍越境  
進剿鎮遠思州兩府苗匪教匪迭獲大勝之實  
在情形也

臣

維貴州一省局勢鼎沸計失守已

久未經克復者都勻思南鎮遠三府丹江清江  
下江八寨古州台拱六廳麻哈黃平兩州施秉  
清平鎮遠安化四縣三腳州同凱里丙昧朗洞  
勝秉各縣丞分駐之所六凡二十一處其賊蹤  
狎至時須用兵者石阡遵義黎平銅仁思州五  
府郎岱松桃兩廳開州平越獨山廣順定番五

州天柱遵義桐梓仁懷荔波貴定龍泉印江龍  
里婺州餘慶甯安開泰永從青谿玉屏湄潭銀  
仁十八縣印水柳霽大塘羅斛黃平舊州各佐  
貳分防之所五凡三十五處據韓超稟報約計  
黔省苗匪教匪不下七八十萬其地方之糜爛  
大局之潰裂可知而與湖南辰沅永靖一道轄  
屬緊接者則銅仁思州鎮遠黎平四府松桃一  
廳也頻年塌厯國維賊入境則剿之賊出境則  
追之黔邊府廳縣有警則援之已失則復之客  
軍之餉固宜自謀黔軍之餉仍望協濟未復之

處固宜代籌已復之處仍難交卸而事機之難  
期順利固在意中現擬先將思州府鎮遠府教  
匪苗匪肅清卽進規鎮遠如援黎之軍速克古  
州則各軍亦可抽調以厚兵力惟有相機斟酌  
勉思補救而已此次楚軍於鎮遠失陷後越境  
力保思州青谿玉屏印水以寡勝眾轉危爲安  
實屬著有微勞合無仰懇

皇上天恩加以甄叙新授江西按察使升任辰沅永  
靖道程誥洞悉邊情才識出眾調度一切恰合  
機宜任事實心不分畛域可否請

旨交部從優議叙花翎補用參將田宗蕃老成諳練  
謀勇兼資人尤樸實可靠可否以副將留於湖  
南遇缺卽補并

賞加勇號升用都司熊興栢屢次以寡擊衆膽力均  
優可否以參將留於湖南遇缺卽補屯千總梁  
友芳貴州守備銜千總潘忠友膽氣甚壯遇事  
奮勉可否均以都司遇缺卽補員弁兵勇可否

准臣保

奏之處伏候

皇上聖鑒訓示施行謹

奏

咸豐八年十一月二十九日拜發奉

硃批另有旨欽此

援黔官軍加增長夫片

再湖南連年召募練勇或派防本境或調援鄰疆均係每勇百名外設正副百長各一名什長十名長夫四十名其百長口糧較之原定各勇口糧酌增一倍此歷年遵辦章程也前因貴州苗匪不靖湖南召派兵勇馳往援勦所有勇夫口糧仍係照章辦理惟黔中擾亂數年田疇多就荒蕪殘破之鄉食物極貴且有無從買糴者仍須赴楚採購層遞轉運始免乏食之虞黔地寸步皆山陸運需夫尤多各營原定長夫四十



名不敷挑運每遇移營進勦致費周章勢不能  
不於原定額數外酌加十名核計每勇百名連  
前共計長夫五十名以資挽運此外如楚軍援  
勦他省或防勦鄰匪地勢平衍均不得援照率  
議增加以示限制據軍需總局司道會詳前來  
臣覆核無異理合附片陳明伏乞

皇上聖鑒謹

奏

咸豐八年十一月二十九日拜發奉

硃批知道了欽此

接濟貴州韓道軍餉緣由片

再用軍之道選將爲難將得其人則一卒得一  
卒之用不但戰勝攻取克將搃伐之威亦且餉  
節兵精可免虛糜之費此籌兵籌餉所由必以  
籌將爲先務也人才難得自古已然此時而求  
韓白孫吳之才何可必得但使將領中有僕廉  
自矢知以

國事爲重者便須多方愛護加意保全重其權勢  
資以餉需俾得稍盡其長有所樹立庶幾一將  
出而部曲中樸勇之士俱進斯營伍貪懦之習

可除而草野忠義之風益奮將戡定之效有不  
期而自至者臣聞前貴州提督孝順剛烈忠奮  
乃以餉匱兵譁自戕前貴州按察使福連又以  
憂鬱致疾而殞竊爲時局惜之現在該省委辦  
下游軍務記名道韓超才識之優絀臣未深知  
然其廉樸耐苦能得民苗之心則早已有所聞  
矣近因軍餉積欠太久屢次稟懇接濟臣不忍  
拂其意每設法濟之惟思隔省官員不便時有  
陳乞遂與省局司道悉心商議於無可籌畫之  
中勉爲設措自本年十月起每月籌解餉銀四

千兩並所需軍火器械隨時發給俾得一心辦  
賊免虞掣肘或能會合楚軍克立微效亦未可  
知所有按月籌濟韓超軍餉原由謹附片陳明  
伏乞

皇上聖鑒訓示謹

奏

咸豐八年十一月二十九日拜發奉

硃批知道了欽此



保舉援軍克復江西撫建各城出力員弁摺

奏爲援江各軍先後克復撫州建昌兩府城崇仁  
樂安宜黃南豐四縣城所有出力員弁兵勇遵  
旨保奏仰懇

天恩獎敘以昭激勸事竊湖南官軍自克復江西臨  
江府城後臣以江西各股匪賊久踞撫建爲老  
巢賊黨分布撫建各屬城鄉市鎮蟻聚蜂屯不  
可勝數非乘軍威大振之時分路節節攻勦不  
足以申

天討而速戎機隨飭援軍統領按察使銜卽選道蕭

啓江道銜卽選知府劉坤一帶所部湘楚各勇  
由新淦進取崇仁以圖撫州按察使銜卽選道  
張運蘭卽選道王開化帶所部湘勇由吉安趨  
永豐進取樂安宜黃南豐以圖建昌皆先攻鄉  
鎮而後城池先取縣城而後府城期收廓清實  
效幸仗

皇上天威將士用命得以迅速蕝役經臣  
奏報欽奉

上諭由湖南派往出力之員弁勇丁仍著駱秉章查  
明保奏候朕施恩欽此臣比卽恭錄宣示各營將

士感荷

皇仁無不歡呼奮躍旋據各營呈賚勞績清冊前來  
臣逐一詳核恭繕清單敬呈

御覽統領按察使銜卽選道蕭啓江紀律嚴明好謀  
能斷道銜卽選知府劉坤一謀勇兼資機宜允  
協該兩員統師克復崇仁撫州戰功卓著前此  
奏報未及隨摺保獎蕭啓江應請

旨賞加布政使銜劉坤一應請

旨以道員歸部卽選以獎微勞其餘軍關各員弁勇  
丁伏懇



皇上天恩加以鼓勵庶兵氣愈揚而兵心愈奮矣所  
有陣亡之擬保把總軍功王嘉猷劉武襄藍翎  
把總蕭田得擬保千總軍功羅玉成擬保把總  
羅鳳山鍾錫純均請照把總例

賜卹外委甘昌發黃齊芳擬保外委軍功周維翰周  
榮魁郭禮純李昌文何錦添郭正山高春發郭  
繼周黃春詳均請照外委例

賜卹以作士氣而慰忠魂所有違

旨保奏原由謹開單陳

奏伏乞

皇上聖鑒訓示施行謹

奏

咸豐八年十一月二十九日拜發奉

硃批另有旨欽此

馬之相公遺集

戊午下

三

參劾永州樊鎮違例乘輿私役弁兵摺

奏爲武職大員違例乘坐肩輿私役弁兵謹據實  
奏參仰祈

聖鑒事竊湖南永州縣總兵樊燮於本年八月由永  
州北上

陛見風聞一路乘坐肩輿並有隨帶弁兵護送同行  
之事臣札飭署永州鎮標中營遊擊王寶將該  
總兵帶去弁兵銜名查明稟知茲據王寶十一  
月初七日稟稱該鎮共帶去兵丁二十八名又  
帶去左營千總朱定貴一員及目兵一名跟丁

三名另札稱係派赴河南地方購買白蠟棹造具花名清冊前來查冊載永州中營馬兵張剛艾得榮王廷貴周得玉羅朝安曾玉勝楊炳昆賀光貴呂鼎王羅天登張兆鵬周定元呂周得楊正得左營馬兵吳大發右營馬兵陳得勝王永發等十七名中營戰兵鄒正陞鄭得貴唐得陞湯成湘王興安何登魁右營戰兵鄒正得馬連陞中營守兵左得勝文光發左營守兵譚光明劉得貴周明亮周得發郭明經等十五名統共兵丁三十二名臣復查該總兵在任違例乘

坐肩輿楹目共覩其眷屬現寄寓長沙南門大街曾派外委李士珍藉請領米折爲名隨同進省照料家務嗣聞臣行查嚴緊該外委始於十一月初六日起程回營現有兵丁三名在省寓伺應其隨同護送至樊城各弁兵尙無歸伍之期此該總兵樊燮違例坐轎及私役弁兵之確鑿有據者也臣維永州一鎮控制兩廣交界地方最爲緊要額設弁兵雖二千餘員名而所轄三營汛地遼濶縱令兵數足額調派已屬不敷頻年防勦兩廣賊匪每次調派兵勇多至數千

萬人該鎮存標兵丁從未有以二百餘名應調者樊燮北上之時正廣東連州廣西賀縣賊勢猖獗之際該鎮所轄臨武宜章兩汛與連州緊連所轄江華永明兩汛與賀縣緊連經臣迭次調派兵勇馳往防勦該總兵豈得諉爲不知乃當轄境軍務緊要存城標兵不敷派撥之時猶敢擅役弁兵隨同出境似此玩視軍務希便私圖實爲軍務之蠹應請

旨將永州鎮總兵樊燮先行交部嚴加議處以昭定例而肅戎行且臣訪聞該鎮署內供差兵丁常

有數十名之多所有厨役裁縫雜色人等之員  
充額兵支食口糧者不一而足該總兵上年於  
署內蓋造房屋所有用費均從鎮標武職養廉  
內攤派署中家宴戲價賞耗亦均從該標辦公  
項下開銷當此時局艱難四郊多壘之秋總兵  
爲武職大員俸廉優厚不能爲

國宜勞稍圖尺寸之效且恣意科歛恬不知恥如  
此若各營相率效尤勢將靡所底止臣現委員  
赴永詳查一切俟得實據再行

奏參頃准督臣咨開業將該員



奏署湖南提督臣已據實函復矣該總兵劣蹟敗

露均在去任之後臣近在一省尙始知覺督臣

遠隔千數百里匆匆接晤自難遽悉底蘊陳

奏兩歧寔非別故理合一併聲明伏乞

皇上聖鑒訓示施行謹

奏

咸豐八年十一月二十九日拜發奉

硃批另有旨欽此

叅劾栗署鎮規避取巧片

再臣准督臣函咨永州鎮總兵員缺業經

奏委新授雲南臨元鎮總兵栗襄署理臣查栗襄

於咸豐二年隨前督臣程喬采來南臣卽見其

人嗣臣於咸豐三年在署湖北巡撫任內時栗

襄官撫標中軍參將臣曾飭其整頓營務栗襄

惟一味支飾毫無實際甚至各城門所派弁兵

經臣親往查驗並無一兵當經臣嚴加申飭維

時署督臣張亮基飭栗襄監造鳥鎗及抽提試

驗則內膛並未鑽過木壳外雖塗飾光彩料極

薄脆所有鐵箍均是濃墨畫成著手卽脫張亮  
基恨其作僞卽令其自行點放栗襄不敢點放  
自認賠造免究一時咸以爲笑臣比卸撫篆旋  
蒙

恩命署理湖南巡撫四年夏間前湖北撫臣青麐率

潰兵來南當臣接晤時青麐言栗襄巧佞欺侮

之狀談次猶有餘恨後仍隨赴荊州不知因何

保舉遂擢今職永州一鎮營務廢弛急須整頓

栗襄斷難期其勝任如果栗襄才有可用則湖

北軍務方殷雲南亦用兵省分該員旣不留鄂

又不赴滇其規避取巧亦可槩見近來營務之壞實由武職大員習氣太深驟難稽察之故臣既有所聞見自未敢依違緘默致重愆尤理合據實附陳伏乞

皇上聖鑒訓示謹

奏

咸豐八年十一月二十九日拜發奉

硃批另有旨欽此



駱文忠公奏議卷之十四目錄 湘中稿

己未上

江西大股賊匪竄擾南路籌辦情形摺

查明己革總兵劣蹟有據請提省究辦摺

賊撲永州祁陽官軍大捷籌辦情形摺

辰州木關移設常德裕課籌餉摺

請撥川陝江西三省協餉摺

賊勢趨重寶慶官軍剿辦情形摺

逆賊盡竄湖南無庸撥兵援粵片

請調李道總統寶慶諸軍片

通志卷之四十四

江西大股賊匪竄擾南路籌辦情形摺

奏爲江西南安大股賊匪傾巢突竄湖南南路處  
處緊急現在籌辦情形謹據實馳

奏仰祈

聖鑒事竊石逆達開一股由江西竄浙由浙竄閩由  
閩竄廣東邊界復回竄江西除新城安仁兩大  
捷外均未大幾懲創所有戰事均經各省馳報  
上年冬石逆大股由江西信豐竄陷南安府城  
時各路股匪陸續會集南安所屬崇義縣爲土  
匪攻陷臣接桂陽縣稟報正慮南安大股由崇



義竄楚卽札調記名總兵劉培元花翎參將彭定太花翎遊擊崔大光帶兵勇一千五百餘名馳赴該縣防堵省城距桂陽縣千里兵勇於本年正月初始陸續行抵桂陽縣臣飭南路各州縣一律重整團練以備不虞其時布政使銜補用道劉長佑因所部楚勇病亡過半軍士久役思歸請假回南臣慮南安大股竄楚密飭該員於回里時迅速將散遣未病各勇招集並另募新勇一面飛催花翎卽選道劉坤一將臣前飭選募新楚勇千名趕緊訓練於正月赴省以待

調遣嗣據劉培元彭定大稟稱桂陽之熱水集龍兩隘爲崇義來縣衝要已分營駐紮崔大光則防守東嶺臣復札飭郴紳曹榮快李雲峯募帶勁勇七百二十名並調駐防臨武順頭嶺之主簿魏喻義帶所部桂勇六百名移駐郴州與管帶郴勇州同陳善溶所部勇丁五百名勤加訓練以保郴州而壯桂陽聲援忽二月初三夜接劉培元彭定大飛稟正月二十四日江西崇義縣之文英營被南安賊攻破探卒瞭見花旗黃旗長亘數里似係大股當卽傳令謹備邊隘

二十六日辰刻賊衆大至旂幟隱現山嶺閒莫知其數劉培元彭定太各派隊分數路出卡迎剿弁勇均百戰之餘不以賊多爲意交鋒之始斬殺頗多忽出嶺閒處處賊旗遍布每官兵一枝賊則以數枝包之軍心遂亂彼此縱橫血戰數時之久賊愈集而勇愈單遂以不支劉培元彭定太突出重圍遙望本營已被賊踏毀歸路亦斷是夜由僻路馳回縣城則團局已散居民遷徙一空崔太光在東嶺聞警馳至已無及矣桂陽縣知縣董繼芳署桂陽營參將常明等當

官軍接仗時亦帶兵勇助戰被賊衝散二十八日賊大隊入縣城桂陽既陷賊分布城鄉搜殺焚擄郴屬俱爲震動署郴州知州胡鏞飭魏喻義防東江陳善溶防崙嶺楓樹坳曹榮快李雲峯防賊犯郴州宜章之路躬率團勇四千餘往來接應署宜章縣知縣吳清鶴署宜章營參將鍾萬升駐防宜章把總王福元等率兵勇防赤石司官渡等處興甯縣知縣彭嗣昌率團紳蔣書城防源口崔大光獨以所部三百餘人扼秀流河守之冀遏賊下竄興甯之路然皆勢力

微弱不足以當大股悍賊二月初六日賊分股至桂宜交界之文明司里田等處鍾萬升王福元合兵勇七百餘人紮赤石司初七日午刻賊以馬隊齊撲官營王福元等失利柳紳陳善溶率局勇二百由楓樹坳橫出截之稍有斬獲次日賊大至撲吳清鵠官渡營盤吳清鵠接仗失利折回縣城賊以馬隊乘之縣城遂失賊之竄撲興甯秀流河者初九日崔大光憑河轟擊斃賊數十賊從上下游鳧水而過兩路蹙之百長藍翎千總段萬彩藍翎外委劉信祥力戰陣亡

崔大光衝突而出退保江口賊由秀流徑撲縣城彭嗣昌在滁口回救不及縣城遂失此南安大股賊匪突竄湖南攻陷桂陽要隘後桂陽宜章興甯三縣失守之實在情形也現在南安大股賊匪絡繹竄楚人數之多號稱十數萬頃接援江布政使銜卽選道蕭啓江南安來稟稱二月初三日已收復南安城池逆賊大股復又竄楚其人數亦號稱二十萬是逆賊全數盡注湖南可知湖南南路桂陽州與粵東接境之連州陽山股匪甚多江華永明與粵西接境之賀縣

城爲賊踞皆係積年兇悍之徒兩粵所未能除者今大股旣陸續竄入其必互相勾結可知恐衡永郴桂一帶將無完土也湖南頻年內圍封守外援四鄰財力旣殫人才亦耗精兵良將援剿外省者率爲外省羈留勿遣一方人才物力與數省共之固早慮其不支矣茲大股逆賊乘虛竄突倘不能迅速剿除不但本省生靈遭其荼毒卽紳民之出境援剿者皆不免有內顧之憂而東南大局且將不可復問臣於接到各處警報之時卽晝夜籌畫調布政使銜補用道劉

長佑按察使銜卽選道趙煥聯卽選道劉坤一  
卽選知府江忠義王勛新授永州鎮總兵周寬  
世等各召集舊部共圖討賊其已成軍者四千  
九百餘名先後調赴安仁茶陵交界一帶取齊  
後進剿派劉長佑爲統領而以劉坤一江忠義  
佐之其劉長佑江忠義未到營之前劉坤一暫  
統一軍之事以一事權合王勛精選老勇二千  
名速赴衡州調都司謝泰平帶師船二十號駛  
往扼耒河口草市河口之要其餘札調各勇共  
一萬數千名須旬月後始可陸續齊集派撥

臣



以蕭啓江一軍四千餘人本是援江之軍所剿者卽此南安之賊今此賊已由江竄楚蕭啓江自應馳回剿辦請

勅下前兵部侍郎曾國藩及江西撫臣飭其由閒道

馳歸聽臣調遣援黔之師已由黎平克復古州

其戰績容臣續報總兵銜副將田興恕所部虎

威軍素稱勇敢田興恕漸可當一路之任臣已

飭其將軍務交道銜知府兆琛辦理兼程回湘

聽候調遣總兵銜金華協副將王明山已告假

回籍臣因水師須人統領飛咨提臣楊載福將

王明山所部戰船調回仍歸王明山統帶以資  
攻剿此股賊首聞係翼逆石達開其黨羽爲張  
遂謀賴裕興傅忠信諸逆皆從前漏網賊首石  
逆在南安時景德鎮賊首屬其由贛吉取道北  
竄與之合勢以竄皖鄂石逆覆稱須由南安竄  
湖南下趨鄂省以取上游之勢此書爲江西樂  
平紳團搜獲其蓄謀之狡毒如此仰仗

皇上洪福能竭力撲滅此股爲東南除一大患於軍  
務實有轉機臣斷不敢驅賊出境存以鄰爲壑  
之見惟當勉盡愚忱繳厲將士以期有補抑臣

竊有請者遊賊所最畏者官軍之水師馬隊也  
湖南水師尚易求精若馬隊則湖南各軍惟在  
鄂者尚習見之餘則莫睹其利而賊反得以此  
眩我故雖精銳兵勇亦每往往爲其所乘卽接  
獲勝仗又不能盡力窮追每致兇渠免脫應請  
旨勅下荊州將軍都與阿及湖北督臣撫臣速練馬  
隊二百派得力之員管帶赴湘助剿仍仰懇

天恩速調馬隊二百赴鄂以補其闕庶軍威可以速

振此次失守城池各文武容臣查明分別嚴參

陣亡弁勇容卽查明請

郵所有南安大股突竄湖南南路處處緊急現在籌畫情形謹據實馳

奏伏乞

皇上聖鑒訓示施行謹

奏

咸豐九年二月十八日拜發奉

硃批另有旨欽此

皇文御成書

日未上

十

查明已革總兵劣蹟有據請提省究辦摺

奏爲查明已革總兵各劣蹟均有實據並有侵虧營餉重情謹據實

奏參請

旨將該革鎮拿問提省究辦仰祈

聖鑒事竊照湖南永州鎮總兵樊燮前經臣訪聞該

總兵有違例乘坐肩輿並多役弁兵冒領兵糧及攤派養廉蓋造房屋家宴戲賞開銷公項各劣蹟當經繕摺

奏請將該總兵先行交部嚴議並聲明委員赴永

詳查俟查有實據再行參奏接准部咨欽奉

上諭湖南永州鎮總兵樊燮違例乘坐肩輿本年陛見私役弁兵至三十餘名之多護送同行其眷屬寄寓省城復派外委李士珍等藉差進省照料家務聞該撫嚴查始行回營永州鎮毘連兩廣現當賊氛未靖邊防緊急之時該總兵以專閫大員玩視軍務希便私圖實屬膽玩樊燮着交部嚴加議處卽行開缺其署內差役冒領兵糧攤派養廉蓋造房屋並演戲賞耗開銷公項各劣蹟仍著駱秉章查明參奏以肅官方等因欽此經部將該總兵

照遠

制律杖一百私罪革職例議以革職此外各劣蹟仍  
俟查明參奏到日再行核辦等因具

奏奉

旨依議欽此欽遵轉行查辦在案茲據委員候補道  
王葆生稟稱遵卽馳赴永州查得該革鎮樊燮  
在任出入均乘坐綠呢四轎訊據中營馬兵周  
得意供稱該兵同左營守兵周明亮管轎夫價  
均派中左右三營發給上年二月初一日樊燮  
行香因轎燈燃燭遲誤該兵當被棍責二十又



查得該革鎮在任兩年之久並未督率操兵只於初到任時赴城外大校廠考拔糧缺一次又查得該革鎮署內供差兵丁分爲上下兩班均派在城三營充當五日一輪合計材官伴當旗牌傳號管班及各項雜用實有一百六十名開具清摺內厨役裁縫剃頭茶水火夫並花兒匠泥水匠作各色人等均係冒充額兵支食糧餉厨役郭明經剃頭何登魁均已隨帶赴北傳到裁縫余青雲等茶夫柏玉升等水夫呂向陽火夫王升貴花兒匠楊廷魁等查訊屬實取具各

兵稟詞又查該革鎮六年八月到任後卽修理衙署內兩邊大花廳五欄用錢二百八十六千零七年五月內修造三堂七欄作爲上房額題九桂堂共用制錢六百九十四千零均派各營於公項下支發該革鎮札飭中營自該革鎮起至各將備止攤派廉俸歸款詢之現任將備除左右兩營將備照派外並未攤有實銀或將餘剩馬價或將公費暫行懸抵又查得該革鎮署內家宴彩觴戲價賞耗俱派用營中公項上年二月初六日在三堂演戲放賞時已三更千總

朱定貴把總李桂芳外委游騰蛟伺候誤班次  
日卽將該弁棍責旋經前署永州府知府黃文  
琛將戲班驅逐出城又查得該革鎮廚房係派  
外委陳朝觀羅有得管理五日一輪取具各弁  
等親供又查得該革鎮上年北行赴省共用大  
小船七隻所有船價槩運行李下河上岸腳錢  
共一百八十八千均派左營於公項下支發又  
查得該革鎮帶去護送兵丁實止張兆鵬羅天  
登周建元何登魁呂周得郭明經六名冒稱十  
八名每名由營支發盤川銀十八兩共銀三百

二十四兩除實用銀一百八兩外計虛支銀二百十六兩又帶去護送至長沙兵丁艾得榮等十三名每名由營發錢十五千共錢一百九十五千又帶去護送至樊城兵丁呂鼎玉等十三名並千總朱定貴跟丁李啓玉等三名二共十六名每名由營發錢十八千共錢二百八十八千均係在各兵糧餉內攤派馬兵陳得勝等三名由樊城爲該革鎮送信回省同在省寓當差之戰兵鄒正升等六名已據該革鎮家屬一併遣令回永均取具各兵稟詞現在尚有兵丁十

七名均未回營至帶去千總朱定貴一員由營  
提發盤費銀一百兩係在把總各弁俸廉內攤  
派該革鎮飭令中軍札委該弁赴河南採辦白  
蠟桿希圖掩飾此外又查得該革鎮交卸起程  
時本年春季兵餉尚未全數散放該革鎮卽預  
提春夏秋三季俸廉等項銀一千五百八兩零  
營中於奉撥兵餉項下提交現有該革鎮札文  
並營中賬簿可查該委員調齊三營賬簿逐一  
細核該革鎮在任除提廉俸外又於上年三月  
內飭請餉差弁李貴芳在省城動用秋季分米

折銀二百二十七兩零購買綢緞至今秋季米折尚未支放又借支中營銀二十二兩七錢零現據該營開具清摺並取具李貴芳切實親供又該革鎮署中一切零星使用無一不取之營中除動用米折銀外查該三營賬摺尚提用銀九百六十二兩公項錢三千三百六十千零因該鎮交卸後卽將俸廉全行提去以致懸款未歸以上各款該委員明查暗訪均得確據將查實緣由並調取三營賬簿及取具弁兵供稟呈實核辦等情稟覆前來臣接閱之下不勝駭異

查該革鎮劣蹟種種不但臣前參違例乘輜私役弁兵及攤派養廉蓋造房屋家宴戲賞開銷公項等款均屬確鑿有據且有臣原參所未及者如兵餉米折皆屬營中正款錢糧該革鎮以專閫大員輒稱預提廉俸並購買綢緞擅行動用數至盈千懸項無著其署中一切使用復提用營中銀至數千之多實屬恣意侵虧大干功令且恐此外尚有別項劣蹟卽提用之款亦恐不止此數亟宜徹底研究按例懲辦以警官邪查該革鎮

陛見回楚此時早已抵湖北境內除咨移督臣官文  
暨署湖北撫臣胡林翼飭查該革鎮現在行抵  
何處卽著委員押解回南聽候查辦外相應據  
實

奏參請

旨將已革永州鎮總兵樊燮拿問以便提同人証嚴  
審究辦所有遵

旨查明各款均有確據緣由理合恭摺具  
奏伏乞

皇上聖鑒訓示施行謹



奏

咸豐九年二月二十八日拜發奉

硃批另有旨欽此

賊撲永州祁陽官軍大捷籌辦情形摺

奏爲逆賊由郴桂繞竄永州府屬突攻永州府城  
官軍迎頭痛剿大獲勝仗蕩平賊壘立解城圍  
賊復竄撲祁陽將結筏渡湘復經官軍痛剿大  
獲勝仗現在籌辦情形恭摺馳

奏仰祈

聖鑒事竊逆首石達開大股自江西南安府竄陷桂

陽縣後興甯宜章相繼失守經

臣

奏報在案時署郴州胡鏞派練勇團勇防東江以  
防興甯之賊守楓樹坳及外嶺摺嶺良田等處

以防宜章之賊三月十一日宜章賊分由開道  
攻撲外嶺良田巡檢盧銓力戰陣亡胡鏞正催  
調團勇齊集摺嶺抵禦忽報外嶺已失則賊已  
出其後急率勇折回則外嶺之賊已先入州城  
郴州失守賊入郴城後分路由永興襲攻桂陽  
州署桂陽州知州張濟遠倉卒募勇守城十三  
日賊分股先至前隊賊不過數百張濟遠卽帶  
勇出剿忽大股賊數路突至新勇駭奔賊衆蜂  
擁而入張濟遠僅以身免桂陽州城亦遂失守  
賊旣陷桂陽州城銳意攻常甯耒陽以窺衡州

管帶桂陽勇主簿魏喻義偵賊急竄桂陽州卽  
日自郴州東江帶所部勇丁千名馳至陽武坪  
適聞州城已於是日失守遂與在籍管帶桂勇  
之花翎戶部員外郎陳士杰謀扼桂陽州小河  
遏賊竄常甯之路以衛衡州總計自二月十七  
日起三月初八日止賊由桂陽興甯宜章郴州  
陸續由桂陽州經過者先後二十餘起每起少  
者數千多者數萬而皆注意偷渡以竄常甯魏  
喻義陳士杰以所部勇丁二千與其鄉團扼河  
而守彼此互爲聲援大小十數戰無戰不捷奪

賊船筏數十礮械數百擒斬長髮悍賊千名解  
散脅從無數賊之不能犯常甯以窺衡州者魏  
喻義陳士杰之力也賊度常甯終不可犯遂迂  
道陷嘉禾分股犯新田署新田縣知縣袁榮渭  
與在籍紳士廣西候補知府張榮組教諭彭行  
恭訓導劉端凝等籌商城守事宜二月二十日  
卯刻賊分股攻城袁榮渭及官紳等登陴固守  
轟斃執旗賊目數名餘匪一百餘名自卯至申  
賊始卻退兵勇乘其疲乏開城出擊斃賊數百  
名生擒賊目胡英國周才茂陳正起房四斗等

七名二十一二十二等日賊頻來撲城城上肅  
靜無譁賊自卻退至夜紛紛逃竄城中兵勇合  
鄉團躡蹤追剿斃賊數百各鄉團亦均有擒斬  
賊分股至臨武署臨武縣知縣王承順署臨武  
營參將李輔朝督兵勇紳民固守城池分遣練  
勇會同團紳伏城背嶺三山及沿河一帶三次  
守城殺賊共斃賊二十餘賊由土江墟遁回嘉  
禾其大股竄入甯遠者署甯遠縣知縣雷壽南  
固守城池賊亦不敢近蓋此賊固深知攻城之  
難而其由江西傾巢竄楚甫及一月所行程途

幾及于里志在虜忽乘虛亦不肯久頓堅城之下也臣於此賊竄入湖南之時以賊在榔桂則

茶陵安仁之龍海塘江口洲爲衡湘總要隘日

當飭花翎卽選道劉坤一暫統兵勇前往駐紮

相機進剿而以師船嚴扼湘江備賊偷渡以窺

衡州及大股均竄桂陽州嘉禾知其必將繞竄

永州祁陽以取上游之勢時布政使銜江西記

名道劉長佑花翎知府江忠義方在新甯本籍

選募楚勇臣密飭其成軍後卽由新甯取道東

安祁陽赴衡並密調駐防江華之副將余星元

參將楊恒升等兩營由江華取道永郡赴衡皆  
論以中途出賊不意遇賊卽剿一面飭護永州  
鎮補用參將侯光裕署祁陽縣知縣劉達善募  
勇嚴守城垣二月二十七日劉長佑前隊花翎  
副將李明惠及擬保遊擊江忠朝等帶所部楚  
勇二千過祁陽時賊已由甯遠白水嶺竄出守  
隘之勇已敗潰矣祁陽人心惶駭殊甚忽覩楚  
勇至祁訝以爲從天而下三月初二日劉長佑  
所部亦至賊謂祁陽有備則疾趨永州劉長佑  
甫到祁陽卽飭江忠義李明惠江忠朝等率楚



勇二千由祁馳赴永州劉長佑亦帶所部楚勇一千五百繼進三月初四日楚勇前隊抵永則賊已先到數時環布城外悉力轟攻矣江忠義購人入城告以援師速到城內人心益定護永州鎮總兵侯光裕久經戰陣素得兵心與知府楊翰零陵縣知縣施濟等悉力固守城上鎗礮轟斃悍賊多名是日劉長佑至軍周視戰地見城外東南北三面民房已爲賊踞並築牆卡隔斷內外其濱湘江之西門一帶尙可出入而上游南門渡下游白蘋洲均有賊瞭守其東北一

帶二十餘里村莊皆爲賊踞初六日辰刻劉長佑率親兵及江忠義同知銜知縣席寶田列隊烟竹舖青山扼正北一路百長王順慶劉光文率勇丁列隊看山嶺扼其右李明惠由鳳皇嶺直搗干子地一帶賊巢遊擊江忠朝徐良煥等張左右翼護之李明惠率勇衝入賊衆十餘起零星搗戰而林木間旂幟時隱時現忽張兩翼突出李明惠躍馬衝陣營總李榮忠百長劉通周分左右迎擊殪其先鋒悍賊數名賊稍卻江忠朝徐良煥等左右翼抄擊劉長佑江忠義見

官軍合戰甚急乃麾營總陳希祥等由中路衝出李明惠追賊至干子地賊陣愈厚有黃衣數賊目督戰甚力數數回旂拒敵官軍李明惠李榮忠於馬上發鎗殪之賊陣始動追至樑木橋則江忠朝已督隊由街右追入賊已出巢鼠竄是役斃賊不過數百而賊之悍者多死割獲首級二百七十八具奪獲抬鎗二十六桿鳥鎗五十餘桿旂幟一百一十二面賊馬十五匹黃馬褂六件連踏賊巢五處而後府城與援軍聲息始通是夜劉長佑江忠義選勁卒二百交都司

王順慶守備鄧芝林入城助守初七日劉長佐  
江忠義李明惠揚隊城外十里地方相度營壘  
初八日進紮烟竹鋪賊皆伏匿不動意待賊援  
麇至圍攻北路官營也是日臣前札調駐防江  
華之副將佗星元參將楊恒升馳至駐營柳子  
廟初九日卯刻劉長佑率江忠義李明惠席寶  
田藍翎知縣唐顯烈及各營總百長等出八成  
隊分五路進剿佗星元楊恒升率所部渡湘亦  
分三路由西而北賊不意官軍猝至駭懼不知  
所措官軍兩路奮威衝殺城中亦派隊助剿擬

保花翎都司李金賜適自甯遠回援四面夾擊連焚賊營九大座賊巢十餘處重圍立解城中歡聲雷動計是役統計各營共斃賊六七千尸橫遍野其焚斃溺斃者無算生擒賊五百餘名奪獲抬鳥鎗三百六十桿子藥數萬斤旗幟刀矛箠牌雜械千餘件騾馬一百七十八匹僞印四十餘顆黃馬褂七件據生擒賊供石逆二旂僞大軍略蕭華卽蕭發勝蕭高卽蕭高麟均於竄過浮橋時經官軍截擊逼溺而斃其印照轡重眷口騾馬爲官軍所獲劉長佑訊驗均符此

賊卽首先竄撲桂陽界隘逆目與僞內五旗宰制陳亨容倡議竄擾湖南以趨鄂蜀者也旣已就殲差快人意餘賊散竄至距城三十里外之菱角塘千子地及金灘各處十二日劉長佑督同佘星元楊恒升李金暘分途進剿侯光裕楊翰亦派隊出城助之賊敗後怯甚官軍奮威衝殺連踏賊營十餘座陣斬僞大軍畧王姓斃賊數千溺斃無算生擒五百餘察其髮淺者釋之奪獲旂幟鎗礮雜械二千餘件僞印三十餘顆賊馬五十餘匹餘賊四竄不復能軍矣此賊突

竄永州官軍出其不意三次大獲全勝立解重圍之實在情形也賊攻永被創其另股賊以官軍悉集永州意祁陽之備必虛將由祁陽以竄衡州寶慶兩郡臣前飭祁陽紳士花翎同知段瑩器募勇七百餘在縣城訓練飭湖北撤遣同籍之副將何紹彩速集舊部千名赴祁聽調嗣劉長佑率所部赴永剿賊臣以祁陽介衡永之中西北界接寶慶正居中用奇之地又爲大軍後路飭花翎知府王勛率湘勇二千由衡州移駐之又調劉坤一帶所部新楚勇一千二百義

勇新安勇八百花翎遊擊黃三清所部祁勇六百由安仁龍海塘防所取道衡州赴祁陽與永州大軍會師討賊而調按察使銜卽選道趙煥聯帶所部馳赴龍海塘並統領各營以一事權飭記名總兵浙江金華協副將王明山統師船由衡州駛赴祁陽截賊偷渡湘江之路時委辦道州團防事宜岳州府知府馮崑方行抵祁陽臣卽飭其督同署祁陽縣知縣劉達善籌辦防剿事宜十三日賊悉眾至縣城下游十餘里觀音灘地方馮崑劉達善飭段瑩器何紹彩所部



各勇馳赴觀音灘對岸扼之賊旋卻退各營卽  
紮對岸是日余星元楊恒升及花翎遊擊余斌  
元自永州拔營赴祁十四日何紹彩段瑩器部  
勇渡湘進剿見賊數百正編筏偷渡急起擊之  
殺賊數十忽東南樹木中賊旂四出將包抄官  
軍勢正不支余星元楊恒升余斌元三營自賊  
後馳至賊衆大駭余星元等分三路縱擊鎗轟  
矛刺斃賊數百賊大奔敗官軍遂收隊渡湘入  
城王勛隨帶所部從衡州馳至王明山率所部  
師船因上游灘涸水淺不能速駛尙未抵縣是

夜賊數千從觀音灘下掠船架筏竟偷過對岸  
王勛會以奈星元等於十五日出隊迎擊自卯  
至未共約斃賊千餘名奪獲騾馬近四百匹陣  
斬賊目僞將軍汪同喜等多名生擒二百餘兇  
鋒大挫此速剿邠陽之賊接獲勝仗之實在情  
形也臣維此賊自竄入楚境旬月之間迭陷各  
州縣城池慄悍捷速勢極狡猾臣於二月初三  
夜接桂陽縣警報卽於旬日內催調各起勇丁  
四萬有餘遠者距省數百里近者亦二百里苦  
於一時不能齊集卽軍裝鎗礮倉卒增添數萬

人之需亦殊非易事目睹逆燄披猖刻深焦灼而逆賊號稱數十萬驟馬亦不下數千所過之處專取偏僻小路夜間列炬疾行驟如風雨自桂陽興甯宜章桂陽嘉禾新田臨武藍山甯遠以抵永祁湖南南境賊蹤殆遍賊行如蠅如蟻前隊至永州後隊猶未出桂陽州境其多亦可想見斯時縱有現兵數萬分途馳剿衆寡之勢懸殊斷難決勝一或偶挫則賊勢益張軍心愈怯大局必不可爲不得已以全力專注永州迎頭截剿冀得稍遏兇鋒幸賴

皇上天威將士用命連獲大捷人心稍安督臣所派  
援湘水師道銜知府蕭翰慶一營福建提臣楊  
載福所派記名總兵王明山一營記名總兵陳  
金鰲一營均隨到隨派赴衡州以重上游之勢  
馬隊一百九十四匹迭經督臣札催起程約本  
月杪可到臣亦派弁迎護矣惟臣前奏調援江  
之布政使銜卽選道蕭啓江一軍奉札後將近  
一月尚未接據入楚稟報援黔之總兵銜副將  
田興恕一軍計期當已行抵楚界臣已飭其由  
武岡赴寶慶聽候調遣又均飛札催之俟此兩

軍到後衡州寶慶兵力始敷派撥臣維有悉心

籌畫以期迅速臣前

奏廣西賀城之賊廣東連州之賊必將勾結犯楚

現據劉長佑稟報賀縣之賊已由江華至道州

之東湘橋連州之賊據署臨武參將李輔朝稟

報亦已蠕蠕欲動是皆意中必有之事而石逆

大股內聞亦有分竄廣東廣西者賊蹤靡定又

如此前准廣東撫臣咨仁化縣盤獲老賊供稱

石逆決意由湘竄鄂赴皖與陳玉成李昭壽合

股及各營獲賊訊供均言賊圖由湖南分犯鄂

蜀臣已飛咨湖北督臣撫臣四川督臣預爲戒

備臣一面竭力籌辦務遏賊衝斷不敢漠視大

局所有此次最爲出力之將領及帶勇紳士仰

懇

皇上天恩量加鼓勵以昭激勸布政使銜江西記名

道劉長佑存心醇篤洞曉機宜聞警馳援收功

敏速該員自五年以道員援江屢獲大捷兩克

堅城臣兩次

奏保虛銜上年新城大捷斃賊實二萬有餘之多

保全江西地方者不少江西撫臣保以道員記

名請

旨簡放此次勞績卓著應如何

加恩之處伏候

聖裁花翎知府江忠義英敏奮發治軍能整新城案  
內擬保道銜此次請以道員歸部卽選湖南補  
用副將余星元參將楊恒升馳援永州奮勇出  
力接剿祁陽賊匪能識機宜殺賊甚多余星元  
可否

賞加總兵銜楊恒升可否以副將升用先換頂戴選  
用主簿魏喻義花翎戶部員外郎陳士杰憑河

設守力遏賊蹤斃賊甚多魏喻義請以知縣歸部選用並

賞加同知銜陳士杰請以知府歸部不論雙單月遇缺儘先卽選花翎副將銜參將署臨武營參將李輔朝倉卒募勇守城屢次截殺大股賊匪實屬出力請以副將留於湖南遇缺卽補吉安案內擬保都司李金賜打仗奮勇初九十二兩仗斃賊甚多請

賞如遊擊銜並

賞換花翎其餘各營出力文武員弁及守城殺賊官



皇清高宗純皇帝 已未上

紳可否由 臣 核明彙案保

奏出自

天恩此次失事文武容卽核明參

奏以昭儆戒是否有當伏乞

皇上訓示施行謹

奏

咸豐九年三月二十三日拜發奉

硃批另有旨欽此

辰州木關移設常德裕課籌餉摺

奏爲請將辰州木關移設常德河祇德山地方裕課籌餉以杜透漏恭摺具

奏仰祈

聖鑒事竊查辰州府例征關稅向於南北城外分設木關按照稅則征收凡貴州及本省沅州永順一帶販運木植出江皆經由此地故原設木關統以辰州爲筧鍵歷來木商唯徵客貲本豐厚江西次之本省又次之而木簾則以杉木爲大宗其餘杉枋杉板及雜木稅亦甚微至於販運

來源以沅水上游爲最旺向於交界之蛇日屯  
集紫成木解經長州南關納稅永順一帶多產  
雜木經辰州北關納稅定例每年額征木稅正  
額銀九千二百四十五兩額定盈餘銀三千八  
百兩額外盈餘銀一萬一千四百一十一兩七  
錢三分七釐又另立鹽關每年額征正稅銀三  
千二百五十五兩共應征銀二萬七千七百一  
十一兩七錢三分七釐又兩項應隨征耗羨銀  
二千七百七十一兩一錢七分三釐七毫此辰  
關向來辦理情形也道光年間因木植難於轉

運關稅漸減迨咸豐二年逆氛竄擾武漢旋踞江南東道不通徽商裹足江西遭賊蹂躪商販亦稀二三四五等年稅務短絀尤甚自六年以來武漢九江先後克復江路漸次肅清辰州木稅漸有起色節經臣督同藩司嚴飭辰州府認真征收以杜侵漁該關之稅較前雖有增加仍難足額臣查辰郡居楚西上游幅員遼闊所屬山谷幽深產饒竹木設關辰州祇能收沅水上游一帶木植之稅而辰關下游一帶所產木植遺漏既多且上游木植多於春漲時暨由山谿

零星浮送出山至下游水寬溜緩之處編紮木  
簰亦非辰關稽察巡攔所能遍及透漏既甚課  
稅漸虧舊額難以征收則舊章須求通變當此  
軍需浩繁待餉孔亟之時凡可稍益軍儲自應  
廣爲籌議臣與藩司再四商酌思求整頓之方  
莫如擇地移關較爲周妥查常德西南踞城四  
十里河祇及德山一帶地方實辰常各屬下游  
總匯之區木簰均於此停泊若將辰州木關改  
移此地徵收木稅足杜繞越之弊唯辰關木稅  
向歸辰州府征收木關既移設下游在常德地

界既非辰州府所能兼顧亦非常德府所能監收現擬一面

奏請一面遴委道府大員親赴常德河祇德山一帶地方移設木關監收仿照湖北新關章程儘收儘解先行試辦二三年俟征有成數再定額征之數其征收科則仍照辰關向辦章程關書巡攔仍用辰關人役以資熟手至書巡工食向在耗羨項下支銷卽大小委員薪水亦可在耗羨內動支如此酌予變更或可稍資裨益現擬移設木關只因圖扼總匯地方以免偷漏並非

添卡重徵與湖井新關木稅來路毫無窒礙惟  
辰州木關向不兼收竹箨稅課湖南西路上游  
一帶產竹尚多今木關既移設下游自應併將  
竹箨彙入木稅項下一律抽收毋庸另定稅額  
至辰州鹽關無須移改地方應仍由該府照舊  
征收伏候

聖明酌奪訓示施行臣為裕課籌餉起見是否有當  
理合恭摺具

奏伏乞

皇上聖鑒訓示謹

奏

咸豐九年三月二十三日拜發奉

硃批戶部速議具奏移關就稅并加征竹籐原爲裕  
課起見豈有置向章於不問儘收儘解之理况籠  
統抽收並未分晰殊屬含混欽此





請撥川陝江西三省協餉摺

奏爲軍餉缺乏請

旨勅撥四川陝西江西三省餉銀以資接濟恭摺

奏祈

聖鑒事竊江西南安大股賊匪突竄楚疆旬日之間

疊陷州縣已經臣調集各路水陸各營分途馳

往援剿唯師行糧隨餉需最關緊要若不早爲

籌備飢潰堪虞湖南頻年援鄂援粵援黔援江

派出兵勇數萬一切糧餉軍火等項均由本省

竭蹶供支且時需協濟各省軍餉凡本省所屬

之地丁漕折捐輸釐金鹽茶餉稅無不搜括靡遺上年冬閒援江將次竣事正在籌畫清理積欠口糧並籌援剿黔省黎平鎮遠兩路兵勇餉項尚恐設措維艱茲大股逆賊絡繹竄楚人數之多號稱數十萬且粵東之連州陽山積匪未除粵西之賀縣城垣久爲賊踞其勾結竄楚早在意中賊勢旣日有增加兵力自不宜單薄經臣前後調募水陸及現在援黔兵勇業已五萬有奇月需餉銀將近三十萬兩之多倉卒之間驟添此項巨款計日授食籌畫萬難且南路地

方既遭蹂躪上仁地丁斷難催納兼之警報頻  
聞商賈裹足郴宜臨武卡局釐稅早歇衡州湘  
潭各卡局釐稅頓減漕項更須秋後方能有收  
各兵勇奉派剿賊萬難枵腹從事臣與總局司  
道等再四籌商委屬無從設措若非鄰省協濟  
必致停兵待餉貽誤事機除軍務省分難以籌  
撥外查四川陝西兩省向係完善之區兩省督  
臣撫臣又公忠體

國素無畛域之見現在四川督臣辦理湖廣商民  
捐輸銀兩昨已委員解到銀三萬兩伏懇

皇上天恩敕下四川督臣迅將此項商民捐輸銀兩

全數催提委解湖南並懇

敕下四川督臣籌撥銀十萬兩陝西撫臣籌撥銀十

萬兩迅速委解來南以濟燃眉之急江西連年

剿匪多藉楚師裹糧隨征時逾三載餉需費至

三百餘萬兩之多此時南安之賊既傾巢竄楚

祇景德鎮一處尚未攻克大局漸完該省漕米

改折一項四倍湖南現係停運之年與江浙迥

異伏懇

皇上天恩敕下江西撫臣迅將該省漕折一項借撥

二十萬兩委解湖南暫濟急需除分咨各該督撫臣趕緊籌撥外理合恭摺具

奏伏乞

皇上聖鑒訓示施行謹

奏

咸豐九年三月二十三日拜發奉

硃批另有旨欽此

四  
馬  
入  
通  
之  
多  
言

已  
未  
上

三

賊勢趨重寶慶官軍剿辦情形摺

奏爲石逆分股繞由粵西邊界竄陷永州府屬東安縣城連撲寶慶府屬新甯縣武岡州兩城均經官軍擊退解圍援寶之軍一敗五勝石逆由祁陽敗竄寶慶南路會合各股逆賊官軍追剿獲勝現在籌辦情形恭摺由驛馳

奏仰祈

聖鑒事竊逆首石達開分股突攻永州竄迫祁陽官軍迎頭痛剿大勝情形業經馳報維時永州城圍已解後起各股逆賊不敢近逼永城均出沒



於永屬之寧遠道州一帶鄉村散竄江華永明及廣西灌陽全州邊界以冀牽制官軍而其注意則在永州府屬之祁陽東安兩縣布政使銜按察使劉長佑卽選道江忠義等於三月十二日在永州續獲大捷後正搜剿餘匪忽接東安縣十五日稟報另股賊撲縣城甚急劉長佑江忠義留楚勇前營守永城親率全軍赴援東安緣永州剿賊喫緊各處民船避匿覓船維艱十九日始抵白牙市距東安城尚二十里甫到賊卽悉銳來犯官軍擊敗之二十日劉長佑等督

隊急撲賊巢賊伏匿不出比官軍近薄賊壘忽  
樹林內伏賊齊出鎗礮如雨藍翎軍功李回光  
中礮陣亡勇丁死者七十餘受傷者七十餘花  
翎游擊江忠朝左臂爲礮子所穿猶揮刃督衆  
繼進斬悍賊數十收隊而還東安城小賊已四  
面合圍署東安縣知縣李右文督同城文武官  
紳悉力固守劉長佑師進草鞋街適遇大雨不  
能卽進二十二日未刻東門外地雷轟發城圯  
數丈李右文與把總馬廷榮訓導吳肇封典史  
蔣慶保紳士候選縣丞唐麟急督勇丁堵賊賊

已蜂擁而入城遂陷李右文馬廷榮吳肇封蔣慶保唐麟均力戰遇害李右文之子及其妾媳罵賊不屈以殉東安一縣西南與廣西全州東北與寶慶府屬之新甯壤地相接新甯自江忠源帶勇殺賊以來所部楚勇多其邑人賊仇之甚劉長佑知賊陷東安後必竄新甯遣江忠義率所部弁勇星夜馳赴縣城助守二十六日僞宰制喻子和率賊萬餘竄撲新甯營房嶺圍練營盤守備黃仁合等敗退維時臣前委辦理新甯圍練之臬司銜卽選道江忠濬帶所部楚勇

駐碓窾沖回軍馳援已落賊後幸江忠義兼程  
急進先賊數時到縣急令所部都司徐良塽權  
光燦守備陳大運等分駐城北之摩訶嶺及東  
嶺親率楚勇入城會同署新甯縣知縣徐白燿  
新平營守備方鈺勝在籍紳士卽選知州江忠  
淑悉力固守盡焚城外民房以防地道二十八  
日賊撲摩訶嶺徐良塽權光燦等嚴陣以待江  
忠義督勇丁自城中出夾擊之兩次斃悍賊百  
餘賊卽卻退散踞城外二十里村莊並掘毀江  
忠源父墓是夜江忠義江忠淑等懸重賞購死

士携火器號鼓潛赴村後山嶺縱火因而乘之  
賊驚覺呼譟自相戕殺天明賊由烟村三渡村  
竄遁江忠義等躡蹤追之斃賊七八百墜巖落  
澗死者無數拔出被擄難民四百餘新甯城圍  
頓解三十日夜僞宰制賴裕新由東安棄城走  
故竄全州意給追軍赴全將由昇鄉萬鄉閒道  
竄新甯也劉長佑追數十里獲賊謀悉其謀乃  
改道折回東安擬察賊蹤所向截之忽新甯探  
報喻逆等率賊衆由新甯烟村三渡村出洋田  
另股僞宰制傅忠信由東安閒道趨新甯之藍

廟勢將撲寶慶武岡劉長佑率卽選道劉坤一等急起追之四月初三日行抵藍廟傅逆不意官軍猝至縱火焚街而走副將李明惠率眾截住街口衝賊爲兩段街內之賊從街左右奪路紛竄營總鄭金華乘勢蹙之河邊其下竄一枝經營總陳本熾等追及官軍合勢衝殺立斃悍賊數百一賊躍馬突圍而走中矛墜馬羣賊擁之而逃其馬爲楚勇所奪據生賊供墜馬者卽傅忠信也是役生擒僞將軍僞地道總制及僞官十七名軍前正法奪獲鎗礮器械無算敗賊

復邀洋田股匪會撲官營初五日戰於木山賊  
三萬餘三面逼攻營壘山谷皆滿劉長佑以八  
成隊出擊自辰至申鏖戰數時賊眾死傷相繼  
猶更番迭進不休劉長佑令留營各勇均出隊  
衝殺賊卽乘虛撲營長夫力不能支各奪路逃  
走營壘盡失劉長佑遂由北沙退回新甯輜重  
軍裝盡失唯鎗礮刀矛損失者少勇夫陣亡者  
亦僅百餘名蓋營勇均出隊接仗爲賊所乘與  
營盤之被攻陷者不同也賊旣敗劉長佑之軍  
知南路無軍追剿遂併力以窺寶郡初八初九

等日前隊已擾及郡城南七十里之黃塘時臣  
前飭調回援黔總兵銜副將田興恕路過寶慶  
時卽留寶慶聽調已先旬日到矣因奉札增募  
勇丁一千八百名正在郡城整理而臣前調赴  
寶郡之花翎五品銜卽選教授鄒漢章帶所部  
師船二十號寶勇五百名花翎遊擊劉吉三帶  
激勇五百名亦早抵郡城初十日田興恕師進  
九鞏橋十一日賊六七千撲七架坡團勇營盤  
田興恕率所部及劉吉三之激勇由木堦舖進  
賊見官軍大至驚怖殊甚田興恕令花翎遊擊



田興奇沈宏富劉義方各率所部縱擊斃賊數百賊翻山逃竄追至白羊鋪始收隊而還十四日賊傾巢忽至約三萬餘布陣周十餘里勢甚兇悍田興恕令各營率六成隊分三路截之七架坡以二成隊預伏坡後伺之前隊鏖戰三時進退七次賊眾死亡雖多陣勢猶整乃漸爲收陣之狀誘之賊相逼而至甫抵坡後伏兵突起田興恕親率所練馬隊衝入賊陣連發十餘矢大旂賊應弦而倒各營繼進頃刻尸橫遍野田興恕手刃數賊左腿亦受矛傷猶裹創力戰營

官擬保游擊花翎守備劉開鴻戰於右路殺賊最多身受二十餘傷墜馬陣亡各營追殺二十餘里始收隊而還是戰斃賊一千五百餘名生擒十一名奪獲賊馬二十餘匹大小鎗一百二十餘桿旗幟二百餘面是夜探敗賊猶屯白羊舖距官營僅二十餘里田興恕傳令挑勇士八百潛往襲之賊衆勞乏酣臥未起忽聞號鼓齊鳴鎗礮震天舖屋均已著火叫號奔竄自相踐藉及焚死者不知其數天明田興恕仍整隊回營自是賊屯黃塘塘田寺一帶不敢出竄矣是

時僞宰制賴裕新自全州引廣西各處逆賊數萬竄近新甯劉長佑以所部敗後僅止旬日宜暫留本境禦賊又慮賊由新甯良山竄武岡州先令江忠義帶所部赴武岡守之武岡故明藩封城周九里城外舖屋鱗次不下數千家地與辰沅靖一帶接壤距新甯僅九十里爲湖南西南路要區江忠義於十三日率所部勇丁一千五百馳抵州城十八日賴逆果率賊黨萬餘由良山突至時州城外對河房屋未及焚拆賊卽踞之穴墻壁爲礮眼向城轟擊西門旣紮賊壘

東門復搭浮橋四面圍攻不遺餘力江忠義會同署武岡州知州汪敷灝署武岡營游擊方開榜等晝夜固守斃賊多名二十一日逆賊猛撲西北各門江忠義方開榜督各兵勇擊退均有擒斬奪木梯二百餘架江忠義飭弁勇附城紮營與城內互相犄角賊不敢迫是夜及二十二夜賊攻益急江忠義均隨機應之其兇悍之賊因仰攻受戮者甚夥二十三日劉長佑派游擊翟國彥率勁勇赴援江忠義飭所部出隊迎護賊卽率眾來撲官軍排開鎗礮斃賊數十城內

外兵勇鎗礮齊集賊遂驚潰自相踐踏及湯斃者甚多賊知城守嚴密城根多是天生石腳其南面濱臨資水不能偷掘地道城外又附築堅壘難以攻陷遂由東南竄遁城圍立解當賴傳喻諸逆繞由江華道州境竄攻東安之時僞宰制陳亨容方竄攻道州僞大軍略蕭壽瓚後至尚在甯遠亦迫撲縣城意在分永州援軍之勢俾賴傳諸逆得速由東安新甯乘虛以圖寶慶維時臣以賊意方注寶郡則祁陽東安爲必經之途密飭各路專注祁東恐兵分見單或爲賊

所乘也一面飭各州縣固守城池以重根本陳  
逆攻道州城經道州知州王必迪率同城文武  
及花翎都司周岐山何紹坤等擊退蕭逆攻甯  
遠亦經署甯遠縣知縣雷壽南署守備賀炳翊  
率紳民兵勇擊退陳逆蕭逆遂解圍繞竄全州  
界以入新寧二十日劉長祐江忠濬劉坤一督  
所部勇丁擊之良山副將李明惠營總鄭金華  
戴盛寬百長陳飛熊廖逢聖姚世文等率銳卒  
陷陣所向披靡殺賊五六百生擒五十名奪獲  
大小旂幟三百面大銅礮一尊九節礮二尊拍

鎗二十七桿小桿四十五桿籐牌九面騾馬十五匹僞官憑三十紙內僞大經略蕭壽瑛一紙僞印十七顆內僞中軍宰制印一顆二十一日探報賊之另股又至大飄坪劉長佑令劉坤一等出羅基塘李明惠鄭金華卽選同知席寶田等出狗蕙壩截之賊自大飄坪至東門頭列長蛇陣橫亘十餘里劉坤一潛令弁勇斷寺山橋遏賊去路與游擊王一枝整隊徐進適李明惠鄭金華席寶田率勇從嶺馳下賊相顧駭愕劉坤一王一枝麾軍七道併進賊陣大亂官軍蹙

之轟斃斫斃溺斃之賊無算是戰斃賊一千四  
五百名割首級七百六十具生擒一百九十五  
名奪獲抬鎗二十五桿小鎗七十八桿籐牌十  
九面騾馬二十一匹大小旂幟四百七十面僞  
印二十三顆僞官憑十九紙二十四日探報賊  
又一股將出大飄坪江忠濬劉坤一率所部出  
官塘劉長佑率本部出良山李明惠出把火嶺  
均設伏待之賊之前隊遇伏卽退劉長佑揚兵  
大出直前搏戰賊嚴陣不動官軍僞退誘之潛  
令各勇仍伏連村飛仙橋以待二十六日黎明



賊果絡繹由大飄坪竄出官軍突起截賊爲二  
奮威衝殺斃賊千餘割取首級七百五十顆生  
擒僞侍衛夏元有等三百餘名拔出被擄難民  
六百餘奪獲旗幟五百七十面抬鎗四十三桿  
小鎗八十七桿僞印三十五顆甫收隊還營探  
報僞宰制陳亨容率前一旂賊眾合敗賊復出  
新寨村劉長佑急傳令出隊截之日暮抵新寨  
賊列陣山前官軍列陣山北相持片時賊已飢  
困多入民房掠食新安營總陳本熾率所部壯  
士直入賊巢見賊卽斫賊倉卒不知所爲仍從

容收隊而還劉長佑令各營排開鎗礮賊衆驚擾夜半遁去官軍追至龍潭賊正渡河見官軍掩至爭渡溺斃者無數其已渡之賊沿河列陣以拒追師陳本熾及花翎游擊鄢世堂漆盛年李長齡等踣淺而渡擊斃僞將軍等百餘陳本熾復追過五里圳復斃賊數百是戰賊之死者數千割取首級八百五十顆生擒滿髮賊一百二十拔出榔桂永州被擄難民六百餘解散者不計其數奪獲騾馬三百餘匹旂幟二百七十餘面大鐵礮一尊九節礮二尊抬鎗二十七桿

小鎗一百三十餘桿僞印九顆餘賊仍由小木田竄山塘一帶而大股賊之殿後者又續由梅溪口石田村竄新寨劉長佑江忠濬等會商分軍截之二十九日五鼓劉坤一率所部分伏飛仙橋馬頭橋劉長佑親督所部繼進以勦新寨之賊李明惠率所部出長湖江忠濬親督所部繼進以勦山塘之賊其由新寨竄出者無老弱輜重皆積年老賊人數雖止二千餘而拒戰最力劉坤一督各弁勇分路抄之官軍屢獲全勝士氣百倍賊不能當有新安勇丁柯興格者執

大白旂混入賊隊左右衝殺斃賊數十賊眾瞪視莫敢枝梧賊退至龍潭爲水所阻仍返旗拒敵適官軍先過北岸者迫之與後路追軍夾擊溺斃無數其從下游渡過五里圳者官軍追擊斬首百餘級江忠濬李明惠擊山塘之賊亦獲全勝斬獲甚多是日合計兩路斃賊一千二百名割獲首級六百五十顆拔出難民不計其數奪獲旗幟四百餘面抬鎗十一桿鳥鎗八十六桿而陳逆蕭逆之由全州繞竄新甯圖撲武岡寶慶各股賊匪始略盡矣此石逆分股繞由

粵西陷東安連撲新甯縣武岡州官軍兩保危  
城數獲大勝之實在情形也逆首石達開與僞  
元宰張遂謀竄逼祁陽三月十四十五等日官  
軍迎剿獲勝後賊大股續到距祁陽東鄉一帶  
村莊周四十里延紮營壘五十餘座而大股悍  
賊多伏匿民房維時臣調劉坤一一軍由祁陽  
赴永甫抵祁陽二十日花翎知府王勛率所部  
由中路總兵銜副將奈星元副將楊恒升游擊  
奈斌元率所部由右路劉坤一率所部由左路  
進勦賊依壘抗拒隊伍甚整官軍復一路分爲

數枝或先搜伏賊或遙撲營壘無不奮勇爭先計三時之久斃賊一千數百迫溺者千餘連踏賊壘十一座各路賊俱敗潰官軍躡蹤緊追斬獲甚多正在得手之際忽石逆張逆率悍賊數千由嶺後突出官軍遠追力乏且陟降巖谷之間無復行列彼此不能相顧左路之軍稍卻幸中路伏兵嚴遏賊衝各路乃徐徐收隊而還是役殺賊三千餘奪獲賊馬一百數十匹旂幟鎗械千數百件僞印二十餘內有僞渠帥光天燕張遂儒一顆而官軍之亡傷者共百二十餘名

藍翎千總羅士榮藍翎外委張友元均力戰陣亡適賴傳等逆圍撲東安甚急劉坤一率所部二千會師馳援留花翎游擊黃三清祁陽勇一營六百人駐祁助勦維時臣前調之副將何紹彩帶所部道州勇一千藍翎知縣楊安臣帶湘勇六百均至祁陽連日賊固匿不出三十日石逆率賊數萬屯楓林橋官軍方議分路攻勦賊忽冒雨趨逼縣城東北一帶山岡築立營壘官軍卽分三路撲之駐紮城內之何紹彩黃三清都司段高翔三營出隊接應官軍鏖戰數時

賊二百餘賊猶冒死突前逕撲奈星元營壘楊安臣親率勁卒自營房抄出何紹彩段高翔所部道勇祁勇亦奮勇截擊斃賊數十適都司謝泰平率礮船由湘水入小河口開礮遙轟岸賊紛紛倒地旋即卻退四月初一日臣前調之新授永州鎮總兵周寬世率湘勇一千五百副將朱品文率湘勇五百同知銜知縣陳湜率湘勇五百餘均由寶慶來援甫抵長慶橋遇賊接戰斃賊數百徑抵祁陽方賊分股迎撲周寬世隊伍時都司朱維堂策馬直掠賊壘覘壘中空虛



意賊已傾巢而出遽率所部與副將朱品文衝入忽壘後樹山伏賊四出包抄乃悟墮賊奸計卽撥馬各率所部左右馳突衝圍而出各營接應速至斃賊甚多而弁勇陣亡者數十適道銜卽選知府蕭翰慶師船入小河轟擊將賊濱河土壘盡數踏毀羣子紛飛斃賊無數始各收隊回營初五日賊迫撲奈星元營盤一騎馬賊目張黃蓋率眾甫由山口馳出奈星元飭勇丁點放新置營門大礮擊之賊中礮落馬各賊昇之去撲營之賊均遁未知爲何賊也是日午刻賊

列隊長葉嶺一帶周寬世率所部力戰斬賊二百餘蕭翰慶師船夾擊斃賊亦多初九日各陸勇由師船渡河水陸並進連踏新橋一帶大小賊壘七座共斃賊千餘奪獲礮械旗幟百數十件初十日各營議乘勝力攻賊壘賊抵死抗拒僅斃賊二百餘臣以逆賊久踞祁陽東鄉衡寶兩郡俱急祁陽陸路各營均被賊迫不能制賊遂調花翎知府陳士杰花翎同知銜魏喻義率所部赴衡由大路攻其南按察使銜卽選道趙煥聯率所部赴衡由小路攻其北四月初五日

魏喻義進踞祁衡大路熊羆嶺俯瞰賊壘是夜  
四更見火光閃閃從樹林中出知賊將來撲營  
嚴陣以待初六日黎明賊數十甫上嶺脊官軍  
乘其喘息未定急起擊之數路賊均敗退忽右  
路賊二千餘繼至亦擊卻之共斃賊四五百生  
擒十一名初九日卯刻賊復悉眾來爭魏喻義  
俟其迫近排開鎗礮轟之賊勢稍卻官軍躡蹤  
猛追逕至六梅嶺八步嶺踏賊營六座斃賊五  
六百陳士杰部勇亦均有擒斬是日趙煥聯率  
所部由白地繞道前進將駐營沙灘橋會祁陽

諸軍合勢夾擊初十日寅刻賊分十數路仍撲熊羆嶺官營陳士杰督所部勇丁從中路山梁壓下魏喻義分左右路夾擊斬獲甚衆各勇丁皆空壁逐利忽老營爲左路賊襲陷始收隊而還仍退紮虹橋趙煥聯是日抵沙灘橋聞熊羆嶺復爲賊踞恐賊由此竄衡州卽夜仍拔營回白地圖復扼熊羆嶺之險十六日進紮靈官殿午刻賊由熊羆嶺分數起來撲營壘趙煥聯率所部及游擊王永章周達武各營擊卻之都司銜守備洪定升主簿吳國佐由白地馳援亦均

有擒斬是戰計斃賊四百餘生擒二十五名奪  
獲旗幟鎗礮百數十件賊知祁陽防禦甚嚴官  
軍又從衡祁大路追至十九日卯刻風雨交作  
遂傾巢西竄圖與寶慶武岡各股會合仍於沙  
灘橋一帶設伏以拒追師祁陽各營分路追擊  
各團沿途搜山截擊斃賊約二千餘而賊之前  
隊已於二十二日竄至寶慶南路田興恕聞警  
是日由九鞏橋拔營還駐城南扼之二十四日  
趙煥聯追賊至九龍嶺遇賊二萬餘橫布山谷  
阻截援軍去路趙煥聯卽麾洪定升周達武王

永章趙福元黃輔卿等分五路奮威衝殺陣斬  
騎馬賊目十餘名悍賊四五百名生擒僞參護  
將軍二名僞軍帥三名賊始敗退二十六日周  
寬世陳湜追賊至渡頭橋築壘甫就賊隊大至  
分三路環迫官營周寬世陳湜等督勇力禦藍  
翎守備譚添祥外委譚洪志力戰陣亡勢殊危  
急適趙煥聯帶所部至分路來援斃賊三四百  
名賊始敗退官軍遂於二十八日進紮寶慶東  
門城外此石逆由祁陽敗竄寶慶各營戰勝追  
勦之實在情形也合計逆賊現竄寶慶者前由

新甯東安竄來之喻逆傅逆嗣由武岡敗竄之  
賴逆朱逆及現由祁陽敗竄之石逆張逆皆由  
南路蔓延東西兩路占地廣袤百數十里或紮  
營壘或踞村莊除迭次勦辦及免死解散外人  
數尚不止十數萬之多而寶慶東路緊接衡湘  
西路旁通常辰沅靖北路可通長沙南路直達  
永郡山徑紛雜防不勝防臣已密飭劉長佑江  
忠義劉坤一等率所部由新甯武岡趨西路調  
何紹彩黃三清余星元楊恆升各率所部由衡  
祁趨東路花翎知府劉嶽昭藍翎知縣楊安臣

副將朱品文參將彭聲發等由東北進並調副將劉培元率所部師船由益陽安化新化赴寶以扼資水之險調記名總兵陳金鰲率所部赴常德以重沅水之防又寶慶東北緊與湘鄉接壤湘鄉一縣士民頻年從戎殺賊久爲賊所仇恨賊中早有分股報復之謠臣已屢飭署知縣賴史直嚴辦團練并札委候選府經縣丞曾國潢統各鄉練勇以歸畫一所有現在籌辦情形合併陳明至劉長佑一軍自東安急援寶慶四月初五日本山一戰營壘全失咎無可辭唯該



員自回軍新甯後未及半月卽五獲大捷斃賊  
萬餘功過尚可相抵可否免其置議之處出自  
天恩花翎卽選道江忠義以所部一千餘勇丁固守  
新甯武岡兩城力遏賊衝保全甚大實屬勞績  
卓著可否

賞給該員祖父兩代四品封典以示優異總兵銜副  
將田興恕自古州調回後力扼寶慶西南一路  
大挫兇鋒裹創血戰驍勇出羣該員克復古州  
城池本應保獎此次又復奮勉出力可否仰懇  
天恩以總兵記名

簡放其江忠義田興恕兩軍出力弁勇可否由臣彙案保

奏伏候

聖裁此次東安失守知州銜署東安縣事准補邵陽縣知縣李右文守城殺賊抗節捐軀不愧守土之吏親屬同殉情尤可慘應請

旨照同知例從優

賜卹其妾媳姓氏及其子有無官職容俟查明再乞恩施旌卹所有同時殉難之署東安縣典史候補州吏目蔣慶保東安縣訓導吳肇封署東安汛把

總外委馬廷榮候選縣丞唐麟均請照例從優  
賜卹所有迭次打仗陣亡之擬保參將藍翎都司劉  
開鴻血戰捐軀實堪憫惜請照參將例

賜卹藍翎守備王榮光譚添祥彭義忠藍翎千總李  
全星毛楚秀龔玉堂均請照守備例

賜卹守備銜藍翎千總彭惠武藍翎千總蕭金堂左  
連升羅士榮段萬彩守備銜千總楊正全千總  
胡見田藍翎把總劉隆吉均請照千總例

賜卹藍翎把總郭承祠盧松發龔雲理賀文義把總  
譚洪盛鍾濟堂王長發王長勝胡相益李長青

彭含輝藍翎外委譚奇武擬保藍翎把總呂時  
禪彭於泰劉發科王壽劉可義均請照把總例  
賜卹藍翎外委劉祥信張友元許先才李錦和陳宗  
品外委譚洪志彭貴一額外陳文林擬保藍翎  
軍功李回光均請照外委例

賜卹又郴州禦賊陣亡之良田巡檢盧鍾請照例  
賜卹又管帶祁勇因勞致疾身故之花翎候選同知  
段瑩器請照同知軍營立功後病身故例

賜卹以慰忠魂伏懇

皇上聖鑒訓示施行謹

奏

咸豐九年五月十四日拜發奉

硃批另有旨欽此

逆賊盡竄湖南無庸撥兵援粵片

再五月初六日欽奉

寄諭前據駱秉章奏報永州祁陽等處連獲勝仗唯賊勢眾多粵西土匪未淨勾結爲患滋蔓堪虞該省餉絀兵單支撐不易駱秉章素顧大局前次調援各軍諒亦陸續到湘著卽督飭在事文武速籌剿辦其竄近粵境匪徒粵西雖派駐紮全州之蘇鳳文並教諭李若霞等督帶兵練防守仍著駱秉章撥兵援應毋令回竄粵西致滋蔓延湖南近日剿匪情形並著駱秉章隨時奏聞以慰廑念欽此

竊首逆石達開竄楚以來

臣

於其由宜章興甯

兩道竄陷桂陽州嘉禾時已料其必竄永祁以  
取上游之勢維時衡州當兩路之衝徵兵未集  
故飭劉長佑由新甯取道祁陽赴衡州飭余星  
元楊恒升由江華取道永祁赴衡而皆密飭其  
中途遇賊卽擊也石逆狡詐殊常此次賊目多  
係二年竄楚時所勾衡永郴桂一帶鹽販煙販  
會匪於各府縣山僻小徑皆其熟游故賊蹤出  
沒多出恒情意計之外自永祁大捷後奸謀已  
阻石逆旣至祁陽令各股悍賊已至未至者馳

騁於楚粵之交勾結兩廣各股土匪悉數竄入  
湖南會合其竄灌陽攻全州者均示形於楚粵  
之交計誘官軍躡蹤追剿以便其深入之謀且  
招致粵匪以張其紛紜之勢

臣前

奏石逆黨夥亦有分竄兩粵者卽此逆賊亦曾揚  
言回粵西老巢而其實非勢極窮蹙必不舍楚  
而竄粵粵西屢經兵燹粵東逼近夷氛非賊所  
注意也現在大股均竄聚寶慶繞竄粵西界之  
傳喻陳賴各逆首俱帶粵賊趨寶唯逆目何文  
彪聞尚在富川計將跟蹤而來廣西積年猥匪



羅亞誨亦入江華之白芒營是廣西北路之賊  
盡已入楚與勞崇光前奏情形迥異上年由福  
建竄去廣東之僞國宗陷嘉應州後又繞由仁  
化縣入楚晝夜行走已抵甯遠縣攻撲城池衆  
約二萬而英德巨匪號稱二十萬者已竄乳源  
勢亦駸駸入楚臣已調布政使銜卽選道蕭啓  
江副將李輔朝花翎知府陳士杰花翎同知銜  
魏喻義各帶所部駐營郴州及宜章臨武邊界  
防之大約上年由江西竄浙閩廣東各賊此時  
均已全數入楚而廣西廣東積年稽誅之寇亦

陸續奔赴而至真防不勝防剿不勝剿也所有  
數省逆賊盡竄湖南并會合粵賊竄楚毋須撥  
兵援應廣西情形謹據實附片覆陳伏乞

皇上聖鑒訓示謹

奏

咸豐九年五月十四日拜發奉

硃批另有旨欽此



請調李道總統寶慶諸軍片

再大股逆賊均竄寶慶南路蔓延東路西路且有漸迫北路之勢

臣

所調各路勇丁除郝宜臨

武一路外盡派赴寶惟營頭既多必須遴員統領以專責成而肅號令統領之選實不易得非威信素著謀勇兼優聲望夙重品秩較崇者不能服各軍之心卽無以盡各軍之力此辦賊所以必先謀將也以現在局勢而言寶慶地居腹中路徑四通八達應分派統領兩員一勦東路一勦西路漸勦漸進迫賊歸併南路然後合勢

蹙之方可聚而殲旃免其紛竄寶西一路當責  
之劉長佑而以田興恕副之惟寶東一路實難  
其人帶勇各員彼此等夷每有兩不相下之勢  
卽如新授永州鎮總兵周寬世以湘勇出身蒙  
恩擢至本省總兵勢難歸人調遣而統馭他營  
又難期帖服如此等類亦尚有之臣默察軍情  
深爲隱慮頃聞按察使銜卽選道李續宜有告  
假暫歸之耗臣擬俟其到籍卽派令充當寶東  
一路統領以一事權該員識略最優身經百戰  
而現在寶東各營多其舊部呼應較靈必能當

此重任臣知李續宜現在鄂中統帶各營亦難  
久羈湘省特以此時大局喫緊湘中軍務較鄂  
爲急實非李續宜暫時統領不能收功已檄商  
督臣及湖北撫臣飭令李續宜暫統寶東軍務  
如鄂省有警一檄馳來李續宜卽當馳赴鄂省  
聽候調遣臣亦斷不藉詞羈之所有檄調李續  
宜統領軍務原由理合附片陳明伏乞

聖鑒訓示謹

奏

咸豐九年五月十四日拜發奉

批知道了欽此

駱大司馬奏稿卷之十五目錄 湘中稿

已未中

代奏李職員謝

恩摺

保舉援軍克復江西吉安出力員弁摺

凌都司請卹片

寶慶援軍大捷府城解圍摺

逆賊窮蹙南竄官軍追剿楚境漸次肅清摺

另股賊匪竄擾南路各屬防剿情形摺

代奏永州周鎮謝



恩摺

會保援江官軍新城八捷出力員弁摺

剿辦兩粵股匪連獲大捷現籌情形摺

援粵官軍獲勝桂林重圍漸解摺

逆目周學韓等投誠片

代奏李職員謝

恩摺

奏爲據情代

奏恭謝

天恩事據職員李登勝呈稱職子續賓在三河剿賊

陣亡蒙

欽差大臣湖廣總督荊州將軍湖北巡撫查照事實

具

奏奉

硃批另有旨詳覽奏牘不覺隕涕惜我良將不克令

終尙冀其忠靈不昧他年生申甫以佐子也欽此

同日奉到咸豐八年十二月十八日內閣奉

上諭官文等奏查明統兵藩司陣亡實蹟懇請優卹一摺覽奏不覺隕涕巡撫銜浙江布政使李續賓當賊匪圍撲長沙之時首倡團練屢建奇功嗣後赴援江西調回湖南旋隨曾國藩東下克復武漢凡江西湖北湖南等省攻克巨壘堅城該藩司無不親歷行間身先將士通計七年之間先後克復四十餘城大小六百餘戰以少勝衆所向無前一時諸將之中無與倫比本年七月赴援安徽甫逾

匝月連克潛太舒桐朕以其謀勇素優威望衆著特命幫辦安徽軍務方冀肅清皖北淨掃狂氛特膺懋賞乃因進圖廬郡先剿三河苦戰旬餘殺賊逾萬江浦六合廬江逆黨大股來援以五千兵勇當十餘萬之賊將士傷亡從容赴義其忠勇義烈之氣雖死猶生實深悼惜李續賓著加恩追贈總督卽照總督陣亡例賜卹入祀昭忠祠任內一切處分悉予開復應得卹典該衙門察例具奏伊父李登勝著賞給光祿大夫封典並賞銀五百兩由湖南藩庫給發伊子李光久李光令均著賞給舉

人一體會試仍於服闋後交吏部帶領引見並著  
於江西湖北安徽及湖南湘鄉本籍各建專祠以  
示朕褒卹蓋臣至意欽此旋奉藩司頒給銀兩到  
職遵卽叩頭祇領伏念職家本寒微世傳耕讀  
沐

聖代生成之德未報涓埃值鄉邦烽火之驚共修矛  
戟職子續賓以草茅愚賤從事戎行數載馳驅  
勉盡効忠之義

九重恩遇渥邀

懋賞之加

沛絲綸而錄及微勞由布衣而洊升方伯荷超遷於  
不次捐頂踵而難酬上年從舒城進剿三河適  
逆黨大股突至遂致孤軍之覆莫伸報  
國之忱雖奮不顧身而歿猶遺憾乃蒙

聖慈優逮

溫詔頻頒惜爲良將之才猶遠期夫輔佐寬其敗軍  
之罪轉厯念夫勤勞官階更

贈以兼圻頭銜一品祠祭並隆於數省血食千秋  
寵錫旣推及所在

恩施且被於厥後凡此

殊榮之叠賁實爲曠代所難逢感激涕零罔知所措  
職桑榆暮景圖報無由職五子續宜現在軍營  
惟有勉其激勵將士迅掃賊氛以期仰答

高厚鴻慈於萬一所有感激下忱理合呈懇查核具  
奏等情謹據情恭摺代

奏伏乞

皇上聖鑒訓示謹

奏

咸豐九年六月十八日拜發奉

硃批知道了欽此

保舉援軍克復江西吉安出力員弁摺

奏爲查明克復江西吉安府城湖南援軍出力各  
文武員弁勇丁遵

旨保奏籲懇

天恩俯准獎敘以昭激勸事竊照湖南派援江西吉

安官軍會克府城經

臣

奏報在案上年九月初三日奉

上諭此次援江各將士同心一力遂能力克堅城盡  
殲醜類援軍各營員弁勇丁著賚兼章擇尤酌保  
欽此旋據道銜卽選知府曾國荃等水陸七營將



領開具勞績清單稟請核明鼓勵前來 臣維江西吉安府城自被逆賊攻陷時逾三載楚師竭力攻剿兩次合圍大小數百戰卒能力克堅城殲除羣醜除各營帶勇將領已經 臣隨摺

### 奏蒙

聖恩優獎外所有各營實在尤爲出力勞績卓著員弁勇丁未便任其掩抑謹據實開列清單敬呈御覽伏懇

天恩加以獎敘其陣亡之擬保守備藍翎把總章其祥擬保千總藍翎外委王生義曹金品擬保守

備甯鄉汎把總王友元擬保千總藍翎外委王  
榮香積勞身故之藍翎把總于洪壽均請照例  
給予

卹典伏乞

勅部議卹以慰忠魂而作士氣所有遵

旨核保原由謹據實陳

奏伏乞

皇上聖鑒訓示施行謹

奏

咸豐九年六月十八日拜發奉

殊批另有旨錄此

凌都司請卹片

再花翎儘先補用都司凌忠元由長沙協兵丁  
經前兵部侍郎曾國藩調赴軍營管帶水師屢  
著戰功胸膛等處迭受礮傷洊保今職嗣於咸  
豐七年經臣札調回南時粵西逆匪竄擾永州  
一帶河道亟須嚴防又經飭赴永州防剿上年  
六月甫經調回省河該員旋因傷病舉發身故  
臣查該都司凌忠元樸勇性成頻年血戰衝鋒  
傷痕遍體上年調回湖南管帶水軍正資委用  
旋因傷病舉發遽爾病故殊堪憫惜可否仰懇

天恩敕部照軍

恩施理合附片

奏伏乞

聖鑒訓示施行

奏

咸豐九年

硃批著照所請

寶慶援軍大捷府城解圍摺

奏爲逆賊合圍寶慶勢極披猖先後調撥各路官軍痛剿大獲勝仗長圍頓解現籌剿辦情形恭摺馳

奏仰祈

聖鑒事竊石逆大股自祁陽敗竄寶慶府南路會集賴裕興傅忠信喻子和朱衣點等逆首併力攻撲寶慶由南路蔓延西路東路占地廣袤百數十里臣調水陸各軍杜其紛竄飭各將領由西路東路東北路且堵且剿所有調撥情形均已

奏報在案維時提督銜副將田興恕駐軍府城之南按察使銜趙煥聯新授永州鎮總兵周寬世駐軍府城之東南其西面濱臨資水以師船扼之東南一帶城外廟宇街市民房臣已預飭焚拆淨盡賊雖眾且悍固不能迫攻城垣也逆賊挾全力以窺楚連攻各城不下無巢穴可依而其詭謀秘計則尤在撼鄂圖蜀以取上游之勢寶慶爲湖南腹地最便紛竄故必欲甘心於此臣預飭寶郡文武及援寶各軍以全力應之其寶慶之西如澱浦武岡綏寧皆由常德辰州靖

州以達鄂蜀之路則調援黔之師扼要固守復以鄂省援湘師船分防沅資兩水以杜其窺伺之念雖兇醜尙張而奸謀固已漸沮惟寶慶北路新化一帶無勁旅可撥寶東各軍無總統軍事之人將士心力不齊難免意爲進退臣前

奏調按察使銜湖北補用道李續宜回湘時適督

臣官文湖北撫臣胡林翼密飭該員回湘於五

月初旬抵省督臣繼接臣咨以新化一路空虛

可慮又與胡林翼籌商將該員所部湘營駐紮黃州上巴河之馬步各軍五千三百七十員名



調遣隨征機局益振然道路相距一千七百餘里會剿需時臣仍一面督飭援寶各軍相機攻剿五月初三日逆賊數萬由長沖口高橋一帶分十餘路來撲趙煥聯周寬世營盤五色旗幟遍布樹林聞鼓角之聲震動山谷趙煥聯周寬世各督五成隊出擊亦分十餘路應之鏖戰逾時周寬世及同知銜知縣陳湜所部左路之兵稍卻都司銜儘先守備洪定陞派所部長勝軍分路策應賊不敢迫洪定陞率親軍七十人挺矛縱馬直陷賊陣忽山凹伏賊突出洪定陞中

礮殞命藍翎把總唐占魁藍翎外委譚太和皆  
力戰陣亡勇丁死者五十餘趙煥聯等憑壘排  
開鎗礮斃賊三百餘賊始卻退官軍踰壁出擊  
一悍目身帶令箭手執李字大旗勒馬回撲爲  
湘勇鄒永昌所殲賊仍敗卻都司黃黼卿黃少  
春等扼之橋邊斃賊二百餘始收隊歸營初六  
日賊數萬由西南兩路直撲城壘都司勝國獻  
李有恒游擊王月亮等擊敗之乘勢破其三壘  
田興恕見賊援厚集急派全凱祖毛克寬等率  
虎威軍兩營截之斃騎馬賊目一名賊稍卻然

猶回旗轉鬪疊進不休田興恕復派游擊劉義方劉吉玉繼進趙煥聯亦派游擊王永章周達武助之酣戰逾時賊始敗退忽大雨如注南路悍賊萬餘以官軍火器難施竟冒雨迨撲田興恕營盤田興恕率楊巖寶鄒學貴等衝出長壕短兵相接陣斬悍賊多名擬保藍翎把總劉可義力戰陣亡楊巖寶鄒學貴各帶數傷猶裹創血戰斃賊多名賊始敗退是戰各營其斃賊七八百奪獲旗幟鎗礮各二百餘件官軍亦陣亡十餘名受傷者百餘名方官軍與賊接仗時另

股賊在陣後各嶺築壘十餘近迨田興恕營盤相距僅三四里是時石逆踞城南十里之澄水橋賴逆踞城西五里之神灘渡傳逆踞城東十二里之泥灣賊眾號稱數十萬除散踞村莊外環城三面連山遍紮賊壘惟北路及東北路賊蹤尙稀官軍文報餉需每取道於此臣慮其長圍速合調記名按察使劉長佑率所部楚勇由武岡繞道郡城西北巨口舖一帶記名總兵劉培元率所部師船由益陽安化新化溯資水而上與之會師從北路進調總兵銜副將奈星元

副將楊恆升游擊余斌元進紮范家山調花翎  
知府劉嶽昭藍翎知縣楊安臣副將朱品文游  
擊銜都司朱惟堂參將彭聲發張義貴等進紮  
龍安橋從東路進寇期大舉剿之十七日辰刻  
賊七八萬從馬鞏山厯余湖山至大東路五里  
牌壓壘而陳趙煥聯周寬世各出六成隊分路  
擊之田興恕見東路賊勢甚厚立派四營前往  
助戰賊布陣縱橫各數十里層岩複嶺重重設  
伏旂幟森然樹林爲之變色各路官軍奮力衝  
殺鏖戰三時斃賊于餘賊始敗退而陣後各賊

已於東路五里牌一帶延紮賊壘直迫資江右岸官軍追賊迫近新壘適大雨如注東南西南兩路之賊復冒雨迫撲官營各營回救均用繳筮護鎗砲轟之賊仍敗退然自是而東北路亦皆遍紮賊壘長圍已合文報餉道均梗趙煥聯田興恕等每遣善水者穿過賊壘馳報戰狀雖屢獲勝仗然終無損於賊也二十五六等日劉嶽昭楊安臣余星元楊恒升朱品文朱惟堂彭聲發張義貴等各帶所部兵勇至寶郡東四十里之洪橋副將何紹彩游擊黃三清亦至劉長

佑江忠義劉坤一方由武岡拔營來援師次黃  
橋石逆偵知遣逆首陳亨容蕭壽璜等率賊黨  
一萬數千復竄新甯蓋知劉長佑一軍將士皆  
新甯人欲以此爲牽綴之計也劉長佑以大義  
諭所部率之援寶令劉坤一率新楚勇義安勇  
二千藍翎主簿劉思詢率副中營楚勇六百回  
援新甯且斷其竄武岡之路六月初二日劉嶽  
昭楊安臣佘星元楊恒升等九營由洪橋進郡  
東北二十里之柳家橋何紹彩黃三清兩營勇  
丁二千一百名仍駐洪橋賊覘洪橋軍單遽起

乘之是日午後賊二萬餘分十餘路撲洪橋營  
盤何紹彩黃三清率全隊禦之鏖戰兩時已將  
賊擊退忽賊數千自後路山梁壓下守營長夫  
驚潰營壘遂陷何紹彩黃三清督勇縱橫血戰  
突圍而出陣亡弁勇二百餘柳橋之軍聞警派  
隊回援已無及矣劉長佑方繞道新化南境之  
麻溪渡資而來聞洪橋有失恐柳橋軍心不固  
遂兼程疾進初五日所部齊抵郡北三十里之  
嚴塘次日赴柳橋營次會議改由東北一路進  
剿是時督臣遣李續宜所部湘勇十一營亦陸



續渡湖而南將於益陽取齊援寶

臣

與李續宜

商定由益陽取道安化之藍田直指寶郡北路以進並以前調來湘之馬隊官兵一百九十四員名隸之凡寶城內外各營兵勇三萬有奇均飭歸李續宜總統節制調遣初十日賊二三萬冒雨迫撲柳橋營壘劉嶽昭楊安臣等及各營擊卻之斃賊約千餘名劉長佑師進高沖石逆見援軍日進抽撥悍賊築壘東北路石山亭一帶阻之賴逆派悍賊數千由神灘渡竄西北驚擾新化南境之草鞋舖牛山卡擬復躡援軍之

後李續宜全軍十九日行抵藍田距新化縣城  
一百一十里距寶慶府城一百四十里其勢又  
出草鞋舖牛山卡之後奸謀遂阻二十日柳橋  
各軍復進紮半邊街二十五日李續宜師進水  
竹地方單騎赴高家沖大營晤劉長佑會商破  
賊之策是夜五鼓賊數萬分伏半邊街近處山  
嶺二十六日辰刻石逆親督大股分由藍江舖  
短陂橋清水塘長茅沖峰擁而來各營出六成  
隊排立壕外靜以待之俟其迫近始放連環鎗  
砲斃騎馬悍賊無數賊退不追賊進又轟之塵

戰三時刀矛隊奮威衝殺賊始紛紛敗潰適大雨如注各營正擬收隊忽另股賊從各路衝出旗幟皆新氣殊驕甚蓋欲以生力乘我之疲也各營刀矛格擊再接再厲復斃悍賊數百名劉長佑令參將鄢世堂守備徐良埭列隊左路山巔遙爲犄角賊始卻退另股賊窺官軍分隊往援半邊街遽出隊來撲高家沖營盤劉長佑督卽選道江忠義藍翎知縣唐顯烈士簿吳國佐守備丁永升等分路擊之千總劉九盛把總蔣得祿陣亡唐顯烈受矛傷十一處猶裹創力戰

鄢世堂徐良煥從半邊街馳回截之賊甫敗退  
少頃復邀撲半邊街之賊回旗助戰劉長佑令  
吳國佐丁永升等伏於營旁俟其迫近鎗礮轟  
擊斃賊無數是日半邊街鏖戰最久斃賊二千  
餘高家沖大營斃賊約二三百據生擒賊供石  
逆以援師日迫調賴傳喻各逆挑選悍賊數萬  
併力致死限三日破援軍營壘二十七日賊列  
隊山巔遙瞰半邊街官營其近高家沖一帶者  
自河岸至棉花塘一帶列陣尤厚李續宜派隊  
來助各選地設伏以待左路賊甫近營前一騎

黃馬賊目及執紅旗兩賊爲劈山礮轟斃賊卽  
卻退少頃數騎馬賊目率悍賊逕撲右營河岸  
賊漸迫左營均經各營擊敗餘賊覘知後路有  
伏不敢深入旋卽引卻李續宜以東路賊勢甚  
厚蔓延甚寬若俟節節攻入曠日需時重圍難  
以速解且其地巖壑幽邃逕雜林深非用衆之  
地趙煥聯函告援軍亦以爲言乃決計由北路  
攻入劉長佑械致劉培元吳國佐於釀溪速架  
浮橋濟師是夜李續宜引軍回釀溪面商劉長  
佑及吳國佐並飭劉嶽昭楊安臣奈星元楊恒

升朱品文朱惟堂奈斌元彭聲發張義貴半邊街各營自二十八起至三十日止朝暮列隊東北牽制賊勢俾不得盡注西路北路以阻我師旋接探報賊之前擾新化南界退至邵陽北境者聞官軍到醴溪已盡回資西壘中矣二十八日黎明李續宜率全軍渡資而西時東北路大股逆賊均尙未覺辰刻各逆首方率賊六萬餘逕撲半邊街大營自雀塘列隊至清水塘環繞二十餘里劉嶽昭楊安臣奈星元楊恒升朱品文朱惟堂奈斌元彭聲發張義貴等分路截擊

激勵士卒且衝且堵自辰至申斃賊二千餘名  
奪獲刀矛旗幟千餘件馬三十餘匹是日李續  
宜調劉培元師船前進巳初陸軍均抵匡家嶺  
周視賊壘自田家渡紮至白田清水塘三十餘  
里環壘開掘外壕寬深各三丈壕上礮位礮眼  
壕外竹籤木椿靡不周密李續宜以中右兩路  
官營距賊尙半里左路官營則在田家渡賊壘  
之下且田家渡有浮橋可通寶東又有寶郡城  
壘僅隔一江尤爲官軍必爭之地密令參將銜  
游擊郭鵬程游擊銜都司于高勝黃連升府經

歷縣丞毛有銘軍功李光燦等各帶所部六成  
隊捲旗息鼓從山背襲之令營務處同知直隸  
州金國琛帶親兵馬隊監督其後適賊二千餘  
出撲凱右營同知銜知縣梁作楫率勇力堵金  
國琛等突出橫截之賊卽大潰官軍直迫賊壘  
壘中賊二千餘復出抗拒金國琛麾各營橫衝  
側擊立斬當先悍賊五千餘名賊陣遂亂官軍  
乘勝躡踏將田家渡賊壘賊卡一律平毀敗賊  
爭由浮橋渡資官軍蹙之浮橋中斷溺斃無數  
是戰共破賊壘七賊卡三十六斃賊二千一百



餘生擒二百六十餘拔出難民七八百名奪獲  
偽印二十一顆騾馬八十五匹旗幟器械無數  
而城中文報餉道通矣賴逆方在東路聞官軍  
襲攻田家渡營壘急圖糾黨赴援自日中至晡  
間賊之由南路渡資而西者殆以萬計是夜南  
路東路賊營海螺聲急其結隊西渡者約計亦  
不下萬餘合之原踞資西者蓋四萬有餘趙煥  
聯田興恕周寬世皆馳報賊將撲官營請嚴爲  
之備二十九日黎明賊果大至重重包裹其列  
陣營前者數十枝每枝各數百人其大股悍賊

忽前忽卻忽捲旗忽揚旗多方眩我實則希圖  
繞出後路以襲官軍營壘也李績宜不爲之動  
適游擊銜都司羅重世游擊劉青山帶所部新  
募兩營至令其一駐田家渡一駐釀溪亦不令  
其助戰也巳刻始密令于高勝帶貞左營郭鵬  
程帶毅右營及中右營兩哨捲旗出隊伏後路  
林密山曲處總兵銜副將沈俊德率元右營總  
兵銜副將胡裕發率副左營副將彭先古率信  
中營出西路爲橫截之兵毛有銘率湘右營並  
馬隊五十斜出後路爲包抄之兵副將蕭慶衍

率貞中營副將彭炳武率剛右營梁作楫率凱  
右營參將李續遠率強右營防壕內之賊李續  
宜自率金國琛李光燦湘中營及馬隊五十由  
前面迎敵飭各營均嚴陣以待俟賊迫近乃縱  
擊之日午各賊齊迫營壘李續宜號旗一舉正  
伏齊出鼓聲震山谷間伏兵反從賊陣後衝殺  
而來賊皆迫聚一處次第就戮李續宜以賊雖  
陷入絕地然數眾且悍必仍拚命死鬪慮多傷  
壯士不如分搗其巢令賊自亂然後從而掩之  
遂於中路分營斜出一面傳令防濠各營奮撲

賊蟲

空益

軍四

元鄒

門渡

管帶

坪截

踏賊

百迫

內有

玉和等賊目四十八名訊明後正法拔出被擄  
難民五六千奪獲僞印八十餘顆騾馬三百餘  
匹旗幟鎗礮雜械無數次日將資西一帶餘匪  
搜捕淨盡寶郡城外水陸各軍截斬之賊不下  
三千餘生擒七百餘內有賴逆之母及僞檢點  
任姓奪獲僞印三十餘顆並獲賴裕新僞官憑  
一紙據生擒賊供逆首賴裕新自武岡竄圍寶  
慶四十餘日意在攻陷寶郡復隨石逆下竄鄂  
蜀不料爲官軍所敗精銳盡喪也現在寶郡北  
路西路已就肅清大股逆首均屯聚東路南路

臣已飭李續宜嚴防東路並因廣東韶連一路賊勢稍緩調駐防郴宜之布政使銜卽選道蕭啓江一軍同知銜魏喻義一軍速由臨武藍山甯遠一帶進勦永明江華竄匪並截大股逆賊南竄之路冀可將此積年逋誅巨寇聚而殲旃免致流毒他方復貽巨患此次石逆攻圍寶慶糾合數省劇寇挾全力而來賊衆且悍勢甚猖獗倘寶郡稍有疏失不獨湖湘糜爛卽鄂蜀亦斷難遏此兇鋒督臣洞悉賊情先後調撥水陸官軍回湘防勦並協濟軍餉銀九萬兩火藥四

萬勛俾機勢得以速振裨益大局實非淺鮮按  
察使銜湖北荆宜施道李績宜居心忠實識畧  
素優此次赴援寶郡機神敏速立解重圍勞績  
卓著可否仰懇

皇上天恩賞加布政司銜以示獎勵所部將士同心  
戮力克奏奇功可否由臣保

奏其守城文武官紳及援寶各軍將士之實爲出  
力者可否彙案請獎之處伏候

聖裁其力戰陣亡之都司銜儘先守備洪定陞請照  
都司例擬保游擊藍翎守備田興恕請照游擊

例千總劉九盛請照千總例藍翎把總伍雲高  
毛季發請從優照千總例把總蔣得祿請照把  
總例藍翎外委王恒茂請從優照把總例一並  
賜卹以慰忠魂所有大股逆賊合圍寶慶官軍大獲  
勝仗重圍速解實在情形謹會同協辦大學士  
湖廣總督臣官文由驛馳

奏伏乞

皇上聖鑒訓示施行謹

奏

咸豐九年七月十一日拜發奉



殊批另有旨欽此

逆賊窮蹙南竄官軍追勦楚境漸次肅清摺  
奏爲大股逆賊窮蹙南竄官軍追勦迭獲大勝楚  
境漸次肅清現在籌畫援勦情形恭摺馳

奏仰祈

聖鑒事竊石逆大股竄圍寶慶經各路官軍痛勦大  
獲勝仗立解長圍維時逆賊之聚踞寶慶東路  
南路者雖人數尚不下十數萬之多而勢已漸  
蹙臣飭李續宜嚴遏東路料賊將由南路竄遁  
調蕭啓江魏喻義各軍由郴州臨武趨藍山甯  
遠取道永州東安截其竄逸業於前摺陳明李

續宜自肅清北路西路後與劉長佑會商將西路各軍布置周妥引軍渡資而東意將裹賊入圍成堯勦之局七月十二日李續宜飭劉嶽昭楊安臣等半邊街各營由右路進龍橋飭趙克彰李續燾蕭慶衍黃涓熙等各營由中路進渡頭橋李續宜自率所部從中路范家祖山高叢山等處前進十四日駐營賀家均逆首石達開等因六月二十八九等日兩被痛勦悍賊死傷過多日夜憂懼不知所措思與官軍決一死戰十五日卯刻石逆令賊黨各嚴守營壘分拒官

軍親率死黨二萬六七千分爲數十枝或揚旗  
列隊或捲旗蛇行力攻賀家坳大營左右兩路  
正伏重疊李續宜飭各營靜以待之巳刻中營  
鼓聲起營總德海率吉林黑龍江馬隊王聯芳  
張正元率親兵營馬隊胡裕發沈俊德李續遠  
彭星古彭炳武梁作楫于高勝劉長槐郭鵬程  
羅重世各率所部開壁齊出李續宜率金國琛  
毛有銘李光燦中右兩營急起衝殺各營或迎  
其頭或抄其尾或擊其腰錯綜爲陣見賊卽斫  
賊勢不支紛紛鼠竄馬步追殺直至右前兩路

溪邊始行收隊陣斬滿髮悍賊二百六七十名  
生擒八十四名內有僞渠帥胡德孝僞統戎陳  
麗江及各僞目二十八名殲溺無數其撲犯龍  
安橋渡頭橋官軍營壘者均經各營勦敗斃賊  
甚多據生擒賊供石逆自稱誤聽奸細之言深  
入楚境現在官軍日迫非誓死力戰不能圖脫  
然僞令雖峻賊象膽寒交綏未久卽已紛潰其  
奔竄之速雖馬隊不能追及故是役溺死者多  
而擒斬之數反少各營均知其將遁矣十六夜  
賊分兩路逃走趙煥聯焚東路賊壘斃賊七八

百名生擒五十六名鄒漢章督所部水陸截擊  
西路竄賊陣斬二百餘獲僞印三十二顆其由  
南路走新甯東安旁出武岡州者劉長佑田興  
恕江忠義率各營追之田興恕一軍是夜追至  
九鞏橋白楊鋪一帶斃賊約四千有餘陣斬僞  
左旗中制黃立英僞檢點陳明友等十餘名生  
擒五百三十餘內有僞將軍蔡光遠周子福王  
智明僞提審孫子安等割獲髮辮三千二百一  
十二救出難民七百五十餘奪獲旗幟一千三  
百餘件騾馬一百八十餘匹僞印十六顆鎗礮

七百三十餘桿江忠義是夜追至九鞏橋白楊  
舖斃賊四五百名生擒僞將軍李定發僞通傳  
許以祥等四十五人劉長佑率大隊繼至沿途  
擒斬無算十七日追至白倉十八日追至大臨  
橋殺賊三千餘生擒二百餘內僞渠帥統戎將  
軍等十餘名奪獲騾馬八十餘匹抬鳥鎗九十  
餘桿僞印二十餘顆拔出難民數千李續宜十  
七日躡蹤緊追馬隊行九十里沿途斃賊五六  
百名解散七八千十八日李續宜至水田舖追  
及石逆大隊適賊之分竄祁陽界者來此會合

石逆挑悍賊萬餘與之合勢列陣前路設伏左右山陰以禦追師李續宜分軍搜勦並相賊陣之厚薄定分撥之多寡鏖戰三時賊勢紛潰遙見前面山岡一賊渠張黃蓋指揮羣賊胡裕發躍馬直前取之被賊矛刺傷羅重世繼進亦受重傷各將士愈憤奮力衝殺賊大奔潰追殺七八里日暮收隊計殺賊五六百生擒三百餘拔出難民六七千據生賊供張黃蓋指揮諸賊者卽石逆也是夜賊卽潛竄二十日黎明前隊已抵東安之蘆洪司官軍因鍋帳未齊前途被賊



焚掠居民遷避購米殊難未能速進二十二夜  
劉長佑江忠義飭席寶田由楊田覓山路逕搗  
蘆洪斃賊二百餘賊復驚竄二十四日劉長佑  
遣李明惠追賊於白牙市斃賊數十生擒僞撰  
文僞軍師各一名二十五日追至東安斃斷後  
悍賊數十二十六日蕭啓江所派各營至白牙  
市次日會合跟追沿途斬獲頗多生擒僞將軍  
楊家廷先鋒馬繼昌訊據供稱石逆連夜奔竄  
已入廣西全州興安地界矣是日前竄永明之  
匪復由灌陽竄近道州之小坪地方適臣調赴

永州截勦竄賊之魏喻義帶所部桂勇一千五百名自江華馳至二十八夜率所部銜枚疾馳四十餘里天明甫抵小坪賊復向永明逃竄魏喻義急起躡之追至筒車尾分三路掩殺賊方造飯見官軍突至駭而奔魏喻義縱勇衝殺復逼之溪岸斬賊數百溺斃者近千名內長髮悍賊二三百奪獲騾馬百四十三匹旗幟鎗礮無算拔出難民男婦百餘名餘匪仍由永明竄去

臣維逆首石達開自江西南安突竄湖南秘計詭謀專注鄂蜀其竄擾郴桂之時晝夜兼行曾

不停趾妄圖先陷永州以趨寶慶寶慶有失則西路之常澧辰沅靖各府州均將受其蹂躪而犯鄂圖蜀之勢成矣迫猝攻永州經官軍出其不意迎頭痛勦三戰三捷立解重圍奸謀頓阻則嗾賴逆裕新攻東安以牽制永州之師石逆自率死黨急攻祁陽以牽制衡州之師陰令逆首傅忠信喻子和卽余志扶陳亨容等乘間取道新寧武岡以趨寶慶該逆在江西崇仁時卽密約諸賊尅期三月十五日會集寶慶其分黨出沒兩粵與湖南邊界者蓋欲分我兵力以亂

吾謀也東安陷後幸江忠義率援軍速至新甯武岡兩保危城劉長佑劉坤一以全軍還扼新甯五獲大捷田興恕力扼九鞏橋兩獲大捷而後寶慶之禍稍紓石逆在祁陽屢挫仍決計犯寶糾賴傅喻諸逆均集寶郡噉陳亨容蕭壽璜兩逆復犯新甯以牽制劉長佑劉坤一之師幸劉長佑江忠義義無返顧率所部繞由寶慶西北渡資而東而劉坤一與江忠義江忠淑等亦將新甯之賊擊退賊衆悉萃寶郡長圍益急寶郡之勢雖極危險而逆賊迫聚一方亦成孤注

矣六月二十五六七等日石逆以援軍厚集寶東一路決計力攻限傅喻諸逆於三日內悉破寶東官軍營壘並將賴逆西北兩路悍賊調赴寶東諸軍悉力支持殺賊數千而李續宜以所部於二十八日倏從北路直攻其瑕將北路重圍先解卽移據賊營二十九日一戰大挫兇鋒自此逆賊窺伺鄂蜀之謀頓息而窮蹙思竄之勢決矣此皆賊退後官軍所獲活賊及賊中僞札所言之情狀也臣前調蕭啓江魏喻義兩軍均赴永州東安截勦務期聚而殲旃乃石逆自

七月十六夜由寶郡南路竄走晝夜疾馳二十一日已過東安縣境距永州六十里比蕭啓江之軍二十二二十三日齊到永州則已後賊兩日魏喻義二十七日馳抵道州又以追勦灌陽闌入之賊未能赴約賊雖窮蹙其颯疾尙如此官軍雖兼程行走終未能速到賊前截其竄路此則臣思慮所未到而深爲慙恨者也臣前奏賊勢非極窮蹙斷不竄粵今雖竄入粵西其志亦斷不久踞於彼或由柳州北境融縣懷遠一帶以入黔仍遂其竄蜀本謀或由廣西湖南邊

界竄廣東以回竄江西皆未可定然廣西兵餉  
兩絀其勢終難支持湖南自應速爲追勦臣已  
飭劉長佑蕭啓江各統所部援粵惟李續宜本  
湖北不可多得之將皖事甚棘斷不可久留於  
湘已飭其將所統湖南各軍布置周妥仍帶所  
部湘勇五千餘返鄂田興恕一軍尙頗能戰臣  
慮賊由融懷入黔仍須調此軍由武岡綏甯靖  
州扼之所以固楚應黔而遏其趨蜀之勢也故  
尙須察看賊蹤酌量調遣其餘各軍應分扼道  
州永州郴州桂陽州各屬遏其竄楚竄江兼遏

廣東竄楚之賊現並斟酌緩急情形量爲調遣  
此次大股逆賊竄入湖南人數之多號稱數十  
萬能戰者實不止十數萬之多除永州祁陽新  
寧寶慶諸大戰及桂陽州永州府各屬擒斬之  
■六七萬外鄉團之沿途截殺者則無數可  
紀據各營及各地地方官稟報投誠散遣給免死  
護票者約萬數千湘鄉一縣團局據報給票散  
遣者亦五千有奇拔出難民男婦及難民逃出  
者不下數萬其竄入粵西者當尚有數萬臣不  
敢以餘匪他竄爲詞所有此次勦賊得力員弁



應懇

天恩加以鼓勵候選同知直隸州金國琛請免選本班由軍機處記名遇有知府缺出請

旨簡放並請

賞加道銜總兵銜候補副將胡裕發沈俊德均請由軍機處記名遇有總兵缺出請

旨簡放候補副將蕭慶衍彭星占均請

賞加總兵銜候補參將劉長槐李續遠均請免補參將以副將歸部儘先推補藍翎游擊銜儘先都司于高勝請免補都司以游擊儘先補用並請

賞換花翎儘先都司王桐柏請免補都司以游擊儘先補用都司銜守備王復勝請免補守備以都司儘先補用並

賞加游擊銜儘先把總李續榭請免補把總以守備儘先補用候選府經歷縣丞毛有銘請免選本班以通判遇缺卽選並

賞加五品銜文童李光燎請以府經縣丞歸部遇缺卽選並

賞戴藍翎卽選道江忠義請

賞加勇號花翎知府劉嶽昭請以道員卽選藍翎知

縣楊安臣請以同知歸部遇缺卽選並

賞換花翎管帶吉林黑龍江馬隊委營總驍騎校德  
海請以佐領補用總兵銜補用副將奈星元請  
仍以副將歸部儘先推補升用副將楊恒升請  
以副將歸部儘先推補並請

賞給該員父母封典補用副將朱品文請

賞加總兵銜游擊銜都司朱惟堂請以游擊留於湖  
南補用同知銜知縣魏喻義請以同知歸部卽  
選其餘出力各營弁勇容臣彙案核保其陣亡  
之守備銜候補千總左策一請照守備例藍翎

把總張貴先王必貴戴正和蔣連陞均請從優  
照千總例

賜卹以慰忠魂所有大股逆賊勦敗竄粵現派官軍  
追勦並籌辦情形謹據實馳

奏伏乞

皇上聖鑒訓示謹

奏

咸豐九年八月十三日拜發奉

硃批另有旨欽此又原摺內或由柳州北境融縣懷  
遠一帶以入黔仍遂其竄蜀本謀或由廣西湖

南邊界竄廣東以回竄江西各字旁均奉

硃筆點又於候選同知直隸州金國琛請免選本班  
由軍機處記名軍機二字旁奉

硃筆點

另股賊匪竄投南路各屬防剿情形摺

奏爲另股賊匪竄擾南路各屬防剿情形彙案馳  
奏仰祈

聖鑒事竊石逆率大股竄攻寶郡其時另股匪徒分  
擾廣東廣西邊界與廣西賀縣懷集之匪廣東  
連州陽山之匪遙相附和出沒於楚粵交界地  
方倏合倏分賊蹤靡定其闖入楚界者大約以  
逆目何文彪及僞石國宗兩股爲大何文彪卽  
賴逆管下之僞渠帥隨大股由郴桂竄入永境  
後分由道州竄粵西擾富川而與賀縣之獍匪

羅嘉誨合最後由廣東嘉應州竄來者爲僞石  
國宗據各路探報該逆本聶姓廣東惠州人冒  
稱石姓此股人數頗多四月二十八日竄入臨  
武縣之牛市地方副將李輔朝率所部兵勇及  
臨武團丁設伏高坡擊之斃賊百數十賊由石  
嶺腳河岸向土坡墟竄逃李輔朝躡蹤追及斃  
賊二百餘名生擒十餘名追至粗石江斃賊三  
百餘生擒僞大司馬羅炳榮及餘匪六十三名  
奪獲旗幟鎗械百餘件馬五匹餘匪竄入藍山  
縣境五月初一日攻撲縣城知縣羅行楷率練

勇及各團勇嬰城固守鎗斃騎馬賊目一名坐  
四轎賊一名爬城之匪數百名賊退踞東西兩  
門外民房初二日賊復豎梯仰攻均經擊退是  
夜羅行楷令團勇縱火焚城外民房城上鎗砲  
齊發斃賊頗多初三日黎明賊向甯遠縣竄走  
初四日攻撲縣城知縣雷壽南署永州鎮右營  
守備賀炳翊率兵勇團丁憑城擊之轟斃騎馬  
賊目五名及首先爬城悍賊三百餘是夜賊攻  
益急城上兵勇隨宜轟擊斃賊不知其數黎明  
賊於北門外突出藤牌數十攢聚如牆各攜土



袋填壕而進雷壽南賀炳翊飭兵勇擲火罐焚之其由街中進者城上覷定開鎗輒應聲而倒共斃賊三百餘生擒僞將軍鄒三賊遂解圍竄走道州初八日知州王必迪護永州游擊中軍守備王綬國派在籍花翎都司周岐山花翎副知衙補用知縣蔣上溶迎擊於錐塘斃賊五十餘初九日周岐山蔣上溶襲賊於楊柳塘圍勇並至周岐山分三路衝殺陣斬僞將畧胡姓及悍賊九十餘是夜賊竄至上渡將竄永明初十日黎明周岐山追截其尾隊斃賊二百餘生擒

長髮賊陳復興王阿成等十二名而其前隊已於先日竄抵永明矣永明縣知縣唐涪燦守備詹榮陞率兵勇紮玉田堵截賊卽由對河三元宮直撲縣城團勇不能抵禦縣城遂失唐涪燦等救援不及退屯程義村二十三日賊分股竄擾道州屬之田廣洞帶勇團紳擬保把總劉光明及其子劉元吉力戰陣亡六月初二日唐涪燦等剿賊楓林坪斃賊數十臣調副將何紹彩魏喻義馳往勦之比何紹彩帶所部馳抵道州賊已竄入廣西唐涪燦收復縣城賊旋由灌陽

撲平樂府城經廣西藩司蔣益澧擊敗後仍從  
蔣家嶺回竄道州小坪筒車尾卽魏喻義七月  
二十九日所殲之賊其向永明竄逸者鎗礮已  
少不復成隊此逆目僞石國宗一股由廣東仁  
化竄楚竄廣西復分竄楚境卒就殲除之實在  
情形也廣西賀縣猓匪羅嘉誨旣竄擾江華縣  
屬之大岡頭逆目何文彪踞富川與相勾結江  
華縣知縣林周培巡檢顧壽田率練勇團勇禦  
之屢有擒斬五月初三日何逆羅逆會攻濤墟  
林周培等接仗失利退回縣城六月初二日賊

分八路擾犯嶺東營及雲川寶識各團團勇傷  
亡數百嶺東營守備向東昇戰敗營兵盡潰臣  
前調都司左光藻帶所部勇五百由道州赴江  
華相機助剿二十日永明之賊分股與何羅兩  
逆合力攻撲城壘左光藻林周培等率兵勇禦  
之衆寡不敵被賊四圍包抄營壘均失縣城遂  
陷賊旋退去林周培帶團勇收復縣城七月初  
五日賊竄擾江藍廳境馬頭市同知椿齡城守  
千總段士高會商鹽卡委員王鳳岡調派團紳  
汪際唐李宸軍功段士清等率兵勇禦之外委

何正光首先陷陣各團勇乘勢掩擊賊即敗潰  
追迫河邊溺斃無數計共斃賊四五百名奪獲  
大小鎗礮二十餘桿旗幟七十餘面賊仍遁回  
嶺東此何文彪羅嘉誨兩股竄擾江華經江藍  
廳截勦獲勝之實在情形也臣維廣東廣西匪  
徒前經官軍迭次痛勦頗懾楚威故雖廣西賀  
縣廣東連州陽山之賊頻年擾攘其地緊接楚  
疆賊黨往來皆繞道連州賀縣邊界蹤跡未嘗  
闌入自石逆竄楚兩廣之賊遙相附和逆目何  
文彪及偽石國宗聶逆兩賊復從而勾之而南

路邊境始復騷然然其意皆視石逆以爲進退耳此時石逆敗蹙入粵僞石國宗一股已經勦敗難以再逞邊境之患似可少紓惟石逆之竄粵西非其本志如不能由黔竄蜀則回竄江西亦意中必有之事各路所獲賊探曾有此供若回竄江西則楚省南路乃其必經之途自須先將邊地餘匪掃除杜其勾結頃因寶慶存亡關係大局故不得不以全力圖之未暇以重兵分途痛剿遂令此賊得以稽誅此時兵力足敷自當相機次第辦理所有南路守城殺賊各文武

官紳應核明彙案請獎其江華永明失事各員  
弁亦卽彙案參辦以昭公允是否如斯伏候

聖訓施行謹

奏

咸豐九年八月十三日拜發奉

硃批覽奏均悉唐涪燦林周培著查明參辦不准稍  
涉遷就以齊團調勇爲名欽此

代奏永州周鎮謝

恩摺

奏爲據情代

奏恭謝

天恩事竊據新授湖南永州鎮總兵周寬世呈稱本年七月初五日寶慶行營奉湖廣總督札開准兵部咨開奉

上諭湖南永州鎮總兵員缺著周寬世補授欽此查周寬世湖南人由鄉勇免補參將以副將留於湖南儘先補用加總兵銜今補授總兵應給予



永州鎮總兵官劄付令其赴任計發周寬世劄付一張等因奉此竊寬世一介武夫至愚極陋自咸豐三年應募充當鄉勇隨征楚江大小數百戰由未弁游擢副將

賞加總兵銜今復蒙

皇上天恩補授永州鎮總兵凡茲

隆恩之逾格實皆夢想所難期唯有益竭駑駘勉供驅策以仰答

高厚鴻慈於萬一寬世現奉調勦辦寶慶賊匪尚未到任呈懇代為具

奏叩謝

天恩等情理合據情代

奏伏乞

皇上聖鑒謹

奏

咸豐九年八月十三日拜發奉

硃批知道了欽此



會保援江官軍新城八捷出力員弁摺

奏爲會保援軍出力各員弁勇丁懇

恩獎勵事竊劉長佑一軍自攻克江西撫州後移軍

新城截擊福建回窺巨寇迭獲大勝當經江西

撫臣

奏報奉

上諭此次劉長佑一軍自新城擊勦福建窺匪直至南豐縣境先後擒斬逾萬大股狂寇殲滅幾盡邊境肅清尚屬辦理有效布政使銜江西補用道劉長佑著交軍機處記名遇有江西道員缺出請旨

簡放其餘出力人員著者齡查明擇尤請獎欽此  
江西撫臣比卽恭錄移咨到臣並行知劉長佑  
時劉長佑江忠義所部疾疫大作困憊萬狀經  
臣調回本籍休養因病勇行走遲滯臘底始克  
抵里適臣接據桂陽縣稟報有賊自閩粵邊界  
竄入江西南安府城卽飭劉長佑仍將所部弁  
勇挑汰募補從新整理聽調本年二月以石逆  
大股突犯楚疆劉長佑奉檄勦賊晨夕不遑未  
及稟保寶慶賊竄以後始據劉長佑開單稟請  
核

奏前來據稱當時殺賊立功各弁勇染疫物故者  
已多未及仰邀甄叙言之仍有餘痛懇請速爲  
核保以勵軍心臣維新城之役八獲全勝保全  
江西腹地殺賊之多蕨事之速勞績昭彰所有  
出力員弁勇丁自應仰懇

皇恩俯加甄叙以作士氣而勵戎行其江西出力官  
紳仍咨明江西撫臣耆齡彙案核保謹繕列清  
單會同前兵部侍郎臣曾國藩江西巡撫臣耆  
齡恭摺附驛馳

奏伏乞

皇上聖鑒訓示施行謹

奏

咸豐九年八月十三日拜發奉

硃批另有旨欽此

剿辦兩粵股匪連獲大捷現籌情形摺

奏爲剿辦兩粵股匪連獲大勝現在籌畫進剿情形恭摺由驛

奏祈

聖鑒事竊石逆竄楚之時另股賊匪竄擾南路防剿情形業經

奏報在案候選同知魏喻義剿辦粵西灌陽分竄道州境內之賊大獲勝仗後餘匪由永明竄入江華勾結前踞嶺東逆黨何文彪及廣西賀縣猥匪羅嘉誨等復擾江華之嶺西一帶八月初



十日管帶

陳品南在

百馳赴江

賊千餘自

都司陳盛

賊駭奔官

斬悍賊百

旂幟三十

計尙二萬

只一千四

所困不如乘勝掩擊先發制之是夜四鼓蓐食疾進陳品南陳盛世等率所部奔勇出右大路伏鵝塘黃瀆熙分所部一出右小路伏青竹坳一由中路潛攻賊背一由左路徑逼賊巢黃瀆熙自督親軍繼之黎明抵寶讖村賊巢賊方傳僞合出襲官軍尙未成列見官軍前隊猝至心易其少遽前格鬪都司賀連級率所部衝殺斃悍賊十餘賊猶抵死抗拒忽賊陣後人聲鼎沸則千總會志友已率所部潛出其背賊方駭愕不知所措官軍前後夾擊遂潰而奔其屯踞附

近之十三村賊衆皆望風驚走將西竄白芒營而陳盛世及藍翎把總熊英豪已各率所部自右路抄出一擊其首一擊其中賀連級曾志友復從後追擊賊不能脫遂奪路斜出坡子坳據險拒戰軍功袁九臯奮勇奪隘中鎗陣亡軍功申鳳林繼進亦中鎗傷適陳盛世曾志友等大隊繼至賊復敗潰軍功周奇才疾馳陷陣身受傷創血戰不退把總黃宗信手刃一驍賊諸軍乘勢蹙之逐北二十餘里至勾掛嶺收隊而還而岩口舖牛矢田神仙洞一帶賊巢均已平燬

嶺西一帶肅清計是役共殺賊二千餘奪獲僞印七顆大小鎗礮五六十桿騾馬六十餘匹刀矛旂幟無算餘賊敗入嶺東賊巢阻險自固黃濟熙以嶺東爲楚粵分界之處四面羣峯鑿刺地勢絕險難以深入惟蕨背嶺之險雖與勾掛嶺齊而距官軍稍遠意賊之備禦或疎二十日與陳品南商各飭所部攜乾糧星夜拔營急進留所部百餘於嶺西故壘多張旂幟以疑之二十三日行至蕨背嶺絕頂遙見賊巢厯厯可數正會商進剿間忽火光四起烟燄蔽天則賊已

焚巢翻山遁竄矣官軍追五十餘里至壕界始收隊而還此江華剿賊大勝縣境肅清之實在情形也廣東連陽逆賊久未掃除頻年以來屢與廣西賀縣諸賊出沒兩粵邊界自石逆由江西竄楚復遣另股分竄兩粵潛相勾結其勢更張臣前於石逆竄楚時曾

奏言賊黨亦有分竄兩粵者此也竄粵西者爲逆目何文彪及僞將石國宗聶姓兩股竄粵東者爲廣東惠潮江西南贛各股石逆在寶郡剿敗時曾遣賊黨分路求援於兩粵諸賊均約其八

月分竄楚境冀以牽制官軍其僞示中有云另  
以偏師由郴桂直取長沙者此也石逆自寶慶  
敗竄時兩粵之賊尙未之知果相率來犯其由  
粵西竄道州江華者既爲魏喻義黃澹熙陳品  
南所敗其由粵東連州乳源英德竄楚者嶺背  
黃全以上蔓延二百里賊黨計不止數萬之多  
八月初五日前隊已乘虛襲踞連州屬之星子  
司另股逆賊張清觀竄踞連州之潭源洞其地  
皆與湖南宜章臨武緊連補用副將李輔朝署  
宜章營參將陶國喜管帶永清營勇把總王福

元各率所部屯順頭嶺鳳頭嶺禦之十一日賊  
竄至大路邊官軍三路截擊斃賊三百餘生擒  
二十餘奪獲鎗礮旗幟百餘件馬五匹二十二  
三等日賊復竄嶺下均經官軍擊敗各有擒斬  
十四日連州星子之賊大至李輔朝陶國喜王  
福元接仗失利署宜章營把總李錦春外委楊  
秀文力戰陣亡兵勇亡傷者百餘名賊遂越嶺  
竄踞宜章之黃沙堡臣前接臨武宜章告急之  
稟知賊勢甚張駐郴之蕭啓江全軍及遊擊崔  
大光都司陶藻諸營均調援粵西賊必乘虛肆

暹檄調花翎都司胡國安帶所部譚勇八百由  
衡州馳赴宜臨交界助剿花翎都司梁開國率  
所部虎威軍六百自長沙馳往會之並調由江  
西回援之布政使銜卽選道張運蘭卽選道王  
文瑞帶所部老湘營副湘營全軍由衡州赴郴  
相機策應二十一日胡國安率所部馳抵宜章  
之倒馬舖距黃沙堡賊巢二十里與李輔朝陶  
國喜王福元及把總蕭紹銓白沙巡檢劉合林  
等會商進剿是日管帶桂勇花翎知府陳士杰  
帶所部馳抵相公塘鷓鴣坪署宜章縣知縣盧



肇煦帶義勇及臨武練勇五百餘馳抵栗源堡  
二十一日賊分股撲塘尾墟天堂墟盧肇煦率  
團勇擊卻之擒長髮賊廖亞金羅銀仔二名二  
十三日賊撲隆盛墟李輔朝擊卻之二十四日  
寅刻胡國安率全隊進剿先搜近村伏賊且剿  
且進行至黃家墟賊分十餘路蜂擁抗拒胡國  
安以奇兵分伏左右自率正兵由中路衝殺陶  
國喜王福元劉合林各從小路橫截而出李輔  
朝陳士杰督所部由隆盛墟分兩路一攻其前  
一截其後賊勢不支紛紛敗潰官軍奮威衝殺

將大園舖黃家墟等處賊巢一律焚毀賊退  
竄黃沙堡胡國安整隊窮追各營四面包抄火  
箭噴筒齊發賊之冒火衝出者復經官軍鎗斃  
矛刺尸橫遍野餘匪翻山竄逸者官軍分路窮  
追至廣東邊界小夏街一帶始收隊回營是役  
各營共計斃悍賊約二千餘生擒百餘名拔出  
難民男婦二百餘奪獲大小旗幟三百餘面大  
小鎗礮一百五十餘桿偽印十三顆刀矛籐牌  
雜械無數敗賊退竄連州屬之星子司此宜章  
剿賊大勝縣境肅清之實在情形也

臣維廣東

連陽一帶與廣西  
賊頻年勾結蔓延  
師乘勝越境追勦  
賊得以假息山谷  
以後人數愈多勢  
援之故各糾黨夥  
遁粵西爲之奪氣  
江西福建各省之  
何文彪一股本係  
素與賴逆不睦聞

追來救弁在股署及義延

摺漏未聲叙此次痛剿江華賊匪以寡勝眾戰功懋著可否仰懇

皇上天恩以直隸州知州儘先補用並

賞戴花翎副將銜參將陳品南驍勇善戰可否以副將留於湖南補用並

賞加勇號花翎都司胡國安忠實勇敢訓練最勤此次以寡勝眾尤爲出力可否以參將留於湖南補用其餘尤爲出力各弁勇可否由臣核實保

奏陣亡之署宜章營把總李錦春可否照把總例賜卹外委楊秀文六品軍功郭成甲羅盛世血戰捐

軀可否均照外委例

賜卹之處伏候

聖裁所有剿辦兩粵股匪連獲大勝楚境肅清情形

謹據實馳

奏伏乞

皇上聖鑒訓示施行謹

奏

咸豐九年八月

日拜發奉

硃批另有旨欽此

卷之三十一

已未年

四

援粵官軍獲勝桂林重圍漸解相

奏爲官軍援粵獲勝粵西省城重圍漸解現在籌畫情形

奏祈

聖鑒事竊石逆敗竄粵西臣飭布政使銜卽選道蕭

啓江率所部全軍入粵援剿續飭布政使銜記名按察使劉長佑率全軍繼之又以蕭啓江一軍兵力尚單復調花翎遊擊崔大光花翎遊擊銜都司李金賜花翎都司陶藻等帶所部勇丁一千六百餘隨同進剿其劉長佑一軍去臘甫



自江西凱旋染疫病故者既多今春倉卒募集成軍卽轉戰永州祁陽東安新寧武岡寶慶諸處復由寶慶追賊至東安勞瘁殊甚在寶慶時各軍士卒冒暑苦戰爲積屍之氣所蒸疫癘復起劉長佑一軍尤甚比至東安則十病六七矣臣飭其迅速挑汰以免傳染一面召集精銳整理成軍尅期進發逆賊畏楚軍速至過全州時不敢逼攻城垣趨踞興安臨川兩縣而於嚴關大溶江一帶延紮營壘以拒援軍其僞石國宗聶姓一股勾結粵西恭灌各賊以先由興安靈

川撲廣西省城臣以蕭啓江所部勇丁六千餘  
名雖患病者亦多然究係生力之軍尙堪整理  
檄催速進蕭啓江由全州趨興安收復縣城探  
報逆首石達開之五旗賊目設卡塘埠營百子  
舖一帶其大股尙屯踞大溶江八月十九日卯  
刻蕭啓江飭擬保副將胡中和副將銜參將蕭  
慶高參將銜遊擊何勝必唐星照等率所部四  
營由左路進擬保升用副將梁萬貴參將秦華  
祝都司陶藻等率所部三營由右路進遊擊銜  
都司李金賜率所部出中路遊擊崔大光黎得

勝繼之蕭啓江自率副將銜參將朱桂秋以中營居中策應李金暘遇賊塘埠營擊賊敗之窮追至百子舖焚賊巢十一所賊悉狂奔復追至中路司門前匹馬衝入賊陣手斬二騎賊而奪其馬時黎得勝崔大光等已由中路馳至七里墟梁萬貴陶藻亦由右路馳至賊甫過河官軍兩路齊撲逼溺水中無數崔大光黎得勝等乘勝覓水衝殺各斬騎馬賊目一名斃賊百餘李金暘亦從司門前渡河忽傍山數村伏賊齊出而司門前對岸之賊亦排列十餘里蕭啓江慮

各營窮追中計急令更番徐退誘之逆賊亦殊  
狡甚旋復卻退惟大溶江對岸之賊尙與左路  
官軍相持蕭啓江併調中右兩路擊之各營並  
進奮威衝殺陣斬賊目二名斃賊數百賊勢不  
支紛紛奔潰是役往返百餘里出賊不意竟獲  
全勝大溶江之賊旣敗塘埠百子舖之賊亦走  
石逆時在靈川斬先退賊目四名以狗猶不能  
止其奔也遂焚所掠穀米向西路遁走二十三  
夜探報賊已由靈川甘石舖竄義甯縣龍勝廳  
一帶二十五日蕭啓江拔營趨桂林桂林撲城

之賊亦經前管帶焯勇調留粵西之蕭榮芳擊  
敗其東北一帶聞已無賊惟西南路之賊尙屯  
踞如故劉長佑於二十八日拔營進至全州探  
報石逆又已竄至永福縣聞柳州之賊已出巢  
應之平樂所屬及廣西各股賊匪均有勾結合  
夥之意石逆去留蹤跡雖尙未定然義甯永福  
可南竄柳州可北竄黔邊自應預爲防範臣前  
聞石逆屯踞靈川已飛飭提督銜總兵田興恕  
由東安新甯武岡綏甯赴靖州並屬其到武岡  
時確探粵西龍勝廳懷遠縣一帶有無賊蹤相

機取道截剿該總兵已於前月二十六日拔營  
據靖州稟報融縣懷遠一帶尙無外來賊蹤惟  
貴州之賊已有由梅寨僱船順流而下柳州者  
揣度賊情或係邀約石逆入黔亦未可知臣維  
石逆久畜竄蜀之謀而黔之北境卽蜀之南境  
黔亂已久痞苗教匪蟻集蜂屯不可數計石逆  
前攻寶慶時此間盤獲賊謀貴州開泰縣人江  
卓據供古州賊首余老科已帶賊七百餘由粵  
西隨諸賊至寶慶與石逆合如其勾引入黔則  
賊勢必張而入蜀奸謀殊爲可慮蜀中自昔爲

戰爭之所以其北蔽關陝東連豫楚西南徑達  
滇黔形勢常爲天下最非若黔粵之僻處一隅  
可比也臣前淮川督臣咨開防禦之畧布置雖  
周而軍薄可慮若不能早爲之所專盼外援不  
但沿邊千里勢難遍及且援軍相距太遠亦實  
有緩不濟急之虞天下事變之來逼之未然者  
易爲力救之已壞者難爲功臣不能不爲鯁鯁  
過計也至楚黔之交如有須截剿逼其竄蜀之  
處臣自當隨時籌辦竭心力所能到者謀之斷  
不敢稍涉推諉仰煩

聖慮所有援軍獲勝桂林重圍漸解情形謹據實陳  
奏伏乞

皇上聖鑒

示謹

奏

咸豐九年九月十九日拜發奉

硃批另有旨欽此





逆目周學韓等投誠片

再逆賊黨羽之多因其隨處誘脅丁壯及迫令蓄髮面刺太平天國等字樣致被脅之民不能自脫雖從賊非其所甘而逃出又恐爲官軍及鄉團所殺小民愛惜身命進退兩難轉念溷跡賊中或可紓旦夕之死故雖百端譬曉終難盡釋其疑臣於此次逆賊竄楚之時卽刊發簡明告示數千張遍貼衝僻各處無論長髮短髮棄械投誠卽給免死護票資遣歸籍不准官軍濫殺要功並不准鄉團藉端擾累其頭面刺有字

跡者明係不甘從賊逆目恐其逃走故設法黥面斷其反正之心此等尤堪憐憫諒飭各州縣諭令鄉團凡遇面有刺字者毋得妄殺致墮賊人奸計此示一張各省難民逃出領票歸籍者約以兩萬計其未曾領票徑自逃歸者尤復不少頂據布政使銜劉長佑稟稱自奉示後被脅難民由該營拔出者先後約計萬餘賊中暗相傳誦羣思解散七月二十七日有偽大軍畧周學韓與偽統戎黃士周周本成蕭祖貴等五十餘人逃至該營幫辦蕭逢漢處請其帶赴大營

面縛請罪據供素係販鹽生理咸豐三年在江南被賊擄入迫受僞職今蒙恩矜全請隨營自效並懇飭知原籍永州零陵府縣免其查拿等情臣當卽批示周學韓等被賊迫脅自拔來歸尙可免其一死准留營差遣責令自效至此次石逆黨夥惟湖北江西安徽廣東四省人數最多湖南貴州次之廣西又次之臣擬移咨各省督撫凡遇湖南給有免死護票者概免查拿卽未領護票私自逃歸者如查係良民被擄亦應一律免其查辦並令鄉團毋得挾嫌擾累以安

反側其向係地痞惡棍投入賊營及曾充鄉勇  
被賊擄脅敗後潛歸者仍應由地方官查明懲  
辦庶於撫剿機宜不無少補是否如斯並懇

皇上訓示謹

奏

咸豐九年九月十九日拜發奉

硃批另有旨欽此

駱文忠公奏稿卷之十六目錄 湘中稿

己未下

覆陳粵西重圍已解及蔣藩司用兵情形摺

剿辦粵西回竄股匪擒斬逆渠摺

解還湖北借撥火藥片

楚軍越境剿辦粵匪獲勝摺

查參桂陽等縣失守文武摺

彙保援黔官軍出力員弁及邊防文武摺

援黔官軍克復鎮遠府衛兩城摺

楚軍越境剿辦廣東禾洞賊匪擒斬首逆摺

請建表忠祠求忠書院摺

湖南軍餉缺乏黔餉請

勅部議摺

蕭道一軍改道馳赴黔蜀之交摺

楚軍剿辦黔匪獲勝並飭田鎮由黎平進剿片  
請留處州劉鎮差委片

庚申

皖賊上犯請調蕭道全軍改道援皖固鄂摺

覆陳粵西重圍已解及蔣藩司用兵情形摺

奏爲據實覆陳仰慰

聖懷事竊臣於九月二十一日承准軍機大臣字寄  
九月十一日奉

上諭曹澍鍾奏大股逆匪圍逼省城請飭催湖南援  
軍合力剿辦一摺逆賊石達開經湖南官軍痛剿  
後敗竄廣西沿途裹脅勾結不下十萬餘人圍撲  
省城雖經文武紳團嚴密堵禦並迭次截剿殲斃  
甚多惟賊衆兵單不敷分布所調赫勇等軍復沿  
途阻滯一時未能趕到駱秉章前派蕭啓江劉長



佑兩軍赴援現於新安靈川一帶爲賊所阻節節  
攻堅未能長驅直進桂林情形待援甚急設有不  
虞使該逆踞爲巢穴剿辦更難措手著駱秉章飛  
催該二員迅速繞道前進或再添撥重兵接應毋  
得遷延並著曹澍鍾一面飛提楚軍一面督率文  
武員弁極力守禦以待援師毋稍鬆勁劉長佑蕭  
啓江等軍俟入廣西地界卽著統歸曹澍鍾調遣  
以一事權將此由六百里諭令知之欽此二十二  
日復奉到十三日

寄諭昨據曹澍鍾奏賊匪圍逼桂林省城請飭催

南援軍合剿業經諭令曹澍鍾固守以待援師本日復據李載熙奏楚匪竄粵城圍方急賊營自西南城外起蔓延百餘里不絕西南北三面道路梗塞文報不通東路恃扒船捍禦而十數里外亦有賊蹤柳州湘勇千餘及另起志同軍赫勇千餘均爲賊隔別無可恃之兵情形實屬非常危急桂林一城關係全省大局設令賊蹤攔入剿辦更難措手蕭啓江劉長佑兩軍據稱已入粵境而尙阻於興安靈川一帶著駱秉章飛催該二員迅速設法繞由間道前進並著添撥重兵竭力赴援不致孤

軍深入方操勝算勞崇光統轄兩粵著派撥重兵  
星馳援應力解城圍並須設法籌辦餉需源源接  
濟毋令匱乏曹澍鍾身任封圻責無旁貸著一面  
飛提楚軍一面督率文武員弁竭力守禦以待援  
軍毋稍鬆勁本日又有人奏廣西藩司蔣益澧刻  
薄寡恩士卒解體坐擁厚貲兵民切齒各款蹟業  
經明降諭旨將蔣益澧革去藩司以道員降補並  
著曹澍鍾將蔣益澧被叅各款查明叅奏矣至蔣  
益澧所部兵勇著交新任臬司劉長佑統帶責令  
迅速剿賊所有疲病各勇卽著劉長佑分別裁汰

以節經費而肅戎行欽此仰見桂林被圍援師遲

緩

聖懷憂切有加無已之至意

臣

跪誦再四愧悚難名

頃據蕭啓江十一月廣西省城來稟具稱八月二十八日所部全軍已抵桂林一路通行無梗各營駐紮城北初四日各軍三路進剿斃賊數百中路銳進因地勢生疏中賊地雷傷亡弁勇竟至五百餘名之多劉長佑於初九日馳至桂林共籌進剿賊聞楚軍大至卽於是夜卯刻悉數由南路遁竄城圍立解現在正籌追剿並據

稟稱竄撲廣西省城者爲僞石國宗一股至石

逆達開尙踞義甯永福一帶又准廣西撫

臣曹

澍鍾咨初十日解圍情形相同並稱拏獲賊探

有圖竄江西之說請嚴加堵禦

臣

查此次竄撲

廣西省城之僞石國宗卽

臣

前奏另股賊匪竄

擾南路各屬摺內所稱石逆率大股竄攻寶郡

其另股攔入楚界者以逆目何文彪及僞石國

宗兩股爲稍大各路探報該逆本聶姓廣東惠

州人冒稱石姓此股人數頗多者也李載熙奏

此賊蹤跡及賊數約不過三萬餘與

臣

奏頗同

所稱後至者爲石逆寶慶敗回之賊約不下三四萬與臣前奏寶慶解圍賊之竄逸粵西者尙有數萬之多亦相符合惟李載熙奏稱該逆遁至東安與其黨謀所向欲暫取粵西以爲後圖不得則竄踞南寧爲再出計疊據拏獲奸細所供大畧相同而曹澍鍾來咨又稱拏獲奸細賊意欲回竄江西彼此互異現在桂林圍解逆賊業已悉數南竄各處稟報皆同石逆達開尙踞義甯永福與否則未可知劉長佑前以桂林賊勢已鬆擬先攻義甯專剿石逆以後亦尙未接

其續稟卽曹澍鍾李載熙原奏雖皆知以石逆爲重而於石逆蹤跡卻未能確切指明亦未言援軍急宜專注石逆或以石逆尙可緩圖而桂林之圍必須急解耳所不可解者李載熙原奏係八月二十七日拜發稱蕭啓江所部已入粵境柳州雖有湘勇千餘及另起志同軍焯字營以檄調稍遲爲賊所隔至今未到此外別無可恃之援等語查蕭啓江一軍實於二十八日馳抵桂林據管帶焯勇之蕭榮芳稟稱由柳赴援二十五日在石門洞得獲大捷亦於二十八日

到省曹澍鍾二十八日業經具

奏彼時桂林東北實已無賊文報常通李載熙近  
在一城何以先一日拜摺之時竟無聞見而乃  
以省城危急外援難到情形入

奏致煩

聖慮臣於賊初竄粵西蕭啓江一軍遲到兩日未及  
攔截之時卽預飭蕭啓江入粵追剿以所部僅  
四千五百人兵力尙單復增調一千六百人益  
之比聞賊已越全州而竄興安恐其全股撲犯  
桂林卽飭劉長佑率全軍繼進其時並未知僞



石國宗一股已先撲桂林嗣聞此股逕撲桂林而石逆大股尙踞興安靈川以阻追師劉長佑所部士卒又染患疾疫自應聽其整軍徐進以策萬全且僞石國宗一股人數雖多然自粵東竄楚以來歷撲藍山甯遠各縣城池皆經各文武擊退其另股回竄湖南道州者又爲魏喻義所殲均經臣

奏報在案是此股雖逕撲廣西省城似亦無甚伎倆蔣益禮旣已於八月初二日馳入省城所遺援省之訓導胡錚雖已敗沒而所部蔣澤春之

湘勇蕭榮芳之赫勇方  
奏守城各事均謂布置  
軍援粵無論必過興安  
小路可逕赴桂林且並  
宗援軍討賊自應先其  
先赴桂林以援省城劉  
先剿義甯以除巨憝截  
避重就輕可比臣於審  
卽預擬援粵豈不知援  
輕重緩急攸分援軍分

有未

乎至

江鄂

恩游擢知

勢殊

後桂

留粵

光

奏報蒙

恩游升廣

集該員少年氣盛閱歷甚少自以身經百戰頗習兵事每論用兵事宜於僚屬及各紳多所凌忽臣早慮其不能以功名終勞崇光赴廣東時亦頗以爲慮然廣西一省除該員所部水陸各勇外實別無兵勇可調以積勞疲病之卒當大股竄逼之時未能迅籌痛剿原屬咎無可辭皇上鑒其微勞僅予薄罰該員感

天地生成之恩應如何激發天良勉思報稱至該員被叅各款有無實據均在勞崇光巡撫任內及曹澍鍾藩司任內時事自無難一一查明叅

奏至逆目何文彪一大股由粵楚交界之處竄入  
湖南江華嶺東又竄江藍廳業經知縣黃涓熙  
副將銜補用叅將陳品南痛剿其由粵西最後  
竄入湖南之逆首賴裕新據報亦經官軍殲斃  
何文彪轉竄甯遠縣魯觀洞及藍山縣大橋等  
處又經花翎知府陳士杰卽選同知魏喻義痛  
剿賊目何文彪據報已於藍山生擒共計斃賊  
兩萬有餘解散難民數千俟臣查明再行馳

奏仰慰

聖懷石逆不由黔竄蜀卽由湖南廣東回竄江西業

經臣

奏明在案現併飛咨四川廣東江西嚴密防堵一面調派兵勇嚴防道州水州一帶以期力遏狂氛所有廣西城圍已解據實覆陳情形理合馳奏伏乞

皇上聖鑒訓示施行謹

奏

咸豐九年九月二十四日拜發奉

硃批覽奏詳悉欽此

已未下

剿辦粵西回竄股匪擒斬逆渠摺

奏爲剿辦粵西回竄股匪疊獲大勝擒斬逆渠

奏祈

聖鑒事竊江華賊匪經卽補直隸州知州黃淳熙副  
將陳品南疊次痛剿逃竄嶺東復自嶺東竄出

粵境經臣

奏報並聲明逆目何文彪與賴逆裕新不睦聞賴  
逆西竄又欲避竄廣東以延殘喘已調卽選同  
知魏喻義卽選知府陳士杰等由臨武藍山進  
副將何紹彩由甯遠進黃淳熙陳品南由江藍



廳進蓋擬截其竄廣東之路免致會合鴟張也  
八月二十六日逆日何文彪由廣西邊界攻破  
大錫圍卡分數道逕撲江藍廳城同知椿齡嬰  
城固守東西南三面環山皆賊也黃瀆熙陳品  
南聞警繞由水口兼程疾進二十九日抵梅子  
溝而營距西路賊營十里是夜黃瀆熙陳品南  
分所部爲四隊藍翎把總熊英豪等以二百餘  
人由雷公嶺出茅栗寨防賊後應兼護廳城藍  
翎都司賀連級等以百餘人自大灣山北攀崖  
而上潛伏賊卡之後俟大隊近攻賊卡卽出擊

之爲奇兵黃涓熙偕幫辦童生唐永清曾傳道  
監生陳元盛督同藍翎千總會志友藍翎守備  
趙華山黃宗信等以四百餘人直攻大灣賊卡  
陳品南偕幫辦遊擊銜藍翎都司陳盛世等以  
三百餘人繼之爲正兵五鼓行抵大灣賊甫驚  
覺曾志友遽毀柵而進賀連級等自卡後躍出  
鼓譟乘之時星光微明賊不辨官軍多少棄卡  
狂奔官軍大隊合勢追殺逕抵馬頭鋪賊巢賊  
傳餐未遍見官軍突至大驚不戰而潰官軍乘  
勢蹙之羣賊狂奔前阻一溪逼溺者無算後賊

藉屍而渡官軍正躡蹤及之忽廳城東茅栗等寨之賊列大隊沿河而西將襲官軍後路熊英豪所部適於河岸相值橫躍入陣大敗之賊奔廻龍村又敗之追十餘里至黃竹寨復追出大坪村又敗之適西南兩路賊眾經黃涓熙曾志友等追至黃竹寨將與前竄大坪之賊合熊英豪以前後皆賊非二百餘部勇所能敵乃橫出山岡嚴陣待之賊眾既合欺官軍勢孤驟蜂擁來撲並張兩翼抄之軍功陳大勳官光輝鄒最輝吳有勝鄧鳴球張能敵賀春榜等縱橫血戰

皆死之勢殊危急陳品南適追賊踵至急分所部爲三路一擊其左一擊其右一直搗其中鏖戰半時始衝重圍而入與熊英豪合復追至冷飯灘收隊而還是役斬賊目二十餘名奪獲僞官照二十三張僞印二顆斃賊三千溺斃無算奪獲馬騾三千餘匹旗幟器械不計其數此九月初一日黃涓熙陳品南援江藍廳迅解重圍攻克馬頭舖朝陽錦陂等賊踞村寨十餘處大獲勝仗實在情形也何逆率餘黨敗竄藍山黃涓熙等擬卽追之忽報屬城南三十餘里高村

地方有首逆賴姓率賊數千自廣西竄入黃滄  
熙陳品南回軍擊之是時陳士杰已率所部馳  
抵藍山之長舖魏喻義已率所部馳抵藍山之  
竹竿寺何紹彩亦由四眼橋繼進何逆知前路  
均爲官軍所截折從八仙嶺珠樓門竄入甯遠  
之魯觀洞洞居九疑之巔巖壑幽險內夷外峻  
旁卽癩子山縣亘數百里路通兩粵山之陽路  
通甯遠道州藍山嘉禾四州縣地向爲羣盜出  
沒之所自初四至初七日陳士杰擊賊珠樓門  
九疑洞盤洞等處斬賊近千生擒五十餘據生

賊供將於旦夕傾巢遁走陳士杰督所部及猪  
勇於初八日卯刻一由癩子山翻山而入一由  
鴨渡洞馬蹄坳突襲賊後賊衆驚潰官軍從山  
梁馳壓而下鎗礮聲震山谷賊見官軍入險相  
率奔逃官軍從後蹙之每遇山廻峯轉地勢逼  
窄之處人馬擠陷坎塹皆滿落嶺槽羊角田涼  
亭坳三處斃賊尤多陣斬僞渠帥劉順禧僞檢  
點鄧聞喜僞統戎何鳴盛等七十餘名奪獲馬  
騾二百餘匹賊將由下灌竄出甫至蕭家嶺魏  
喻義預遣六哨勇丁伏於左右石山賊至伏發

斬前隊賊千餘何紹彩所部復由猴子坳及羊角壩左右橫出截之賊復折竄白水坳前逼石壁徑路俱絕魏喻義何紹彩三面薄之賊之墜巖冒石而死者數千屍如山積其未及墜巖者大小男婦約尙三千餘魏喻義急令各軍齊呼棄械免死僅戮僞渠帥李大成餘俱泥首乞命均令薙髮給票遣歸奪獲馬騾一百八十五匹僞印百餘顆旗幟軍械不計其數餘賊散竄藍山縣境各徭山陳士杰飭所部勇會藍山團勇分途追之何紹彩部勇亦至初九日追至小源

山一帶遇敗賊踉蹌奔逃各勇直前追殺大呼  
棄械免死賊均伏地乞命內有賊目十餘稱賊  
渠何名彪已受子傷挾其死黨數百向大源一  
帶徭山遁走官軍卽夜窮追至大源簸箕山生  
擒逆渠何名彪解赴藍山陳士杰會同知縣羅  
行楷將生擒及乞降各賊訊明除將僞軍師李  
和尙凌世福僞統戎毛昭榮僞指揮許洪量等  
二十三犯斬決外將逆渠何名彪及賊目李得  
勝羅財新劉才高等犯取其供狀分別羈禁押  
解計是役共斃逆賊七八千生擒二千餘解散



遞回難民大小男婦五千餘名口大股無一漏網此九月初四至初十日陳士杰魏喻義何紹彩追剿何名彪卽何文彪股逆連獲大勝全股蕩平實在情形也其竄踞高村者爲首逆賴姓石逆達開令與何文彪合營且監之何逆走大錫時賴逆已抵張家洞適何逆攻江藍廳城爲黃涓熙陳品南所敗竄出藍山縣境賴逆遂踞楚粵交界之牛尾嶺麓杉木根地方植巨木爲城分屯逆黨於河西大寨黃馬石龍諸處阻險自固九月初五夜大霧四塞黃涓熙陳品南會

商賊巢極險官軍力單急宜出不意攻之四鼓  
會督所部銜枚疾進各於昏暗中覓徑蛇行初  
六辰刻抵賊卡宿霧未收藍翎千總會志友等  
首先奪隘而入賊大駭反奔官軍追殺至大王  
廟中隔一溪賊踣淺竄西岸少頃霧收黃涓熙  
等登高瞭望見黃馬石龍高村登掛軍屯橋碑  
各寨之賊陸續齊出隨令藍翎把總熊英豪由  
左岸踰山東行繞出賊背幫辦生員曾傳理等  
以親兵百餘人繼之都司賀連級守備黃宗信  
等自下游西渡伏於山峽曾志友等渡溪迎擊

陳品南陳盛世等繼之兩軍甫渡畢賊已列陣河洲以待官軍整隊齊進大小鎗礮連環繼發斃賊無數賊陣稍動適賀連級率所部自山峽突出腹背夾攻賊遂大潰官軍乘勝驅殺徑抵大寨熊英豪鍾開誠復自山左抄出合隊奮擊賊奔杉木根木柵拒守官軍分路躡之將抵木城忽東岸山谷有賊數百勢欲繞出官軍之後黃淳熙急分軍截之親率各軍直逼柵下賊由柵隙開鎗抗拒復自望樓擲石下擊官軍中傷者數十人相顧奪氣曾傳理曾傳道陳盛世等

急以大鎗劈山礮分布四隅連環轟擊屋瓦皆  
飛望樓二座亦碎各弁勇徑前奪門而入前者  
中鎗倒地後者復進賊不能支遂破其右兩門  
而入賊急竄入民房官軍縱火焚燒自相踐踏  
及被焚死者無算其冒火衝出者官軍四面圍  
刺悉殲之柵中賊二千餘無一倖逃者首逆賴  
姓亦斃其中其東岸山谷之賊見木城火起知  
老巢已破分竄牛尾嶺唐永清及曾志友賀連  
級分途追殺椿齡所部勤勇及獠勇復自嶺馳  
下截擊擒斬殆盡會合收隊而還是日官軍以

一日一夜之力奔馳百餘里斃賊數千兼斃首  
逆所有賊之輜重及偽印偽照旗幟等項均付  
一炬此九月初六日黃淳熙陳品南剿辦賴逆  
一股大獲勝仗全數殲除之實在情形也臣維

逆日何文彪與首逆賴裕新不睦自抵道州後  
卽分竄粵西四月內賴逆攻陷東安復繞竄全  
州者據賊中僞文乃因追何文彪之故蓋何逆  
所屬賊衆二萬餘雖爲賴逆右四旗大軍略而  
其勢力固足相當賴逆恐失其助也嗣因石逆  
急圖寶慶調賴逆由新甯武岡會撲郡城何文

彪遂留粵西時出沒楚界比石逆賴逆敗竄粵西何逆復圖由江藍廳藍山竄合廣東諸賊以擾江西是何逆之圖竄兩粵邊界者意在避賴逆賴逆回竄湖南邊界者意在追何逆以賊蹤賊情言之似高村賊目之爲賴裕新本有可信據江藍同知兩次稟報亦稱首逆賴裕新卽連州獲賊口供亦稱賴剝皮亦入此股賴剝皮卽賴逆綽號也惟高村股匪全數焚斃屍骸已成灰燼無從認質此股逆首雖確知爲賴姓而其爲賴裕新與否尙未可知軍事最宜質實臣不

敢以無據之辭上瀆

宸聰也逆日何文彪於陣擒後服毒自盡已據陳士杰割取首級解省并將投誠賊日李得勝等八名及該逆之妻盧氏押解前來臣委員分別審

訊質明無異除將該逆首級梟示外李得勝等八名訊係自拔歸誠仍發還陳士杰營安置盧氏審係江西南康縣民女上年十一月被該逆強擄爲妻現咨江西撫臣速飭南康縣傳其親屬給領至此次剿辦巨股賊匪擒斬焚斃及解散之數實不止三萬之多渠日均就擒斬全數

蕩除並無漏網帶勇各員分馳截剿頗著微勞  
花翎卽選知府陳士杰可否以道員歸部卽選  
卽選同知魏喻義可否

賞戴花翎花翎直隸州知州黃溥熙可否以知府留  
於湖南補用花翎副將陳品南可否

賞給該員父母封典其餘各員弁兵勇可否由  
臣核保之處出自

皇上天恩所有剿辦粵西回竄股匪疊獲大勝擒斬  
逆渠情形謹查明據實陳

奏伏乞



聖鑒訓示施行謹

奏

咸豐九年十月十一日拜發奉

硃批另有旨欽此

解還湖北借撥火藥片

再前因江西南安股匪竄擾楚疆圍撲寶慶府城經臣調派水陸各勇分途進剿月需火藥甚鉅誠恐趕辦不及據總局司道詳請咨借湖北火藥接濟旋經督臣官文先後

奏明在於湖北糧台總局借撥火藥四萬觔加工鎗藥一千觔門藥一千兩解南交局濟用在案茲查湖南火藥暫可敷用湖北現當整師東下需藥浩繁湖南前借北省火藥四萬觔加工鎗藥一千觔門藥一千兩已由局如數動撥派委

候補庫大使石時懋等分領解還北省糧台總局驗收並據詳請具

奏前來除照詳批飭撥解外所有解還湖北前借火藥緣由理合附片具

奏伏乞

聖鑒謹

奏

咸豐九年十月十一日拜發奉

硃批知道了欽此

楚軍越境勦辦粵匪獲勝摺

奏爲官軍越境勦辦廣東賊匪疊獲大勝仰祈

聖鑒事竊廣東賊匪竄入宜章縣境之黃沙堡經臣

調派參將胡國安等馳往勦辦克獲大勝敗賊  
竄廣東連州之星子司比卽

奏報在案臣以廣東之賊本係石逆夥黨由江西

福建分竄廣東者除僞石國宗一股外人數尙  
七八萬其竄逼楚境亦因石逆勾引而來維時  
何逆文彪及續由廣西竄來之賴逆方竄擾江  
藍廳藍山甯遠各屬與廣東諸賊遙相附和妄

意楚軍方援粵西冀可乘虛以逞臣於賊退星  
子之時卽飭布政使銜卽選道張運蘭花翎卽  
選道王文瑞由宜章越境追剿調花翎參將彭  
聲發都司張義貴帶所部千人益之適何逆全  
股剿滅並飭卽選同知魏喻義由藍山臨武會  
師並進亦料何逆就擒各賊聞之膽破機有可  
乘也九月十五日張運蘭王文瑞師次黃沙堡  
與胡國安梁開國之軍合是日魏喻義之軍繼  
至十八夜四鼓張運蘭等約諸軍四路急趨星  
子十九日天明齊抵賊巢賊出隊分拒官軍奮

擊大破之賊棄壘遁官軍分隊窮追三十里至馬頭坪收隊而還計是役各營共斃賊三千餘生擒一百二十餘內有僞總制徐明鳳僞旅帥曾尚仁等奪獲旗幟器械無算敗賊分竄西江墟茶田麻埠而大股屯集九陂石塘富村洞鴨子田等各老巢衆猶數萬張運蘭等議賊勢零星散漫分剿則動虞牽制不如俟其歸併聚而殲之三十夜四鼓得連州圍總藍翎縣丞成兆侯探報敗賊投入九陂石塘泥潭諸處擬會襲連州三江兩城以爲巢穴意以距楚境稍遠楚

軍或不遽來也張運蘭與王文瑞魏喻義胡國安等會商宜出不意乘之十月初一日各營先後馳抵連州初二日卯刻分帶成兆侯所派熟習路徑之團勇數名爲嚮導密令成兆侯速搭浮橋濟師張運蘭一軍甫出城六里至四方營卽遇撲城之前隊賊數百人負梯板至見楚軍旗幟駭而奔官軍突擊敗之三路衝殺至火燒廟忽賊數千列隊迎拒官軍奮威衝殺立斬大旗賊目數名及悍賊百餘賊奔相子洞與九陂之賊萬餘合併卓旗返撲適石塘之賊約二萬

餘從對面石山衝出意圖夾擊官軍張運蘭分所部爲四飭花翎參將劉松山劉光明力敵中路藍翎遊擊陳青雲花翎參將文恒久由左路截殺花翎參將朱紹輝由右路衝入各營愈鬪愈奮銳不可當立斃賊三千餘遂破九陂賊巢張運蘭復督幫辦花翎都司張廣勝等由中路直搗石塘立將賊巢攻破方擬傳令稍憩忽登高瞭望見四面援賊旗幟紛出巖谷皆滿均向九陂石塘撲來仍分隊迎拒路險林密不能用衆乃散隊縱擊之約復斃賊二千餘賊衆亂竄



窮追至一山峭石壁立攀登墮落死者無數王文瑞由連州西門過浮橋剿泥潭之賊胡國安梁開國繼進行數里接三江城都司德勝飛報賊逼汎城王文瑞急進連剿邵村泥潭之賊直抵三江城約斬賊二千數百內有賊目蘇子泰黃贊英羅廷文僞丞相毛世惠等生擒僞將軍鄢合隴等三十餘名胡國安梁開國擊賊於龍口亦大有擒斬計是役共斃賊九千餘生擒七百餘名解散脅從約數千奪獲騾馬一百數十匹旗幟礮械僞印不計其數賊之老巢悉破而

連州三江兩城得以無虞矣時彭聲發張義貴率所部馳抵連州張運蘭以敗賊復聚白虎墟慮三江城有失遂令移所部守之初七夜彭聲發等馳報是日酉刻賊撲三江城已經擊退張運蘭料其必將復至派張廣勝花翎同知劉生璫等復率各哨援之親督所部與王文瑞同出九陂石塘截擊胡國安梁開國駐四方營以爲策應初九日辰刻賊果悉數攻撲三江汛城張廣勝劉生璫等甫行抵龍口卽與賊遇遂麾步隊嚴陣以待馬隊從旁抄擊張義貴率所部復

從城內殺出賊勢大潰陳青雲文恒久  
等督各哨追至猗山張廣勝督各哨及  
至小傘兩路共斃賊近三千旋聞後隊  
三江城張廣勝等急回旗迎剿甫至新  
聲發被賊圍裏勢方危急花翎遊擊何  
喻煥成憤甚率馬步隊大呼陷陣遇賊  
入重圍彭聲發時已受刀矛傷十數處  
軍左右衝突又賊五人見援師至復合  
賊敗向東塘而竄適陳青雲文恒久由  
回正迎其頭易開俊復由大路衝至三

斃賊約二千餘連陽營遊擊任仕魁亦帶勇追至賊奪路鼠竄向連山廳一路而去官軍始收隊回營是役各營共斃悍賊四千餘名內有偽指揮偽正將軍等賊目十餘名獲偽印十四顆馬騾八十餘匹刀矛旗幟無數生擒賊及拔出難民約四五千其潰竄嵯山經連州各鄉團獍民擒斬者無數可紀而三江城圍立解白虎墟積年老賊巢穴始清矣彭聲發回營後因身受重創次日殞命張運蘭令張義貴等仍駐三江汎城偵敗賊所向剿之探報敗賊遠竄連山廳

之寨岡墟有人粵西邊境會合賀縣懷集各股賊匪之耗臣於張運蘭稟報連州肅清時卽以連山廳屬禾洞地方現有徭匪羅嘉誨卽羅亞會一股久踞於彼與湖南江藍廳廣西賀縣邊界相距不遠廣西賀縣之賊稽誅已久懷集及平樂所屬餘孽甚多連州大股賊匪經此次痛剿不能復竄江西若與廣西諸賊勾結則廣東之禍雖紓廣西之事必急當密飭張運蘭由連州取道東陂觀回藍山出江藍廳會剿禾洞之賊如各賊竄聚一隅則相機痛剿兩粵邊境或

可漸次廓清湖南防邊之費亦可少減惟張運  
蘭自奉檄赴郴時已據稟近患肝氣上逆之症  
請假三月調理適接越境進剿之札以事機所  
迫力疾從戎頃復接其連州來稟稱舊疾增劇  
飲食不進心神恍惚萬難支持懇請給假三月  
回籍調理臣以該員沈毅堅忍素習戎機今以  
積勞成疾不得不准其所請現札飭花翎都司  
張廣勝花翎同知劉生璫代領所部仍由東陂  
觀取道藍山錦田出連山廳邊境確探賊蹤出  
其不意痛與剿洗並調魏喻義一軍助之如此

股敗匪果悉數合併粵西諸賊則聚而殲旃較  
之分軍雕剿尚易爲力至此次由江西分竄廣  
東一股人數號稱十數萬卽石逆所屬之外五  
旗逆謀在由楚回竄江西經楚軍剿敗後復越  
境追剿兩保危城疊獲大捷兇燄頓衰在事文  
武弁勇實著微勞布政使銜卽選道張運蘭可  
否俟軍務告竣以道員由軍機處記名請

旨簡放卽選道王文瑞可否

賞給該員父母四品封典補用都司梁開國可否以  
遊擊歸部儘先推補陣亡之補用參將彭聲發

祁陽寶慶解圍案內擬保副將此次血戰捐軀  
實堪痛惜可否請

旨交部照副將例

賜卹其餘尤爲出力各文武弁勇可否由臣保

奏出自

天恩所有楚軍越境剿辦廣東賊匪疊獲大勝及現  
籌情形謹據實陳

奏伏乞

皇上聖鑒訓示施行謹

奏



咸豐九年十一月十七日拜發奉

硃批另有旨欽此

查參桂陽等縣失守文武摺

奏爲查明失守文武員弁恭摺參

奏以昭儆戒事竊照本年正月石逆達開自江西  
南安突竄湖南另股續由江西廣東邊境竄入  
楚境各州縣猝不及防被賊闖入比經臣將失  
守情形隨摺

奏報並聲明俟查明嚴叅欽奉

諭旨著查明參奏臣覆查石逆大股上年冬間陸續

由福建回竄江西陷南安府城其時並未接准  
江西移咨南安距湖南桂陽桂東邊界尚數百

里中隔嵯山近邊各州縣接隣省探報均指爲  
另股土匪臣比調記名總兵劉培元參將彭定  
太等帶練勇千數百名馳赴桂陽防堵並飭南  
路各屬重整團練以備不虞亦尚不知竄陷南  
安者卽石逆大股也嗣該逆於本年正月二十  
六日突竄桂陽邊隘防軍失利縣城遂陷由是  
宜章興甯兩縣郴州桂陽兩州均相繼不守賊  
方急趨永州以窺寶慶所失三縣兩州城池旋  
經該地方文武隨時收復其另股僞石國宗等  
續由宜章臨武新田各境闖入未嘗攻城其攻

藍山甯遠兩縣城池者復經該文武擊退乃由  
道州境趨永明而賊目何文彪時由廣西灌陽  
富川回竄江華江華永明兩縣亦相繼不守是  
湖南州縣所應查辦者桂陽興甯宜章江華永  
明五縣郴州桂陽兩州也臣維州縣失守定例  
綦嚴原以杜畏蕙逃避之漸此次石逆大股突  
竄湖南各州縣疎於偵探均誤以爲另股土匪  
失事之先各屬稟牘尙謂團勇足恃扼守邊隘  
保全或多迨大股狂奔壓境遂遽失守桂陽興  
甯宜章郴州四屬情形如出一轍桂陽州時方

考試文童聞警召集勇丁授兵登陣而賊之前  
隊已長驅逕抵城下倉卒召集之勇丁自難當  
大股颯忽之劇寇雖各州縣旋經收復城垣勦  
捕零匪彈壓土匪然功過未足相抵除署郴州  
知州胡鏞署桂楊州知州張濟遠已奉

旨革職查辦外應請

旨將失守之桂陽縣知縣董繼芳署桂陽營參將常  
明興甯縣知縣彭嗣昌署宜章縣知縣吳清鶴  
署宜章營參將徐萬陞署江華縣知縣林周培  
署永明縣知縣唐滔燦一併革職審辦以昭儆

戒所有各該員均經先後撤任其同城武弁佐雜教職容俟分別辦理臣忝任封疆未能思患預防咎無可辭應請

旨交部議處至郴州所屬之永興縣桂陽州所屬之嘉禾縣當巨賊狂竄時間均有匪徒乘機闖入旋卽潛遁之事容再確查具

奏其調赴桂陽防堵之記名總兵劉培元補用參將彭定太當賊竄桂陽之時接仗失利咎有應得惟劉培元臣派帶師船赴寶慶剿賊屢著戰功功過實足相抵現蒙

恩簡放浙江處州鎮總兵應請

旨免其議處彭定太平日打仗尙頗出力桂陽之敗  
委因眾寡懸殊應請

旨暫行革職仍留軍營差遣以觀後效是否有當謹  
恭摺具

奏伏乞

皇上訓示施行謹

奏

咸豐九年十一月十七日拜發奉

硃批另有旨欽此

彙保援黔官軍出力員弁及邊防文武捐

奏爲遵

旨併案核保並將攻克古州城池剿辦餘匪及邊防出力各員弁紳勇附列懇

恩獎勵事竊湖南援黔各軍自援剿黎平以來先後克復永從縣及剿辦黎平南路東南路苗寨復攻克金山寨收復錦屏適廣西賊首李文茂勾結古州賊首余老科圍撲黎平府城復經楚軍痛剿大獲勝仗立解重圍均經

臣先後

奏報七年八月二十四日八年十二月十一日兩



奉

上諭出力員弁兵勇著駱秉章查明保奏楚軍旋追  
賊古州本年正月二十二日副將田興恕道銜  
知府兆琛復各督所部攻克城池二月十一二  
十五等日痛剿撲城之賊均獲大勝適石逆由  
江西竄楚臣以湖南西路空虛飛調田興恕帶  
所部由古州拔營取道黎平靖州武岡以達寶  
慶聽候調遣而飭兆琛仍留古州黎平以清餘  
孽三月十七日剿扒王寨蒿之賊二十六日剿  
唐冷孖隆九歪觀音山之賊均獲勝仗大有擒

斬而黎平古州漸就安謐所有田興恕兆琛兩  
軍實在出力員弁兵勇均係兩次保案內應獎  
之人而楚邊各屬文武官紳兵勇或出境隨征  
或練團禦寇或採運軍米時閱三載著有微勞  
未便任其掩抑謹一併附入彙爲一案仰懇

皇上天恩加以甄叙以策後效而勵戎行於黔楚軍  
務不無小補所有彙案開單酌保緣由謹據實

陳

奏伏乞

皇上聖鑒訓示施行謹

奏

咸豐九年十一月十七日拜發奉

硃批另有旨欽此

援黔官軍克復鎮遠府衛兩城摺

奏爲楚軍剿辦黔賊疊次獲勝並攻復鎮遠府衛  
兩城現籌防剿情形

奏祈

聖鑒事竊黔省下游一帶苗匪教匪日肆披猖楚軍  
或留防黔境有警則捲甲星馳以赴戎機或越  
境雕勦事定則隨時撤歸以節糜費頻年以來  
幾無虛日其尋常調發固未敢一一上瀆

宸聰也自鎮遠府衛兩城失陷後苗匪教匪麇聚思  
州鎮遠接境各處而唐家營風崖谷定鶯嘴響

鼓五墩尤賊淵藪皆倚險爲巢互爲犄角力圖  
抗拒援師其踞府衛兩城者賊數時多時寡並  
無一定黔中無一旅之師過問致稽克復之期  
而援師不克五墩又斷不能直趨鎮遠蓋其地  
久經兵燹人民逃散田土皆荒逆苗固匿山崗  
時出剽掠賊食不能斷絕而官軍轉饋最艱復  
不能隨地採買若以饑軍深入重險賊以堅城  
拒我而從五墩旁襲其後殊難計及萬全此固  
限於地勢之無可如何者也五墩之地萬峯巔  
另一徑縈紆夙稱天險楚軍久屯其下難以仰

攻出隊雕剿時有利鈍惟帶勇各員弁及貴州糧道韓超署思州府知府陳岳霖彼此聯絡互相策應得以牽制賊勢杜其蔓延而楚軍之在思鎮各境者分而見單又適值石逆竄楚援黎平之師不得不調回防剿遂亦未遑遠畧黔賊聞楚有寇警方議傾巢出犯調補按察使留任辰永沅靖道翟誥稟請增兵協剿時石逆已屢經痛創喪膽狂奔臣調道銜知府兆琛率所部赴思鎮相機圍之八月初七八等日駐營思州境之管帶健勇花翎遊擊張萬書商同署思州

府知府陳岳霖調集團勇割刈唐家營風崖兩墩賊種禾稻十五夜初更張萬書與貴州千總曹克興各率所部及陳岳霖韓超所部各勇分四路銜枚急進直攻風崖賊墩抵墩賊始驚覺官軍斬其放哨者數賊大呼躍入噴筒火箭齊施四門火起賊棚數千次第著火官軍乘勢奮擊立斬賊首歐光美黃永年僞將軍陳大五毛添爵等二十餘名斃賊七八百其焚死墜崖死者無數二十三夜楚黔各營會攻唐家營賊墩乘夜縱火燒其墩外子營數座二十五日黎明

攻破賊墩擒斬甚衆九月十三四等日進攻谷  
定賊墩賊列隊迎拒經官軍擊敗回巢十六日  
楚黔各勇復會撲賊墩賊棄墩四竄官軍一面  
縱火焚巢一面追殺斃賊數百奪獲牛馬六七  
十匹鎗礮刀矛不記其數餘黨有逃赴鶯嘴者  
有棄械求撫者鶯嘴墩賊知風崖唐家營谷定  
均破亦遂棄墩而奔惟響鼓墩賊恃其地險人  
衆負嶠如故適管帶幹勇花翎同知吳自烈帶  
所部奉調馳至與花翎參將熊興栢花翎都司  
滕加洪花翎知府張由庚等連營菜花坪打羅



坪白果橋長安營船形地方緊逼賊墩二十一  
日賊復糾約鎮遠黑苗數千及鬼計寨苗並餘  
慶之上方下方等處教匪意圖出撲長吉雞寨  
會合響鼓墩賊下犯楚邊霍諾檄花翎都司周  
洪印馳赴思州會剿臣并飭催兆琛帶所部赴  
之適都坪之賊經張萬書吳自烈滕加洪張由  
庚等擊敗斃賊數百賊退響鼓墩黑苗因賊糧  
不繼亦退回鎮遠二十七日忽另股教匪二千  
餘自龍溪來墩助逆前隊甫至白蠟坳熊興柏  
滕家洪張由庚等出隊截剿斃紅衣賊目三人

殺賊數十賊遂卻退適張萬書吳自烈韓超等  
各派所部勇由左龍溝抄出來擊賊更不支官  
軍奮威衝殺斃賊七八百名餘賊仍遁回龍溪  
響鼓墩賊自風崖唐家營谷定鶯嘴四墩以次  
攻破已失犄角之勢復因外援敗潰黨夥離心  
求撫益急十月初一二等日墩中難民分赴楚  
黔各營籲懇免勦韓超陳岳霖等見其情詞懇  
切遂會同楚營各員弁計議於初九日入墩安  
撫點驗墩中男婦大小亡千五百餘名傳令雍  
髮歸園而思鎮五墩賊巢始一律肅清矣五墩

既清鎮遠府衛兩城踞城之賊聞風喪膽時花  
翎都司周洪印自靖州帶所部勇一千五百人  
先赴青溪霍誥卽飭其相機規取鎮遠二十一  
日進紮焦溪距鎮遠二十餘里適逆苗數百出  
掠擊敗之踞城之賊聞楚軍繼至紛紛散匿二  
十六日周洪印分所部爲三路直薄鎮遠先撲  
東關賊營賊敗潰額外田茂林等由東門入衛  
城擬保守備楊洪明等入府城兩城同時火起  
城外六賊營一併踏毀殺賊數百割獲首級三  
百七十一顆奪獲旗幟二十二面大礮一座指

鳥鎗三十七桿環視城市荒寂蒿萊長與人齊  
賊囤米糧已被焚燬軍中無糧可因又苦無從  
採購而城外苗寨林立順逆未分周洪印仍駐  
軍焦溪俟兆琛大軍繼至始可分別剿撫次第  
辦理現據兆琛稟報已率所部各營馳抵玉屏  
一面購運米糧進駐兩城分別剿撫以圖戡定  
實效此楚軍會剿黔賊克復五墩及鎮遠府衛  
兩城實在情形也惟黔省糜爛已極各府廳縣  
城池之已陷者久未克復已克復者亂民四起  
遍地皆然僅恃湖南裹糧從征隨時補救在湖

南固已疲累不堪在黔省究無了日臣尙不知所爲計也此次援黔之員弁兵勇頗有微勞可否由臣酌核彙案請保以示激勵之處出自天恩所有克復五墩及府衛兩城情形謹據實馳

奏伏乞

皇上聖鑒訓示施行謹

奏

咸豐九年十二月初六日拜發奉

硃批另有旨欽此

楚軍越境勦辦廣東禾洞賊匪擒斬首逆摺  
奏爲官軍越境勦辦廣東禾洞賊匪大獲勝仗擒  
斬首逆廣東連州連山一帶地方肅清恭摺馳  
奏仰祈

聖鑒事竊楚軍勦辦廣東連州賊匪疊獲大勝業經  
奏報在案前奏會聲明廣東連山縣屬禾洞地方  
有猥匪羅嘉誨一股久踞於彼與湖南江藍廳  
廣西賀縣邊界相距不遠臣已密飭花翎都司  
張廣勝花翎同知劉生璠由連州東陂觀取道  
湖南藍山錦田出廣東連山邊境出其不意勦

之惟時尙祇知踞禾洞以擾三省邊界者爲賊  
首羅嘉誨不料廣東積年稽誅賊首何觀保李  
榮淑之已敗竄合夥也花翎知府陳士杰旣會  
勦首逆何文彪一股殲除淨盡卽移軍駐江藍  
廳續剿羅嘉誨一股探報羅嘉誨及逆首何觀  
保等於連山禾洞上下門村一帶建木城六所  
逆首僞副元帥李榮淑踞李屋寨互爲犄角其  
通楚路徑均已掘斷十月二十一日賊出掠東  
安團陳士杰麾陳吉祥擊之斃賊三百餘陳士  
杰登山瞭望遙見禾洞蛇嶺太平柏廣鷄啼等

寨均有大股屯踞寨外密布竹籤餘隙間不容  
趾見楚軍至均伏匿不出官軍逼巢則穴牆開  
礮子落如雨陳士杰令收隊回營賊出隊來追  
官軍擊之敗退回巢二十二日賊自大竹園竄  
出亦經擊退二十四日官軍分由關亭劫金竹  
園進攻禾洞及門村亦均有擒斬然賊之負隅  
自若也二十六日張廣勝劉生璣帶湘勇三千  
五百人馳抵江藍廳二十八日各營潛約剋期  
會剿二十九日五鼓傳餐畢天氣晴霽宿霧盡  
收張廣勝督同花翎遊擊陳青雲參將文恒久



都司易開俊遊擊何本高由白石山安馬水口  
破卡而入與陳士杰所部會搗下門村賊仍固  
匿不出官軍以火具攻之是時花翎參將劉松  
山劉光明朱紹輝藍翎都司陳玉恒等由珠簾  
奪隘而入直搗上門村陳士杰與藍翎遊擊張  
義貴藍翎千總彭志易各率所部由金竹園林  
屋寨進兩路同時攻破卡隘各路會合奮威衝  
殺立將禾洞上下門村及各村寨賊巢一律焚  
燬淨盡計是役各路約共斃賊七八千奪獲統  
領大元帥等偽印三十餘顆馬騾五十餘匹大

小鎗砲三百餘桿大小旗幟二十餘件刀矛雜  
械無數賊屍遍野坑塹皆滿生擒首逆僞總統  
何觀保僞副元帥李榮淑僞都督葉亞烟僞指  
揮李石秀羅元財僞將軍李亞有曾亞八及小  
賊目等五十餘名餘匪五百餘名拔出難民男  
婦千餘名訊據生賊供稱逆首羅嘉誨亦已於  
下門村賊巢焚斃其餘各逆目惟僞旗帥范幹  
廷尙無確實下落餘則擒斬焚斃殆盡矣臣維  
逆首何觀保自二年以來從賊起事屢次擾掠  
廣東之連州陽山連山及廣西之賀縣懷集一

帶三省邊防日棘羅嘉誨本係廣東商民佔籍  
廣西賀縣頻年與土民構釁佯就招安陰懷異  
志攻陷賀縣之賊卽由其勾引而來今年石逆  
竄楚時該逆卽率賊黨由賀縣竄入勾引逆目  
何文彪肆擾湖南邊境實屬罪大惡極此次楚  
軍由連州凱旋復出其不意越境雕勦竟將積  
年巨寇迅速掃除實足以快人心而昭

天討現在廣東連州連山一帶境內已一律肅清所  
有此次出力員弁勇丁可否由臣核明彙入勦  
辦廣東賊匪案內一併請

獎之處出自

天恩謹據實馳

奏伏乞

聖上聖鑒訓示施行謹

奏

咸豐九年十二月初六日拜發奉

硃批另有旨欽此

御入道公下野

己未下

三

請建表忠祠求忠書院摺

奏爲遵

旨建立專祠並請建立表忠祠彙祀湖南先後死事  
諸臣建立求忠書院義塾訓課死事官紳兵勇  
子弟以勵忠義而裨風化事伏維湖南湖北向  
稱湖廣自

國朝康熙年間改偏沅巡撫設湖南巡撫以長沙  
爲省會別爲一省而後湖南之名始著南控兩  
粵西達川黔北接荆湖東連章貢幅員雖濶而  
物產不及中邦人文可觀而材武究遜邊地往

牒所載可考而知自廣西金田賊起江忠源以  
在籍知縣奉檄募帶新甯鄉勇隨同烏蘭泰剿  
賊而後有楚勇之名自咸豐二年賊由長沙北  
竄後羅澤南王鑫以文生奉檄募帶湘鄉團勇  
訓練而後有湘勇之名三年春塔齊布以候補  
遊擊署撫標中軍奉檄簡選撫標及長沙協標  
兵丁並選各屬勇丁訓練而後有湖南精兵及  
辰勇保勇之名嗣是選官紳士民之樸幹者爲  
營官各屬募鄉村農民自練自帶又或參調各  
營弁兵以資鈐束慎選各屬士紳以資襄助皆

量其質地才技用之七八年來內靖土匪外禦  
流賊並屢興援鄂援粵援江援黔之師莫不踴  
躍從戎奮勉圖報其轉戰他省者彼闕此補其  
效命疆場者父前子後統計湖南勇丁長夫出  
境從征者常不下十餘萬人而將領營官弁目  
以陣亡蒙

恩賜卹者且數千計勇丁長夫之陣亡物故者奚止  
數萬忠義之風照耀區宇此蓋我

國家二百餘年養士之報而

皇上於死事諸臣生前備極



褒榮歿後復

優加矜恤疊次

諭旨恩明誼美實足感頑懦而勵忠誠故血氣之倫  
莫不爭自摩勵求得一當以效涓埃而湖南遂  
得稍收其效於一時也江忠源塔齊布羅澤南  
王鑫李續賓亡故時均蒙

天恩允其建立專祠臣謹擇長沙城內東北隅古荷  
花池建立晉贈總督安徽巡撫

子諡忠烈江忠源湖南提督

子諡忠武塔齊布照巡撫例議卹布政使銜浙江甯

紹台道

予諡忠節羅澤南晉贈布政使銜照二品例議卹按  
察使銜記名道

予諡壯武王鑫晉贈總督幫辦安徽軍務巡撫銜浙  
江布政使

予諡忠武李續賓諸臣專祠因念諸臣部曲先後陣  
亡者實不乏人雖時有久暫之殊秩有高卑之  
別而同心殺賊効命捐軀忠義微忱未容軒輊  
除曾經

奏明禘祀各員外凡諸臣各部曲陣亡員弁兵勇

曾蒙

賜卹者伏懇

皇上天恩准其一律耐祀以慰幽魂又湖南用兵數載領兵帶勇各官紳如追贈提督湖北鄖陽鎮總兵瞿騰龍浙江提督鄧紹良候補副將周雲耀保升遊擊署臨武營叅將趙永年候補同知直隸州知州趙啓玉卽選知府劉騰鴻劉騰鶴追贈鹽運使銜運同丁銳義武陵縣訓導儲玖躬照縣丞例議卹從九品毛英勃照遊擊例議卹寶慶協都司武昌顯及水師各營將弁等或

在他省討賊捐軀或在本省力戰殞命斯皆英  
風浩氣凜凜如生大節固已無虧微勞況又足  
錄若任其掩抑日久必致泯沒無聞臣擬於諸  
臣專祠之旁別建表忠一祠彙祀湖南陣亡文  
武官紳而凡湖南之陣亡員弁兵勇曾蒙

賜卹者一律附祀以彰

聖世勸忠之典而慰此邦人士慕義之忱至死事諸  
臣及各員弁兵勇或蒙

恩賞卹

給予世職之榮或僅照例給支卹賞銀兩其後嗣有

入營食俸者有焚了無依者有力能延師訓課者有窮苦不能讀書者正恐斯時孤露過早能仕未教之忠異日門蔭相承入官或墜其緒亦非所以慰忠魂而成

聖化也謹擬於表忠祠側建立求忠書院一所凡陣亡員弁子弟有願入院讀書者成童以上延師課以經史試以策論其未成童者延師授之句讀而皆酌給膏伙筆墨以獎之冀其對廟貌而思先澤克紹家風因之承堂構而貽合名儲爲國用所有經費一切除由紳富捐助外臣與藩司

文格鹽道裕麟等悉心計議設法籌措銀數千兩即可葺工從茲椒醕列案足慰諸臣百戰之忠蘭芷升庭庶保君子五世之澤而我

皇上眷念忠良有加無已之意亦可少慰矣謹將建立專祠及請建表忠祠求忠書院各原由會同協辦大學士湖廣總督臣官文前任兵部侍郎臣曾國藩恭摺具

奏伏乞

皇上聖鑒訓示施行謹

奏

咸豐九年十二月初六日拜發奉

硃批另有旨欽此

湖南軍餉缺乏之黔餉請

勅部議摺

奏爲湖南軍餉缺乏恐誤協撥要需據實陳明請  
旨勅部核議事竊湖南一省每歲經入之數僅敷本  
省支銷歷少贏餘待撥之款自元年以來粵西  
賊起湖南首當兵衝自是防剿本省援剿鄰省  
迄無虛日近數年來用兵益繁餉項益絀地丁  
錢糧而外所恃以挹注者全賴本省釐稅及捐  
輸兩宗捐輸自二年以來至今搜括已遍釐稅  
雖竭力經理尚頗如常而來源既少抽數不能



求多亦地勢物情有以限之也自四年以來至今援鄰之師均係裹糧從征且時需隨時協濟鄰餉約計所費已不下六百餘萬兩而本省防剿之費不預焉本年正月石逆率賊數十萬由江西突竄湖南復大集師徒且防且剿閱五月有餘始克蕪寧復越境而追粵西之賊剿粵東之賊其援黔者田興恕兆琛兩軍由黎平古州調回事平仍先後調之赴黔而原調駐黔邊之印水及思州鎮遠邊境之軍則始終未撤也統計兵勇至七萬餘月餉至三十餘萬兩爲湖南

向來未有之事餉項艱難拮据不想可知臣於  
春間曾

奏撥四川協餉銀十萬兩并將湖廣商民捐輸銀  
兩全數催解僅准解過協餉二萬兩商民捐輸  
八萬兩

奏撥陝西協餉銀十萬兩僅准解過五萬兩

奏撥江西漕折銀二十萬兩僅准陸續解過十萬  
兩其計收過川陝江西三省協餉銀二十五萬  
兩寔不足供湖南一月之需臣以時艱同值未  
便過事催促每念

皇上宵旰焦勞部臣等畫良苦尤不敢以窘迫情形  
屢形奏牘不得已咨請在籍前通政司正使嚴  
正基前內閣學士禮部侍郎周玉麒前江西巡  
撫陳啓邁翰林院檢討童秀春主事徐棻員外  
郎李家驊內閣中書郭崑燾札飭卽用道前吉  
安府知府黃冕卽選道李概四川補用道陶枕  
道銜卽選知府黃廷瓚候選知府羅濤前河南  
開封府知府方宗鈞及各府縣紳士等隨同地  
方官勸諭商民竭力捐輸雖羣情踴躍輸將約  
書捐銀六七十餘萬兩而業經呈繳者則尚止

三十萬兩零蓋連年籌捐民力重困實亦力有不逮也計現在積欠各路勇餉八十餘萬兩地丁錢糧釐稅捐輸各入項隨到隨付軍需總局支放口糧及養傷賞卹各項此湖南經費出入大致及現在缺乏實在情形也迭次欽奉

寄諭湖南省欠解黔省兵餉軍餉各欸銀兩著迅速籌撥陸續解往以資接濟其劉長佑一軍餉銀奉諭按月支應毋誤要需臣查湖南援黔之餉截至上年年底止已八十七萬餘兩其製造器械籌解軍火以及本年支發勇糧採辦兵米價脚及辰

沅道隨時派撥援剿兵勇口糧尚不在內現在  
田興恕一軍飭令由黎平進剿兆琛一軍自克  
復鎮遠府衛兩城卽全軍移駐鎮遠代爲防剿  
而思鎮交界五賊壘克復後仍須留兵駐紮以  
資鎮壓計兵勇萬餘每月卽須餉銀五萬餘兩  
尚未知蕨事何時從前部撥協濟黔省軍餉銀  
五萬兩採買兵米銀十三萬一千一百九十八  
兩零己未年兵餉銀八萬兩不敷養廉銀三萬  
五千餘兩除已解過協餉銀三萬兩及陸續協  
濟貴州道員韓超軍餉銀三萬二千兩尚止未

解銀二十萬餘兩計現在田興恕兆珂兩軍數月月餉抵之有餘而從前援黔之餉百萬餘兩固不具論也可否仰懇

皇上天恩飭部核議嗣後湖南暫免再撥黔餉稍紓窘迫至蕭啓江劉長佑兩軍由湖南派援廣西追剿石逆蕭啓江一軍四千五百連長夫合其六千三百人現已回湘擬改由黔粵之交相機迎剿其半餉固應仍由湖南支應其劉長佑一軍合計勇丁餘丁長夫其一萬二千餘每月約需銀五萬數千餘兩截至十月底止已欠發銀

馬三良公奏請 己未下 上之  
九萬餘兩現在趕緊籌措尚無所出若以後仍  
如曹澍鍾咨奏全由湖南支應勢必貽悞無疑  
查廣西本省祇支應劉長佑蔣益澧兩軍地雖  
貧瘠較勝貴州復蒙

恩飭令廣東川陝協撥軍餉若仍指湖南代爲籌措  
實苦力不能勝可否仰懇

皇上天恩飭令曹澍鍾自本年十一月以後預爲籌  
畫以免貽悞如湖南積欠稍清臣自當相其緩  
急隨時接濟斷不忍藉詞推諉致煩

聖厯臣維兵勇錢糧皆

國家自有之財力以

國家之財力辦

國家之事畛域本無可分特就湖南現在缺乏情形言之若不據實預爲陳明將來或致貽悞臣咎更屬難辭所有協撥要需寔難籌措情形謹據實直陳伏乞

皇上聖鑒訓示施行謹

奏

咸豐九年十二月十五日拜發奉

硃批戶部速議具奏欽此



馬三思公奏議

己未下

四

蕭道一軍改道馳赴黔蜀之交摺

奏爲蕭啓江一軍已回抵湘潭現在奉到

寄諭謹擬飭令改道馳赴黔蜀之交相機迎剿以速  
戎機事竊臣於十二月初六日欽奉

寄諭據曹澍鍾奏酌撤蕭啓江一軍回鄂援皖等語  
九月二十二日逆匪竄撲懷遠鎮天河等處敗回  
羅城慶遠柳城一帶意欲奔黔窺伺川省蕭啓江  
一軍正與劉長佑由永福進兵會同剿辦雖經會  
國藩調回催令赴鄂惟廣西兵力較單仍著駱秉  
章曹澍鍾酌量情形是否堪以暫留並接濟兵餉

使其追剿石逆以固川省邊防欽此初九日又復  
欽奉

寄諭前因粵西逆匪圖由黔省窺蜀恐田興恕一軍  
不足以資扼截諭令駱秉章等酌留蕭啓江在粵  
追剿毋任賊蹤他竄本日據蔣蔚遠奏探聞首逆  
石達開現已竄入慶遠裏脅不下十餘萬自羅城  
至落墨渡連營二百餘里十月二十六日分股由  
六合墟渡河竄踞德勝逼近南丹意欲由黔入蜀  
請飭田興恕速行回黔由都勻一帶迎剿等語田  
興恕一軍前據駱秉章奏明俟探明黔中消息再

行前進現在賊匪欲由黔入川獨山荔波均形危  
急諒駱秉章已令進兵惟賊氛業已逼近著飭該  
副將星馳前往毋稍延緩至該逆人數眾多自應  
厚集兵力以資圍剿蕭啓江一軍前因曹澍鍾奏  
稱因楚中檄調急欲回軍曾降旨仍令暫留粵西  
昨據曾國藩奏稱並未調回湖北所有蕭啓江兵  
勇仍著駱秉章接濟兵餉由曹澍鍾飭赴慶遠一  
帶追剿石逆毋令蔓延川省以保完善之區欽此  
仰見我

皇上廑念巖疆思患預防至意臣查蕭啓江一軍四

千五百人前經臣飭援廣西省城桂林圍解後  
曹澍鍾留其在粵剿賊曾國藩調其回鄂援皖  
蓋均以兵力宜厚統將需才也蕭啓江既奉曹  
澍鍾酌撤赴鄂之檄遵即馳回因所部在粵傷  
亡數百又以不服水土染病物故者多行抵湘  
潭即暫留整理本月初四日單騎赴省稟見臣  
面詢粵西賊蹤據云石逆由義甯竄柳州時柳  
州賊固拒不納旋假道竄踞慶遠府城僞石國  
宗一股尙踞來賓縣此外土匪股數尙多難以  
悉數粵西土地荒蕪民物彫耗良民避賊結寨

山居士匪則倏聚倏散軍行所至不特採購維艱卽偵探亦難得的耗官軍現擬進攻柳州俟克柳州始可進圖慶遠旋即稟辭回湘潭臣奉到

諭旨比卽恭錄行知茲復欽奉

諭旨飭赴慶遠一帶追剿石逆毋令蔓延川省是蕭啓江一軍急應專注石逆不容稍緩蔣蔚遠旣稱十月二十六日賊已逼近南丹獨山荔波均形危急是貴州都勻一帶形勢迫切可知現已四十餘日賊蹤又竄至何處無從懸揣蕭啓江

一軍已回抵湘潭距廣西慶遠府二千五六百里卽令整理完竣星夜回赴粵西約計程期非五十餘日不能馳抵慶遠比至慶遠賊蹤又不  
知竄向何處誠恐賊蹤日遠一日官軍終無遇  
賊之期且由廣西追剿石逆必取道柳州柳州  
現爲另股所踞若與官軍相持不下官軍又不  
能越柳州而趨慶遠是柳州之賊代石逆受兵  
而石逆反得從容逸去終遂其入蜀本謀也以  
臣愚見度之石逆旣已逼近南丹則入黔之勢  
已決黔亂已久又本瘠苦之鄉非賊所戀其由

此窺蜀無疑蕭啓江一軍旣已抵湘似宜由甯鄉安化溆浦一帶取道沅州一面確探黔中消息如賊蹤未過都勻則由靖州赴黎平古州與田興恕會師橫出截之倘已過都勻或竄至平越甕安餘慶一帶則距四川邊界極近官軍若從黔境尾追反速其人蜀之勢蜀中承平已久營務廢弛咽喉匪所在充斥斷難期其力遏兇氛非調蕭啓江田興恕兩軍繞道赴蜀併力禦之賊或深入蜀境則土匪響應從亂如歸而患乃不可勝言矣臣非不知禦賊於廣西貴州卽所



以保固四川且可兼顧黔粵較之預防四川所  
全者多但以黔粵兵荒已久暗亂之士匪從逆  
之苗徭所在蜂屯蟻聚官軍此時既以討石逆  
爲急勢必不能節節分兵剿洗致滯兵機假使  
分兵剿洗不獨孤軍深入愈分愈單無以制賊  
且曠日持久師老餉竭意外之患更難設想又  
黔粵地方殘破過多採購鹽米極艱軍行難期  
迅速正恐黔粵未得客軍之益而四川先已受  
狡寇之害也且以大勢言之蜀境雄甲西陲地  
險民富天下常視以爲安危蜀境安則北而關

陝南而滇黔東而楚豫均可藉其屏蔽賴其轉輸倘稍有損失則滇黔粵西無可盼之餉荆湖無可籌之釐陝豫且有防不勝防之慮石逆前竄湖南注意寶慶者爲其可通鄂蜀臣之所以嚴扼寶慶截其旁竄者亦以其可通鄂蜀之故茲旣由粵窺黔將由黔以窺蜀官軍難於黔粵遏其奔衝則蜀中戒備自不得不嚴益加嚴以期慎密臣愚竊謂爲四川計蕭啓江田興恕兩軍人數尙止九千仍嫌單薄且恐其才足當一路而未足規畫全局可否仰懇

皇上速飭曾國藩從長計議如皖事暫尙可緩卽帶所部陸軍並酌帶水師數營赴蜀與署督臣曾望顏相機圖之四川如獲保全則兵力轉弱爲強餉源更裕滇黔亦可資其援剿之力西南兵事自有轉機至田興恕一軍自古州調回時人數僅止一千五百當經飭令加募足成四千五百人前追賊東安時臣慮石逆由粵西懷遠竄黔已飭帶所部全軍馳赴靖州嗣復飭其確探賊蹤相機進剿其月餉概由湖南籌給其蕭啓江一軍之餉每月由曾國藩籌給一半湖南籌

給一半今既改赴黔蜀之交擬湖南仍給半餉  
外咨四川督臣籌給一半將來入蜀卽由川省  
就近全數籌給以裕軍食而免轉運之煩所有  
籌酌情形謹據實覆陳是否有當伏乞

皇上訓示施行謹

奏

咸豐九年十二月十五日拜發奉

硃批另有旨欽此

楚辭卷之八

已未下

三

楚軍剿辦黔匪獲勝並飭田鎮由黎平進剿片  
再貴州黎平古州一帶自楚軍痛剿後餘賊震  
讐威稜不敢肆逞田興恕奉檄回軍寶慶時曾  
留參將成應洪一營五百人在黎平代爲防守  
兆琛亦留外委田宗榮彭蓋助等助之六洞逆  
苗梁姓聞楚軍方回剿石逆又分軍遠戍黎平  
意楚邊之備必虛妄圖由特洞襲攻靖州所屬  
之通道縣八月二十四日率賊黨三千餘由碕  
村江口竄擾特洞時兆琛所部全軍已經臣檄  
調由淑浦馳回靖州適得探報兆琛卽飭彭蓋

勛田宗榮藍翎訓導戈鑑經歷楊逢新等馳赴特洞扼之彭蓋勛田宗榮先至恰與賊遇卽與投誠軍功譚燦猷等分三路迎擊設伏山谷邀之賊不意楚軍突至相顧駭愕官軍三路衝殺立斃大旗賊目二名賊卽敗潰官軍乘勝追擊伏兵齊出兩面夾擊賊大敗走追十餘里至漂安地方始收隊回營計斃賊五百餘墜崖死者無數生擒賊目王友山龍丙限等九名適戈鑑楊逢新亦各帶所部續至二十五日擊賊雞窩寨陣斬僞將軍楊五僞先鋒姚起玉等斃賊三

百餘逆氛稍息及田興恕全軍抵靖兆琛卽遵  
調赴思州剿賊比五屯及鎮遠府衛兩城克復  
兆琛全軍進駐鎮遠臣卽催田興恕進駐黎平  
據稟永從六洞及古州屬高文八開俾幫各處  
尚均有賊嘯聚意圖勾引石逆牽制官軍擬將  
各股掃除以便一意截剿臣已飭其確探石逆  
動靜相機圖之矣所有楚軍剿賊黎平獲勝及  
田興恕全軍已飭速由黎平相機截剿原由理  
合附片陳明伏乞

皇上聖鑒訓示謹



奏

咸豐九年十二月十五日拜發奉

硃批知道了欽此

請留處州劉鎮差委片

再新授浙江處州鎮總兵劉培元前經臣派令募練水師赴寶慶助剿扼賊由水路北竄屢次截剿出力旋因寶慶事竣調回省河該員現蒙恩命補授今職應

陞見後卽赴新任惟湖南水軍統帶需才一時接替乏人可否仰懇

皇上天恩暫將該員留於湖南數月以資臂助之處伏候

聖鑒訓示謹

奏

咸豐九年十二月十五日拜發奉

硃批另有旨欽此

皖賊上犯請調蕭道全軍改道援皖固鄂摺  
奏爲皖賊上犯急須策應請調蕭啓江全軍改道  
援皖固鄂以顧全局恭摺馳

奏仰祈

聖鑒事竊蕭啓江一軍回抵湘潭擬飭令改道赴黔  
蜀之交相機截剿以保川省完善之區經臣馳  
奏正月初八日欽奉

寄諭著照准所議辦理至該撫請飭曾國藩從長計  
議酌帶水陸官軍赴蜀等語現在四川省業已收  
復筠連等三縣敘郡亦已解圍情形稍緩皖省軍

務正當喫緊會國藩現須統師東下以顧全局勢不能再令赴蜀欽此同日接會國藩上年除夕宿松大營來札太湖多鮑蔣三軍於臘月十六日移駐小池驛龍家涼亭等處二十二日一戰官軍先大勝而後小挫三軍傷亡約共一千三百人二十四六等日賊圍鮑超左營二十八九等日五營均被賊眾包圍文報不通者三日多隆阿蔣凝學等皆以力薄不能救應情形危急之至所部萬人已派八千六百人進圍太湖兼顧鄂邊勢難分軍策應明知蕭啓江全軍將赴黔

蜀之交張運蘭恙假未滿所部遠在江華均難  
應急然鄂軍無後繼前敵若有疏虞大局不堪  
設想請設法援應等情復准督臣官文及曾國  
藩咨稱皖北粵捻各匪麇聚潛山一帶悉力上  
犯此閒軍事迫不及待飛調記名道張運蘭帶  
所部老湘營卽日拔營馳赴宿松聽候調遣前  
來臣惟張運蘭一軍僅二千五百人自越境勦  
廣東連州三江城賊後張運蘭因病勢增劇稟  
懇給假三月回里調養經臣批准並飭都司張  
廣勝花翎同知劉生璫權領其衆由連州東坡

觀旋師復由江藍廳出境雕勦禾洞股匪粵東  
連州連山境內甫就肅清上年臘月忽接廣西  
撫臣飛咨石逆自慶遠分股由慶遠趨柳州南  
路翻山竄越藤縣昭平等處平樂喫緊請調楚  
軍援勦旋接江華永明及各營稟報逆賊數萬  
已由富川竄入楚境張廣勝劉生璫截之牛角  
灣追之水口均獲勝仗賊知楚邊有備卽由嶺  
東折竄廣西桂嶺並探稱此股賊眾係石逆所  
屬之中三旗中二旗及左五旗逆首係僞欽天  
豫譚姓及傅忠信等賊謀由廣東湖南邊界回

竄江西後路有大股續至與否尙未可知臣維石逆之敗竄廣西非其本志不由黔窺蜀則由湖南廣東邊界回竄江西臣前此曾經

奏明當楚軍追賊入粵入黔之時臣分布各營於道州江華藍山臨武宜章邊隘並越境追剿廣東連州連山之賊亦正所以斷其勾結而嚴遏其奔衝也茲石逆果分股驟來倘前途無阻則慶遠大股難保其不源源而至就現在南路所有兵力分布防剿已嫌單薄更何能分調赴鄂以致顧彼失此且張運蘭病尙未痊所部老湘



營勇丁二千五百爲數甚單遠在江華藍山之  
交距長沙千有餘里皖北粵捻各匪旣大舉上  
犯鄂軍數萬尙慮疎虞又豈二千里外一旅之  
師所能救應再四思維現在四川本省情形稍  
鬆而石逆又方分股回竄楚粵是局勢較之從  
前已覺有異蕭啓江前擬赴黔蜀之交慮所部  
兵力尙單面懇增募一千五百人合成六千之  
數臣比令其尅期募練以便啓行已據稟報由  
水路赴常德陸路趨沅州相機前進連日北風  
舟行遲滯計此時尙未渡湖不如飭令改道趨

鄂以赴戎機在湖北得蕭啓江全軍六千前往  
協助自可固鄂以圖皖在湖南留張運蘭一軍  
二千五百人駐邊協助亦可固湘以控粵且彼  
此程途徑捷各有攸宜似於軍務情形不無小  
補倘後此皖鄂軍務稍緩四川情形復急卽懇  
勅下曾國藩令其速催蕭啓江全軍由荆宜入川亦  
可不至貽悞曾國藩久歷戎行素知大局自當  
權其緩急妥爲籌辦軍情瞬息千變貴在相機  
立應實未可稍形拘執臣謹就一得之愚據實  
上陳伏乞

皇朝通志  
卷一百一十五  
禮儀  
皇帝  
三  
皇上聖鑒訓示施行謹

奏

咸豐十年正月

日拜發

皇  
上  
聖  
鑒  
訓  
示  
施  
行  
謹

奏

咸  
豐  
十  
年  
正  
月

日  
拜  
發